









**HORÆ SUBSECIVÆ  
MARBURGENSES**

*ANNI M DCC XXXI,  
QUIBUS*

**PHILOSOPHIA**

AD

**PUBLICAM**

**PRIVATAMQVE UTILITATEM  
APTATUR.**

---

*AUTORE*

**CHRISTIANO WOLFIO,**

POTENT. SUECORUM REGI, HASSIÆ  
LANDGRAVIO, A CONSILIIS REGIMINIS, MA-  
THEMATUM AC PHILOSOPHIÆ PROFESSORE PRIMARIO,  
IN ACADEMIA MARBURGENSI, PROFESSORE PETROPOLI-  
TANO HONORARIO, ACADEMIÆ REGIÆ SCIENTIA-  
RUM PARISIÆ SOCIETATUMQVE REGIARUM  
BRITANNICÆ ET BORUSSICÆ  
SODALI.


---

**TRIMESTRE BRUMALE.**

---

FRANCOFURTI & LIPSIAE, M D C C C X X X I.

PROSTAT IN OFFICINA RENGIERIANA.



RECEIVED  
MAY 11 1911

MAY 11 1911

RECEIVED  
J. T. TAYLOR

RECEIVED

RECEIVED  
MAY 11 1911

RECEIVED  
MAY 11 1911



ILLUSTRISSIMO ATQVE EXCELLENTIS-  
SIMO

DOMINO,  
DN. JOHANNI  
FRIDERICO,  
L. B. a STAIN,  
POTENTISSIMI SVECORVM  
REGIS,  
HASSIÆ LANDGRAVII,  
MINISTRO STATVS INTIMO,  
REGIMINIS PRÆSIDI,  
ACADEMIARUM SUPREMO CU-  
RATORI,  
EQUITI S. HUBERTI  
ET  
DYNASTÆ IN MÛLHUSA AD A-  
NISUM,  
DOMINO SUO GRATIOSO  
FELICITATEM PERPETUAM!

ILLUSTRISSE  
ATQUE  
EXCELLENTISSE DO-  
MINE,

**C**Um veritas tum de-  
mum voluntatem  
moveat, ubi convi-  
ctum tenet animum; omni-  
bus profecto viribus in i-  
annitendum erat, ut de  
Etr

Arinæ humano generi utiles ad veritatem liquidam perducerentur. Dudum exemplo suo docuere Mathematici, veritatem doctrinarum, si ab experientia discefferis, cui tamen promiscue omnes non subesse constat, perspicui non posse, quantum ad convictionem plenariam sufficit, nisi ea methodo in ordinem digerantur, quam longo atque continuo usu ipsi sibi quasi propriam fecere. Optandum itaque erat, ut in tradendis disciplinis accurata methodo uterentur,

X 3



## DEDICATIO.

---

tur, qui juvenum animos doctrina solida imbuere & ad ministerium Ecclesiæ ac Reip. præparare debent. Quoniam fieri haud quamquam potest, ut Facultatum superiorum, quas vulgo dicimus, Doctores ad eam evidentiam perducant dogmata, quæ absque rationum extrinsecarum suppetiis sola assensum firmum atque immotum præstat & mentem plena luce perfundit, ut veritati absque pudore resisti non possit, antequam philosophia Mathematicam imitetur, ut a Logica

ca

## DEDICATIO.

---

cæ tribunali non amplius,  
abhorreere teneatur; ego  
quoque a prima juventute  
omnes ingenii nervos in  
id intendi, ut accuratam  
methodum ad philosophi-  
am enodandam transfer-  
rem. Nullus dubito, Vir  
illustrissime, quin Tibi pla-  
ceat institutum, quod ju-  
dicio virorum in Rep. lite-  
raria doctrina singulari emi-  
nentium probari expertus  
sum ac indies experior.  
Quemadmodum enim in  
rebus gerendis haud facile  
parem, superiorem nemi-  
nem habes, ita quoque tan-

## DEDICATIO.

---

ta eruditione fulges ut eorum numero sis, quorum Protectorem ac Mecænatem Te præbes. Quamobrem cum in his ipsis Horis subsecivis non modo doceam, quomodo mea philosophandi ratio in Facultates superiores influere possit; verum etiam speciminibus dictis fidem faciam; eas in conspectum Tuum proferre audeo. Quas igitur humillima mente offero, eas ut vultu, quem Tibi proprium prædicant omnes, gratioso respicias rogo. Feli-  
cem



## DEDICATIO.

---

cem sese prædicat Hassia, quod  
a consiliis Tuis pendeat ipsius salus.  
Felicem sese prædicat Academia  
Marburgensis, quod Tibi ejus cu-  
ra fuerit demandata. Felicem de-  
nique me prædico & ego, quod Te  
Protectore ac Patrono frui detur.  
At Deus T. O. M. Te, VIR ILLU-  
STRISIME, esse jubeat felicem!  
felicem esse jubeat familiam splen-  
didissimam! Ita vovet

ILLUSTRISIMI ATQVE EXCEL-  
LENTISSIMI

NOMINIS TUI

Marburgi Cattorum  
d. 25. Sept. 1734.

*Cultor devotissimus*

Christianus Wolfius.



## PRÆFATIO.

LECTORI BENEVOLO SALVTEM!

**V**aria sese haftenus mihi  
obicere obstacula, quo-  
minus Horas subsceivas  
continuarè minime potue-  
rim, quibus recensendis nunc qui-  
dem supersedeo. Cum vero com-  
plu-

## *PRÆFATIO.*

---

plures me fuerint hortati, ut eas continuarem; ad utilitatem aliorum promovendam pronus facile me adduci passus sum; speroque fore ut, impedimentis quibusdam sublatis, quæ desiderantur, suppleam. Tanta autem maiore voluptate ad laborem aliquandiu intermissum redeo, quod magis in dies veritatem ac utilitatem philosophiæ nostræ perspicere intelligam, Dei causam justam contra invidorum malitiosa molimina defendente. Sane singularia prorsus hujus providentiæ divinæ specialis documenta venerabunda in Numen optimum mente deprædicaui, cum  
nuper

nuper Phychologiam rationalem  
in publicum proferrem, in qua con-  
tinentur illæ theoriæ, quæ in per-  
versum sensum detortæ adversariis  
calumniandi & criminandi ansam  
dedere; Quæ ibidem legi possunt,  
hic non repeto, nec addo plura,  
quæ addi poterunt. Erit enim di-  
es, qua in lucem proferentur o-  
mnia, quæ ut æternis tenebris se-  
peliantur optant adversarii treme-  
bundi. Equidem novam calu-  
mniandi viam ingrediuntur in an-  
gustiis constituti, inepte admodum  
aliis persuadere nitentes, me alia o-  
lim Halæ docuisse, alia scripsisse:  
cum vero plures passim vivant viri  
docti

## PRÆFATIO.

---

docti atque ingenui, qui lectionibus meis interfuerunt, non dubito fore aliquos, qui publicum veritati testimonium dare non de-  
rectabunt, quamvis nihil absurdi-  
us fingi possit, quam libros demon-  
strativa methodo conscriptos con-  
trario sensu interpretari velle. Sin-  
guli enim definiuntur termini &  
significatus eorum tenaciter serva-  
tur, immo inde prima demon-  
strandi principia petuntur, ut tale  
quid moliri idem sit ac insanire.  
Si quis principiis meis dicatur abu-  
sus, mihi nullo jure imputatur.  
Eaquis enim est qui nesciat, non  
desse plurimos, qui ipsis oracu-  
lis

lis divinis abutuntur? Primum locum in Horis Subsecivis, quas nunc in publicum profero, occupat dissertatio de influxu philosophiæ nostræ in Facultates superiores, Theologiam, Jurisprudentiam & Medicinam. Nihil diximus, quod sit a veritate alienum. Dedimus jam in Horis subsecivis annorum præcedentium aliquot specimina, quæ dictis fidem faciunt, & plura dabimus in posterum, ut aliorum conatus exemplis juvetur; exemplorum enim magna vis est; ut recte omnino dixerit SENECA iter longum esse per præcepta, breve per exempla.

Quod



Quodsi non defuerint, qui istis excitati methodum accuratam in potestatem suam redigant, & notionibus, quas in philosophia explicamus, animum imbuant; ipso opere experientur, me de influxu philosophiæ in Facultates superiores differentem ipsorum expectationem minime fefellisse, modo semetipsos non fallant, ut plus de facultatibus suis sperantes quam in iis est, nondum satis præparati ad rem arduam accedant: neque enim putandum est rem arduam brevi negotio confici posse. Quamvis vero non præcipitato nimium gradu præperan-

perandum; cavendum tamen quoque erit, ne nodum in scirpo quærant, quemadmodum facere solent, qui methodo pueriliter abutentes carpunt, quod offendere nequit nisi tyronem. Sua enim scrupulositate, qua sibi solis placent, non facient nisi ut progressuri retrogrediantur & doctrinam solidam in contemptum adducant. Dabam Marburgi Cattorum d. 25. Septembris A. O. R. 1734.

HORÆ SUBSECIVÆ  
 MARBURGENSES

Anni MDCCXXXI.

Trimestre Brumale.

I.

*De influxu philosophiæ Autoris in Facultates superiores.*

§. I.

Qui in Academiis operam navare <sup>Ratio in-</sup>  
 solent studiis, philosophiam <sup>stanti.</sup>  
 potissimum in usum Faculta-  
 tum superiorum addiscunt, etsi alibi  
 (a) ostenderim, eam quoque per se  
 addiscendam esse ob utilitates, quas  
 spondet sui cultoribus a Facultatibus  
 superioribus non expectandas. Quam-  
 obrem ubi novi quid in philosophia  
 quis molitur, prima statim incidit quæ-  
 stio, num id conducatur facultatibus su-  
 perioribus, an vero iis inde imminuat  
 aliquod periculum. Non igitur miror,  
 A ean-

(a) Trim. autumn. Hor. subsec. Anno  
 1729. n. III.

eandem quaestionem de nostro quoque in philosophia reformanda ausu fuisse motam, aliis inutilitatem in Facultatibus superioribus temere accusantibus, aliis vero verentibus ne forsan quid periculi Facultatibus istis immineat. Equidem cum habitum philosophiae ad publicam privatamque utilitatem aptandae delinearem (b), ea jam tradidi, unde influxus philosophiae nostrae in Facultates superiores deduci poterat & in Horis hisce subsecivis, id imprimi ago, ut exemplis doceam, qualem habere possint; ne tamen deessem nonnullorum desiderio, eundem ex instituto declarandum esse duxi.

## §. 2.

*In quo-  
nam phi-  
losophia  
Auctoris  
ab omni  
reliqua  
differat.*

Philosophia nostra methodo potissimum differt ab omni reliqua. Ea enim ad leges methodi demonstrativae componimus, non admittentes vocabula nisi accurate definita, & significatum semel constitutum sanctissime custodientes, ne vel latum unguem eadem discedatur, nec recipientes tamquam verum, quod ex definitione

ligitur, nisi realitate ejus evicta, ac præterea propositionem ita determinantes, ut ex iis, quæ in notione subjecti sumuntur, colligatur prædicatum. Uno dicam verbo, quid moliar: Quæ in philosophia doceri debent, ad notiones determinatas revoco, earumque veritatem, quantum datur, a priori demonstro, continua veritatum universalium concatenatione. Si cui hæc obscuriora videntur, quam ut ea intelligere possit; is opera nostra philosophica, quæ prostant, & in posterum a nobis, si Deus voluerit, in publicum proferentur, cum operibus Philosophorum aliorum conferat, & quænam sit differentia philosophiæ nostræ a philosophia ceterorum abunde perspiciet, modo ad talia dijudicanda sufficiente acumine fuerit instructus. Equidem *Cartesio* propositum erat hac methodo philosophari, ut non admitteret nisi sufficienter explicatum & probatum omniæque in concatenatam seriem redigeret; sed quanto adhuc intervallo distet ab ea, quam nos sequimur, methodo, præclaro exemplo dubitationis universalis doceri potest in limine statim Principio.

piorum propositæ, ubi nostra metho-  
do ad notionem determinatam revo-  
catur, quemadmodum alibi (c) feci-  
mus. Erunt enim plurimi, qui no-  
tionem determinatam verbis philoso-  
phi vix convenientem agnoscent, præ-  
sertim ubi vulgari interpretatione præ-  
judicium hauserint, etsi demonstra-  
tiva ratione ex contextu probari pos-  
sit, vim inferri philosopho, ubi men-  
tem ejus interpretari aliter volueris.

## §. 3.

*Quarta  
casit.*

Non vero est ut præcipitato judicio  
tibi persuadeas, differentiam hanc, quæ  
in sola methodo consistit, esse exigua  
admodum momenti, adeoque merito  
contemnendam: id enim demum va-  
leret, si methodum scholæ, quam ap-  
pello (d), variare non absimilis ei  
qui eadem fercula alio ordine in ta-  
bula digereret. Aliter prorsus sese re-  
habet, ubi scholæ ordinem in ordinem  
naturalem convertis: tum enim quæ  
sunt eadem non amplius eadem man-  
nent, nec eadem repeti possunt, n

(c) not. §. 245. Log.

(d) §. 829. Log.

plurimis novis interspersis. Notiones distinctæ & determinatæ, quas solas agnoscit nostra philosophia, cum notionibus confusis ac vagis, quæ ubivis regnant, immo evolutæ cum inevolutis eadem non sunt etsi ejusdem objecti: determinatæ enim notiones a vagis magis abeunt, quam corpus integrum a mutilo & evolutæ ab inevolutis magis dissident, quam fœtus perfectus ab embryone. Immo notiones determinatæ in systema veri nominis redactæ a vagis inter se non concatenatis, sed communi discursu expositis magis differunt, quam corpus humanum vivum a sceletō. Quamobrem si nostro more philosophentur homines, a philosophia expectare licet, quæ alias frustra ab eadem desideraveris. Veritas, quæ dubitationibus ac disceptationibus obnoxia, nunc plena luce perfusa agnoscitur & ab eo, quod veritatem mentitur, distinguitur. Agnita efficitur utilis & fecunda. Una prodit dogmatum concordia, una consequentia, contradictoriis in perpetuum exilium missis. Quænam hinc redundant in genus humanum utilitates, & quam ve-



rum intelligatur illud *Ciceronis*, philosophia nihil melius a Deo immortalī humano generi datum esse, ubi nostro more philosopheris, in præsentī nostrum non est exponere uberius. Sufficit unumquemque, qui nostræ philosophiæ dulcedinem expertus est, mutato veluti sapore notiones confusas & vagas sine ullo ordine digestas nauseare: id quod in accusationem converterunt alii, quasi nostra philosophia inaudito more cum universali aliorum contemptu propagetur, mirantibus aliis, quam arte in devinciendis discipulorum animis uterer, quos mihi non vulgari modo addictos experiebantur. Quodsi ars æsores habeat ignorantes, cum ignorantibus principia mihi disputandum non est. Proponantur enim, quæ doceri debent alios, ea methodo, quam philosophiæ unam convenire dudum evici (e), ipsique tyrones, modo cupidum discendi afferant animum, nemine monente in se ipsis experientur, duo cum dicunt idem, non esse idem, neque adeo opus erit verbis

(e) §. 115. & seqq. Discurs. prælim.

ubi rerum testimonia adsunt. Et quamvis nostro more veritas nuda in conspectum producat; cum tamen nativam habeat pulchritudinem, qua intimius eam perspicientibus sese commendat, externo ornatu non indiget ut placeat, præsertim cum perspicacioribus manifestum sit, externum ornatum tanquam alienum haud parum obesce, ne ipsa agnoscatur.

§. 4.

Philosophia in Facultates superiores influit, quatenus iis suppeditat principia ad dogmata explicanda & stabilienda. Enimvero philosophia nostra id singulare habet, quod etiam suppeditet ideam dogmata superiorum Facultatum in systemata veri nominis non sine ingente utilitate redigendi & conferat subsidia, sive quibus tam arduum opus absolvi nequit. Etenim qui in philosophia nostra diu multumque versatur, ejus animo sese ingenerat idea exemplaris tum systematis, quod nomen suum tueri potest, tum methodi scientificæ ad dogmata quælibet applicandæ, ut verum eorum systema condi possit. Et quoniam ha-

*Quotum-  
plici mo-  
do philo-  
sophia  
Auctoris  
in Facul-  
tates su-  
periores  
influit.*

bitus applicandi regulas methodi scientificæ non nisi multo exercitio acquiritur, philosophiæ vero nostræ tractatio continuam illarum regularum applicationem requirit, ut adeo in istiusmodi exercitio consistat, quale habitus comparandus postulat, nobisque præterea in more positum est singularia methodi annotare, ubi exempla occurrunt; nullo modo dubitari potest, quin philosophiam nostram sedula manu versans tam præclaro habitu potiatur. Enimvero non unicum hoc est subsidium, quod philosophia nostra ad dogmata superiorum Facultatum in systemata redigenda confert; verum alia adhuc supersunt. Definitiones, quibus in Facultatibus superioribus locus est, tum demum eam claritatem consequuntur, quam methodus scientifica exigit, ubi in definitiones philosophicas accuratas resolvuntur: id quod ex legibus methodi manifestum suppono. Jam vero nos in philosophia nostra id molimur, ut definitiones exhibeamus, quæ continuo in alias resolvuntur, donec non assumantur, nisi quæ absque definitione assumpta nihil prorsus obscuri-

scuritatis relinquunt : a prima enim philosophia, quam Ontologiam vulgo vocant, exorsi cetera inde omnia deducimus continua a se invicem dependentia. Præterea in stabiliendo terminorum significatu non solum usus loquendi rationem habemus; verum etiam id agimus, ut commode in definitionibus Facultatum superiorum supponi possit. Nostræ adeo definitiones lucem affundunt definitionibus superiorum Facultatum, ut & penitus perspiciantur, & multo fiant fecundiores. Probationes dogmatum in Facultatibus superioribus tum demum eam evidentiam nanciscuntur, quæ ad convincendum animum sufficiunt, ut immoto assensu veritatem amplectantur, ubi principia evidentia ex philosophia petuntur, sine quibus evolutio ratiociniorum ad evidentiam necessaria non subsistit. Enimvero deest principis evidentia, qualem veri nominis convictio requirit, si alio more, quam nostro philosopheris. Quamobrem tum demum spes quædam superest fore, ut Facultates superiores a tanto, qui in iisdem regnat, dissensu liberentur,

A s                      quan-

quando cum disciplinis philosophicis inter se legitime concatenatis & ipsæ concatenabuntur: id quod aliter fieri non potest, quam ubi philosophia ad methodum scientificam exacta Facultates quoque superiores ejusdem methodi opem implorent.

§. 5.

*An influxus iste noxius sit.*

Absit autem ut verearis ne forsitan hic philosophiæ in Facultates superiores influxus sit noxius. Si enim methodus scientifica ad Facultates superiores transfertur & notionibus philosophicis ejusdem auxilio evolutis lux iisdem affunditur, quam prorsus inexpectatam haud immerito dixeris, non nova conduntur dogmata, sed antiqua subsistit veritas; hæc vero tantummodo magis in aprium protrahitur, ut intimius perspici & ab errore citra ullam hæsitacionem separari possit, & errori ex adverso omnis detrahatur, quam habet, species, ne forma mendaci blandiens amplius imponat. Liberantur systemata ab opinionibus sibi invicem adversis, cum contradictiones latentes fi-  
ant manifestæ, veritatibus quippe non nisi cum veritatibus, erroribus autem non-

nonnisi erroribus connectendis. Omnis nimirum ex Facultatibus superioribus, quemadmodum ex philosophia expellitur obscuritas, ut non occurrat, nisi quod explicari possit donec sufficienter intelligatur; tolluntur penitus omnes difficultates, quæ intellectum ab assensu avertunt, vel ad vacillandum inducunt; evanescit omnis dogmatum repugnantia: succedit plena claritas, quæ ad notiones distinctas & quantum necesse est in quolibet casu adequatas efficiendas sufficit; omnimoda evidentia, qua ad assensum immotum præstandum opus est; una tandem concordia & consequentia, qua veritatum a se invicem dependentia conspicua evadit & rationis lumen mirifice augeatur. Si quis fuerit, qui hinc periculum quoddam Facultatibus superioribus imminere opinatur, is ignoret necesse est constantes discentium aliorumque querelas, quod in Facultatibus etiam superioribus occurrant, quæ non sufficienter explicantur, ut intelligi possint; quod probationibus ea defuit evidentia, quæ ad assensum compellit, ut appetitus in eundem influens firmi-

firmitatem admodum infirmam largiri debeat; quod denique concordia dogmatum adeo lateat, ut repugnantia habeantur pro concordibus.

*An sit  
possibilis.*

§. 6. Enimvero non deerunt alii, qui influxus istius utilitatem facile prospicient atque suspicient; sed subdubitabunt, utrum fieri possit, nec ne, ut nostrum philosophandi morem imitentur Doctores Facultatum superiorum ac principis nostris in rem suam utantur. Sed dubitatio ipsorum nullo nititur fundamento. Nimirum quæritur, quo ordine dogmata proponi debeant, ut certam eorum cognitionem acquiramus. Finis hic idem est, quem nobis in tradenda philosophia præfiximus. Idem finis eadem requirit media. Quamobrem cum ostenderimus (f), in philosophia certam rerum, de quibus ea agit, cognitionem acquiri minime posse, nisi scientifica tradatur methodo, quæ Mathematicis, præsertim Geometris veteribus arrisit; quin eadem methodo utendum quoque sit in

Facul-

(f) in Disc. prælim. c. 4.



Facultatibus superioribus, ubi certam eorum cognitionem desideres, quæ ibi docentur, dubitari nequit. Nimirum si in Facultatibus quoque superioribus intelligi debent, quæ docentur, non utendum est terminis, nisi explicatis. Cumque termini, quibus utuntur, non esse debeant sine mente soni, necesse est ut explicari possint. Dari adeo possunt definitiones accuratæ, quibus significatus illorum determinatur. Et quia ea, quæ definitionem ingrediuntur, vel ex philosophia intelligi, vel per alias definitiones explicari possunt, quoniam alias termini, quibus utuntur, in Facultatibus superioribus non denotarent res, sed chimeras, quibus nulla notio respondet; ideo fieri etiam potest, ut definitiones eo disponantur ordine, ut termini definitiones sequentes ingredientibus explicentur per antecedentes, cumque nos ea, quæ ad philosophiam spectant, definiverimus, per nostras definitiones lux affundatur definitionibus in superioribus Facultatibus, ne quicquam in iis intelligendis obscuritatis sit residuum. Similiter si in Facultatibus quoque superioribus certo assensu

com-

complecti debeamus dogmata, quæ proponuntur, perinde ac in philosophia demonstrari debent, utque demonstrari possint, perinde ac in philosophia conditio accurate determinanda, sub qua prædicatum subjecto convenit, seu sub qua aliquid de realiqua affirmatur, vel negatur. Quoniam vera non est propositio, nisi quatenus prædicatum per notionem subjecti, seu per ea, quæ de subjecto sumuntur, determinabile (g), quin dogmata Facultatum superiorum, si vera sint, ad propositiones determinatas reduci possint, quales in philosophia assumamus, dubium nullum superest. Qui demonstrationum indolem animo rite conceperunt, qualem exemplis luculentis alibi (h) illustravimus, abunde perspiciunt propositionem non esse demonstrabilem, nisi quatenus prædicatum per notionem subjecti determinatur, adeoque ipsamet determinata est. Quamobrem cum in Facultatibus superioribus dogmata ad propositionem

---

(g) §. 513. *Log.*

(h) §. 551. & seqq. *Log.*

tiones determinatas reduci possint; quod eadem demonstrabilia sint, extra omnem controversiam aleam positum est. Ad demonstrationes requiruntur principia vel insita, vel aliunde petenda. Quamobrem si propositiones in Facultatibus superioribus, ad quas revocantur dogmata, sint demonstrabiles, eadem quoque ita collocari possunt, ut præcedentes inserviant demonstrandis sequentibus, cumque nos in philosophia propositiones certis demonstrationibus muniamus, inde peti possunt, quæ aliunde petenda sunt principia. Atque ita abunde patet, Facultatibus superioribus & convenire methodum, qua nos philosophiam tradere cœpimus, & principia ex philosophia nostra peti posse tum ad lucem affundendum dogmatis Facultatum superiorum, tum ad veritatem ipsorum stabiliendam. Philosophia igitur nostra eo, quem diximus modo, in Facultates superiores influere potest. Immo nulli dubitamus fore, ut etiam actu influat. Passim enim reperiuntur jam viri eruditi, qui non modo methodum, qua philosophamur,

mur, in Facultatibus superioribus, quamvis nondum omnes eodem successu, imitari conantur, sed nostris quoque principiis in dilucidandis & evincendis dogmatis Facultatum superiorum utuntur. Exempla non addimus, cum nemo nisi sua culpa ignoret, quæ hodie in orbe erudito gerantur. Cumque non adeo facile sit methodi demonstrativæ leges præsertim in integris disciplinis observare, siquidem non in iis acquiescere velis, quæ externam saltem speciem mentiuntur, neque nos adhuc ea tradiderimus omnia, quæ usui esse poterant &, si Deo visum fuerit, in posterum adhuc trademus; non vana spe lætamur, fore ut in posterum philosophia nostra magis influat in Facultates superiores, quam quidem præsentis rerum itatu fieri potest. Immo prævident hoc alii, & utilitatem ingenus humanum hinc redundaturam prospicientes in vota erumpunt, ut adsit illa dies, qua eruditi magis veritati detegendæ & demonstrandæ, quam vanæ in opinionibus dissentientium perstringendis & impugnandis libidini litabunt.

## §. 7.

Equidem in his ipsis Horis subseci- *Influxus*  
vis non aliud agimus, quam ut influ- *in Theo-*  
xum philosophiæ nostræ in Facultates *logiam*  
superiores exemplis illustremus, sive *speciatim*  
methodum species, qua philosopha- *ostendi-*  
mur, sive ipsa dogmata, prouti a no- *tur,*  
bis enucleatius proponuntur, si vel  
maxime tradamus, quæ docent com-  
muniter omnes: non tamen e re esse  
videtur, si nonnulla de Facultatibus  
superioribus in specie dicamus. Nemo  
est qui nescit, Facultates superiores  
tres numerari, Theologiam, Juridicam  
& Medicam. Dicendum itaque est si-  
gillatim de influxu Philosophiæ no-  
stræ in Theologiam revelatam, in Ju-  
risprudentiam & in Medicinam. Cum  
vero tantus hic sese offerat dicendo-  
rum campus, qui integro volumini  
conscribendo sufficiat; nobis in præ-  
senti suffecerit tantummodo specimi-  
nis loco quædam prælibare, ut alio-  
rum studia excitemus, quæ ad exco-  
lendas Facultates superiores conferre  
possunt, ipso opere influxum illum ex-  
perturi, quem non sine invidia præ-  
dicare valeamus. Theologia revelata  
B varias

I. in ex-  
egeticam.

varias habet partes, quæ sunt veluti totidem ejus species. Habemus enim Theologiam exegeticam, dogmaticam, polemicam, moralem, casuisticam: quibus addi solet methodus concionandi & addi adhuc potest Theologia experimentalis, ignotum forsitan multis nomen. In singulas peculiari modo philosophia nostra influit, sive methodum spectes, sive notiones ejusdem auxilio evolutas. Dari demonstrativam Scripturam sacram interpretandi methodum, & alibi ostendimus, cur usum Logicæ in interpretanda scriptura sacra exponeremus (i), & haud difficulter intelligitur: singuli enim scripturæ sacre verbis ac phrasibus determinatæ respondere debent notiones, ut sensum habeant certum & definitum, cumque Deus intelligi a nobis voluerit necesse est sensum istum nobis erui posse, & ut sensus genuinus a spurio distingui queat, necesse potest probari posse sensum hunc esse genuinum, alium spurium. Quod si ergo alteri explicare velis vim & potestatem

---

(i) §. 968. & seqq. *Log.*

verborum, ad notiones distinctas & determinatas revocare debes res iisdem denotatas: qua in re nostra philosophia auxilio est, quemadmodum ante ostendi. Quodsi probare volueris sensum, quem verbis tribuis, esse menti scriptoris sacri conformem; genuinæ demonstrationis indolem perspectam habere debes, ut ex assumtis tanquam concessis, vel saltem concedendis, ubi præjudiciorum nebulae discussæ sunt, legitime ac evidenter colligere possis, quod erat probandum. Nemo non interpretum scripturæ sacre fatetur, sensui verborum ejusdem tribuendam esse omnem amplitudinem, quam habere possunt. Enimvero amplitudo non interpretis arbitrata, sed per principia definienda. Quodsi enim alter neget verbis competere eam, quam ipsis tribuis, amplitudinem; probandum id utique erit, nisi unicuique salva esse debet sua quidlibet fingendi licentia. Quomodo vero probaveris, nisi supponas principia ab altero concessa, vel saltem concedenda, si ad absurdum deduci nolueris? Quomodo evidenter probaveris, ut ad assensum

**B 2**

com-



compellatur alter rationum pondere appetitu minime obstetricante, nisi formam demonstrationis legitimæ animo comprehensam habueris, ne in concantenandis ratiociniis ab eadem aberres. Quantum hic auxilii ferat philosophia nostra, non multis doceri debet. Sufficit provocare ad exemplum, quod eam fini jam alias dedimus, cum dictum Apostoli de homine nihil a se ipso habente interpretaremur, usum notionum directricium in interpretanda scriptura sacra declaraturi (k). Nemo non interpretum fatetur in scriptura sacra interpretanda spectandum esse verborum emphasin. Eodem vero modo patet, quo necessitatem probanda amplitudinis sensus evicimus, emphasin non interpretis arbitratu definiendam sed ex principiis firmis deducendam esse. Quantum vero huc conferant notiones distinctæ ac determinatæ cum genuina methodo, exemplis denuo docuimus alias (l), ut probationi qua

---

(k) in Hor. subsec. A. 1729. trim. æstiv. n. III. conf. Trim. brum. A. 1730. n. IV. §. 2.

(l) loc. cit. §. 4. Trim. Vern. A. 1730.

quæ sine prolixis ambagibus dari haud poterat, superfedere valeamus. Jubent interpretes interpretationem analogiæ fidei conformem esse debere. Non sufficit conformitatem niti opinione interpretis; sed ea utique probanda venit. Constituenda igitur est fidei analogia & tenendus est modus, quo probatur interpretationem eidem conformem esse. Sunt quædam scripturæ loca, quorum sensus adeo manifestus est, ut, nisi vim verbis inferre volueris eaque in alienum sensum detorseris, in dubium vocare minime possis, quin potius demonstrare valeas, modo methodi fueris artifex, non alium sensum esse posse, quam quem verba per se insinuunt. Atque hæc sunt illa dicta, quæ phrasi Theologis recepta classica merito dixeris. Sunt vero deinde dicta alia, quæ in se spectata dubiæ sunt interpretationis, quod eorum sensus pendeat a classicis & iis convenienter explicari ipsa debeant. Atque ea est ratio, cur idem scripturæ sacræ locus a

B 3                      diver-

---

n. V. §. 7. Trim. æstiv. ejusd. A. n.  
V. §. 4.

diversis diversimode eadem specie explicetur. Ex dictis classicis determinandi sunt articuli, quos *fundamentalis* hoc sensu dixeris, quod sint fundamentum, cui ceteri superstruendi, quatenus his sumtis tanquam principiis cetera inde servatis methodi demonstrativæ legibus deduci possunt. Articuli isti fundamentales, si rigorose loqui volueris, analogiam fidei constituunt, quatenus fidei conforme censetur, quod ipsis convenit, vel cum aliis necessaria consequentia inde deductis consentit. Ad analogiam itaque fidei legitime constituendam & scripturam sacram juxta eam interpretandam conducit demonstrativa methodus, quam Logica nostra distincte explicat, & integra philosophia nostra animo lectoris insinuat; conducunt notiones directrices, quas philosophia prima una cum aliis disciplinis philosophicis suggerit; conducunt denique veritates philosophicæ ad determinatas propositiones revocatæ, quales philosophia nostra suppeditat. Exempla non addo: continentur jam aliqua huc spectantia in iis scripturæ locis, quæ in his Horis inter-

interpretatus sum. Plura occurrent in posterum, si Deo ita visum fuerit; quando plura scripturæ loca explicaturi sumus, ut usum philosophiæ in interpretanda scriptura sacra ipso opere commonstremus. Poteram præterea in præsentē urgere, quod interpretatio scripturæ quoad articulos mixtos esse debeat rationi conformis, quoad mixtos eidem non repugnare: ubi philosophiæ, qualis a nobis traditur, luculentus ostendi poterat usus. Enimvero cum specimina jam ante in his Horis tradita, & in posterum tradenda idem palam loquantur; non opus est ut diutius huic tractationi immorer.

§. 8.

Veritates revelatæ puræ cum sint <sup>2. dogmat-</sup> supra rationem, ex principiis rationis <sup>ticam.</sup> demonstrari nequeunt, consequenter nec cum disciplinis philosophicis eodem modo connecti possunt, quo ipsæ inter se connectuntur, neque notiones in Theologia revelata ita resolvi possunt, ut penitus intelligantur, quemadmodum accidit in iis, quæ sunt rationis. Constat tamen easdem veritates puras inter se connecti posse, ut

perfectum constituent systema, & in ii connectendis uti esse propositiones determinatas & definitiones accuratas philosophicas, quibus tanquam principiis utimur in ratiociniis, quorum concatenatione opus est ad illas inter se connectendas; id quod jam alibi monuimus (m). Ibidem quoque jam removimus dubium, quod incautis facile suboriri poterat, quasi ex principii rationis demonstrari velimus, quæ sunt supra rationem. Neque enim in omnibus ratiociniis occurrunt principia rationis & in nullo, utraque præmissa rationis est, sed alterutra semper a revelatione pendet, ita ut vel ex scriptura sacra immediate desumatur, vel ex illarum propositionum numero sit, quæ ex istiusmodi principio fuere deductæ. Præterea definitiones terminorum, quibus exprimuntur res pure revelatæ, in notiones simpliciores resolvi possunt quantum sufficit ut intelligantur, et eas comprehendere impossibile sit. Quod si quis in Mathesi versatus, ut intelligat, quænam sit veri systematis forma & qua methodo ad eam sit opus, theologi

---

(m) §. 980. *Log.*

logica dogmata, quibus animum imbuunt, in systema istiusmodi redigere conatus fuerit; is ipso opere experietur supponi principia philosophica, quæ sumenda sunt tanquam vera, antequam ad scopum pervenire possis. Systema igitur theologiæ revelatæ, in quo veritates omnes inter se connexæ tanquam unum corpus exhibentur, referri debet ad systema aliquod philosophicum, in quo veritates rationis eodem modo inter se connexæ comparent. Quamobrem cum nos philosophiam in istiusmodi systema redigamus, ecquis est qui dubitet, eam ad systema verionominis theologicum opem suam conferre posse, immo in posterum collaturam esse. Hæc dudum perspexi, cum ad philosophiam emendandam nondum animum appulissem. Cum A. 1709. elementa Aërometriæ edidissem, in quibus ad experimenta Mathematicæ applicaveram specimine aliquo facili ostensurus philosophis, quomodo in Physicis ad certam rerum naturalium atque in arte fecundam cognitionem perveniri possit, Theologus tunc temporis celeberrimus *Ja. Andreas Schmidius*, literis ad me da-

tis hortabatur, ut Theologiam revelatam eadem methodo in systema aliquod redigerem, quo definitiones aliæ in alias resolverentur & propositiones aliæ ex aliis deducerentur, ut veritatum revelatarum mutua a se invicem dependentia & suavisissimus concentus pateret. Respondi tunc temporis, laborem istum non posse cum laude nec ea, quam spondet, utilitate absolvi, nisi ante philosophia ad eam formam componatur, ut veritatum naturalium mutua a se invicem dependentia in aprico ponatur. Cum enim Theologia revelata philosophiam præsupponat, quod nullo non tempore agnovere Theologi; systema theologicum, quale a Viro eximio desiderabatur, ad simile systema philosophicum referri debere. Quoniam Mathematicum erat peritus & in philosophia, quam ante docuerat, versatus; veritatem responsi facile agnovit.

## §. 9.

3. in  
Theolo-  
giam Mo-  
ralem.

Quemadmodum in Theologia dogmatica duo occurrunt veritatum genera, nimirum veritates puræ & mixtæ; ita similiter in Theologia morali duplicia

plicia sunt, quæ urgentur, officia: alia homini christiano propria sunt, alia omnibus omnino hominibus communia. Officia homini christiano propria sunt, quæ ex notione christianismi deducuntur; officia communia eadem sunt, quæ jure naturali præscribuntur. Hæc tamen officia in Theologia morali immutantur, ita ut materialiter differant a seipsis, quemadmodum jam alias ostendimus (n), quatenus scilicet motiva seu rationes, quibus flectitur ad ea voluntas, ab opere redemptionis, seu iis, quæ christianismo propria sunt, desumuntur. Unde apparet, Theologiam moralem præsupponere Jus naturæ atque philosophiam moralem cum civili, una cum Theologia dogmatica & exegetica. Ubi igitur eam ad formam demonstrativam redigere voluerimus; necesse est ut ante Jus naturæ, philosophiam moralem atque civilem ad eam formam reducamus, immo ut Theologiæ quoque exegeticæ & dogmaticæ eandem operam navemus. Philosophia igitur duplici modo influit in Theologia

---

(n) in Horis subsec. An. 1730. Trim.  
Vern. num. 1. §. 2.



Theologiam moralem, nimirum immediate & mediate. Immediate influit, quatenus supponit ea, quæ in Jure naturali de officiis hominis demonstrantur & in philosophia morali de praxi virtutum atque vitiorum docentur, nec non in philosophia civili de virtutibus & vitiis imperantium ac parentum inculcantur. Ac nostra inprimis philosophia influit singulari quodam modo in Theologiam moralem, dum materialem virtutum philosophicarum & theologicarum differentiam clarissime exponit, quæ hætenus generatim expensa minime fuit, ut adeo Theologiæ morales hætenus conscriptæ ab ea, quam habere debent, forma plurimum adhuc differant, nec eam Ministris Ecclesiæ afferant utilitatem, quam afferre debebant & poterant. Nulli igitur dubitamus fore, ut, philosophia nostra practica publici juris facta, theologia moralis aliam induat faciem, non sine insigni emolumento Ecclesiæ: id quod haud paucos jam agnoscere mihi exploratum est. Et ut juvenem illorum conatus, qui Theologiam moralem Ministris Ecclesiæ utilem reddere

dere conabuntur; hinc inde in notis, quando philosophiam moralem dabitur, adjiciemus, quæ differentiam virtutum philosophicarum & theologiarum in specie concernunt, & ad Theologiam moralem spectant. Immo in his ipsis quoque Horis exemplo præire dabitur, ut salutem Ecclesiæ, quemadmodum generis humani, pro virili promoveamus. Præterea ad influxum immediatum quoque referri debet, quod philosophia exhibet propositiones, quæ, cum in ea ex principiis rationis demonstrantur, in Theologia morali ex principiis scripturæ sacræ demonstrandæ veniunt. Etenim veritates mixtas, siue theoreticæ fuerint, siue practicæ, ex principiis non minus scripturæ sacræ, quam rationis demonstrare debet Theologus: id quod multiplicis usus est. Quamvis vero ab eo, qui arte in veniendi pollet, propositiones istæ in universum omnes ex principiis scripturæ sacræ deduci possint; facilius tamen ex hisce principiis contexere demonstrationem, ubi propositio jam ante cognita fuerit, quam eam demum ex illis deducere. Accedit quod

quod in philosophia nostra versatus & facilius demonstrationes reperire, & ipsas propositiones eruere possit. Mediate philosophia influit in Theologiam moralem, quatenus ea supponit Theologiam dogmaticam & exegeticam methodo demonstrativa pertractatam, ubi ipsamet ad formam demonstrativam componenda. Etenim vidimus paulo ante philosophiam nostram influere in Theologiam dogmaticam & exegeticam, ubi methodo demonstrativa pertractanda. Quamobrem cum Theologia moralis ad formam demonstrativam redigi non possit, nisi referatur ad Theologiam dogmaticam & exegeticam ejusdem formæ; per has quoque philosophia nostra in illas influit. Notandum vero in primis est, ubi philosophia moralis ad formam demonstrativam fuerit reducta; hoc ipso in animo lectoris nasci ideam exemplarem Theologiæ moralis ejusdem formæ. Praxis enim Theologiæ moralis a philosophia morali non differt quoad formam, sed saltem quoad materiam. Quamobrem ut philosophia moralis degeneret in Theologiam moralem

ralem substitutione tantummodo materiz opus est, forma retenta. Ita ubi in philosophia morali docetur, quomodo flectenda sit voluntas, ut actum aliquem appetamus, motivo philosophico substituendum est theologicum. Ponamus enim nos motivum desumfisse a convenientia cum natura humana, aut ad detestandum actum contrarium ab hujus repugnantia cum natura humana; Theologiam moralem conditurus motivum desumet a natura hominis christiani, aut ad detestandum actum contrarium a repugnantia cum natura hominis christiani. Nimirum quemadmodum actus quidam fiunt honesti per ipsam hominis naturam, ita ut per eam intelligatur, cur deceant hominem; ita iidem actus efficiuntur quoque boni per naturam hominis christiani, ita ut per eam intelligatur, cur deceant christianum. Et ex adverso sicuti actus quidam redduntur inhonesti per ipsam hominis naturam, ita ut per eam intelligatur, cur dedeceant hominem; ita iidem quoque evadunt mali per naturam hominis christiani, ut inde intelligatur, cur dedeceant christia-

stianum. Quemadmodum vero porro ex convenientia actuum vel repugnantia eorundem cum natura humana fuit obligatio ad istos committendos, hos vero omittendos, quæ in homine efficax quatenus rationis ductum sequitur, nec affectuum impetu interruptum abripitur; ita quoque ex convenientia actuum vel repugnantia eorundem cum natura hominis christiani nascitur obligatio christiana, quæ in homine christiano efficax, quatenus Christo vivere decrevit. Unde in hoc casu ubi vis facilis est motivorum substitutio, modo naturam hominis christiani habueris perspectam, ut de convenientia vel repugnantia actuum cum eadem statuere possis. Quæ hic dicuntur doctrinæ ac praxi Apostolorum conformia sunt, nec difficulter conformitatem intelliget, qui scripta novi fœderis cum attentione perleget ac eo acumine fuerit instructus, ut veritatem ab alio non monitus videat. Quorundam enim attentionem juvare debemus, ne eidem sese subducant, quæ observare debent. Quæ de motivis diximus, quibus flectitur voluntas; de aliis



aliis quoque praxeos capitibus tenenda sunt. Dabimus aliquando fidem oculatam. Quodsi interea fidem dictis habere volueris, ex iis, quæ de motivis dicta sunt, judicans de ceteris; haud invitus concedes, ubi philosophia nostra moralis publici juris facta fuerit, ceteris, quæ præsupponenda esse modo monuimus, suppositis haud difficilem fore ejus in Theologiam moralem conversionem. Specialia hic quemadmodum in antecedentibus non addimus, utut non deessent singularia prorsus, quæ commemorari mererentur, alia occasione rectius proferenda, ubi plenius intelligi poterunt.

§. 10.

In Theologia polemica tractantur ea, quæ inter Theologos sunt controversa, & errores a veritate separantur, veritas etiam ab objectionibus liberatur. Modum errores refutandi & veritatem defendendi docuimus in Logica (o). Regulæ igitur, quæ ibidem traduntur, maxime usui sunt in Theologia

4. in polemica.

---

(o) cap. 2 & 3. part. 2. sect. 4. §. 1017. & seqq.

logia polemica, &, si quis eas animo rite comprehenderit ac sufficiente acumine instructus fuerit, quam multis modis in eas impingatur, abunde perspiciet. Theologia sane polemica, si qua alia disciplina, plurimis defectibus laborat, quos hic recenseri opus non est, abunde perspiciendos ab iis, qui cum in philosophia nostra fuerint versati, verioris methodi ideam lucidam animo tenuerint. Defectibus istis medelam afferri debere haud negabit, cui cognitum atque perspectum, quantum noceat in theologicis dissenfus, & qui animo perpendit, quantum is suadere soleat malorum. Distinguiamus in Logica refutationem ab impugnatione (p), quæ vulgo perperam inter se confunduntur. Refutatio est demonstratio falsitatis propositionis, quam pro vera habet alter. Demonstratio vero vel directa est, vel indirecta, quarum illa ex principiis concessis colligitur contrarium ejus, quod alter tuetur; hac vero ex propositione, quæ ad refutandum proponitur, assumpta

tan-

tanquam vera infertur contrarium ejus, quod alter tanquam verum admittit, seu propositio, quam falsam esse alter agnoscit. Demonstrandi impotentia methodum refutandi indirectam in spuriam convertit, qua utuntur consequentiarii tantorum malorum autores. Veri adeo nominis refutatio supponit habitum demonstrandi & principia evidentia, hoc est, propositiones, quæ & ipsæ demonstratæ sunt. Habitus demonstrandi supponit continua exercitia, sine quibus non acquiritur, & in primis in eo veritatum genere, in quo eodem uti decreveris. Principia evidentia in refutando non erunt, nisi desumantur ex systemate veri nominis. Quamobrem Theologia polemica eam perfectionis apicem, ad quem evolvi potest, non attinget, nisi ante Theologia dogmatica & moralis, consequenter & exegetica, adeoque & disciplinæ philosophicæ formam demonstrativam induerint. Quoniam itaque nos omnem movemus lapidem, ut philosophiæ eam formam conciliemus, & ejus ope ad demonstrativam scripturæ sacræ interpretationem & systemata



genuina Theologiæ dogmaticæ ac moralis perveniri dabitur; influxus philosophiæ nostræ in Theologiam polemicam tam immediatus, quam mediatuſ abunde patet. Ad influxum immediatum referri inprimis debet, quod ad refutandos errores & refellendas objectiones non modo Antiscripturarium, verum etiam aliorum, qui scripturæ sacre autoritatem in dubium minime vocant, principia suppeditet philosophia, cum notiones deceptrices ex philosophia in Theologiam invectæ multos pepererint errores & perversis interpretationibus scripturæ sacre locum dederint, immo ignorantia philosophiæ gemina mala produxerit. Ne vero principia philosophica, quorum usus in theologia evitari nequit, erroribus ansam præbeant, & controversias intricatas reddant; notionibus distinctis & determinatis opus est, ad quas nos doctrinas philosophicas revocare studemus. In Theologia polemica danda inprimis opera est, ne adversariis errores imputemus, a quibus sunt alieni, vel opiniones, quas fovent, saltem ex parte immutemus; ne in logoma-

machias incidamus, ex diversitate terminorum vel formularum loquendi inferentes diversitatem sententiarum; ne denique præter necessitatem in erroribus refutandis inanem operam sumamus, quæ vulgo iis impenditur, qui sua sponte ruunt, ubi errores fundamentales fuerint everfi. Errores inter se non minus connectuntur, quam veritates, danturque eorum systemata, quorum fundamento subverso corruunt omnes. In Theologia igitur polemica systemata ista errorum sunt explicanda & deinde fundamentum, quo nituntur, evertendum. Non vero est quod verearis frustraneam vel prorsus damnosam operam systematis istiusmodi impendi. Quodsi enim ex uno errore, quem evidenter refutare potes, ceteros demonstrativa ratione deduxeris; hoc ipso ceteri intelliguntur falsi, quod demonstrativa ratione inde deducantur, consequenter errorum ex erroribus fundamentalibus tanquam principiis demonstratio est maxime evidens eorundem refutatio. Ubi systema theologiæ dogmaticæ, quod nomen tam augustum tuetur, præ-

supponitur, errores fundamentales tanquam veritati demonstratæ contrariis per modum corollarii subsumere licet. Unde labor in Theologia polemica plurimum imminuitur, si systema dogmaticæ juxta methodum demonstrativam conditur. Ut vero logomachia vitentur, & ne adversariis tribuas errores, a quibus sunt alieni; notionibus distinctis & determinatis opus est, & observandæ sunt regulæ, quas ad interpretationes demonstrativas in Logica commendamus. Nihil profecto communius est, quam ut in tractandis controversiis logomachiis litetur & adversariis obtrudantur opiniones vel invitæ, ut ideo disceptationes omnes sint infructuosæ. Nec erit horum malorum finis, nisi ad rectam philosophandi viam revocentur eruditi & eandem quoque in Facultatibus superioribus ingrediantur.

## §. II.

§. in Theologia  
casuistica  
eam.

In Theologia casuistica casus intricati circa actiones hominis, præsertim christiani, sive in genere, sive quoad certum statum spectati, expenduntur.

Vo-

Vocantur vulgo casus conscientiæ. Nemo non videt accurata opus hic in primis esse discussione, ne solutio a veritate aberret. Discussiones istiusmodi & principia evidentia, & habitum demonstrandi supponunt. Principia petuntur ex philosophia, ex scriptura sacra, ex Theologia dogmatica & morali, subinde & polemica. Deest non modo philosophiæ, verum etiam ceteris disciplinis philosophicis ea evidentia, quæ firmitate assensus conscientiam constanter ac perpetuo tranquillat, nisi ad eam formam reducantur, ad quam nos philosophiam reducere conamur, viam monstrantes, qua ad eundem scopum in Theologia contendere liceat. Notandum vero est, nos hoc loco non agere nisi de eo, quod humanis viribus effici potest, quatenus certa rerum haberi potest cognitio. Seponimus quæ in praxi virtuti Spiritus S. tribuenda veniunt, quippe quæ ab influxu in philosophiam expectari nequeunt. Sane si omnes Theologiæ partes fuerint in systemata redactæ, quæ nomen suum coram rigidissimo tribunali rationis tueri possunt & ad systema philosophiæ

phiæ referantur, in quo ne minimum quidem occurrit quod jure reprehendere possis; ex Theologia tantum perspicies quid scripturæ sacræ sit consentaneum & ejus supposita autoritate divina tanquam verum admitti debeat. Rationis itaque lumine solo usus non agnoscis nisi hypothetice verâ, quæ in istis systematis traduntur; sed ut firmo assensu eadem amplectaris tanquam infallibiliter verâ, operatione Spiritus Sancti opus est. De hac quæ dicenda sunt, ad præsens institutum minime pertinent: sufficit itaque annotasse, quod quæ de disciplinis theologicis ad formam scientificam reducendis inculcantur non contrariantur iis, quæ de fide divina docent & præcipiunt Theologi. Theologia casuistica in scholis Protestantium hodie evanuisse videtur: quod tamen fecus antea videbatur Theologis, qui in Academiis futuros Ecclesiæ ministros etiam ad casus conscientiae præparabant. Exemplo nobis nostro adhuc ævo est Theologus eximius *Friedemannus Bechmannus*, cujus Theologia conscientiaria (quæ cum casuistica eadem) seu Tractatus de casibus

sibus conscientia anno 1700. prodiit. Agnoscit idem, quam necessaria sit ad hanc Theologiae partem scientia solida (1), ut calculo suo approbasse dicendus veniat, quæ de influxu philosophiæ ad formam demonstrativam compositæ & de ceteris philosophiæ partibus ad eandem formam reducendis disseruimus. Ecce tibi verba viri pie defuncti! Ergone, inquit, ad solidam scientiam adspirare in vitio positum est? Absit hoc! Tantum enim abest, ut ad veram scientiam contendere reprehensionem mereatur, ut potius non raro sine ea sive propriæ, sive aliorum conscientia succurrere, satis vix liceat: id quod in primis verum esse arbitror de illis, qui S. S. Theologiae suam addixerunt operam, ut vel ad officium sacrum contendant, vel recens ad illud admoti sint. His enim sicut varii obveniunt casus, qui sæpe conscientiam turbant & variis dubitationibus implicant, ita quomodo se sine scientia eorum, quæ ad solvendos ejus-

C 5

,, modi

(1) in præfatione p. 2.

modi nodos necessaria sunt, experire dire queant, perspicere haud possum. Ubi Jus naturæ cum ceteris philosophiæ practicae partibus ad finem fuerit perductum, quomodo principia inde petenda in solvendis casibus conscientiae usui esse possint, exemplo uno vel altero in his Horis doceri poterit, quamvis non diffiteamur, plures occurrere casus, in quibus principia philosophica & theologica socias præstant operas, ita tamen ut per theologica una mediate influant philosophica. Quod si universa philosophia more nostro pertractata jam prostaret, si singulae partes Theologiæ influxum illius expertæ jam in systemata veri nominis fuissent redactæ, & in horum numero Theologia conscientiaria sive casuistica deprehenderetur, ex citationibus eodem modo pateret influxus materialis philosophiæ in decisiones casuum conscientiae, quo successivam assensus generationem palam fieri docuimus (s): formalis enim influxus per se patet, utut ex citationibus eodem modo

---

(s) §. 992. *Logica* q. 1. m. 1. n. 1. ( )



modo firmetur, quo materialis agnoscitur. Ex anterioribus intelligi arbitror, philosophiam *materialiter influere* in Facultates superiores, quatenus principia iisdem suppeditat, *formaliter* vero, quatenus ad formam demonstrativam reducta ideam exemplarem sui cultoribus ingenerat, juxta quam Facultatibus superioribus eadem forma inducitur.

§, 12.

Theologiae experimentalis nomen forsan inauditum, etsi res ipsa non sit ignota iis, qui christianismum non ore, sed facto profitentur. Idea ejus continetur in verbis Christi (t), quando ad Judæos; Si quis, inquit, voluerit voluntatem ejus facere (qui misit me), cognoscet de doctrina, utrum ex Deo fit, an ego a me ipso loquar. Exemplum habemus in Petro, qui cum jussu Dei ad Cornelium centurionem, hominem gentilem, accitus serium ipsius & familiae integræ propositum christianismum amplectendi experiretur: In veritate, inquit, comperi, „ quia

6. in experimentalis.

(t) Joh. VII. 17.



„ quia non est personarum acceptor  
 „ Deus, sed in omni gente, qui timet  
 „ eum & operatur iustitiam, acceptus  
 „ est illi (u). „ Theologia experimen-  
 talis itaque juxta mentem Christi ea  
 est, qua docetur, quomodo homo chri-  
 stianus veritatem doctrinæ christianæ  
 experiri debeat, ipso facto & in seipso.  
 Et huic notioni consentit exemplum  
 Petri. Etenim Christus præceperat A-  
 postolis, ut irent in mundum univer-  
 sum prædicaturi Evangelium omni cre-  
 atura (x). Sublato itaque discrimine  
 inter gentes & Judæos, quod in Veteri  
 Testamento attendi voluit Deus, ad  
 externam communionem Ecclesiæ vo-  
 candi erant promiscue omnes. Do-  
 ctrinam hanc de promiscua omnium  
 vocatione ad communionem exter-  
 nam Ecclesiæ per omnes universi mun-  
 di gentes dispergenda ipso facto ve-  
 ram experiebatur Petrus, dum serium  
 christianismum amplectendi propo-  
 situm in Cornelio & tota domo ejus ob-  
 servabat, immo Spiritum S. super o-  
 mnibus

(u) Act. X. 34.

(x) Marc. XVI. 15.

mnibus effundi videbat, atque seriam Dei voluntatem de Ecclesia ex omnibus gentibus colligenda agnoscebat ad Cornelium ejus convertendi causa ire iussus. Quemadmodum itaque in philosophia experimentalis hodie nemini ignota, qui vel primis labris philosophiam naturalem seu physicam degustavit, docemus, quomodo theoriæ experimento subjiciantur, ut certior constet veritas; ita quoque doceri potest, quomodo veritatem doctrinarum christianarum in nobis ipsis & aliis, maxime tamen in nobismetipsis experiri valeamus. Sunt regulæ generales, quibus experientia illa spiritualis continetur, quemadmodum ars experimentandi suas habet regulas. In Theologia itaque experimentalis & generales istæ regulæ explicari, & ad modum doctrinas quaslibet christianas experimento subjiciendi applicari debent. Philosophia experimentalis ideam quandam exemplarem præbet, quomodo veritates sint experimento subjiciendæ, sit ita quod Physicis ea ab Astronomia venerit. Quamobrem Philosophia experimentalis influit in Theologi-

logiam experimentalem; quatenus ideam hujus exemplarem animo ingerit, juxta quam eam in formam artis redigere licet; simulque vires idem præstandi largitur Theologo distinctam & vere systematicam doctrinarum christianarum cognitionem possidenti. In Teleologia, quæ de finibus rerum agit, plurima Theologiæ naturalis experimentalis specimina occurrent, quatenus ibidem ostendetur, quomodo dogmata Theologiæ naturalis per contemplationem naturæ confirmantur: hæc enim confirmatio ab experimento non differt. Quamobrem hæc philosophiæ pars magis adhuc influet in Theologiam experimentalem, quam philosophia experimentalis. Et cum in Theologia naturali creaturarum dependentiam ab attributis divinis una cum providentia Numinis explicaturi simus; principia quoque suppeditabimus, quibus egregius erit in Theologia experimentalis usus. Quemadmodum vero notiones philosophiæ primæ directrices sunt in omni scientiarum genere, siue theoriam, siue praxin spectes; ita similiter eadem suo munere fun-

funguntur in theologia experimentalī. Veritates, quæ experimento subjiciendæ, continentur in Theologia dogmatica seu positiva, itemque Theologia morali atque casuistica. Quamobrem Theologia experimentalis præsupponit dogmaticam & moralem cum casuistica. Et quatenus philosophia in has Theologiæ partes influit, influxus in Theologiam experimentalem mediatuſ est. De Theologia morali, quatenus experimento subjicienda veniunt, quæ in ea docentur, in specie notandum, quod hic imprimis usui sint, quæ de signis virtutum & vitiorum adduntur, cum ex iis quod virtutis revera est discernatur ab eo, quod ejusdem saltem speciem habet. Nec minus usui sunt, quæ de motivis traduntur. Etenim si actio ex virtute proficiscitur, quod per signa patet, ex motivis intelligitur, num dogmatis, unde motiva desumuntur, assensum immotum præbeas, cum extra controversiam sit, dogmata non influere in appetitum, nisi quatenus habentur pro veris. Immotum vero assensum a parum firmo distingues, ubi voluntatem constantem deprehenderis

ris, impedimentis oblati, ita ut rationibus extrinsecis non cedat, ubi per intrinsecas fuerit determinata. Quemadmodum vero universa praxis philosophiæ moralis usui est, ubi virtutes experimento subicere volueris, quatenus ibidem explicantur: ita simul lucem affundunt experimentis, quibus subijciendæ sunt virtutes christianæ. Media, quæ in philosophia & Theologia morali commendantur, experimento confirmantur, dum successum ipsimet in nobis & aliis experimur. Optandum omnino foret, ut hæc Theologiæ pars, deserta propemodum & inculta, magis excoleretur, cum tunc demum omnis, quam profitemur, religio tota quanta practica evaderet, nec tam disceptando veritatem quaereremus, sed eam ex semetipso unusquisque agnoscere conaretur. Speramus autem fore, ut magis excolatur & a disceptationibus inutilibus ad praxin avocentur qui Christi nomen profitentur, ubi philosophiæ nostræ, de quo diximus hætenus, influxum experiemur, Theologiæ partibus singulis ad formam scientificam reductis.

## §. 13.

Noſtris moribus conciones ſeu ſer-<sup>7</sup> *hominum*  
 mones ſacri abſolvuntur 1. introitu, <sup>1</sup> *leticam*,  
 2. exordio, 3. propoſitione & 4. tra-  
 ctatione, quæ explicationem & appli-  
 cationem continet. Introitus & exor-  
 dium ſunt partes minus principales,  
 quæ & minus neceſariæ dicuntur;  
 propoſitio autem & tractatio partes  
 principales, quæ & neceſariæ appellan-  
 tur. Philoſophandi methodus, quam  
 ſequimur, id urget, ut de rebus non  
 judicemus niſi ex notionibus diſtinctis  
 ac determinatis. Eidem igitur adſue-  
 tus ubi ad methodum concionandi,  
 quæ & Theologia homiletica, Orato-  
 ria ſacra, Rhetorica eccleſiaſtica dici  
 ſuevit, accedit, de ſingulis concionis  
 partibus non judicat niſi ex notionibus  
 diſtinctis & determinatis. Non levis  
 momenti videri debet, quod apprime  
 neceſſarium, ubi finem, qui intenditur,  
 conſequi ſtuderis, præſertim cum ex-  
 perientia quotidiana loquatur, quan-  
 tum in notionες iſtas injuriū ſint qui in-  
 ter concionatores vel eminere judican-  
 tur. Dictis faciamus fidem. Introi-  
 tus, qui & exordium prius, a nonnul-

D

lis

lis parum apte exordium generale appellatur, non alio fine primum inter partes concionis locum tuetur, quam ut ad devotionem excitetur auditorium, cum non sine precibus ad tractationem verbi divini accedere debeamus, quippe quæ sine Spiritus S. auxilio fructuosa esse nequit, & verbum Dei devota mente sit excipiendum, quemadmodum exordium perinde ac in orationibus profanis præmittitur, ut excitetur attentio. Ex hoc utroque fine deducuntur regulæ, quas in introitu & exordio observare tenetur Orator facer. Quantum vero ab eodem aberrant concionatores, haud difficulter observare licet, ubi quæ proferunt ad eundem finem referre libuerit. Sane qui in introitu & exordio dicta Scripturæ prolixè explicant & applicant, prout in ipsa concione fieri debet, ac patientiam auditorum sæpius fatigant, antequam exordiantur ipsam tractationem; sine hoc non alia de causa excidunt, quam quod vel eum ignorent, vel quomodo ad eum perveniatur non intelligant. In explicatione textus genuinus sensus eruendus, ut nascentur in



in animis auditorum ideæ , quæ verbis  
textus respondent. Quomodo expli-  
cationes sæpius deformatur a concio-  
natoribus, ecquis est qui ignorat? Mi-  
scentur enim plurima, quæ ad scopum  
non faciunt, non alia de causa, quam  
ut tempus dicendo consumatur, quod  
sermoni sacro destinatur. In applica-  
tione ad usum auditorii tam theoreti-  
cum, quam practicum transferri de-  
bet textus bene intellectus, quatenus  
inde deducuntur tam credenda, quam  
agenda. Quantus vero hac in parte  
defectus vulgo observetur, nemo non  
novit. De omnibus rectius statuerent  
concionatores, si ex notionibus distin-  
ctis, fixis ac determinatis de singulis  
judicare didicissent eaque sibi com-  
parasent dona, quæ ad fines, quos pro-  
spiciunt, consequendos requiruntur.  
Quodsi ergo singularum partium, qui-  
bus concio constat, notiones rite deter-  
minaveris & ex iis regulas, quæ concio-  
natoribus commendantur, demonstra-  
veris; Theologia homiletica fructuosa  
evadet; dum eam induit formam,  
quam eidem in philosophia nostra ver-  
satus induere valet. Philosophia no-

D i                      stra,



stra, quicquid rationis lumine cognoscimus, ad notiones distinctas & determinatas reducit & prædicatum ex notatione subjecti evidenter deducit, & ejus beneficio atque auxilio idem in iis moliri datur, quæ revelationis lumine assequimur. Concionatoris est instruere auditorium, ut intelligant, quid credendum sit, quid agendum, & ut avidis auribus menteque attenta hauriant, quæ proponuntur. Quantum huc conducant notiones distinctæ & determinatæ atque evidens earum evolutionis, ipso facto experientur concionatores, ubi in philosophia nostra cum laude versati Theologiam universam eadem methodo perceperint. Non desunt exempla, ad quæ provocare possem: sed ab iis commemorandis abstinere placet. Inprimis autem Theologia naturalis, Jus naturæ, philosophia moralis & civilis, ubi ad distinctas & determinatas notiones revocantur, concionatoribus utilitatem maximam eamque prorsus indispensabilem præstant, ac inprimis impediunt, ne pietas vertatur in zelum veritati inimicum, qui etsi a plebe imperita subinde laudetur,

detur, concionatoribus tamen penes intelligentes omnem detrahit fidem eorumque labefactat utilitatem. Nostrum jam non est novos concionatorum depingere: id tamen pro certo asseveramus, ubi concionatores nostro more philosophabuntur & Theologiam eadem methodo percipient, qua nos philosophiam tradimus, non facile fore aliquem, qui non sua veluti sponte evanescet.

## §. 14.

Indicavimus influxum, quem philosophia nostra in Theologiam habere potest. Sed inde jam satis intelligitur, quantæ sit utilitatis. Quando enim philosophia nostra in Theologiam universam influet, nihil in ea amplius occurret obscuri, quod non penitus intelligatur, interpretationes scripturæ evadent certæ ac determinatæ & ab opinionibus interpretum liberabuntur, dogmata credendorum & agendorum erunt evidentiæ, eorumque pulcherri-  
*Utilitas influxus philosophia Auctoris in Theologiam.*

fus, in puris ipso rationis lumine agnos-  
cetur convenientia cum dogmatis aliis  
sive naturalibus, sive revelatis, dogmata  
theoretica influunt in voluntatem, erit-  
que una credendorum ac agendorum  
concordia. Singula evidenter demon-  
strari poterant, sed suppositis præsup-  
ponendis, nec sine prolixitate. Eritque  
dies, qua eadem absque demonstratione  
patebunt. Neque enim dubitamus fore,  
ut nostro molimine excitentur alii  
& Theologiæ eandem operam navent,  
quam nos philosophiæ navare cœpi-  
mus. Tum ipso opere experientur di-  
ctorum veritatem, qui eam ægre nunc  
admitterent vi demonstrationum com-  
petendi, cum non sint ii, qui eidem cede-  
re valent. Neque vero ideo inutilis  
censeri debet labor, qui Theologiæ ad  
formam demonstrativam reducendæ  
impenditur, propterea quod fides non  
sit opus hominis, sed Spiritus S. atque  
adeo assensus non nitatur evidentia ra-  
tionis, sed virtute Spiritus S. in anima  
producatur. Etenim nemo non con-  
cedit, ad sensum Scripturæ sacræ inve-  
stigandum conducere media herme-  
neutica, quæ ideo docentur & commen-  
dan-

dantur, ideas vero verbis scripturæ jungendas non enthusiastico modo infundi animæ, dum illuminatur. Rata igitur manent, quæ de Theologia exegetica diximus, & cum nonnisi notiones distinctæ cum aliis communicari possint, qui veritates theologicas docere alios debent, claris & distinctis notionibus comprehendere eas tenentur. Nemo vero methodi gnarus est qui nesciat, tum demum notiones fieri vere claras & distinctas, si ita proponantur in systemate, ut sequentes in antecedentes resolvantur. Præterea methodo scientifica innotescit dogmatum theologorum a se invicem dependentia, quæ absque hoc subsidio plene intelligi haudquaquam potest. Ecquis vero negaverit utile esse, quod nexum veritatum divinitus revelatarum perspiciamus, cum inde sapientia divina ex œconomia gratiæ eluceat, & tota quanta opus immensæ sapientiæ intelligatur? Quamvis itaque veritatibus pure revelatis assentiri nemo possit, naturæ viribus solis; id tamen non obstat, quominus eadem ex se invicem utiliter demonstrarentur, ut omnium appareat sua-

visissimus concentus, qualis in naturalibus deprehenditur, manifesto indicium eas originem suam referre ad auctorem Naturæ. Immo haud rectius doceri possunt qui sunt a religione revelati alieni, non naturæ viribus acquiri sed eam dono Spiritus S. acceptam ferendam esse. Ubi enim ad formam scientificam reducitur Theologia, quædam assumenda esse patet auctoritate solius scripturæ, quæ tanquam vera non admittet per principia rationis assensum extorturus.

## §. 15.

*Necessitas influxus ejusdem.*

Nostro autem ævo necessarium prorsus videtur, ut Theologia quoque ad methodum scientificam reducat & ad systemata philosophica eadem methodo conscripta referatur. Etenim ex quo *Cartesius* distincte philosophari coepit & studium mathematicum magis excolitur, quam ante moris erat displicent quæ non satis intelliguntur quia non satis explicantur, nec assensum sufficienter movent, quia non sufficienter probantur. Inde vero est quod plurimi fiant ad profanitates pro-

proclives, vel religionem naturalem  
solam amplectantur a revelata alieni.  
Huic igitur malo medelam afferre haud  
quaquam datur, nisi Theologia quo-  
que revelata methodo scientifica tra-  
ctetur. Mutato igitur genio seculi  
modus quoque proponendi veritatem  
divinam immutari debet. Etsi enim  
eadem sit semperque maneat veritas,  
nec nova condantur dogmata, sed an-  
tiqua retinentur ac propagantur; eadem  
tamen pro diversitate temporum di-  
versimode proponenda esse nemo dif-  
fitebitur, qui perpendit ipsummet  
Deum in revelandis veritatibus sese ac-  
commodasse genio illarum persona-  
rum, quibus facta est revelatio: quem-  
admodum unanimi ore consentitur ac  
docent Theologi omnes. Ergo non  
invito Numine in proponendis dogma-  
tis divinis nos quoque accommodamus  
capacitati docendorum. Immo expres-  
se hoc facere jubemur (y), quatenus  
exemplum Apostoli curate discernen-  
tis, utrum lacte, an solido cibo quis  
indigeat, præceptum continet. Quam-  
D 5 obrem

(y) Hebr. V. 12. & seqq.

ficulter quoque ad causarum patronum applicantur, qui cum vulgo male audiant, quod plurimi sint injustitiam amantes, & juris prosecutionem difficilem reddant ac sumtuosam, a justitia minore intervallo recedere poterunt theoria ac praxi juris ad formam demonstrativam reducta. Paucissimi hominum adeo mali sunt, ut tales videri velint. Evidentia vero pellit ignorantiam, ne quis seipsum decipiat visus qui non est, atque fucatam speciem qua aliis imponit, ut ab ipsis habeatur qui non est. Insigniter autem voluntatem Judicis atque patroni causarum a justitiam inclinat veritas, quæ juri inest evidenter agnita: cum ex adverso juri cognitio non influat in voluntatem, ut tibi persuaseris jura cæco potentur arbitrio definiri. Unde non miramur esse haud raro Jurisperitos celebres qui cum quotidie jura doceant alios de decori tamen sibi minime ducant, si in omnibus cum aliis negotiis vehementer injustos præbeant. Inter utilitates Jurisprudentiæ demonstrativæ porro retulimus controversiarum foro nullis ambagibus obnoxiam trahi



Stationem & evidentem definitionem. Quoniam tot ac tantæ sunt hominum querelæ de litibus ultra hominum ætatem protractis, & de dissenſu judicantium in cauſis tam criminalibus, quam civilibus; haud exigua profecto videri debet utilitas, quam præſtat Jurisprudentia demonſtrativa, ubi juſtis illis querelis finem imponit: id quod fruſtra hæcenus tentatum ab aliis, qui cum medelam malo afferre vellent, cauſam magis vulnerarunt.

## §. 18.

Reſtat ut dicamus de influxu philoſophiæ noſtræ in Medicinam. Plures <sup>Influxus in Medi-</sup> ſunt Medi- cinæ partes, quas non eodem <sup>ſpeciatim</sup> proſus modo dividunt omnes. <sup>Oſtenditur,</sup> *Olivierus Jacobæus*, Medicus non incelebris, (p) totam artem medicam partibus duabus commodiſſime abſolvi poſſe exiſtimat, quarum prima de tuenda ſanitate agens *Hygiene*, altera de collapſa reſtituenda tractans *Therapeutice* appellatur. Hygienem ſubdiſtinguit in *Phy-*

(p) in Compendio Inſtit. Med. proleg.

§. 3. & 4.



thesin contendamus, atque adeo universam tam philosophiam, quam Theologiam ad scientificam formam reducamus. Rationes, quas adducit, nostro adhuc tempore persistunt, immo novis accessionibus auctæ sunt, quas omnibus fatis perspectas, modo quis eas videre velit, speciatim recensere nolumus, ne aliis molesti videamur. Qui præsentem rerum statum non minus civilem, quam ecclesiasticum ad animum revocant, & inter doctrinam solidam ac superficiariam aut minus solidam distinguere norunt; quam utilis & necessaria sit ea opera, quam philosophiæ navamus; & quam utilis ac necessarius sit ejus in Theologiam ceterasque Facultates superiores influxus abunde perspicient.

## §. 16.

*Influxus  
in Juris-  
prudenziam  
speciatim  
ostenditur.*

Vidimus influxum philosophiæ nostræ in Theologiam: dicendum itaque porro de influxu in Jurisprudentiam, non naturalem (ea enim philosophiæ pars est); sed civilem. Duplici autem modo in hanc etiam influit philosophia nostra, tum quatenus ideam exempl-

tenuis causas morborum explicat, ad Physicam referri debeat, cum Physici sit explicare quoque rationem status tam naturalis, quam præternaturalis corporis humani; nobis enim perinde est, siue Medicinæ dicantur partes, siue Physicæ capita, modo solidam continent doctrinam. Imperfectionem Medicinæ nemo non hodie agnoscit & quantum ægrorum salus sæpius periclitetur, nemo est qui ignorat. Quamobrem si Medicinam ad certitudinem evehere valeamus, in id omnibus annitendum erit viribus.

### §. 19.

Physiologiam partem Physicæ agnoscimus, atque adeo ipsimet eandem pertractaturi sumus, si quidem Deus vitam ac corporis animique vires tam diu benignissime conservaverit, ut eo usque laborem nostrum continuare nobis detur. Quamobrem non opus est, ut de influxu philosophiæ nostræ in Physiologiam dicatur. Quod si tamen eam a philosophia naturali separare & ad Medicinam trahere velis; per nos quidem id facere licebit. Non tamen

*Influxus  
philosophiæ  
animæ in  
Physiologiam.*

definitionibus, ut omnis dispellatur obscuritas; & principia demonstrandi, quibus demonstrationibus conciliatur evidentia, ut omnis abigatur dubitatio, quæ assensum circa veritatem legi in-existentem morari poterat. Inesse legibus Romanis veritatem deprehendet, qui eas ad formam scientificam reducere conabitur. Profecto si veritate carerent, nec demonstrationes admitterent, cum nil sit demonstrabile nisi quatenus verum. Quemadmodum verò Logica regulas methodi, ita Methaphysica & universa philosophia practica principia conferunt. Ad philosophiam practicam Jus etiam naturæ pertinet. Nos notionem Juris naturalis ampliavimus, ut nulla omnino sit actio libera, cujus moralitas sub datis circumstantiis ex ipsius principiis determinari non possit. Limites coarctavit inscitia & philosophiæ præsertim primæ ac methodi ignorantia. Unde ipsa hæc finium dilatatio influxui philosophiæ nostræ in Jurisprudentiam naturalem tribui debet, cum philosophiam ad notiones distinctas & determinatas reduxerimus & methodi genuinæ

nuinæ leges non modo in Logica exposuerimus, sed ipsam etiam methodum in philosophiam introduxerimus. Quamobrem quia Juri naturali omnem suam extensionem tribuemus, quando ordo nos ad Jurisprudentiam naturalem deducet; nullum quoque occurreret actionum humanarum genus, quod per principia nostra non determinatum videri poterit in opere nostro, vel sicubi cogitationem nostram in scribendo non subierit, facile determinetur ab alio methodi gnaro. Jam vero jus civile, si ei constet honos suus, recte inculcante *Ulpiano* (c), efficitur ex Jure naturali, cum eidem aliquid addimus, vel deminus. Quamobrem cum in philosophia civili, quæ Politica vulgo dicitur, doceamus, quid addi, quid detrahi debeat juri naturali, ut abeat in positivum seu civile; quantum Jurisprudentia naturalis legitime extensa & methodo demonstrativa pertractata una cum prudentia civili ex principiis legitimis eadem methodo deductis, hoc est, philosophia nostra practica

---

(c) l. 6. ff. de L. L.

ctica ad Jurisprudentiam civilem pe-  
nitus intelligendam, limandam & ulte-  
rius perficiendam collatura sit, nemo  
non hinc intelligit, modo a præjudi-  
ciis & ignorantia purgatum habeat a-  
nimum. Etsi autem Jus naturæ &  
philosophia civilis cum practica uni-  
versali potissimum influant in Jurispru-  
dentiam civilem seu positivam; sunt  
tamen etiam philosophiæ primæ hic  
suar partes, non modo quatenus dire-  
ctrices offert notiones, verum etiam  
quatenus principia largitur rationibus  
legum explicandis inservientia. Dedit  
ejus rei specimen haud inelegans Jctus  
eximius, *Cramerus*, collega nobis con-  
junctissimus (d), cum restitutionem  
spoliati adversus bonæ fidei posse-  
sorem vi notionis exceptionis, quam in  
philosophia prima evolvimus, arceret.  
Dabimus forsan & nos alia in his Ho-  
ris subsecivis, & principia Ontologiæ  
nobis jam profuerunt ad definitionem  
et in his philosophiæ primæ et justit-

---

(d) in Programmate de restitutione spo-  
liati adversus bonæ fidei posse-  
sorem.

justitiæ *Ulpiani* penitus intelligendam (e), imprimis autem in notionibus substantialium, naturalium & accidentalium feudi explicandis (f). Quemadmodum vero Jurisprudentia civilis operæ methodi demonstrativæ ad concordiam reducitur, ita ut in toto jure civili nulla amplius supersit dissonantia; ita simul ad systema philosophicum eadem methodo conditum relata ad concordiam revocatur cum philosophia, ut non modo appareat juris civilis cum ratione consensus; verum etiam nihil occurrat in toto jure civili, quod non plenissima luce fulgeat, qua fulgere potest, tenebris omnibus ac nebulis dissipatis. Est etiam influxus quidam mediatas, de quo nobis adhuc dicendum. Constat nos carere non posse Jure ecclesiastico. Ecclesiæ Romanæ servit Jus canonicum: quod cum nitatur hypothesebus theologicis, quæ Theologis Protestantibus parum probantur, nec juri isti in terris Protestantium promiscue locus esse potest. Quoniam

E

vero

(e) in Hor. A. 1729. Trim. vern. n. III.

§. 4.

(f) Hor. ej. A. Trim. æst. a. II.



vero jus ecclesiasticum niti debet dogmatis in Theologia probatis, ubi Theologia dogmatica & moralis in systema veri nominis fuerit redacta, & Jurisprudentiæ ecclesiastica ope methodi demonstrativæ cum eadem connexa, quantus sit hujus cum illa consensus liquido constabit & nemo non videbitum justæ sint nonnullorum queræ de Jurisprudentiâ papizante, an vel saltem subinde parum justæ. In ipsa quoque praxi juris utilitatem promittit influxus philosophiæ nostræ non contemnendam: id quod fieri posset alias luculentius ostensurus sum. Sit tam in Germania, quam apud externos qui hunc influxum agnovere, quem modum ex privatis ipsorum ad me teris mihi constat. Sed cum in publicum proferre nolim, quæ privatim me perscribuntur, ne plus juris in auctoritate mihi arrogem, quam quod mihi competere certus esse possum; non ad rationem, quam ad testimonium artis sue eminentium provocare, non ignorem penes plures plus veram auctoritatem, quam rationem sufficienter ponderatam. In pro-

tam civili, quam criminali facta sunt probanda & leges ad probata applicanda. Factorum probatio cum summa niti debeat evidentiâ, ne quisquam jure suo excidat, vel innocens condemnatur; & formam requirit legitimam, & principia certa. In utroque auxilium promittit philosophia nostra, si in ea diu multumque fueris versatus, & Jurisprudentia ad methodum demonstrativam reducta & cum ea connexa. Applicatio legum vel immediata est, vel mediata. Immediata supponit & leges ad propositiones determinatas reductas, & casum definiendum rite determinatum. Utrumque pendet a Jurisprudentia demonstrativa, quæ citra influxum philosophiæ demonstrativæ sperari non potest, & supponit in eo, qui leges applicare debet, acumen absque istis subsidiis non comparandum. Mediata applicatio supponit, ut ex legibus tanquam ex principiis deducas quasi legem, cujus immediata applicatione definitur casus datus. Etenim cum casus iste in legibus non contineatur, nulla quoque extat lex, cujus immediata applicatione definiri possit,

E 2

quid



quid in eo iustitiæ conveniat. Quæ-  
tur itaque qualem legem dare debe-  
legislator ad casum istum in foro de-  
finiendum, ut non violetur legum con-  
cordia. Non sufficere huic labori so-  
lam legum notitiam, sed præterea re-  
quiri, ut & principia philosophica per-  
spicias, & methodi artifex sis, intel-  
gentium nemo in dubium vocat. Ni-  
quis regerat experientiam contrariarum  
loqui, casus enim istiusmodi decidi quo-  
tidie ab iis, qui quid sit methodus de-  
monstrativa prorsus ignorant, & ab  
omni philosophia, multo magis ab omni  
Jurisprudencia demonstrativa vacui  
prorsus habent animum; is perpende-  
velim, quantus sit Doctorum ea in re  
disensus, & quam dissonantes sint co-  
legiorum Juridicorum diversorum sen-  
tentiarum. Agnoscere enim tenetur, re-  
tionem diversitatis necessario de-  
Quodsi jam tanto acumine præditi  
fuerit, ut eam perspicere possit, hanc  
aliam deprehendet, quam quod huius  
meri submittantur oneri, cui ferendi  
non dum sunt satis pares. Quodsi vero  
porro inquisiverit, quid fieri debe-  
ut robur, quod deest, acquiratur; non

alia commendari possunt media, quam  
ut animus philosophia & Jurispruden-  
tia demonstrativa imbuatur.

§. 17.

Cum de Jurisprudentia civili ad for-  
mam demonstrativam redigenda age-  
remus, utilitatem Jurisprudentiæ de-  
monstrativæ jam commemoravimus

(g). Quoniam vero philosophia no-  
stra influit in Jurisprudentiam civilem,  
quatenus ejus auxilio demonstrativa  
efficitur; quæ de utilitate Jurispru-  
dentia civilis ad formam demonstrati-  
vam redigendæ diximus, eadem pror-  
sus sunt cum iis, quæ utilitatem influ-  
tus philosophiæ nostræ in Jurispruden-  
tiam concernunt. Neque vero exigua  
est, quæ inde speranda, utilitas. Et-  
nim jus civile, quo nunc utimur, li-  
beratur ab omnibus dubiis interpreta-  
tionibus. Quantus nunc sit in inter-  
pretando Jure disensus, nemo non  
novit, qui vel obiter Jctorum volu-  
mina inspexit, ita ut non desint Jcti ce-  
lebres.

(g) Hor. subsec. A. 1730. trim. brum.  
num. II. §. 13.

lebres, qui audacter affirmant, omnem  
Doctorum dissensum ad diversam le-  
gum interpretationem redire: qua-  
re utut acumen suum desiderari pati-  
antur, inde tamen colligere licet, dis-  
sensum in interpretando esse admo-  
dum frequentem, cum alias a Jurispru-  
ditis haberi haud quaquam posset pro  
omni. Quamobrem qui dissensum  
interpretandis legibus a Jurisprudencia  
aufert, insignem eidem utilitatem ad-  
fert. Neque est quod quis dubitet, non  
tantam utilitatem ab influxu philoso-  
phiæ nostræ in Jurisprudenciam sper-  
rare liceat. Confidenter enim asse-  
mus, non aliud dari medium dissen-  
sum tollendi, quam ubi eodem modo  
philosophati fuerint Icti, quo nos phi-  
losophandum esse inculcamus, &  
Jurisprudencia eam formam induerit  
quam nos philosophiæ induimus.  
possibile enim esse, ut citra legitimam  
probationis formam evidenter pa-  
veritas, dudum evicimus. Legiti-  
autem in Jure probationes deside-  
buntur, quamdiu philosophia non  
peditat principia, in quorum evidenti-  
nihil prorsus desideravimus. At

cipia istiusmodi philosophia suppeditare nequit, nisi ubi ipsamet ad formam demonstrativam fuerit reducta. Perpetua adeo erunt Ictorum de intellectu legum disceptationes, quamdiu subsidia carebunt, quæ ipsis commendamus & quibus nunc carent. Altera Jurisprudentiæ ad formam demonstrativam reductæ utilitas, quam commendabamus, erat certitudo omnimoda de æquitate legum. Hæc equidem utilitas levis videri poterat; sed levis non censetur, ubi eam intimius perspexeris. Aliquid ejus jam monstravimus, cum utilitates Jurisprudentiæ demonstrativæ delinearem. Monuimus enim æquitate legum manifesta convinci iudicem justum, se in jure dicendo a iustitiæ tramite non discedere. Iudicem justum esse debere, nemo diffidetur. Erit autem justus, docente *Ulpiano* (h), si constans ipsi ac perpetua fuerit voluntas jus suum unicuique tribuendi, consequenter si firmum fuerit propositum in nullo casu a jure recedendi, quibuscunque tandem irrita-

E 4

mentis

---

(h) l. 10. ff. de J. & J.

ficulter quoque ad causarum patronum applicantur, qui cum vulgo male audiant, quod plurimi sint injustitiam amantes, & juris prosecutionem difficilem reddant ac sumtuosam, a justitia minore intervallo recedere poterunt. theoria ac praxi juris ad formam demonstrativam reducta. Paucissimi hominum adeo mali sunt, ut tales videri velint. Evidentia vero pellit ignorantiam, ne quis seipsum decipiat visus qui non est, atque fucatam speciem qua aliis imponit, ut ab ipsis habeatur qui non est. Insigniter autem voluntatem Judicis atque patroni causarum a justitiam inclinat veritas, quæ juri inest evidenter agnita: cum ex adverso juris cognitio non influat in voluntatem, ut tibi persuaseris jura cæco potentur arbitrio definiri. Unde non miramur esse haud raro Jurisperitos celebres qui cum quotidie jura doceant alios de decori tamen sibi minimè ducant, si in omnibus cum aliis negotiis vehementer injustos præbeant. Inter utilitates Jurisprudentiæ demonstrativæ porro retulimus controversiarum in foro nullis ambagibus obnoxiam tra-

Stationem & evidentem definitionem. Quoniam tot ac tantæ sunt hominum querelæ de litibus ultra hominum ætatem protractis, & de dissenſu jusdicentium in cauſis tam criminalibus, quam civilibus; haud exigua profecto videri debet utilitas, quam præſtat Jurisprudentia demonſtrativa, ubi juſtis illis querelis finem imponit: id quod fruſtra hætenus tentatum ab aliis, quiſcum medelam malo afferre vellent, cauſam magis vulnerarunt.

## §. 18.

Reſtat ut dicamus de influxu philoſophiæ noſtræ in Medicinam. Plures <sup>Influxus in Medicinam ſpeciatim</sup> ſunt Medicinæ partes, quas non eodem <sup>ſpeciatim</sup> proſus modo dividunt omnes. <sup>Oſtenditur.</sup> *Olivæ* *Jacobæus*, Medicus non incelebris, (p) totam artem medicam partibus duabus commodiſſime abſolvi poſſe exiſtimat, quarum prima de tuenda ſanitate agens *Hygiene*, altera de collapſa reſtituenda tractans *Therapeutice* appellatur. Hygienem ſubdiſtinguit in *Phy-*

(p) in Compendio Inſtit. Med. proleg.

§. 3. & 4.



*Physiologiam & Dieteticam*, quarum illa corporis humani statum naturalem exponit, hæc vero methodum integritatem ejus conservandi explicat. Therapeuticen in *Pathologiam, Semioticam & Curatoriam*, quæ *Praxeo* quoque *medicæ* nomine venit, subdividit, quarum illa statum corporis præternaturalem docet, morborum signa diagnostica & prognostica proponit, hæc denique methodum sanitatem restituendi cum universo remedium supellectile pro morborum diversitate huic negotio inserviente declarat. Ne mireris nullam hic mentionem fieri *Anatomie, Botanice & Chemie*: hæc enim *Physicæ* potius partes sunt, quam *Medicinæ*, etsi cum *Medicinæ* potissimum serviant, ut iis carere non possit Medicus, subinde tanquam *Medicinæ* partes considerentur, propterea quod a *Medicinæ* studiosis in *Academiis* prope modum solis tractentur. Unde & *Academia Regia scientiarum*, quæ *Parisiis* floret, *Anatomiam, Botanicam & Chemicam* ad *Physicam* specialem refert. Non jam disputamus, num etiam *Physiologia & Pathologia*, quæ tenu

tentus causas morborum explicat, ad  
 Physicam referri debeat, cum Physici  
 sit explicare quoque rationem status  
 tam naturalis, quam præternaturalis  
 corporis humani; nobis enim perinde  
 est, siue Medicinæ dicantur partes, siue  
 Physicæ capita, modo solidam contine-  
 ant doctrinam. Imperfectionem Me-  
 dicinæ nemo non hodie agnoscit &  
 quantum ægrorum salus sapius pericli-  
 tetur, nemo est qui ignorat. Quam-  
 obrem si Medicinam ad certitudinem  
 evehere valeamus, in id omnibus anni-  
 tendum erit viribus.

§. 19.

Physiologiam partem Physicæ agno- *Influxus*  
 scimus, atque adeo ipsimet eandem *philoso-*  
 pertractaturi sumus, si quidem Deus *phia an-*  
 vitam ac corporis animique vires tam- *toris in*  
 diu benignissime conservaverit, ut eo *Physiolo-*  
 usque laborem nostrum continuare *giam.*  
 nobis detur. Quamobrem non opus  
 est, ut de influxu philosophiæ nostræ  
 in Physiologiam dicatur. Quodsi ta-  
 men eam a philosophia naturali sepa-  
 rare & ad Medicinam trahere velis;  
 per nos quidem id facere licebit. Non  
 tamen



tamen alia dicenda erunt de philosophia nostræ in Physiologiam influxu quam quæ dicenda veniunt, ubi ipsa met pars philosophiæ habetur, cum constet partem philosophiæ unam in alteram influere. Nos in philosophia præsertim naturali hypotheses distinguemus a dogmatis, ne certa cum incertis confundantur: hypotheses vero cur eliminari ex Physica nefas sit, alibi jam abunde docuimus (q). Recipiendæ igitur etiam sunt in Psychologiam, ubi certa rerum cognitio nondum haberi potest, ea tamen cautione ut a dogmatis distinguantur, nec praxis medica ad eas accommodetur. Qui in philosophia nostra versatus fuerit, is non modo hypothesebus a dogmatis distinguendis adsuescet, verum etiam cavebit, ne in praxin influant, quæ eam dubiam ac incertam reddere possunt. Exemplo esse potest Psychologia rationalis, in qua hypotheses sollicitè distinguimus ab iis, quæ certa sunt vel cum iis nihil commune habent, & de-

**inceps**

(q) Hor. subsec. An. 1729. trim. vern.  
n. I. §. 5.

incens in philosophia morali cum cura cavemus, ne hypothefibus utamur tanquam principiis in demonstranda praxi morali, neque praxeos certitudini quicquā detogetur. Non injustæ sunt quorundam Medicorum nostra ætate querelæ, quod hypothefes in Physiologiam introducantur non sine damno artis salutaris, atque ideo jure urgent Medicinam ab omnibus hypothefibus esse purgandam (1): non tamen semper distinguere videntur, quæ confundenda non sunt. Nimirum hypothefibus superfluenda non est praxis Medicinæ seu medendi methodus, nec ex hypothefibus statuendum est de viribus medicamentorum, cum hoc pacto facile fieri possit, ut ægro noceant quæ prodesse debebant. Absit autem ut Medicus noceat ægro, qui medelam afferre debet! Enimvero quatenus hypothefes inserviunt veritati successu temporis detegendæ, & excitant inventores eorumque acumen augent, iis in quolibet

---

(1) Vid. Pitcarnius in Oratione de Medicina ab omni philosophorum secta libera Opusc. Med. p. 1. & seqq.

libet etiam Medicinæ parte locus est concedendus. Non deerunt in philosophia nostra exempla, quibus idea exemplaris hujus usus hypothesium animo ingenerabitur, ut adeo influxui ejus in Medicinam tribuere non vereamur rectum hypothesium in Medicina usum, tanto quidem confidentius, quanto certius constat, eos hypothesium in Medicina genuinum usum non agnovisse, qui abusum, quem fecere nonnulli, observarunt. Sane qui perpendit, quæ de Medico Astronomum imitante (s) docuimus; ultro largietur, Medicum in veritate investiganda hypothesebus subinde utiliter uti, immo uti debere. Quamvis vero hypothesebus utatur ad veritatem adhuc latentem in apricum producendam; non tamen ideo opus est ut iisdem praxin conformem efficiat. Ultro enim concedimus *Pitcarnio* (t) nihil hic decere pro vero affirmare, de quo usque adeo sumus incerti, ut nemo de bonis suis tam incertus esse velit, cum vitæ

non

---

(s) Hor. subsec. A. 1729. trim. brum.  
n. IV.

(t) l. c. §. 4. p. 3.

non minor, quem pecuniæ habendæ cura  
esse debeat. Neque vero prorsus  
negaverim hypothesebus subinde in  
praxi quoque esse posse locum. Nemo  
non novit in Medicina occurrere, quæ  
certitudinem pro arbitrio deducere  
non licet. Ubi vero in necessitate a-  
gendi constituimur, deficiente certitu-  
dine ad probabilia confugiendum, in  
eorum numero esse hypotheses, si-  
quidem satis limatæ sint, dubio caret.  
Sunt qui Physiologiam medicam a  
physica distinguunt, & hinc Medico  
non modo inutilem, sed prorsus no-  
væ existimant. Iipse *Pitcarnius*  
physicarum investigationem,  
qualem instituere solent philo-  
sophi, Medicis neque utilem, neque ne-  
cessariam pronunciat. Quatenus ad-  
mitti possit differentia diximus alibi (u).  
Subens concedo experientia duce in-  
veniri posse propositiones determina-  
tas, quæ Medicum in praxi juvant,  
si ignoret, quomodo effectus a  
causis suis dependeant. Ita novimus  
renibus secerni a sanguine urinam &  
per ureteres in vesicam deferri. *Physici*  
*F* *est*

(u) Hor. subf. A. 1730. trim. æst. n. 1 V. §. 6.





tudo, quæ nos a periculo errandi liberat & extra dubitationis aleam constituit. Quæ igitur Medico ad præxin profunt, in Physiologia traduntur multo accuratius exposita, quam si vulgari modo in notionibus confusis latent, ut non satis agnoscantur, adeoque & certius atque securius auxilium promittant. Etsi autem Physicus hypothesium genus usum faciens de causis interferat, quæ nondum prorsus explorata sunt, adeoque non satis tuto ad præxin transferuntur, immo si contingat, hypothesein esse falsam nocere possint ad præxin deducta; nondum tamen hinc concluditur, hypotheses nocere Medico ac ideo ex Physiologia medica esse eliminandas. Nocet enim abusus hypothesium, non hypotheses ipsæ, quarum usus Medicinæ prodest. Nimirum nocent, si hypotheses ab eo, quod rigida demonstratione firmari potest, non distinguantur iisdemque tanquam fundamento praxis superstruatur, atque in hoc ipsarum consistit abusus. Profunt, quatenus Medicum ad observationes & experimenta madducunt, ad quæ absque his ducibus

F 2

non

non pervenisset; ejusque acumen aget, ut in observationibus communibus ad ea attendat, quæ alias attentio ipsius sese subducerent. Atque in genuinus ipsarum usus consistit. Juvet ergo usus hypotheseum Medicum quemadmodum idem juvat Astronomum. Medicus, dum salutem ægri attendit, qui auxilium ipsius implorat, sua quoque augere debet cognitionem, posthac ægris plus auxilii ferat. Quod si nostro more philosophetur physicus & medicus, hypotheses cum iis, quæ dubia experientia constant, non confundit, usumque ab abusu distinguit, quatenus certitudinis tenaciter custodienda causa tam in theoria, quam praxi constanter colit rationis ac experientie connubium. Physiologia, pars Physicæ specialissima, principiis indiget. Physica non modo generali, verum etiam ex aliis ejusdem capitibus specialibus, immo ex philosophia prima, seu inde & cosmologia generali atque ipsa Psychologia petendis. Philosophia igitur nostra largiter influit in Physiologiam, tum quatenus ideam exemplarem tractandi questiones ad res naturales

ales spectantes animo ingenerat philosophia experimentalis & naturalis, tum quatenus principia, quibus illa oritur habet, rite determinat & firmat. Nullam injicimus mentionem eorum, quae de usu notionum directricium ex philosophia prima petitarum ad veritatem in Physiologia investigandam disponent, & quantum hoc studium promoveatur, ubi genuinam methodum ad philosophiam experimentalem & naturalem transferre didiceris; de his enim dicendum est in arte inventiendi.

**§. 20.**

Dietetica rectum imprimis usum sex *Influen-  
rum non naturalium, quas Medici philoso-  
phica au-  
toris in  
Dieteti-  
cam.*  
cant (x), declarat. Constat illas  
aërem, cibum & potum, excreta  
retenta, somnum & vigilias, motum  
quietem, passiones tandem animæ.  
Singula hic spectantur, prout in-  
ferunt in sanitatem corporis, eidem vel  
amica, vel inimica. Quamobrem ne-  
cessè est, ut singularum qualitates sus-  
fici-

(1) Hol. subsec. A: 1730. rim. æstiv.  
n. IV. §. 6.



ficienter agnoscantur, & quatenus impendat sanitas, ad liquidum perducatur. De aëre agimus in philosophia experimentalis & in physica dogmatica. Ubi methodi demonstrativæ leges observantur, ad notiones determinatas revocantur aëris qualitates, tum quatenus purus spectatur, tum quatenus vaporum & exhalationum receptaculum est & ventis varie agitatur. Si physica igitur experimentalis & dogmatica ad formam demonstrativam revocata non satisfaciat Diæteticæ in componendo recto aëris usu & evitando abusu. Quantum corpus nostrum a aëre pendeat, in Physiologia docetur, siue eam partem Physicæ, siue Medicinæ feceris. Neque usum, neque abusum aëris in tuenda sanitate docere posse, nisi certo cognoscatur corpus ab aëre dependentia, palam esse arbitror. Atque adeo Diætetica supponit Physiologiam ad formam demonstrativam redactam. Quæ de cibo ac potu in hac Medicinæ parte docentur, nulli prorsus principiis nituntur, sed tantumquam experientia comprobata sumuntur, cui quanta tuto haberi possit fide

non apparet. Mereretur tamen hoc Medicinæ caput, quod pro dignitate exco-  
eretur, omni luce eidem foenerata,  
qua perfundi potest, cum a cibo ac po-  
tu vita & sanitas magna, si non maxi-  
ma parte pendeat. *Ludovicus Lemery*  
initio hujus seculi idiomate patrio Tra-  
ctatum de alimentis edidit, in quo cibo-  
rum effectus tam bonos, quam malos  
recenset, principia chymica eorum e-  
numerat & cui ætati & temperamento  
inguli convenient indicat, additis in-  
cholis rationibus, quas alii negligunt  
autores: methodi tamen gnarus non  
diffitebitur, quæ ab eo traduntur, pro-  
cul adhuc ab ea evidentia distare,  
quam nos desideramus & quam optant  
omnes, quibus sanitas ac vita in pretio  
est. Cum tamen plurimum referat ut  
quædam nobis jam innotuerint de effe-  
ctibus & qualitatibus ciborum, ante-  
quam ad eas disquisitiones nos accinga-  
mus, quibus opus est ut ad certitudi-  
nem perducantur, quæ dubitationibus  
obnoxia sunt. Tractatus iste haud ex-  
iguo adjumento esse poterit, ubi quis  
ciborum ac potuum salubritatem &  
insalubritatem ad evidentiam perdu-  
cere

cere voluerit. Nostrum jam non e  
speciatim exponere, quænam obse  
vanda sint, ne scopo suo excidant g  
neri humano tam utilem præstituri o  
peram: sufficit philosophiam primam  
& naturalem, ac præsertim experimen  
talem, ad formam demonstrativam re  
actam, sive methodum spectes, sive  
principia, auxilia, qualia desiderari po  
sunt, offerre. Ciborum duplices sunt  
qualitates, nutritivæ scilicet atque me  
dicæ. Medicarum in nutritione quo  
que habenda ratio est, præsertim ubi d  
ciborum præparatione sermo incidit  
in qua compositioni locum esse nem  
non novit, tum etiam quando quis di  
versis ferculis una vescitur, ut conste  
quænam in uno prandio vel una cœna  
sint conjungenda, ne noceatur sanitati  
Unde intelligitur, diætetica ad ratione  
evidentes revocata, coquinariam quo  
que rationalem effectum iri. Neque est  
quod tibi persuadeas, quæ diuturna ex  
perientia comprobata sunt, nullo exa  
mine opus habere, nec majus ad sani  
tatem præsidium a cibo ac potu spe  
rari posse, ubi qualitates utriusque rigi  
disforme a priori demonstrare potueris  
quam

quam ubi nullas cur profint, vel nocent cibi ac potus, rationes reddere, valueris. Etenim quæ ab autoribus docentur, non adeo explorata sunt, quin subinde contrarium experiamur. Plura in medium afferre possem exempla, quæ domestica suggerit experientia: sed rationem reddi consultius est, cur ulteriori examini subjicienda veniant, quæ sub nudarum assertionum forma in scriptis Medicorum extant, aut rationibus stipantur non satis evidentibus. Nimirum vitio subreptionis nihil frequentius in observationibus communibus vix evitando, nisi ratio experientiæ suppetias ferat. Et ubi in hac Diæticæ parte connubium fiet rationis ac experientiæ, veritatibus nonnullis particularibus inventis, in potestate erit progressus ad universales, e quarum numero quoque sunt signa ciborum salubrium ac insalubrium combinandorum ac separandorum, quæ ad praxin magnum afferunt momentum, hæcenus autem desiderantur, vel, si quædam jam prostant, nondum sufficienter exposita, ut usui esse possint.

F 5

Cor-



*Cornelius Bontokoe* (y) istiusmodi signa dare voluit; sed quæ assumit, gratis concedenda non videntur. Quid somnus & vigiliæ ad statum corporis naturalem ac præternaturalem conferant, non intelligitur nisi constet, status corporis in somno ac vigiliis differentia, quam cum Physiologia distincte explicare debeat, ejus hac in parte opem implorat Diætetica. Non ante igitur Diætetica influxum somni ac vigiliarum in sanitatem demonstrabit, quam Physiologia ad formam scientificam fuerit reducta. Non ab simili modo idem patet de excretis & retentis, motu atque quiete, animique affectibus. Non sufficere hic communes observationes, sed experimentis opus esse Medicina statica Sanctoriana probat. Rectæ autem experimentandi methodi nos non rectius nec feliciter compotes fieri, quam ubi philosophia experimentalis methodo analytica ita pertractatur, ut experimentorum a se invicem dependentia & primorum ab obser-

---

(y) in der Abhandlung vom menschlichen Leben. part. 3. §. 17. p. 327. & seqq.

observationibus communibus pateat, quemadmodum a nobis factum (z). Inluit adeo philosophia experimentalis scientifice pertractata in Diæticam, si vel solam spectes methodum, sed eo modo, ut aliunde istum influxum frustra expectes. Etsi enim Astronomiæ interior cognitio, si ejus a primordiis usque ad nostram ætatem statum attente consideres, aliqua afferre possit adjumenta; ea tamen remotiora sunt, cum analytica & scientifica philosophiæ experimentalis tractatio propria offerat. Constat ex Psychologia (a), affectibus animi in corpore respondere motus peculiare sanguinis, qui ordinariè in eodem non observantur, & singulis quidem affectuum speciebus motus respondere diversos. Affectus animi in sanitatem ac vitam corporis influere nequeunt, nisi quatenus in corpore motus istos sanguinis fluidique nervi comites habent. Quamobrem dubitandum non est, Diæticam hac

in

(z) in Versuchen, wodurch zu gründlicher Erkenntnis der Natur der Weg gebahnet wird.

(a) Psych. empir. §. 611.

in parte multis veritatibus utilibus locupletatum iri, si omni differentia in motum sanguinis cadente ex Physiologia perspecta accurate definiveris motum sanguinis fluidique nervei, qualis in unaqualibet affectus specie reperitur. Quam vastum inveniendorum campum aperiat Diætetica, haud difficulter ex hactenus dictis perspicitur. Quod si quis in philosophia scientifica cum laude versatus, præsertim ubi accurata ac diligente Mathematicum tractatione præparatus ad eam accessit, ad Diæteticam excolendam animum appulerit; is deinceps deprehendet, qualia ante in Physiologia & philosophia naturali detegenda sint, quam dogmati diætetico sua constare possit certitudo. Inveniendorum numerus augetur, quando ei investigando operam damus, quod invenire intendimus.

## §. 21.

*Influxus  
in Patho-  
logiam.*

In Pathologia more apud Medicos recepto status corporis præternaturalis tantum modo in genere explicatur & causæ morborum eorumque symptomata generalia expenduntur: specialis autem



observationibus communibus pateat, quemadmodum a nobis factum (z). Inluit adeo philosophia experimentalis scientifice pertractata in Diæticam, si vel solam spectes methodum, sed eo modo, ut aliunde istum influxum frustra expectes. Etsi enim Astronomiæ interior cognitio, si ejus a primordiis usque ad nostram ætatem statum attente consideres, aliqua afferre possit adjumenta; ea tamen remotiora sunt, cum analytica & scientifica philosophiæ experimentalis tractatio propria offerat. Constat ex Psychologia (a), affectibus animi in corpore respondere motus peculiare sanguinis, qui ordinariè in eodem non observantur, & singulis quidem affectuum speciebus motus respondere diversos. Affectus animi in sanitatem ac vitam corporis influere nequeunt, nisi quatenus in corpore motus istos sanguinis fluidique nervi comites habent. Quamobrem dubitandum non est, Diæticam hac

in

(z) in Versuchen, wodurch zu gründlicher Erkenntnis der Natur der Weg gebahnet wird.

(a) Psych. empir. §. 611.

in parte multis veritatibus utilibus locupletatum iri, si omni differentia in motum sanguinis cadente ex Physiologia perspecta accurate definiveris motum sanguinis fluidique nervei, qualis in unaqualibet affectus specie reperitur. Quam vastum inveniendorum campum aperiat Diætetica, haud difficulter ex hactenus dictis perspicitur. Quod si quis in philosophia scientifica cum laude versatus, præsertim ubi accurata ac diligente Mathematicum tractatione præparatus ad eam accessit, ad Diæteticam excolendam animum appulerit; is deinceps deprehendet, qualia ante in Physiologia & philosophia naturali detegenda sint, quam dogmati diætetico sua constare possit certitudo. Inveniendorum numerus augetur, quando ei investigando operam damus, quod invenire intendimus.

## §. 21.

*Influxus  
in Patho-  
logiam.*

In Pathologia more apud Medicos recepto status corporis præternaturalis tantum modo in genere explicatur & causæ morborum eorumque symptomata generalia expenduntur: specialis autem

autem morborum tractatio ad Curatoriam, quam diximus, seu praxin medicam rejicitur. Nobis quidem perinde est, in quacunque Medicinæ parte hoc vel illud argumentum tractetur; presenti tamen instituto convenientius est, ut morbi in specie etiam in Pathologia considerentur. Dividimus adeo *Pathologiam in generalem & specialem*. Illa morbos eorumque symptomata in genere; hæc vero in specie explicat. Neque hic quicquam innovatur; specialis enim Pathologia cum Curatoria seu praxi vulgo conjungitur, ne disjungantur, ad quæ in praxi simul animum advertere debet Medicus. In Pathologia tam generali, quam speciali ad tria capita redeunt quæ dicenda sunt, inquiritur nimirum 1. in naturam, 2. in causas & 3. in symptomata morborum. Natura morbi dicitur Medicis, quæ stylo philosophico rectius essentia appellatur. Atque adeo hic notionis directricis loco sunt, quæ tam de ente in genere, quam de ente in universali in specie in philosophia prima tradidimus. Morborum notio in genere, tum etiam specialium morborum

lem; a posteriori autem patet, eum quoque dari in rerum natura posse: & quæ ratiocinando deduximus confirmantur. Requiritur autem status naturalis cognitio, quæ a priori est, ubi Pathologiam ad formam scientificam reducere volueris: tum enim cum Physiologia & philosophia ad eandem formam ante reductis connectenda, suppetias, sicubi opus est, ferente philosophia. Quid ad causarum cognitionem conferat philosophia ad notiones determinatas reducta, facilius adhuc perspicitur. Etenim patet, philosophiam primam suppeditare notiones causarum tanquam directrices præsertim eas, quæ ad causam efficientem atque effectum spectant, cum status præternaturalis pendeat a suis causis per modum effectus. Immo ipsæ causarum divisiones generales plurimum lucis ex philosophia prima hauriunt & notioni causarum prædisponentium & procatarcticarum multum claritatis accedit ex rerum nexu in Cosmologia generali explicato, præsertim ubi Physicam & ipsam quoque Physiologiam ac Diætetica methodo scientifica pertra-

tractaveris, ut rerum naturalium ne-  
xum intimius perspexeris & corporis  
inprimis nostri quoad statum suum de-  
pendentiam a rebus non naturalibus a-  
nimo comprehenderis. Logica sub-  
ministrat regulas perinde ac in naturæ  
morborum investigatione, ne vitium  
ubreptionis committas morborum  
causas ex observationibus deducturus:  
quod hic facillime accidere potest,  
ubi causis procataceticis non plus tri-  
buere debes, quam ad eas pertinet, in-  
præjudicium prædisponentium. Phy-  
sica autem, Physiologia & Diætica,  
ubinde etiam philosophia prima prin-  
cipia suppeditat ad ratiocinandum ne-  
cessaria, ubi demonstrare volueris, has  
causas esse status præternaturalis cor-  
poris seu morbi sufficientes. Quoni-  
am causarum sufficientia absque de-  
monstratione non intelligitur, ea ta-  
men Medico perspecta esse debet, tum  
quatenus remotarum cognitio facit  
ad morbos præcavendos, proximarum  
vero notitia ad eosdem curandos;  
quantum annitendum sit, ut Medicina  
ad formam scientificam reducatur &  
tum philosophia ante ad eam reducta  
con-



connectatur, nemo non videt. Quod Pathologiam specialem cum generali conjunxeris, seu quæ hic dicuntur & utramque applicaveris; quantus hinc nascatur meditandorum campus abunde perspicitur. Sed dabitur alias occasio mentem nostram de hoc Medicinæ capite utilissimo ad formam demonstrativam reducendo plenius apertum faciendi. Symptomata denique a morbo pendent, vel etiam subinde ab ejus causa proxima, quemadmodum ipsi morbi a proxima causa per modum effectus. Quamobrem quæ de causis morborum diximus, facile ad symptomata applicantur, ut adeo de hisce quædam in specie annotari non necesse videatur, præsertim cum alias in notionem symptomatis via analyticè inquirere constituerimus, ut illorum conatus juvemus, qui Medicinam cum philosophia juxta leges methodi demonstrativæ connectere voluerint, in fluxum philosophiæ nostræ in Medicinam ipso opere promoturi.

## §. 19.

*Influxus  
in Semi-  
oticam.*

In Semiotica explicantur signa sanitatis & morborum tam diagnostica, quam mor-

morbū præsentem indicant, ut Medicus certus esse possit, quo morbi genere laboret æger, quam prognostica, ex quibus futurus morbi eventus colligitur. Quemadmodum vulgo Pathologia non nisi morborum generalem theoriam exhibet, speciali ad Curatoriam rejecta; ita similiter in Semiotica non nisi signorum theoria generalis tradi suevit, signis morborum specialibus Curatorię reservatis. Enimvero hic loci consultius est, ut Semiotica specialis cum generali conjungatur, cum, quæ dicenda veniunt, ad utramque pertineant. Theorias signorum in abstracto ad notionēs determinatas revocavimus in philosophia prima (b). Hæc igitur notionēs directrices suppeditat, ubi in signa tam diagnostica, quam prognostica via analytica inquirere volueris, ac prima demonstrandi principia suggerit, ubi theoriam signorum demonstrare volueris. Eruuntur a priori tum ex causis morbi, tum ex functionibus organorum læsis, tum ex statu morbi præsentē, quatenus inde sequitur sequens.

G 2

(b) §. 922. seqq. Ontol.



quens. Atque adeo tam principiis physiologicis de functionibus organorum in statu naturali, quam pathologicis de causis morborum, de læsione functionum organorum in statu præternaturali, morborumque natura opus est, ut certo ratiocinio colligantur, quæ investiganda sunt signa. Iisdem opus esse principiis, ubi signorum theoriam demonstrare volueris, ex eadem ratione claret. Subinde quoque recurrendum erit ad principia philosophiæ primæ ac Physicæ, si quidem ratiocinia legitimo modo evolvi debeant, quemadmodum postulat methodus demonstrativa. A posteriori ex observationibus eruuntur & a priori eruta observationibus confirmantur, a posteriori reperta ex principiis modo memoratis demonstrantur, nunc experientia suppetias ferente rationi, nunc ratione experientiæ: id quod & de aliis Medicinæ partibus notandum. Supponit adeo Semiotica ad formam demonstrativam reducenda præter philosophiam primam, aliquando & Psychologiam & Physicam, partes quoque Medicinæ Physiologiam, Diæticam & Pathologiam

giam ad eandem formam ante red-  
ctas. Diætetica supponitur non modo  
quatenus Pathologia ejus implorat o-  
pem, ut certitudinem consequatur, ve-  
rum etiam per se in Semioticam influ-  
it, quatenus ex abusu rerum non na-  
turalium signa status corporis præter-  
naturalis pendent, & ipse status præter-  
naturalis peculiaria habet symptomata.  
Semioticam, Medicinæ partem utilis-  
simam, ea adhuc destitui evidentia, quæ  
in praxi satisfacit, experientia abunde  
confirmat, nec fieri potest, ut ad eandem  
perducatur, nisi ubi omnibus viribus  
in id annitantur viri ad artem saluta-  
rem excolendam nati, ut cum philo-  
sophia ad notiones determinatas revo-  
cata, beneficio istiusmodi notionum &  
ipsa connectatur.

§. 23.

Curatoria denique, quæ subinde & *Influxus*  
Therapeutice strictiori sensu accepto *in Cura-*  
vocabulo dici solet, itidem vel genera-  
lis est, vel specialis. A generali com-  
muniter separatur specialis, cum patho-  
logia & semiotica specialis eidem jungi  
suerit, quemadmodum paulo ante

G 3 dictum

dictum. Vocatur autem a nonnulli  
 Curatoria specialis juncta Pathologia  
 & Semioticæ speciali *Nosocomice* (c).  
 In Curatoria generali agitur de me-  
 thodo medendi & medicamenta ex tri-  
 plici naturæ regno petita quoad virtu-  
 tes medicas ad clases generales revo-  
 cantur, prouti v. gr. sunt vel emetica  
 vel cathartica, vel diaphoretica, vel diu-  
 retica, & ita porro. In speciali doce-  
 tur, tum qualibus medicamentis sit o-  
 pus, tum quibusnam in specie sit uten-  
 dum, ut morbus profligetur, vel sym-  
 ptomata mitigentur, tum denique quæ  
 pro dato quovis morbo conveniat æ-  
 gro diata. Medendi methodus cum in  
 eo potissimum versetur, ut remedia  
 apta eademque certo ordine adhibea-  
 Medicus, in indicationibus explicandi  
 multum occupatur, unde intelligitur  
 quid fieri debeat, ut ægro succurratur  
 quid vero omitti necesse sit, ne eiden-  
 noceatur. Atque his indicationibus  
 opus imprimis habet Medicus in Cura-  
 toria speciali, ubi speciem morbi op-  
 semio

(c) vid. Jonstonus Med. pract. part.  
 p. 499.

Semiotica certo cognovit. Supponit adeo indicatio medicamentorum virtutes medicas ad sua genera revocatas & singulorum in specie virtutes perspectas. Virtutes medicamentorum eodem modo investigantur & demonstrantur, quo ciborum ac potuum qualitates. Quamobrem quæ de cibo ac potu paulo ante (§. 20) dicta sunt, ea quoque ad medicamenta applicari debent. Petuntur medicamenta extriplici regno naturæ, animali, vegetabili & minerali, adeoque Physicæ objectum sunt. Quamobrem quin Physica ad notiones determinatas reducta influat in hoc Medicinæ caput, nemo est qui dubitare valet. Et quoniam hodie medicamenta arte chymica præparantur; hanc quoque ad rationes evidentes reduci optandum erat. Medicamenta alia simplicia sunt, alia composita. Compositio supponit virtutes simplicium cognitæ, ac inquirendum præterea, num in compositione simplicium virtutes alterentur. Rationes quoque reddendæ dosium medicamentorum tam simplicium, quam compositorum, cum quod genuina quantitate sumtum

agro auxilium affert, minore nil juvet, majore noceat. Nemo hic notiones determinabit, quales methodus demonstrativa requirit, nisi in philosophia & ceteris Medicinæ partibus eadem methodo pertractatis diu multumque fuerit versatus. Quemadmodum Geometria practica ad regulas, quæ praxi satisfaciunt, easque certas reduci nequit, nisi supponatur Geometria theoretica rigidis demonstrationibus munita; ita quoque praxi Medicæ deerit certitudo, quæ optari poterat, quamdiu partes ceteræ, de quibus diximus, evidentiam non fuerint consecuta. Nil addimus de regimine corporis in statu præternaturali: cum enim totum pendeat a recto rerum non naturalium usu in morbis, ita ut artis auxilio impetretur, quod natura negat, veluti si frigus a corpore arcetur vestimentis, vel aër in conclavi ope ignis in fornace efficitur calidus; ea patere debent per Diæticam & Pathologiam tam generalem, quam specialem. Plus igitur in præsentī non addimus.

*§. 26.*

*Necessitas*

*tas & n.*

Vita ac sanitate, si ab anima discesseris

seris, homini nil quicquam carius esse <sup>utilitas in-</sup>  
 debere in confesso est apud omnes. <sup>fluxus in</sup>  
 Quamobrem cum Medicina doceat, <sup>Medicina</sup>  
 quomodo vitam ac sanitatem conser-  
 vare, morbos præcavere & debellare  
 debeamus; si qua alia dogmata certa ac  
 evidentia esse debeant, de Medicinæ  
 dogmatis id inprimis desiderari nemo  
 refragabitur. Apparet adeo quam sit  
 necessarium, ut partes Medicinæ ad  
 formam demonstrativam reducantur  
 & cum philosophia ad eandem for-  
 mam ante reducta connectantur. Et  
 quoniam Medicina ad notiones deter-  
 minatas revocari haud quaquam pot-  
 est, nisi ante philosophia ad istiusmodi  
 notiones reducta fuerit, quemadmo-  
 dum veritatum medicarum a se invi-  
 cem & a philosophicis dependentia,  
 quam modo contemplati sumus, mani-  
 festo loquitur; immo utilem hac in  
 parte Medicinæ operam navare mini-  
 me potest, nisi qui methodi discendæ  
 gratia in Mathesi fuerit multum ver-  
 satus & philosophiam methodo scien-  
 tifica pertractatam sibi familiarem red-  
 didit, ne idea exemplari evidentiam  
 dogmatis venandi viribusque desti-



tuatur; quam necesarius sit philosophiæ nostræ in Medicinam influxus, nemo non videt. Etsi autem tanta sit in Medicina agendorum moles, ut eam ab uno homine superari haud quamquam posse lubentissime concedamus, immo tanta requiratur observationum repetendarum & continua repetitione emendandarum copia, ut unicum seculum, nedum unius hominis ætas tanto molimini sufficiat; non tamen de successu desperandum, ubi plures per plura secula laborem cœptum continuabunt, quemadmodum Astronomia docere potest eos, qui rationum perspicillis usi idem videre non valent. Ponamus vero tandem obtineri in arte salutari notiones determinatas ac evidentes, quales desideramus: sanitatem magis in potestate habebunt homines regulas diæteticas a Medicis edocti, ipsi vero Medici in potestate magis habebunt morbos ac certius ægrotis afferent auxilium. Atque hæc ad utilitatem influxus philosophiæ ad leges demonstrativæ methodi exactæ in Medicinam probandam abunde sufficiunt.



II.

*De bona fide toto præscriptionis tempore requisita Jure Canonico.*

§. I.

**T**yronibus notum est, jure civili sufficere ad præscriptionem, bonam fidem adesse initio acquisitæ possessionis; at jure canonico tempore quoque intermedio semper bonam fidem exigere (a). *Innocentius III.* Pontifex Romanus hanc urget rationem, quia omne, quod non est ex fide, peccatum est. Ita enim (b): Quoniam omne, inquit, quod non est ex fide, peccatum est; synodali judicio definimus, ut nulla valeat absque bona fide præscriptio, tam canonica, quam civilis. Cum generaliter sit omni constitutioni atque consuetudini derogandum, quæ absque mortali peccato non potest observari. Unde oportet, ut, qui præscribit, in nulla temporis parte rei habeat

*Institu-  
tum au-  
toris.*

con-

---

(a) vid. Struvii Jurisprud. Rom. Germ. forens. lib. 2. tit. 9. §. 9.

(b) c. fin. X. de præscript.

conscientiam alienæ. Rident subinde Doctores Protestantes Pontificem, quasi reddiderit rationem parum convenientem a baculo ad angulum argumentatus, atque hoc inprimis exemplum allegare solent, quoties contendunt in Jure Canonico allegari rationes prorsus alienas, quibus nulla infit vis ad persuadendum, quod probari debebat. Nihil enim inconvenientius dici posse opinantur, quam præscriptionem ex fide proficisci debere sensu scripturæ & bonam fidem, quam in præscriptione requirunt leges, eandem esse cum illa fide, de qua loquitur Apostolus (c): Omne, inquit, quod non est ex fide, peccatum est. Mihi contrarium videtur, qui contendo & bonam fidem juxta finem Juris canonici toto præscriptionis tempore requirendam esse, & rationem a Pontifice allegatam esse genuinam ac menti Apostoli maxime conformem. Lubet igitur in præsentī ostendere, quod verba Apostoli conveniente loco allegentur a Pontifice & quod hypothēsibus Pontificiis

---

(c) Rom. XIV. 23.

ficiis convenienter ex iis inferatur, quod inde ab eodem colligitur.

§. 2.

Primum itaque dispiciendum, quid *Quid A-*  
 Apostolus fidem appellet eo loco, ad *postolus*  
 quem provocat Pontifex. Qui Pon- *Rom. XIV.*  
 tificem reprehendunt, in ea sunt opi- *fidem ap-*  
 nione, quod ipsi sermo sit de fide sal- *pellet.*  
 vifica: sed in eo oppido falluntur.  
 Repugnat enim contextus & reclamant  
 Interpretes etiam Protestantes. Ex  
 contextu nimirum apparet, per fi-  
 dem hic intelligi iudicium, quod lici-  
 tum sit, quod agimus. Atque adeo  
 ex fide non esse dicitur, quod, dum fa-  
 cimus, illicitum tamen iudicamus. Apo-  
 stolus enim contendit, si quis a Judais-  
 mo ad christianismum conversus sibi  
 persuadet legem de ciborum mundo-  
 rum & immundorum discrimine sibi  
 adhuc observandam esse & hac per-  
 suasione non obstante carnem pro im-  
 munda habita comedit, eum peccare,  
 & hanc reddit rationem, quod non  
 agat ex fide, hoc est, secundum con-  
 scientiam, peccatum vero sit, quod ex  
 fide non est, hoc est, quod contra  
 con-

conscientiam fit, Dictum igitur Apostoli omne quod non est ex fide, peccatum est, convenit cum regula philosophorum: Quicquid fit contra conscientiam, peccatum est, etiam ubi fuerit licitum, vel, ut alii efferunt, conscientia erronea obligat hominem, ne contra eam agat. Etenim hanc obligationem urget Apostolus isto loco. Unde *Hammondus* celebris Paraphrasta novi Testamenti hunc locum ita effert: „ Ad judaizantem quod attinet, satis causæ non est, cur male habeatur, quia non audet comedere quod sibi illicitum esse putat: lethale enim esset peccatum, & propter quod ejus conscientia eum damnaret, si ederet aut faceret rem quampiam adiaphoram, dum eam ipse illicitam existimat. Quisquis aliquid facit, nec judicat minimum id licitum esse (quod judicium vocatur hic fides & cognitio 1. Cor. VIII. 7), sine dubio peccat., Et in Annotationibus *Clericus* verba Apostoli, omne quod non ex fide est peccatum est, ita reddit: „ Quicquid facimus, dum nescimus, licitumne sit, nec

„ ne,

„ ne , id proficiscitur ab animo liciti  
 „ atque illiciti parum curante , adeo-  
 „ que peccatum est. „ Probat ibidem  
 vocabulum *πίστις* ab Apostolo sumi in  
 significato recepto loco *Philonis* Ju-  
 dæi (d), in quo sacrificium Abra-  
 hami allegorice interpretatus sub-  
 dit : „ ἀριστον ἱερεῖον ἡ συχία καὶ ἰπποχὴ  
 „ περὶ ὧν ἔκ εἰς πίστις : opima victima  
 „ est quies & hæsitantia in rebus, qua-  
 „ rum fides non est „. Certa enim  
 hic fides esse dicitur eorum , quorum  
 conscientiam certam habemus , judi-  
 cantes scilicet, nihil restare dubii , quo-  
 minus ea pro licitis habeamus. *D. Tho-*  
*mas* probaturus conscientiam erran-  
 tem obligare ad hunc locum Apostoli  
 provocat & fidem per conscientiam  
 explicat (e). Vixit is seculo XIII, quo et-  
 iam *Innocentius* III. Ecclesiæ præfuit.  
 Unde patet isto ævo dictum Apostoli  
 eodem modo fuisse explicatum , quo  
 idem explicat *Hammondus* , explicant  
 quoque alii inter Protestantes interpre-  
 tes,

(d) in libro de Profug. p. 336.

(e) in Summa Theol. part. p. 2. quæst.  
 18. art. 5. Conf. *Carbonem* in Com-  
 pendio l. c. annot. 1. p. 243.

tes, etsi plerique fidem salvificam ab Apostolo intelligi velint & hinc eodem dicto utantur ad probandam thesin in se alias veram (f), quod opera bona Christianorum ex fide in Christum proficisci debeant. Quamobrem dubio caret, *Innocentium* III. eodem sensu accepisse verba Apostoli, ut per fidem conscientiam intelligeret, qua denotari iudicium de actionis committendæ vel omittendæ moralitate nemo est qui nesciat. Cum nemine seram contentione recipiamus, utrum fidem rectius per conscientiam, an per fidem salvificam interpretemur: nobis enim sufficit in dubium vocari minime posse quod Pontifex, dum ad dictum hoc Pauli provocat rationem redditurus, cur bona fides toto præscriptionis tempore requiratur, non alium sensum eidem tribuerit. Non nego obligationem conscientie errantis fidei salvificæ esse conformem, cum eam demonstrativa ratione inde deduci posse dudum cognoverim, ex quo dogmatum theologicorum nexum seu mutu-

---

(f) vid. Gerhardus in Loc. 20, §. 8. f. 4.

mutuam earundem a se invicem dependentiam scrutatus sum. Quamobrem si quis vel maxime urgeret, Apostolo de fide salvifica sermonem esse, concedere tamen debet, cum negare non possit, ipsum obligationem conscientiae errantis in isto loco urgere, quod idem fidei adversa judicet salvificae, quae contrariantur conscientiae erranti, ac ideo in numerum peccatorum referat conscientiae erranti adversa, quod repugnent fidei salvificae. Non itaque difficile erit salvare rationem Pontificis, si vel maxime fidem, de qua loquitur Apostolus, pro fide salvifica accipias. Nostrum tamen est interpretari verba Pontificis menti ejus conformiter, non vero iis affingere sensum ab eadem alienum, cum non ingenii ostentationi, sed veritati litemus.

§. 3.

Hisce praemisfis intelligitur, quid sibi velit Pontifex in nostro capitulo. *Interpretatio capituli* Nimirum constituit, ut, qui praescribit, in nulla temporis parte habeat conscientiam rei alienae, hoc est, ut toto praescriptionis tempore persuasus sit, se  
H rem



rem a domino accepisse, minime autem ad notitiam ipsius pervenerit, quod eam a non domino acceperit. Persuasus enim se rem a domino acceptam possidere, eam bona fide possidet: at qui contrarium novit, in mala fide versatur, si stylo Juris exprimere velis, quæ modo vulgariter enunciavimus. Reddit autem hanc rationem, quod omni constitutioni atque consuetudini derogandum sit, quæ absque mortali peccato observari non potest, atque adeo jus civile, quod tantummodo initio acquisitæ possessionis bonam fidem requirit, in earum constitutionum numerum refert, quæ absque mortali peccato observari non possunt. Unde apparet, Pontificem possessionem malæ fidei pro peccato mortali habere, quod in homine Christiano tolerari minime possit. Probat porro, cur possessio malæ fidei sit peccatum mortale, quia est contra conscientiam, Apostolus vero peccatum pronunciat, quod non est secundum conscientiam, sed eidem aversatur. Mens adeo Pontificis hæc est. Quoniam docente Apostolo peccatum mortale est, quod est contra conscientiam

entiam, qui vero mala fide possidet, novit rem a se possessam esse alienam, adeoque contra conscientiam eam possidet; malæ fidei possessio peccatum mortale est. Quamobrem cum peccatum mortale nunquam tolerari possit, nec in præscriptione toleranda unquam mala fides. Necesse igitur est ut præscribens toto præscriptionis tempore in bona fide versetur. Hoc pacto liquet, nihil absurdi in ratiocinio Pontificis contineri, nec eum inepte dictum Apostoli allegare fide salvificam cum bona fide Jætorum confusa.

§. 4.

Erunt forsan alii, qui rem ipsam re- Car Pon-  
tifex bo-  
nam fi-  
dem toto  
præscri-  
ptionis  
tempore  
urgere  
debuerit,  
prehensuri sunt, quasi absque ratione urgente a Jure civili recedat Pontifex conscientia prætextu, eidem minime concessuri, quod constitutionibus annumerandum sit jus civile bonam fidem initio saltem possessionis acquisitæ urgente, malam fidem postea supervenientem tolerans, quæ absque mortali peccato observari non possit: ostendendum itaque nobis est, quod secundum notiones theologicas, quæ ipsi

H 2

fuere,

fuere, possessionem malæ fidei pro peccato mortali habere debuerit, nec sine Juris canonici salvo, mala fides superveniens in præscriptione tolerari poterit. Utrumque probatu haud difficile, modo principiorum Theologiæ Scholasticæ non fueris ignarus, quam cum *Petrus Lombardus* seculo undecimo in ordinem redegerit & *Thomas Aquinas* seculo duodecimo, quo vixit *Innocentius III.* exposuerit, dubitandum non est, quin huic familiaris fuerit. Constat vero Pontificiis peccatum mortale a veniali ita distingui, ut illud de se inducat reatum pœnæ æternæ, hoc vero non item. Ob peccatum adeo mortale homo damnatur, nisi eidem remittatur: non vero remittitur, quamdiu in eodem perseverat. Jam in numero peccatorum mortaliū est peccatum contra conscientiam, quando nimirum quis novit aliquid esse illicitum & hoc tamen non obstante idem facit. Unde peccatum contra conscientiam erroneam, de quo loquitur Paulus, stantibus hisce principiis utique mortale est. Etenim qui per errorem judicat aliquid esse illicitum,

tum, & hoc tamen non obstante idem facit, idem utique faceret, etiam ubi non erraret, adeoque quoad ipsum perinde est, ac si nosset esse illicitum & hoc tamen non obstante faceret. Mortaliter itaque peccat. Jam qui mala fide possidet, is novit rem, quam possidet esse alterius, adeoque eam injuste a se detineri, cum per legem naturæ alteri restituere debeamus quod suum est, & hoc tamen non obstante eam detinet nec alteri restituit, immo nunquam restituendi animum habet. Detinet igitur rem alterius contra conscientiam, adeoque mortaliter peccat, consequenter possessio malæ fidei peccatum mortale est. Ecquis non videt *Innocentium* vi hypothesium suarum non potuisse non possessionem malæ fidei in numerum peccatorum mortalium referre. Quamprimum adeo mala fides supervenit, hoc est, quamprimum quis convincitur, se possidere rem alterius, nec restituendi animum habet, in peccatum mortale incidit, adeoque periculo damnationis æternæ sese exponit. Et quamdiu possessio malæ fidei continuatur, possessor in

H 3 pec-

peccato mortali perseverat, immo quamdiu animus ipsi non est rem a se injuste detentam domino suo restituendi, tamdiu in peccato mortali perseverat, adeoque damnationis æternæ obnoxius manet. Hæc omnia manifesta sunt secundum hypothesen Pontificis, ut de iis nullum ipsi dubium superesse potuerit. Atque ita probavimus primum, quod probandum erat. *Innocentius* cum probare non posset, hominem in peccato mortali adeoque eo in statu constanter perseverare, quo damnationis æternæ obnoxius est; nec jus civile probare potuit, quod malam fidem supervenientem admittit in præscriptione, cum ex ipsius mente hic modus præscribendi observari non possit, nisi permittatur, ut quis perpetuo in peccato mortali perseveret. Jam Jus canonicum civium actiones ad finem æternæ beatitudinis dirigit (i), atque adeo in eo a civili differt, quod non tantummodo honestatem æternam respiciat, quemadmodum Jus civile, verum etiam conscientie rationem habeat.

---

(i) *Lancelottus* in Instit. J.C. lib. i. tit. i.



**habeat.** Quamobrem cum possessio malæ fidei sit peccatum mortale atque adeo possessorem æterna beatitudine privet per modo dicta ; ea nunquam hoc jure permitti, consequenter nec mala fides superveniens in præscriptione tolerari potuit. Unde in capitulo nostro disertis verbis inferitur : oportet ut qui præscribit in nulla temporis parte rei habeat conscientiam alienæ. Atque ita alterum quoque probavimus, quod erat probandum. Utroque autem sufficienter probato, evidens est, Pontificem reprehendi minime posse, quod conscientia prætextu jus civile inutiliter immutaverit. Nemo enim ab eo requisiverit, ut aliter statuerit, quam ex principiis theologicis tunc temporis receptis & probatis. Alia vero quaestio est, num secundum principia Theologorum Protestantium mala fides superveniens in præscriptione tolerari possit ; alia quoque est, num possessio malæ fidei supervenientis in tantum periculum animæ conjiciat hominem, quantum visum Pontifici. De neutra harum jam disquirimus : neque enim nobis jam sermo est de capituli

H 4                      veri-

veritate, sed tantum de genuino ejus sensu & ratione a Pontifice allegata, utrum ea sit ad rhombum, nec ne, hoc est, num Pontifex ex dicto Pauli stantibus hypothesebus suis legitime ratiocinetur, ut nullo judicii defectu argui ideo possit, consequenter hoc exemplum perperam allegetur ab iis, qui rationes Juris Canonici exagitare solent. Fecimus igitur, quod nostrum erat, dum evicimus Pontificem ex hypothesebus suis legitime fuisse argumentatum.

## §. 5.

*An fides  
Apostoli  
& bona  
fides Ictis  
rum de-  
notent  
rem ean-  
dem.*

Quod si quaesiveris, utrum bona fides Ictis eodem sensu accipiat, quo fides Apostolo; citra hæitationem respondemus, id nec necesse esse, ut salvetur ratiocinium capituli, nec ita visum Pontifici. Vidimus supra Pontificem vocabulum fidei in dicto Apostoli sumsisse pro judicio, quod licitum sit, quod facimus (§. 2), & quod philosophis conscientia dici solet. Bona fides Ictis dicitur (k) sincera conscientia

---

(k) Simon Schardius in Lexico Juridico.



entia unumquemque certo excusans de ignorantia rei alienæ, quam vel tradit alteri, vel accipit ab alio. Apostolus igitur vocabulum fidei secundum genium linguæ Græcæ latiori in significatu; Jcti vero vocabulum bonæ fidei in sensu strictiori sumunt. Præterea notio Apostoli primario refertur ad actionis moralitatem ex opinione agentis; notio autem Jctorum ad dominium rei, quæ traditur vel accipitur, ex opinione tradentis vel accipientis. Non adeo unus idemque est fidei significatus Apostolo atque Jctis. Notionem utramque cum penitus perspexerit Pontifex, quin diversitas significatus ipsi nota fuerit dubitandum non est. Nimis adeo pueriliter sentiunt, qui sibi persuadent, Pontificem sono vocabuli delusum fidem salvificam cum bona fide Jctorum, adeoque res toto cœlo diversas confudisse. Etsi autem non idem prorsus sit vocabuli significatus Apostolo & Jctis, ea tamen diversitas minime obstat, quo minus dicto Apostoli tanquam principio ratiocinandi uti potuerit Pontifex, ubi ipsi cum bona fide Jctorum negotium fuit.

H 5

Ecquis

Ecquis enim hanc ratiocinantibus legem scripsit, ut ad probandam propositionem non utantur principio, in quo vocabulum aliquod, quod in illa extat, alio significato sumitur, quam in ista propositione? Veritas enim non a vocabulis, sed a notionibus pendet. Equidem non probant leges methodi, ut in una eademque disciplina unum idemque vocabulum in diversa accipiatur significatione: inde autem non sequitur, quod, si ad principia extrinseca recurrendum, non assumi possint principia, in quibus terminus aliquis in alio significato accipitur. Immo acumen iudicii probat, si quis istiusmodi principiis rite utatur, quando iisdem habet opus, ut non obstat æquivocatio, quominus probe ratiocinetur, quemadmodum fecit Pontifex. Ceterum hoc exemplo docemur, quam sit necesse rationes, quibus veritas thesium adstruitur, evolvi, quemadmodum postulat methodus demonstrativa, ut ab omnibus vis probandi percipiatur, & a temerariis iudiciis sibi temperent acumine destituti.

## III.

*De Notione Corporis.*

Pars altera.

## §. I.

Cum nuper (a) in notionem corporis via analytica inquireremus; ex phænomenis deduximus ad eandem requiri extensionem, vim inertię atque vim motricem, quę simul in corpore tanquam in subiecto admittenda, ut phænomenorum ratio sufficiens inde reddi possit. Vidimus præterea notionem extensionis, vim inertię atque vim motricis non esse primitivas, sed in alias simpliciores resolvable. Immo vidimus corporum elementa, unde oriuntur, esse substantias simplices, atque in iis, tanquam phænomenorum fonte, reperiri debere rationes sufficientes, cur corpora sint extensa, cur extensum sit imbutum vi inertię & cur insit corporibus vis motrix. Rationem cum nuper reddere non possemus ob spatii angustiam.

---

(a) Trim. brum. anni super.n.IV.

gustias, nos id proxime facturos esse promissimus. Agedum itaque! liberemus fidem nostram! Monui jam nuper in Cosmologia nos quæ huc spectant jam synthetica methodo proposuisse; hic vero via analytica rationes istas perscrutandas esse, qua in ipsam corporis notionem inquisivimus. Promissi igitur memores ea via constanter incedemus.

## §. 2.

Quo sensu  
sumatur  
vis motrix  
diversitas  
dicantur  
phenomena.

Quodsi ergo ad extensum animum advertimus, eidem figuram inesseprehendimus, quatenus limitatum est, & figuram in eodem extenso diversimode variari posse observamus, extensione atque hinc pendente magnitudine salva. Extensio itaque cum sit constans quædam determinatio, diversimode modificabilis, supponit subiectum, cui inest, perdurabile & modificabile, adeoque substantiam aliquam, de qua prædicatur (b). Atque inde est quod *Cartesiani* ipsam extensionem substantiam corporum esse contendunt.

---

(b) §. 768. Ontol.

dant. Vis inertię per extensum æqualiter diffusa nec ullam subit mutationem, quamdiu extensum non augetur, vel minuitur. Quamobrem cum vis inertię constans quædam determinatio sit, extensionis socia; peculiare non requirit subjectum, cui inhæret. Atque ideo extensio & vis inertię tribuuntur materiæ tanquam eidem subjecto & materia pro substantia venditatur. Immo *Cartesianis* materia & corpus synonyma sunt, quæ tamen nos a se invicem distinguimus & distinguere debere ex iis patet, quæ nuper de notione corporis diximus, cum præter materiam ad corpus quoque requiratur vis motrix, seu stylo scholæ forma substantialis. Porro de vi motrice jam nuper (c) evicimus, quod sit perinde ac materia subjectum perdurabile & modificabile, ideoque ab *Aristotele* formæ substantialis nomine fuerit compellata. Videtur itaque corpus ex duabus constare substantiis, nimirum materia, extensionis ac vis inertię subjecto, & vi motrice primitiva, quarum una alteram permeat.

---

(c) Trim. brum. A. 1730. n. IV. §. 6. 7.

meat. Enimvero cum hujus permeationis nullam habeamus notionem, multo minus actionis vis motricis in materiam; dubitandi hinc nascitur ratio, utrum ea, quæ ex phænomenis colligimus, revera ita sese habeant; an verò tantummodo appareant, quamdiu corporis determinationes intrinsecas nonnisi confuse percipimus. Monuimus enim jam nuper nos eas nonnisi confuse percipere & omnes sane difficultates, quæ ex eo consequuntur, si materiam & vim motricem pro duabus substantiis diversis se invicem permeantibus habeamus; abunde loquuntur, nos extensionem, vim inertiam & vim motricem nonnisi confuse percipere, quamdiu in iis acquiescimus, quæ sensui accepta ferimus: confuse enim percepta aliter apparent quam sunt & hinc cum pro talibus habeantur, qualia apparent, in difficultates inextricabiles, immo manifestas contradictiones nos conjiciunt. Sume e. gr. solis figuram esse disceam, quemadmodum visus insinuat. Ubi ex motu macularum collegeris motum vertiginis solis; manifesta hinc enascetur contra-

tra.

traditio , scilicet quod circulus circa diametrum in gyrum actus oculo immoto constanter instar circuli apparere debeat. Confuse percepta phaenomena dicimus (d), quo sensu phaenomena dicimus colores , aliasque qualitates sensibiles, ipsam etiam gravitatem & vim attractricem universalem materiae, siquidem sufficienter probari possit. Eodem igitur sensu materia quoque & vis motrix seu forma substantialis scholae phaenomena dici debent. Atque ea de causa ex simplicibus substantiis tanquam phaenomenorum fonte horum quoque phaenomenorum reddenda ratio est.

## §. 3.

Hæc tamen phaenomena ab aliis differunt. Etenim cum phaenomena alia, Differe-  
tia ab aliis pha-  
nomenis, veluti colores & ceteræ qualitates sensibiles, per modum accidentium concipiuntur, quæ subjecto inhaerent, ex adverso materia & vis motrix, quemadmodum modo vidimus (§. 2), per modum substantiarum concipiendæ sunt. Quamobrem cum *Aristoteles* sub-



substantiale dixit, quod substantiæ instar concipi debet, etsi talis non sit, dum formas substantiales appellavit principium corporum activum, quod ipsis quidditatem suam largitur (e); eum imitati materiam & vim motricem phenomena substantiata dicimus (f). Præterea phenomenon ceterorum, quæ instar accidentium concipiuntur, rationes petuntur ex aliis phenomenon & tandem ex substantiatis; ast substantiatorum ratio immediate ex simplicibus petenda, quemadmodum abunde perspectum est iis, qui in philosophia naturali fuere versati, & per ea, quæ istis insunt, intelligibili modo explicanda veniunt, phenomena hæc fundamentalia.

## §. 4.

Notio di-  
rectrix in  
investi-  
ganda ra-  
tionem  
determi-  
nationum  
intrinsic-  
eorum  
corporis.

Ratum igitur est, extensionem & vim inertiam, sive materiam, atque vim motricem, sive formam substantialem, non aliter a nobis percipi quam colores ac alias qualitates sensibiles, consequenter vi intellectus ubi concipiuntur.

(e) Hor. subf. loc. cit. §. 7.

(f) Cosmol. §. 299 & 300

tur, alias prorsus podire notiones, per quas intelligatur, quid in imaginibus istis involvatur. Confusæ perceptiones ut rite evolvantur, ex Psychologiâ rationali repetendum (g) ideas sensuales esse similes objecto, quod repræsentant, & hinc, dum sentimus, animam sibi repræsentare substantiarum simplicium determinationes intrinsecas, sed in unum confusas (h). Ad hanc enim similitudinem ubi animum advertimus, quomodo prodeant ideæ confusæ extensionis, vis inertię, atque vis motricis palam fiet. Ista igitur similitudo idearum sensibilibum cum sensibilibus notionis directricis vice fungitur in investiganda ratione intrinsecarum determinationum corporis. *Cartesius* similitudinem istam non agnovit, sed perceptiones confusas ex solo Dei arbitrio mutationibus ab objectis sensibilibus in organa sensoria impressis respondere voluit: unde ideas qualitatum sensibilibum pro primitivis habuit atque simplicibus, neque adeo animadvertit extensionis, vis motricis ac vis inertię

I

ideas

(g) §. 91.

(h) §. 98.

ideas in alias resolubiles & ab altiori principio deducendas esse. Agedum itaque! similitudine ista utamur tanquam fida duce: ita enim ad interiorum corporis rationem propius accedemus.

### §. 5.

*Ratio extensionis.*

Dum extensum percipimus, multitudinem nobis repræsentamus in unitate, adeoque idea extensionis supponit plurium coëxistentiam & unionem, unde continuitas in extenso resultat (i). Corpora sunt elementorum aggregata (k). Unde cum perceptio animæ sit rei perceptæ similis seu idea similis suo ideato; anima corporum extensionem sibi repræsentans non potest sibi repræsentare nisi elementa, quibus aggregatis corpus constituitur. Hæc elementa cum singula sint inter se dissimilia (l), cum alias in aggregatis seu corporibus nulla esset diversitas; plura quoque illa ab anima repræ-

(i) Hor. subf. A. 1730. trim. aut. n. IV.  
§. 5. conf. §. 548. & seqq. it. §. 566  
Ontol.

(k) §. 176. Cosmol.

(l) §. 195. Cosmol.

repræsentari debent tanquam diversa: Unde idea extensionis involvit plurimum a se invicem differentium coëxistentiam. Enimvero elementa rerum visu ne quidem armato distinguere valemus, cum observationibus microscopicis testibus ne quidem corpùcula mixta, veluti in metallis, oculo optime amato distinguere valeamus. Quamobrem cum anima per essentiam suam sibi repræsentet corpora convenienter mutationibus, quæ in organis sensoriiis contingunt (m); clare & distincte singula elementa sibi repræsentare nequit, sed ea inter se confundit. Unde cum nihil diversitatis clare, nec unitates numerum ingredientiæ sigillatim percipiantur: in idea extensionis remanere nil quicquam clari potest nisi pluralitas & diversitas indeterminata. Atque ad hoc patet quomodo notionem extensionis ingrediatur notio multitudinis seu pluralitatis indeterminatæ atque præterea diversitatis notio abstracta. Jam elementa ad corpus constitutendum concurrentia ita aggregantur, ut

I 2

inde

(m) §.66. Psychol. rat.

inde prodeat corpus unum. Quamobrem vi similitudinis idea cum ideato elementis quoque inesse debet, quod confuse perceptum notionem unionis invehit notioni extensionis. Elementa rerum materialium omnia inter se connexa sunt (n), quatenus scilicet mutationum omnium, quæ in uno elemento contingunt, ratio reddi potest ex mutationibus, quæ in altero contingunt (o). Quemadmodum vero elementa singula clare atque distincte percipere non possumus, ita quoque eorum nexum per determinationes intrinsecas explicabilem clare atque distincte percipere non valemus. Perceptio igitur hujus nexus nonnisi confusa est & quatenus eundem confuse percipimus, unionis notio in ideam extensionis invehitur. Jam elementa omnia a se invicem differunt, nec duo reperiuntur in toto universo, quæ similia prorsus sint, ita ut unum salvo nexu in locum alterius surrogari possit. Quamobrem si ponas statum elementi

---

(n) §. 204. Cosmol.

(o) §. 209. Cosmol.

menti A explicabilem esse per statum elementi B, impossibile est ut aliud inveniri possit elementum præterquam B, ex quo intelligi possit, cur præsens status elementi A talis potius sit, quam alius. Atque adeo elementum A & B ita invicem coëxistunt, ut alia intermedia salvo eorum nexu coëxistere nequeant: quod cum in toto elementorum aggregato ita sese habeat, certus quidam coëxistentiarum ordo nascitur, vi cujus inter binas quascunque alia existentia intermedia excluditur. Vi similitudinis ideæ cum ideato in idea extensionis quidpiam quoque adesse debet, quod huic coëxistendi modo respondet. Et quia modus ille coëxistendi distincte percipi nequit, propterea quod statum internum elementorum distincte non percipimus; confusa quædam perceptio modi coëxistendi elementorum respondere debet. Remanet igitur nonnisi notio indivulsionis hujus nexus, quam continuitatem dicimus. Atque adeo continuitas confuse repræsentat

I 3

mo.

(n) §. 204. Cosmol.

(o) §. 209. Cosmol.

modum unionis elementorum ac resultantium inde partium, & distincte explicatur per alias imagines simpliciores continuum, quod partes eo ordine se invicem excipiant, ut alias inter ipsas ordine alio interponi impossibile sit, ut continuitas dicatur excludere existentiam partis intermediæ diversæ inter duas datas sibi proximas possibiles (p). Patet adeo quomodo idea extensionis & cum eadem cohærens idea continuitatis in anima nascatur, & cur idæ isti tales insint determinationes, quas prodire deprehendimus, ubi eam in alias ideas simpliciores resolvere studemus. Atque ita abunde intelligitur, ideam extensionis & continuitatis, quam vulgo habemus, alia prorsus repræsentare, quam apparent, quemadmodum idæ colorum alia prorsus repræsentant, quam per imagines eorum, hoc est, confusas perceptiones apparet. Quodsi ergo elementorum singulorum status internos per se invicem explicabiles distincte perciperemus, alia prorsus prodiret

re-



rerum facies, quamquæ imagine extensionis ac continuitatis nobis obvertitur. Ast quamdiu distinctam status interni elementorum notionem non habemus, nec ea, quæ ideam extensionis & continuitatis ingrediuntur, ab imaginibus separare valemus. Sufficit vero nos ostendisse, quod rationes altiores dentur eorum, quæ in idea extensionis ac continui continentur, & quod eadem in elementis delitescant, immo quales sint elementorum determinationes, in quibus delitescant, generaliter spectatæ.

## §. 6.

Vis inertix est principium passionum, per quod nempe intelligitur, cur <sup>Ratio vis inertix.</sup> passiones tales potius sint quam aliæ. Patitur autem corpus unum ab altero, quatenus motus inducitur: inde enim pro diversitate mobilium mutationes consequuntur in subiecto, ut rigore loquendo hæ mutationes non sint ipsæ passiones, sed ab hisce pendeant. Vigetur similitudinis ideæ cum ideato perceptio vis inertix repræsentare debet principium passionum, quod in elementis existit; sed confuse, quod ni-

hil clare & distincte percipimus, quod elementis inest, consequenter in aggregato elementorum, quale corpus est, quod inest uni distinguere non possumus ab altero. Nascitur adeo idea vis inertiae, quatenus principium passivum in elementis confuse percipimus. Non jam inquirimus, utrum passiones elementorum sint reales, an saltem ideales: neque enim ad praesens negotium spectat haec disquisitio, cum non inquiramus in specificam harum passionum rationem, sed eo contenti sumus, quod in genere constet elementa a se invicem pati. Ceterum cum principium passivum seu potentia patiendi insit singulis elementis; vis inertiae per omnem materiam diffusa deprehenditur, & quidem aequaliter, quia unum elementum perinde patitur ab altero ac aliud quodcunque: ostendimus enim (q), statum quemlibet elementorum relationem involvere ad cetera coexistentia omnia, ipsa etiam composita. (r). Principium passivum in elementis

---

(q) §. 206. Cosmol.

(r) §. 211. Cosmol.

§. 7.

(s) §. 209. Cosmol.

tare valemus. Quamobrem perceptio vis motricis nonnisi confusa est; consequenter quemadmodum *Cartesius* recte negavit, colores, quales apparent, non inesse subjectis, cum ea, quæ subjecto insunt, & confusa perceptione miscentur, alia sint ab hac imagine, quam sensus sistit; ita quoque dici non potest, tale quid, quale vis motrix apparet, inesse elementis, cum ea, quæ hisce insunt, diversa admodum a vi motrice esse debeant, quippe cujus idea demum resultat, ubi invicem permiscentur, quæ elementis insunt vires. Falluntur adeo qui vim motricem imaginantur tanquam compositum ex viribus, quæ elementis insunt, ita ut vires singulorum elementorum spectentur tanquam partes vis motricis totius corporis; quemadmodum falluntur qui sibi imaginantur extensum sive materiam ex elementis tanquam particulis componi debere. Neque enim idea vis motricis prodit homogeneorum additione, quemadmodum numerus major prodit unitatum seu numerum minorum collectione; sed plurium nobis indiscernibilium permixtio.

mixtione, quomodo omnis idea confusa nascitur. Qui modum, quo ideæ confusæ oriuntur & de quo in Psychologia rationali plura diximus, perpendit; is sibi cavebit ne per imagines explicare velit, quæ ab imaginibus separanda sunt, ut intelligantur.

### §. 3.

Ex dictis simul intelligitur, qualem *Motus* motus habeamus ideam. Est nimirum *qualem* ea itidem confusa, quæ nascitur per *ideam* mixtione longe aliorum, quam fert *habeamus*, motus imago, elementis inexistentium. Nostrum vero jam non est inquirere, quænam sint illa quæ invicem permiscuntur, cum motum tanquam a vi motrice pendentem in phænomenis consideremus. Quemadmodum vero vis motrix elementis non est, ita nec motus elementis inest; sed in numerum eorum referri debet, quæ confuse percepta imagine quadam exhibentur, quæ extra animam non datur, etsi dentur ea, quorum confusa perceptione nascitur imago in anima. Exemplum colorum, ad quod aliquoties jam provocavimus, hic quoque usum habere potest.

potest in illustrada idea motus. Et enim nec imago colorum, qualis in anima datur, subiecto inhæret; insunt tamen alia distincte explicabilia, quemadmodum ex Physicis claret, quæ simul confuse percepta imaginem istam in anima gignunt.

### §. 9.

*Usus doctrinae præcedentis.*

Etsi autem realia ista, quæ insunt elementis, sub cognitionem nostram non cadant, ut confusarum idearum genesin sufficienter explicare valeremus, de quibus modo diximus, neq; in explicandis phænomenis ad elementa, tanquam eorum fontem, recurrere opus habeamus, cum gradum sistamus in phænomenis simplicioribus, nec unquam phænomenon aliquod prorsus intelligibiliter explicemus; haud quaquam tamen inutilis censeretur debet præcedens tractatio. Utilitatis enim non contemnendæ est nosse, notiones eorum, quæ notionem corporis ingrediuntur, non esse primitivas, sed supponere imagines, quæ ex confusa perceptione realium in elementis existentium oriuntur. Quamprimum enim ea quæ apparent,

parent, seu confuse percepta, cum realibus, quæ rebus insunt, confundimus; ex hoc errore inextricabiles propullulant difficultates, quales omni tempore ingenia summa circa principia generalia corporum urfisse constat. Inprimis autem hinc intelligitur mundum intelligibilem alium prorsus esse a sensibili ex imaginibus nostris compositum. Cumque idea intelligibilis detur in intellectu divino ab omni prorsus imagine separata; cognitionem universi, quæ Deo est, prorsus differre ab ea, quæ in homines cadit, inde perspicitur. Utile est hoc nosse in Theologia naturali, ne intellectui divino affingamus, quæ ab eo aliena sunt.

## IV.

*De Notione causæ Morbi.*

## §. I.

**C**um in horis hisce subsecivis de notionibus directricibus egissem (a) <sup>insist.</sup> ostendens, <sup>cum an-</sup> <sup>notis.</sup> notiones generales & abstra-

---

(a) Trim. Vern. 1729. n. IV. p. 310.



tractas usum habere in dirigendo intellectu, ne in meditando a genuino tramite ad devia aberret, ac deinde notiones sanitatis (b), morbi (c) & naturalis, præternaturalis & non naturalis in arte medica (d) exposuissem, quas notionibus directricibus in arte salutari annumerandas esse palam erat; non defuere qui a me petiere, ut ceteras quoque notiones generales in Medicina evolverem. Eorum igitur desiderio ut satisfaciam, placet in præsentī notionem causæ morbi explicare, quam in Pathologia subinde non satis distincte exponunt Medici. Fungitur enim vice directricis non modo in Pathologia generali, verum etiam in speciali: immo usui est in Diætetica, quatenus ea de morbis præcavendis agit. Utrumque ex tractatione sequente elucescet.

## §. 2.

De quānam causā Medici loquantur.

In confesso est apud omnes, quando in Pathologia de causa morborum mentio fit, causam efficientem intelligi.

(b) Trim. æst. 1729. n. IV.

(c) Trim. aut. ej. a. n. IV.

(d) Trim. æst. 1730. n. IV.

gendam esse. Immo idem patet tum ex recensione causarum in genere in Pathologia generali, tum ex causis morborum specialium, quæ in Praxi Medica seu Pathologia speciali allegantur. In Pathologia generali inter causas morborum referuntur res sex non naturales, aër, cibus & potus, somnus & vigiliæ, motus & quies, excreta & retenta, pathemata animi seu affectus. Ita iræ locus tribuitur inter causas podagræ, itemque nimio vini haustui. Ecquis vero non videt, iram & nimium vini haustum causam podagræ aliam esse non posse, quam efficientem? Fructus immaturi dicuntur causæ diarrhœæ. Ecquis vero denuo non videt, eos hujus mali causam esse non posse, nisi efficientem? Similiter causæ morbi generales in Pathologia generali enumerantur plethora, cacochymia, flatus, calculi, vermes. Ecquis vero non videt, unumquodque eorum non posse referri ad aliud causarum genus, quam ad genus causæ efficientis? Quodsi quis causas morborum specialium percurrere voluerit, similiter patebit, eas causis efficientibus

annu-

annumerandas esse. E. gr. hydropis ascitæ causa dicitur esse humor aquosus. Cum hydrops sit tumor quidam abdominis, femorum ac pedum, nonnunquam & scroti, qui ab humore aquoso ortum habet; palam est, humorem hunc aquosum non alio sensu dici causam istius tumoris, quam quatenus eundem efficit, atque adeo tanquam causam efficientem allegari. Non opus est rem satis manifestam & obviam pluribus confirmari. Necesse tamen est ut constet de quanam causa loquantur Medici, ubi notionem causæ morbi evolvere volueris. Etenim ad causam morbi applicanda veniunt, quæ de eadem in abstracto docentur in Ontologia. Quamobrem necesse est ut noris, ad quod causæ genus spectet causa morbi, ne ignores quanam ad eam applicari debeant.

## §. 3.

*Causa morbi notio in genere explicata.* Causam in genere definivimus per principium, a quo existentia sive actualitas entis alterius ab ipso diversi dependet, tum quatenus existit, tum quatenus tale existit (e). Quamobrem cum

---

(e) §. 118. Ontol.

cum morbus sit status corporis, in quo una vel plures ejus partes ad usus suos, quibus destinantur, aptæ non sunt (f); causa morbi erit principium, unde dependet actualitas illius status corporis, quo pars aliqua vel plures partes ad usus suos aptæ non sunt, & quod hæc potius partes, quam aliæ ad usus suos ineptæ sint. Principium in se continet rationem ejus, cujus est principium (g). Quamobrem in causa morbi continetur ratio illius status corporis præternaturalis, in quo functio unius alteriusve partis læditur, consequenter ex ea intelligitur, cur hæc vel illa pars ad usum suum, ad quem destinatur, inepta deprehendatur, & cur hæc vel illa potius, quam alia inepta sit. Qui ergo causam morbi distincte cognoscit, is intelligit & intelligibili modo alteri explicare valet, quomodo hæc vel ista corporis pars inepta fiat ad functionem suam obeundum & cur hujus potius, quam alterius partis functio in præsentem lædatur. Et ubi demonstra-

K

re po-

---

(f) Hor. Subf. A. 1729. trim. aut. n. IV.

§. 2.

(g) §. 866. Ontol.

re potes, hujus in dato calu partis functionem lædi & rem illam indigitare vales, unde læsio illa pendet, ac præterea firmiter adstruere nosti, non aliunde læsionem istam pendere, te causam morbi perspectam habere certus eris. Enimvero quando Medici de causa morbi loquuntur, ipsis de causa efficiente sermo est (§. 2). Quoniam itaque causalitas causæ efficientis in actione consistit (h); ex ejus quoque, quod causa morbi est, actione intelligitur, quomodo partis cujusdam corporis functio lædatur, seu quomodo ea ad usum suum inepta reddatur. Causa morbi cum agat in partem, quæ ad functionem suam inepta evadit; hæc ad illam se habet quemadmodum patiens ad agens. Actio dicit mutationem status, cujus ratio continetur in subjecto, quod eundem mutat (i); passio vero mutationem status, cujus ratio continetur extra subjectum, quod statum suum mutat (k); etsi in eodem contineatur ratio, cur passio in

---

(h) §. 881. Ontol.

(i) §. 713. Ontol.

(k) §. 714. Ontol.

eo sit possibilis (l). Explicaturus itaque, quomodo causa morbum producat, consequenter a priori demonstraturus, quod quid morbi causâ esse possit, & mutationem, quæ in agente deprehenditur, & alteram, quam ob istam subit patiens seu pars; cujus functio læditur, explicare tenetur. Causâ morbi in corporum numero est, adeoque vi motus agit, & agendi possibilitas, quæ potentia agendi dicitur (m), per qualitatem & quantitatem causæ intelligitur. Ex adverso patiendi possibilitas, quæ potentia passivæ fert nomen (n), per qualitates illius partis; cujus functio læditur, patet. Unde a priori demonstraturus, hanc esse illius morbi causam, & qualitates partis, cujus functio læditur, & qualitates & subinde quantitatem seu magnitudinem illius corporis seu materiæ, quæ morbi causa est, perspetas habere debet. Tum enim demum perspicere datur, quamnam mutationem parti læsæ induxerit causa morbi & cur propterea ad functionem

K 2

(l) §. 715. Ontol.

(m) §. 716. Ontol.

(n) ibidem.



nem suam obeundam inepta deprehendatur. Determinationes intrinsecæ, quæ quantitatem & qualitates complectuntur, partium ex Anatomia addiscuntur; quomodo per eas pars corporis ad certam aliquam functionem apta fit, in Physiologia docemur. Unde patet, in Anatomia & Physiologia satis exulta versatum esse debere, qui causas morbi a priori demonstrare aut explicare in Pathologia speciali voluerit, quomodo causa morbum producat. Ubi constiterit, quanam sit causa alicujus morbi; haud difficulter intelligitur, undenam haurienda sit notitia determinationum intrinsecarum, a quibus actio pendet quoad specificationem, quatenus scilicet ad mutationem datam parti inducendam apta. Ponamus cibum quendam assumptum esse morbi causam, qualitates ejus noxiæ ex Diætetica perspectæ præsupponuntur. Atque tum patet Diæticam probe excoli ante debere, quam a priori explicare possis, quomodo morbum producere potuerit. Causam a posteriori detegere certo haud raro difficile est. Ratio difficultatis patet.



patebit ex sequentibus. Regulam investigandi causam effectus a posteriori præscripsimus, cum usum Logicæ in formandis judiciis intuitivis & notionibus a posteriori exponeremus (o). Nimirum si enti cuidam mutatio accidit, quam primum alteri jungitur; hoc alterum causam illius mutationis esse intelligimus. Si ad causam morbi applicare regulam volueris, statum præsentem corporis ac illius præsertim partis, cujus functio læditur, perspectum atque cognitum habere debes. Neque enim causa morbi talis erit, nisi in hoc statu. Quamobrem si certus esse volueris, causam a te observatam esse sufficientem, ut ejus posita actione semper ponatur effectus (p); necesse est ut eo, quem diximus, modo in demonstrationem inquiras, quæ evincitur talis causæ actione partem corporis ad functionem suam neptam effici posse. Atque adeo intelligitur, theoriæ Medicæ, quæ a priori demonstrat ad statum corporis

K ;                      tam

---

(o) §. 697. Log.

(p) §. 898. Ontol.

tam naturalem , quam praternaturalem spectantia , aut , si ita loqui ames , theoriam Medicinæ philosophicam , Medico non esse inutilem , sed apprime necessariam , ubi incrementum artis medicæ promovere & praxeos certus esse voluerit. Quamvis enim lubenter concedamus , praxi satisfacere notitiam causæ a posteriori acquisite , nec prodesse demonstrationes , quippe per se in praxin minime influentes ; vidimus tamen certam notitiam rarissime absque ea , quæ a priori est , haberi posse. Quamobrem diximus , ad promovendum artis medicæ incrementum , ut ne desit certa causarum morbi cognitio , facere demonstrationem a priori , qua evincitur , causam talem morbum talem producere posse. Etsi porro lubenter largiamur , ubi causæ morborum certæ in apicum fuerint productæ & suis limitibus quoad actum cauſandi accurate circumscriptæ , ne verendum sit te iis locum minime concessurum falso ratiocinio , ubi nullum habent , Medico in praxi satisfacere nudam illorum theorematum notitiam absque demonstratione , quemadmo-

admodum Geodetæ satisfaciunt in sua, quam colit, praxi theoremata Geometriæ, quorum demonstrationem ignorat, & perspicillorum atque tuborum & microscopiorum fabris theoremata dioptrica, quorum demonstrationem nesciunt; constat tamen Medicum notitia, quæ a priori est, minime instructum ea certitudine praxeos destitui, quæ est alteri illa instructo, nec adeo facile aberraturum in applicatione per oscitantiam quandam iis familiarem, qui non probe excultum habent intellectum. Quamobrem diximus, notitiam illam, quæ a priori est, utilem esse Medico, ubi praxeos, quam exercet, certus esse voluerit. Cel. *Boerhaavius* (q) causam morbi vocat, quæ morbum præsentem facit. Ne definitione hac abutaris contra mentem viri de arte salutari meritissimi, probe perpendendum quid sit morbum præsentem facere. Idem hoc est ac in actualitatem morbi influere, seu, si philosophica displiceat locutio, aliquid ad hoc conferre, ut corpus morbo corri-

K 4

pia-

(q) in Instit. medic. §. 737.

piatur, consequenter ut pars ejus aliqua inepta evadat ad functionem suam, ita ut morbus minime adesset, nisi actio illius rei in partem aliquam corporis præcessisset. Absit adeo ut definitionem ita explices, quasi causa morbi sit, cujus posita actione statim ponatur morbus ipse. Etenim tum in numerum causarum morbi non admitteretur, nisi causa efficiens sufficiens (r), consequenter nonnisi proximæ causæ competeret definitio, cum tamen eandem quoque convenire velit remotæ, quam huic morbo producendo nunquam sufficientem profitetur (s). Quodsi jam menti celeberrimi viri conformiter explices, quid sit morbum præsentem facere; nullum supererit dubium, quin definitioni ejusdem consentanea sint, quæ de notione causæ morbi in genere disseruimus.

## §. 4.

*Differen-  
tia causæ  
morbi ex-  
terna ac  
interna.*

Explicata notione causæ morbi in genere, videndum nunc porro erit, quomodo Medici morborum causas divi-

---

(r) §. 898. Ontol.

(s) loc. cit. §. 741.

dividere soleant. Dividunt easdem in internam & externam, itemque in proximam & remotam. Remotam subdividunt in prædisponentem & procatacticam. De singulis dicamus seorsim. Patebit enim philosophiam primam divisionibus hisce eam affundere lucem, quæ Medico ad certam causarum cognitionem adspiranti usui non minus esse possunt quam ea, quæ de notione causæ morbi in genere diximus. Causa interna est, quæ intra corpus humanum existit, causa vero externa est, quæ extra idem datur. In numerum causarum referuntur res non naturales, veluti cibus ac potus & excreta ac retenta. Quodsi cibus aliquis vel potus fuerit morbi causa, erit ea externa: est enim cibus ac potus quidpiam, quod extra corpus datur, etsi non ante noceat corpori, nisi eadem ingeratur. Enimvero si fæces alvo retentæ, quæ excerni debebant, fuerint causa morbi; erit ea interna. Similiter plethora, nimia sanguinis abundantia, intra corpus datur. Quamobrem si ea fuerit morbi causa; erit hæc denuo interna. *Distinctio causæ*



morbi in internam & externam intellectu facilis non prorsus coincidit cum divisione causæ in genere in internam & externam, quæ in Philosophia traditur prima (t). Causam enim internam dicimus, quæ internum principium est, actualitatis scilicet entis cujusdam ab ipsa diversi, veluti hic morbi; externam autem, quæ externum est principium. Jam principium internum est, quod in principiatio existit; externum vero, quod extra principiatum existit (u). Quamobrem cum principiatum sit id, quod rationem sui in altero habet; morbus, seu status præternaturalis corporis proprie loquendo principiatum est, quemadmodum causa morbi ejusdem principium, non vero ipsum corpus, morbi subjectum. Sed relinquenda utique est Medicis sua loquendi libertas. Neque enim quæ modo diximus alio fine proferuntur, quam ne quis perperam in foro Medicorum applicet, quæ de divisione causæ in internam & externam

---

(t) §. 882. Ontol.

(u) §. 880. Ontol.

nam dicuntur in Ontologia. Et sane applicatio ista parum cauta est. In philosophia prima enim causa in genere dividitur in internam & externam: in Medicina vero causa morbi in genere est causa efficiens (§. 2), adoque ad certam causarum speciem spectat. Divisiones autem causæ in genere non semper ad singulas species applicari possunt. Quamobrem ne ulla quidem metuenda æquivocatio est, quæ obstat, quo minus Medicina cum philosophia prima connectatur, quod in philosophia prima causa in genere spectata alio sensu dicatur externa & interna, quam quo in Pathologia causam morbi, quæ ad speciem causæ efficientis pertinet, internam & externam appellamus. Cel. *Boerhaavius* causam internam definit, quod sit illa, quæ quodammodo præexistit in corpore ante effectum productum: neque enim id, quod causa morbi interna est, statim causatur morbum, quamprimum in corpore existit, sed antequam morbo quodam corpus laborare incipit, in eo jam datur. Exempli loco est plethora, quam esse plurimorum morborum



rum causam in foro Medico pro comperto & explorato habetur. Enimvero non statim homo in morbum incidit, quamdiu nimio abundat sanguine, adeoque hæc causa morbi præexistit in corpore antequam effectum producit. Quod autem Medicus non simpliciter pronunciet, eam in corpore ante effectum productum præexistere, sed quodammodo præexistere affirmat; id certo utique consilio ab eo factum intelligitur. Etenim fieri potest, ut non statim ponatur in actu causandi, quam primum in corpore datur, consequenter tum causa morbi nondum est, fieri tamen potest, immo sæpe certo fiet: & ubi ponitur in actu causandi, non statim sensibiliter influit in morbum, adeoque morbus per insensibilia incrementa successive gignitur, quemadmodum naturæ solenne est, ita ut morbus demum in sensus incurrat, ubi sensibilia incrementa cepit, quemadmodum res fere sese habet in vegetatione plantarum, quas crescere non videmus, crevisse tamen observamus. Nos cum diximus causam morbi internam esse, quæ in corpore datur,

no.

notionem morbi in genere supponimus, atque adeo ad eandem divisionem, quemadmodum methodus jubet, referimus, consequenter non alio respectu quid causam morbi dicimus, quam quatenus actum causandi exercere potest. Quamobrem cum in philosophia omnia consideremus in statu possibilitatis citra respectum ad subjectum aliquod individuum; plethora quoque causa morbi interna dicitur, quatenus morbos in corpore producere valet, & dum hoc facit, in ipso corpore existit. Quando vero de singulari aliquo subjecto quæritur, num plethora, qua laborat, sit morbi causa, non ante causam morbi dicere possumus, quam ubi in actu causandi constituta in morbigenesi influit. Neque hoc insoliti quidpiam habet. Etenim cibum dicimus causam morbi quatenus morbum producere valet, citra respectum ad aliquod subjectum individuum, sed utique ob actum causandi, qui ab eo proficisci potest. Enimvero si quæritur num cibus aliquis sit huic subjecto individuo causa morbi, causam morbi non ante dicimus.

mus, quam ubi actum causandi exercet. Quodsi ergo plethora absque actu causandi existit in aliquo corpore individuo, non dicetur causa morbi quoad hoc individuum & isto tempore; quamprimum vero actum causandi exercet, hoc est, in morbi genesin influit, dicenda quoque causa morbi est quoad hoc individuum. Neque vero inutilis est causæ in internam & externam divisio, immo nec inutile est nosse, quod causæ quædam internæ in corpore præexistent, antequam in genesin morbi influant. Huc enim dirigenda attentio est, quando de morbis præcavendis & curandis sermo est: internæ enim tollendæ tum ut morbus tollatur, vel ejus genesis invertatur; externæ vitandæ, ut morbus præcaveatur. Immo hinc pendet judicium utrum morbus aliquis curari vel evitari possit, nec ne.

## §. 5.

Notio  
causæ  
morbi  
proximæ  
& remotæ

Videamus jam porro, quænam sit differentia inter causam morbi proximam & remotam. Causa morbi est ex numero causarum efficientium (§. 2). In philosophia prima causa efficiens distin-

distinguitur in remotam & proximam (x). Quamobrem dubio caret, distinctionem istam ad causam morbi eodem sensu applicari posse, quo ibidem traditur. In philosophia prima docemus, si fuerit series causarum efficientium A, B, C &c. ita ut B sit effectus ipsius A, causa vero ipsius C & a causa C proficiscatur effectus E; dicetur C effectus E causa efficiens proxima, B autem & A erunt causæ remotæ & quidem B causa propior quam A, A autem remotior quam B. Quodsi ergo in productione morborum idem obtinet; eodem sensu causa morbi remota erit, quo in genere dicimus remotam in Ontologia, eritque etiam proxima eodem sensu, quo eam ibidem vocamus. Quodsi dubites, num idem in genesi morborum obtinere possit; ut scilicet morbus pendeat a causarum quadam serie; demus exemplum. In Pathologia generali plethora refertur in numerum causarum morbi. Jam vero plethora suas denuo habet causas, veluti cibi admodum nutrientis & potus

---

(x) §. 889. Ontol.



potus nimiam quantitatem sumtam. Quamobrem causa una morbi est effectus alterius causæ, atque adeo plerumque esse potest causa morbi proxima, cujus cibus ac potus nimia quantitate sumtus est remota. Similiter inter causas morbi in Pathologia, generali recensentur calculi & vermes. Nemo non novit, & calculos, & vermes in corpore humano generari, consequenter dantur eorundem causæ in ipso corpore. Atque adeo si in solis causis internis subsistas, vermes atque calculi sunt causa morbi proxima, effectus autem alterius causæ, quæ respectu morbi remota est. Enimvero etsi dubium nullum supersit, quin causæ morbi proximæ ac remotæ dici possint eo sensu, quem vocabulis istis tribuimus in philosophia prima; nondum tamen inde consequitur, quod eodem quoque non alio sensu causæ morbi remotæ ac proximæ dicantur in foro Medicorum, etsi nihil obstet, quo minus quis Pathologiam cum philosophia concatenaturus in hac quoque vocabulis eundem tribuat significatum, quem ipsis tribuimus. Immo si vel maxime alius ibidem

dem obtineat significatus, rem ipsam tamen, quam nos vocabulis istis indigitamus, admittere tenentur Medici, immo necesse est, ut animum advertant ad hanc causarum subordinationem, vi cuius alia effectui propior existit, alia ab eodem remotior est, ubi de morbis præcavendis ac tollendis quæstio incidit. Præcaventur enim morbi, si a corpore arceantur causæ remotæ; tolluntur, si causæ tollantur proximæ. Agedum vero! videamus, quo sensu Medici causas morborum in proximam & remotam dividunt. *Sennertus* (y) causam proximam definit per eam, inter quam & morbum nihil intercedit: remotam vero dicit, inter quam & effectum alia causa propior intercedit. In serie causarum A, B & C, in qua sequens est effectus proxime antecedentis, inter effectum & causam C, quam nos proximam dicimus, nulla alia intercedit, adeoque C & juxta *Sennertum* proxima est. Similiter inter causam B & effectum datur alia propior, nempe C, adeoque & juxta

L cun-

---

(y) in Instit. lib. 2. c. 1.

eundem B causa remotior est. Et eodem modo patet, etiam juxta eundem A esse causam remotiorem. Illud quoque ad notinem causarum remotarum & proximarum quadrat, quod monet *Sennertus*, non raro longam causarum seriem sese consequi. Enimvero si verba Medici attente consideres, diffidendum non est, in foro Medicorum causæ remotæ & proximæ significatum esse laxiorem, ita ut quam nos remotam dicimus, veluti species contineatur sub ea, quam remotam Medici appellant. Etenim si remota causa ea est, inter quam & effectum alia causa propior intercedit; remota etiam causa dicenda venit ea, quæ antecedit proximam, & in genesin morbi influit, mutationem quandam inducendo organo, cujus usus vi morbi tollendus, utut proxima sese ad eam non habeat per modum effectus. Atque in hoc significatu laxiori causam remotam accipi a *Sennerto*, ex earum subsequente in procatacticas & prædisponentes subdivisione patet: de qua mox plura dicemus. Nimirum synonyma ipsis sunt causa remota & mediata, atque pro-



proxima & immediata: quæ tamen a nobis distinguuntur. Causam mediatam & immediatam eo modo explicamus, quo *Sennertus* causam remotam & proximam distinguit. Est enim nobis causa efficiens immediata, cui effectus continuus est. Quamobrem cum effectum continuum agnoscamus, quando inter eum & causæ actionem nulla alia causa principalis interponitur; causa efficiens immediata erit, inter quam & effectum nulla alia causa principalis intercedit, quemadmodum vult *Sennertus*. Quando enim causam in genere appellat, causam efficientem principalem, quæ instrumentali opponitur, utique intelligit. Ex adverso itaque causa efficiens mediata nobis est, cui effectus non est continuus, consequenter inter cujus actionem & effectum alia causa principalis intercedit, quemadmodum habet *Sennertus*. Quemadmodum vero ostendimus (2) causam efficientem proximam esse quoque immediatam & remotam mediatam; ita quoque docuimus, non

L 2                  omnem

---

(2) §. 912. 913. Optol.

omnem causam immediatam esse proximam, cum proxima supponat remotam, a qua tanquam effectus dependet. Dicendum itaque *Sennertum* & qui cum ipso faciunt a causa immediata proximam, a mediata remotam non satis distinxisse, propterea quod ad nexum rerum non adverterint satis animum, quatenus is in morborum genesi attendendus: quod enim quodammodo animo ejus obversatus fuerit, cum de causæ divisione in remotam & proximam ageret, ex iis, quæ jam antea adduximus, verbis constat, quod scilicet in aliquibus morbis non raro longa causarum series sese consequatur, sub qua serie, quin etiam comprehendat eam, in qua causa sequens ab antecedente per modum effectus dependet, dubitari nequit. Facile gitur *Sennertus* cum nobis in concordiam reducit. *Cel. Boerhaavius* (a) causam proximam appellat totam illam simul, quæ totum jam præsentem immediate constituit morbum: remotam vero illam, quæ corpus ita immutat,

---

(a) in *Instit.* §. 740. 741.

tat, ut aptum sit suscipere morbum, si adhuc alia accesserit. Quin causa proxima ipsi sit ea, quam immediatam appellamus, nemo non videt. Quid enim aliud est totum morbum jam præsentem immediate constituere, quam morbum tanquam effectum actioni causæ morbi continuum esse, ut inter morbum & actionem hujus causæ nulla alia causa principalis intercedat? Enimvero causa remota, quam vocat, nec remota, nec mediata est sensu philosophico, sed concausa. Et enim cum causa, quæ dicitur, remota corpus ad morbum suscipiendum aptum reddat, si adhuc alia accesserit, & ambæ junctæ, quemadmodum additur, faciant causam proximam, illa vero sola non sit unquam integra causa, nec sufficiens illi morbo producendo: ecquis non videt, morbum hic tanquam effectum pendere a pluribus causis, quarum singulæ solæ eidem producendæ non sufficiunt? Sunt igitur causæ istæ concausæ in genere causarum efficientium insufficientium (b).

L 3

Quod-

---

(b) §. 885. 897. Ontol. & §. 2. sup.

Quodsi desideres, ut divisioni causarum morbi cum philosophia prima consentienti insit veritas ex principiis ejus demonstrabilis; poteris causas, quæ proximam antecedunt, *concausas antecedentes* appellare. Ita enim in morbum influere intelliguntur, ei tamen producendo non sufficiunt solæ: quod quot modis fieri possit, earum subdivisio docet. Et hæc ad id sufficiunt, ut notioni insit vis directrix, ne in scrutandis morbi causis insufficientem pro sufficiente amplectamur. Quodsi vero terminum causæ morbi receptum retinere & cum philosophia prima in concordiam reducere volueris; definire eam poteris per concausam, quæ causam proximam antecedit. Ita nihil decedit vi directrici, quam ex philosophia prima recipit notio, & nihil in dictione in gratiam philosophiæ primæ immutandum. Atque hoc nobis maxime probatur, qui innovationem terminorum in eo, quo evitari poterat, casu damnamus, utpote confusionem in disciplinas invehentem, quæ multis modis nocere deprehenditur.

## §. 6.

Causa morbi, quæ vulgo remota dicitur, dividitur in procatacticam & prædisponentem. *Procatactica* dicitur etiam *προφάσεις* seu *Occasio*. Hanc causam definit *Sennertus* (c) per eam, quæ latentes in corpore causas excitant & movent, & ita quidem ut manifeste ad sensum evidenter corpus nostrum afficiant. Ponamus aliquem mœrore incidere in melancholiam, vel prorsus in amentiam aut furorem. Quoniam hunc non semper experimur tristitiæ ingentis effectum, melancholia, amentia & furor ab ea causa sola proficisci nequit. Necesse igitur est, ut corpus jam alia de causa ad melancholiam, amentiam vel furorem ita sit dispositum, ut tristitia accedente morbus hic cerebri producat. Quamobrem mœror animi seu ingens, quo quis affligitur, tristitia causa procatactica est. Quodsi supponas esse in corpore rem quandam, qualiscunque tandem ea fuerit, quæ juncta mœrori effectum tam noxium producere potest,

L 4

nec

(c) loc. cit. §. 734.



nec a mœrore solo, nec ab ipsa sola producendum, sive mœror causam istam quocunque modo in actu causandi constituat, sive socias vires præstet, seu quocunque modo una cum altera illa causa is in morbum influat; dicetur etiam hoc sensu mœror seu ingens tristitia causa melancholiæ, amentia, furoris procatarctica aut, si mavis, ejusdem occasio. Ponamus cibum aliquem ventriculo ingestum non nocere corpori, accedente autem potu vel cibo altero excitari diarrhœam vel dysenteriam; erit potus vel cibus alter dicendus diarrhœæ vel dysenteria causa procatarctica. Apparet adeo causam procatarcticam influere quidem in genesin morbi, sed per se non aptam esse ad eundem producendum. Nimirum vel supponit aliquam mutationem jam antea ab aliis causis parti cuidam corporis inductam, vel causam aliquam, quam immutat & hac ipsa immutatione in actu causandi constituit, vel cui vires suas conjungit, ut, quod separatis fieri non poterat, conjunctis fiat. Atque hinc colligitur, causas procatarcticas omnes non esse unius ejusdemque generis, ut adeo laxiori sensu



sensu fieri debeat interpretatio verborum *Sennerti*, quando affirmat, causas procatarcticas excitare & movere latentes in corpore causas. Alias enim si stricte verbis inhærere velis, facile tibi persuadebis causam procatarcticam tantummodo dicendam esse, quæ aliam internam immutat eamque in actu causandi constituit, vel cum alia causa interna jam antea præsentē, vires suas conjungit ad producendum effectum virium non nisi combinatione obtinendum; nequaquam vero in eundem censum quoque venire causam, quæ nocet parti alia jam de causa mutationem quandam passæ, cum *Galenus* ad mentem prorsus *Hippocratis* diserte pronunciet (d), causas procatarcticas suapte natura vehementem morbum producere non posse, sed, si in corpus ad morbosam affectionem paratum & morbosam παρασκευὴν habens incidant, illud in morbum conjicere & *Cel. Boerhaavius* affirmet, (e) causam procatarcticam solis nocere prædispositis, ut fiat talis morbus. Et idem omnino tenendum est de de-

L 5

fini-

(d) apud Sennertum loc. cit.

(e) loc. cit. §. 743.

definitione *Boerhaaviana*, quod causæ procatarctica sit ea, quæ accedit remotæ, eamque excitat, ut morbum faciant simul. Nimirum si ea, quæ definitionibus subjiuntur, cum iisdem consentire debent, triplex omnino influendi modus causæ procatarcticæ, quem indicavimus, admittendus erit. Erit adeo causæ procatarctica, quæ cum per se in corpore sano morbum producere non possit, eundem tamen producit, quatenus agit in corpus per alias causas ad morbum jam dispositum, vel causis aliis in corpore jam existentibus vires eum producendi largitur: quod posterius duplici quemadmodum diximus, modo fieri posse intelligitur, vel mutationem inducendo causæ, ut jam ad morbum producendum apta sit, vel vires suas cum viribus causæ alterius internæ conjungendo, ut prodeat actio ad producendum effectum idonea, qualis a causâ ista sibi relicta proficisci nequit. Causæ procatarcticæ manifestæ sunt & facile hinc observantur, immo hætenus per solas observationes innotuerunt. Quoniam tamen etiam aliæ causæ sunt manifestæ, quæ procatarcticæ non

non sunt; igitur tenendum est, quomodo causa procatarctica ab alia causa manifesta discernatur. Causa manifesta ea est, ad cuius præsentiam statim sequitur morbus, ita ut dubitari non possit eidem morbum tanquam effectum tribuendum esse. Quamobrem procatarctica esse intelligitur a posteriori, ubi eadem posita non tamen in diversis subjectis ponitur vel morbus idem, vel morbus aliquis. Etenim si alia causa manifesta morbi ponitur, quæ procatarctica non est, nocebit ea singulis subjectis eodem modo. Cum enim causa procatarctica supponat corpus vel in se, vel præsentia alicujus causæ ad morbum dispositum; non nocet nisi prædisposito, consequenter non omni: ast causa morbi alia cum nullam præsupponat ad morbum dispositionem, nocere debet corpori omni, etiam sano. Quod si a priori judicare volueris, quænam causa data sit procatarctica, necesse est, ut eam intime habeas perspectam, utque præterea cognita tibi sit natura morbi, cujus est causa. Etenim ubi per ea, quæ in notione causæ continentur perspicere nondum potueris, quo-

quomodo morbus in corpore ad ejus præsentiam fuerit ortus ; ab ea sola immediate morbum non pendere animadvertis, consequenter eam morbi nonnisi procatacticam causam esse intelligis. Determinata autem causæ procatacticæ cognitio tum demum habetur, ubi noveris, qualem dispositionem in corpore præsupponat, ut causæ locum subeat. Atque hac opus est, ubi morbum inde oriturum certo prævidere, consequenter, certas morbos præcavendi regulas præscribere volueris, quas nunc tantummodo probabiles esse nemo non novit. Est autem regularum certarum vis major, quam probabilium, propterea quod vi evidentix per se influant in appetitum, ratione appetitui sensitivo reluctante, cum ex adverso regulæ probabiles exemplorum contrariorum numero infirmentur, ut, rationibus, quibus movetur appetitus sensitivus, facile cedant, nisi magna sit vis præjudicii autoritatis, qua creditur artifici in arte sua. Accedit, quod regulis probabilibus annumerari possint, quæ sunt a veritate alienæ, ut adeo sanitati minime proficuum



cuam commendent abstinentiam, subinde prorsus noxiam. Omni adeo studio contendendum erat, ut determinatas causarum morborum procatarcticarum acquireremus notiones.

## §. 7.

*Causa prædisponens* dicitur a *Galeno* Notio (f) dispositio, quam sequi seu a qua generari morbus aptus est. Vocatur nomine græco *προηγμένη*. causa prædisponens Talis est plethora, quippe quæ morbum non actu producit, sed corpus ad morbum disponit, ut accedente causa alia generari possit. Convenientius forsan dici poterat, causas prædisponentes esse causas, quæ corpus ad morbum generandum aptum efficiunt, aut, si mavis, mutationem quandam inducunt, ut accedente jam alia causa in morbum incidere possit, quem alias eadem producere minime poterat. Atque hujus causæ ambitus latius mihi patere videtur, quam vulgo statuitur. Etenim Medicis causæ prædisponentes tantummodo internæ sunt, atque adeo potissimum ad fluida referuntur & res toto genere præternaturam, seu quæ totæ præternaturaliter

ter in corpore generantur, veluti calculi & vermes. Veteres nimirum in morbis magis ad fluida, quam solida respexere. Sed impossibile non est, ut etiam partibus solidis, immo & fluidis a causa quadam externa inducatur quadam mutatio, vi cuius disponitur ad morbum quendam alia causa accedente suscipiendum, sive mutatio ista sit effectus permanens, sive transiens. Atque tum causa illa externa prædisponentium numero non inutiliter accensetur. Sane quemadmodum morbi prædisponentes causæ internæ ideo cognoscendæ, ut, iis tempestive sublatis, morbi antevertantur; ita externas nosse prodest, ut præcaveantur. Quod si tamen vocabulo ex reverentia antiquitatis vim inferre nolueris, & causas illas externas, quæ dispositionem morbificam corpori inducunt, causis insufficientibus annumerare volueris; per nos quidem licet, modo eas non prorsus insuper habeas cum Diæticæ detrimento. Causarum vero prædisponentium, præsertim externarum, si eas huic generi accensere velis, observatio sæpius difficilis, tum quod ante morbum in corpore lateant, ubi in-

ternæ



ternæ fuerint, tum quod externarum effectus, quatenus morbificus est, seu dispositio morbifica corpori inducta non æque patet, nec a priori ante agnoscitur, quam ubi simul vim causæ morbificæ accedentis perspexeris.

## §. 8.

Equidem non ignoro non deesse ho- *Epilogus.*  
die aliquos, qui contemptu Metaphysicæ  
omnem doctrinam generalem de mor-  
bis ex Medicina eliminandam esse con-  
tendunt: verum hi sunt, qui notionum  
directricium utilitatem minime perspi-  
ciunt, quam in inveniendō & demon-  
strando afferunt. Quamobrem com-  
mendamus iis ut legant, quæ de his no-  
tionibus alibi (g) docuimus. Quod si me-  
thodi compotes causarum investiga-  
tionem & propositionum determina-  
tarum de causis morbi demonstratio-  
nem ipsimet tentaverint; quam sint  
necessariæ generales istæ causarum  
morbi notiones, ipso opere  
experientur.

*FINIS Trimestris brumalis.*

CON-

---

(g) Trim. vern. A. 1729. n. IV.

# CONSPECTUS TRIMESTRIS BRUMALIS.

## I.

*De Influxu philosophiæ Autoris in Facultates Superiores,* 1

## II.


*De bona fide toto præscriptionis tempore requisita Jure Canonico,* 107

## III.

*De Notione Corporis. Pars altera,* 123

## IV.

*De Notione causæ Morbi,* 141



**HORÆ SUBSECIVÆ  
MARBURGENSES**

*ANNI M DCC XXXI,*

QUIBUS

**PHILOSOPHIA**

AD

**PUBLICAM**

PRIVATAMQUE UTILITATEM  
APTATUR.

---

*AUTORE*

**CHRISTIANO WOLFIO,**

POTENT. SUECORUM REGIS, HASSIÆ  
LANDGRAVII, CONSILIARIO REGIMINIS,  
MATHEMATUM AC PHILOSOPHIÆ PROFESSORE  
PRIMARIO IN ACADEMIA MARBURGENSI, PRO-  
FESSORE PETROPOLITANO HONORARIO, ACA-  
DEMIAE REGIAE SCIENTIARUM PARISIÆ SO-  
CIIATUMQUE REGIARUM BRITANNICÆ  
ET BORUSSICÆ MEMBRO.

---

**TRIMESTRE VERNALE.**

---

*FRANCOFURTI & LIPSIAE, M DCC XXXVIII.*  
PROSTAT IN OFFICINA RENGIERIANA.

CONFIDENTIAL  
SECRET  
CONFIDENTIAL

CONFIDENTIAL  
SECRET  
CONFIDENTIAL

CONFIDENTIAL  
SECRET  
CONFIDENTIAL

CONFIDENTIAL  
SECRET  
CONFIDENTIAL

CONFIDENTIAL  
SECRET  
CONFIDENTIAL

# HORÆ SUBSECIVÆ MARBURGENSES

Anni MDCC XXXI.

Trimestre Vernale.

L.

*De Theoria negotiorum publicorum.*

§. I.

**N**on dubito fore plerosque, qui <sup>Ratio in-</sup> mirabuntur, cur de theoria <sup>stituti.</sup> negotiorum commentari constituerim. Existimabunt enim, aut nullam dari istiusmodi theoriam, aut, si vel maxime aliqua dari possit, eam tamen inutilem fore, propterea quod videmus negotia publica absque theoria non sine successu tractari, immo omni ævo tractata fuisse. Sed hi erunt, qui de re nondum satis inspecta decretoriam ferre solent sententiam. Non nego, nullam adhuc theoriam doceri in scholis, nec novi quendam, qui eam condiderit & scriptis comprehenderit, etsi passim legantur, quæ eam condituro, usui esse possint: non tamen concedo, nullam esse theo-

M 2

riam

riam iis, qui cum laude negotia administrant. Quamobrem minime inanem operam a nobis sumi arbitramur, dum, quid sibi velit theoria ista & quomodo cognitio ejus acquiratur, distincte docere intendimus. Ipsam theoriam tradere jam nobis animus non est: sed qualis ea sit, quamam re constet, id nobis docere propositum est. Ita nimirum intelligetur, perperam eandem pro non ente haberi, & theoria perfecta præferetur imperfectæ, quæ in fortunæ potestate relinquit, quæ nostræ subjici poterant, & defectibus obnoxia reddit, quæ ad normam rectitudinis reduci poterant. Patebit autem, tum demum felicem fore Rempublicam, ubi ad certam theoriam negotia publica examinantur. Quæ vero de negotiis publicis dicentur, ea ad privata eadem facilitate applicabuntur non sine felicitate generis humani.

## §. 2.

*Negotia  
publica  
quam  
dicantur  
& quid*

Quid sit *Theoria*, diximus alibi (§. 467 *Psych. rat.*), nempe veritatum universalium complexus. Et *complexum* appellamus, quæ veritates uni-  
ver-



versales ad statuendum de re aliqua in <sup>fit theo-</sup>  
 quolibet casu sufficientes complecti- <sup>ria co-</sup>  
 tur; *incompletam* vero, quæ quas- <sup>rundem.</sup>  
 dam saltem comprehendit, non vero  
 omnes ( *not. §. cit.* ). *Negotia publi-*  
*ca a privatis* hoc distinguuntur, quod  
 illa spectent res totius civitatis, hæc  
 vero res singulorum. *Theoria igitur*  
*negotiorum publicorum* est complexus  
 veritatum universalium de negotiis  
 publicis, hoc est, iis, quæ res civitatis  
 spectant. Sumimus autem vocabu-  
 lum civitatis in significatu apud Phi-  
 losophos recepto, qui in jure natu-  
 ræ suo loco explicabitur, & tanquam  
 vulgo notus hic supponi potest. Ger-  
 mani vocant **einen Staat**. Hæc  
 igitur theoriatum demum dici potest  
*completa*, ubi nullum occurrit nego-  
 tium publicum, qualecunque tandem  
 illud sit, de quo non tradantur veri-  
 tates universales ad idem recte expe-  
 diendum sufficientes. Notionem re-  
 ctitudinis supponimus ex Philosophia  
 practica universali, quæ in nulla actio-  
 ne ad negotium requisita quidpi-  
 am ex parte intellectus vel voluntatis  
 ac noluntatis desiderari patitur (§.

72 &amp; seqq. Part. 1. Phil. pract. univ.).

Est enim omne negotium humanum complexus quidam variarum actionum, quæ denuo in diversos actus diversarum facultatum resolvuntur. Sed de his jam non dicemus, quæ ex primis Philosophiæ practicæ principiis intelliguntur.

## §. 3.

*Quod  
Theoria  
negotio-  
rum pu-  
bli. rum  
datur.*

Ex definitione nominali Theoriæ negotiorum publicorum statim colligitur, eam non esse in numerum non entium referendam. Negotia publica dari nemo in dubium vocat. Eadem negotia redire, non minus exploratum est. Quamobrem cum entia universalialia constituentur similitudine partiali individuorum seu singularium, vel minus universalium, aut, si mavis, eo, quo unum individuum seu singulare alteri singulari, vel ens unum minus universale alteri minus universali simile est (§. 232 *Ontol.*), & in similitudine singularium species (§. 233 *Ontol.*), in similitudine vero superiorum genera, & in horum similitudine genera superiora consistant (§. 234 *Ontol.*); quin ne-  
gotia

gotia publica ad certa genera certasque species revocari possint dubitandum non est. Genera & species definiri possunt (§. 172. 173 *Log.*). Dari adeo possunt definitiones generum & specierum negotiorum publicorum, seu in se impossibile non est, ut negotia publica ad sua genera suasque species revocata accuratis definitionibus circumscribantur. Experientia constat, de negotiis humanis quemadmodum in genere omnibus, ita etiam de publicis varias incidere quæstiones, veluti num hoc fieri debeat & quomodo fieri debeat. Judicium, quo in dato casu altera pars contradictionis definitur, veluti quod hoc fieri debeat, & quod fieri debeat hoc modo, singulare est, idque discursivum, non intuitivum: neque enim in notione negotii, quæ animo nostro observatur, quid fieri debeat, comprehensum intuemur, ut intuitivo iudicio sit locus (§. 51 *Log.*), cum nulla opus esset deliberatione, quam tamen necessariam experiuntur, quotquot negotia publica administrant. Elicendum adeo est ratiocinio, cum ali-



ter ad iudicium dianoëticum non perveniatur (§. 52 *Log.*). Ratiocinia, quæ syllogismis distincte proponuntur (§. 332 *Log.*), nituntur dicto de omni & nullo (§. 353 *Log.*), adeoque supponunt propositionem aliquam universalem, quæ de tota specie, vel de toto genere five absolute, five sub expressa conditione enunciat, quod de negotio singulari in casu dato enunciandum (§. 348 *Log.*). Adeoque necesse est dari propositiones seu veritates universales de negotiis publicis ad sua genera suasque species revocatis, quarum beneficio iudicatur quamnam contradictionis partem amplecti debeamus, siquidem quæstio aliqua incidit de negotio quodam publico in dato casu expediendo, & dum deliberamus, ad has ipsas veritates universales animum advertere debemus. Quoniam igitur dantur definitiones negotiorum publicorum ad sua genera suasque species revocatorum, danturque propositiones universales, quibus enunciat, quæ negotiis istis vel absolute, vel sub certis conditionibus conveniunt, verita-

tum vero universalium, quales præter definitiones ac propositiones non dantur aliæ, quemadmodum ex operationibus intellectus a priori demonstratur, & disciplinæ methodo scientifica pertractatæ loquuntur, complexus theoria est (§. 2); evidens omnino est dari theoriam negotiorum publicorum, seu eam non esse impossibilem. Quodsi quæsieris, ubi nam detur; facilis est ex Philosophia nostra responsio. Datur in Mundo rationali veritates omnes universales continente (§. 263 *Part. 1. Theol. nat.*), cujus descriptio est Philosophia methodo scientifica pertractata. Inquirere enim in veritatem latentem idem est ac in mundo rationali peregrinari, & latentem in apricum producere idem est ac ad eum spectandum admitti, veritatem vero detectam alios docere idem est ac iisdem narrare, quidnam in mundo rationali, dum nobis ad eundem aditus concedebatur, viderimus. Qui vero methodo demonstrativa philosophatur aliis ad mundum rationalem aditum parat, quibus inaccessibleis erat. Ce-

terum qui negant dari theoriam negotiorum publicorum, principiorum ontologicorum & logicorum sunt ignari, nec ex Psychologia intellectus naturam habent perspectam, mundi-que rationalis nulla ipsis notio est. Enimvero si quis in operibus nostris metaphysicis fuerit probe versatus, is & quæ diximus intelliget, & theoriam negotiorum publicorum possibilem agnoscer. Velim huc animum advertant, qui de nimis subtilitatibus metaphysicis conqueruntur, & quam parum justæ sint ipsorum querelæ discant, nec indignentur, si intelligentes hasce contemnant, hebetudini ingenii tribuentes, quod ipsi acumini tribuunt, cum intellectum propius nosse ipsis datum sit.

## §. 4.

*Genera-  
lia theo-  
ria nego-  
tiorum  
capita.*

Postquam igitur constat, theoriam negotiorum publicorum non esse impossibilem (§. 3); nostrum jam est, ut eam propius intueamur. Quotiescunque de negotiis publicis deliberatur, duplex incidit quæstio: altera de Jure est, utrum scilicet jure tuo &



& absque violatione juris alterius hoc agere possis, nec ne; altera de utilitate, utrum nimirum expediat hoc facere, nec ne. Juri enim suo lubenter cedit, qui idem sibi damnosum potius, quam utile experitur. Duabus adeo virtutibus eminere debent illi, quibus negotiorum publicorum cura demandatur, justitia atque prudentia. Illa opus est, ne age-revelint, nec agendum suadeant, nisi quod justum est, ab eo, quod injustum est, abhorrentes: hæc autem requiritur, ne noceant, dum prodesse volunt. Ponamus exempli loco deliberandum esse, utrum ad arma sit veniendum, nec ne. Prima hic sollicitudo animum tenere debet, num adsint causæ belli justæ. Deinde dispiciendum est, utrum e præsentī statu civitatis sit, nec ne, bellum gerere. Illam disquisitionem justitia; hanc prudentia urget. Et tum demum recte decernitur bellum esse indicendum, ubi & justum est, & civitati expedit bellum gerere. Eorum igitur, qui negotia publica curant, symbolum est: Juste ac prudenter. Equidem

dem non ignoro utilitatis haud raro  
soli rationem haberi, de jure co-  
gitationem esse nullam: parum ta-  
men nos movet eorum autoritas, qui  
faciunt, quod facere minime debent,  
& quod ab aliis fieri nolunt, obliti  
illius pervulgati: quod tibi non vis  
fieri, alteri ne feceris. Immo pro  
certo habendum utilitatem absque ju-  
re fucata saltem specie imponere in-  
cautis, utpote damnorum futurorum  
causam, nec prudentiæ nomen mere-  
ri eam, quæ a justitia sejungitur, cum  
virtus nulla alteri contrarietur, sed  
omnes potius amicissimo vinculo con-  
jungantur. Enimvero ex profundio-  
ri philosophia hæc hausta sunt, quam  
ut hic distinctius doceri possint. Ne-  
xum rerum humanarum intimius per-  
spicere debet, qui hæc capere volue-  
rit: sit ita quod eorum veritas exem-  
plis quoque persuaderi possit, ubi Hi-  
storicorum volumina attenta mente  
perlustrare & ad ea, quæ domestica  
experientia suggerit, animum atten-  
dere volueris. Mihi, qui philoso-  
phus audio, incumbit veritatem de-  
monstrare a priori rationem reddendo

do eorum, quæ sunt ac fiunt (§. 46 *Disc. prælim.*). Philosopho enim domicilium suum in mundo rationali est, Historico sensibilem inhabitandam relinquit, utut in sensibili peregrinetur novas sibi sedes in rationali quæsiturus. Satis aperta loquor iis, qui, quæ alibi (§. 258 & seqq. *Part. 1. Theol. nat.*) de mundo rationali tradidimus, perspecta habet.

§. 5.

Negotia publica jure naturæ ac gentium reguntur, nisi quatenus pactis jura acquisita, quæ ipsum jus naturæ servari præcipit, ita ut quod pacto quæsitum fuit jus absque injuria alteri invito adimi non possit. Quamobrem ex principiis juris naturæ ac Gentium deducendum est, quod in negotiis publicis justum est, ut adeo hoc jus sit fons primus theoriæ negotiorum publicorum. Immo si theoria juris naturæ & gentium fuerit completa, theoriam quoque ejus, quod in negotiis publicis justum est, continet. Qui igitur systema juris naturæ ac gentium condit, quod nomen suum tuetur, partem unam theoriæ negotio-

Fons pri-  
mus the-  
ria nego-  
tiorum  
publico-  
rum.

tiorum publicorum tradit. Sane non alio fine *Grotius* præclarum istud de jure belli ac pacis opus conscripsit, quam ut proderet iis, quibus negotiorum publicorum cura est commissa, ne desint ipsis principia ad rationcinandum necessaria, ubi de eo, quod justum est, deliberatur. Et quamvis illo tempore, quo vivebat, methodi leges, sine quibus in nulla scientiarum parte theoria exasciata speranda, nondum essent perspectæ, & Mundus rationalis inter inaudita adhuc referendus nondum innotuisset; quæ tamen tradidit, pleraque bona sunt & ad theoriam negotiorum publicorum condendam utilia, ubi de eo, quod justum est, agitur, quemadmodum in Præfatione novæ illius operis editioni, quam in usum prælectionum nostrarum de jure naturæ ac gentium curavimus, præmissa nos observasse meminimus. Cum nobis in operibus nostris philosophicis propositum sit mundum rationalem describere; operam quoque daturi sumus, ut quoad jus naturæ ac gentium instituto nostro satisfaciamus:

fini-



finita enim parte altera philosophiæ practicæ universalis systema istius juris dabimus, quod ad negotia publica juste expedienda plurimum profuturum confidimus. Equidem hoc jus multo latius patet, ita ut ambitu suo omnia quoque negotia privata complectatur; non tamen ideo theoriæ negotiorum publicorum quicquam decedit, quin potius hæc ipsa plurimum inde haurit lucis, ut, qui theoriæ negotiorum publicorum studet, theoria privatorum carere nequeat. Negotiorum publicorum theoria ita pendet a theoria privatorum, ut non modo communia habeant principia; verum etiam negotia publica sub forma privatorum repræsententur: quod adeo verum est, ut jam olim Sinæ huc animum non inutiliter adverterint.

§. 6.

Hinc vero elucet, quanta sit necessitas, ut jus naturæ & gentium excolatur. Nemo enim sanus negare potest, in negotiis publicis spectari ante omnia debere quod justum est, ita ut quotidie videamus hos ipsos, qui

*Necessitas juris naturalis excolendi.*

qui injuste agunt & alienis inhiant, juris tamen prætextu se tueri, nec injustos videri velle qui sunt. Ponamus tamen absurdam illam & generi humano valde noxiam opinionem adeo invaluisse, quasi negotia publica nullo jure regantur, & justitia ex aulis principum releganda sit in provincias ad privatos, prudentia sola in illas admissa: an ideo perversa nonnullorum opinio veritatem æternam ac mutari nesciam immutabit, ac minus verum erit, negotia publica juste esse administranda, nec sine naturæ ac gentium jure juste administrari posse? Sane qui sola utilitate metiuntur omnia, jure se tuebuntur adversus potentiam majorem, ubi idem sibi utile existimaturi sunt. Cumque non minus alteri utile esse possit, quod tibi utile, cujus quæso utilitate standum? Num potentioris? Valde dubito, te in hanc abiturum sententiam, ubi te altero, cum quo tibi negotium est, debiliorem agnoscis. Non urgemus, quod supra jam monuimus (§. 4), nocuam esse utilitatem, quæ juris præsidio destituitur ac id demum revera utile



utile dicendum esse, quod nulla iniustitiæ labe inficitur. Ubi nexus negotiorum publicorum fuerit perspectus, qui vulgo non agnoscitur, saltem parum expenditur; manifesta erunt quæ dicuntur. Tum vero intime perspicietur, ubi theoria negotiorum publicorum methodo demonstrativa pertractata prostabit, ut eorundem mutua a se invicem dependentia in aprico collocetur. Jure igitur cum regantur negotia publica, nec regantur alio nisi naturæ ac gentium jure, cum ipsa jura positiva nonnisi per illud subsistant, quemadmodum suo loco demonstraturi sumus; ecquis est, qui necessitatem excolendi juris naturæ ac gentium in dubium revocare velit? Pertinet hoc jus ad veritates universales, quas mundus rationalis continet (§. 263 *Part. I. Theol. nat.*). Quare cum in eodem entia universalia omnia (§. 258 *Part. I. Theol. nat.*), adeoque & quæ de iis prædicantur, consequenter veritates omnes universales inter se connectantur, quin quæ ad jus naturæ & gentium spectant cum aliis sint connexæ,

N                      du-

dubitari nequit. Juris igitur naturæ & gentium theoria, qualem hic desideramus, tum demum dabitur, ubi idem cum veritatibus aliis, unde ejus pendet veritas, connectetur. Hinc nemo nobis vitio vertet, quod theoriam juris & gentium ex principiis metaphysicis demonstremus: quod enim ab iisdem dependeat earundem veritas, philosopho imputandum non est, qui nec mundi rationalis conditor, nec veritatis faber est, sed via demonstrationis veritates æternas ac immutabiles, quas detegit, revelat, & in mundum rationalem alios introducit, qui aditum per se reperire minime possunt. Nec est quod excipias, hoc pacto ad subtilitates metaphysicas rimandas obligari, qui ab iis abhorrent, & quibus tantum temporis spatium non suppetit, ut per tantas ambages ad cognitionem veritatum sibi scitu necessariarum accedant: immo qui in gerendis negotiis toti sunt, eorum ingenia ad speculationes parum apta deprehendi. Neque enim unum est, quod reponere licet. Primo nimirum respondemus, non dari

dari viam regiam ad scientiam. Cui adeo tanta ingenii acies non est, nec patientia tanta, quanta ad scientiam requiritur; is suum esse non agnoscat, ut ipse in mundum rationalem excurrat, & propriis oculis videat, quæ in eodem occurrunt. Deinde notes velim, quemadmodum qui in oras peregrinas proficisci prohibetur, aliorum relatione contentus esse debet, qui quæ ibi viderunt narrant; ita eum, qui demonstrationes ex primis suis principiis deductas capere nequit, contentum esse debere, quod propositiones norit, quas veras esse profitentur, qui vi demonstrationis convicti iisdem assentiuntur. Quæ propriis oculis videre non possunt; ea alienis videre tenentur, quatenus videntibus habent fidem. Neque hic quicquam desideras, a quo illi sunt alieni, quibus negotiorum publicorum cura est. Ecquis enim adeo hospes est in iis, quæ quotidie sunt, ut ignoret eos lubentissime imitari alios in casu simili, etsi rationes ignorent, cur alter hoc fecerit & hoc potius fecerit modo, quam alio? Quis vero

N 2 ne-

negare auit, tum aliorum prudentiæ plenam haberi fidem? Et quis adeo hebes est, ut non videat, istiusmodi imitatore alienis oculis videre, non suis? Immo quis præterea est qui nesciat, auctoritatem eorum, qui juris periti censentur, magnum habere pondus in quæstionibus juris penes eos, qui ipsimet de jure statuere nesciunt. Qui credere solent artifici in arte sua, ecurr non etiam credant philosopho, qui, dum quid juris naturæ sit demonstrat, artem suam profitetur? Jus igitur naturæ haud quaquam ideo inutile redditur iis, qui demonstrationes ejus capere nequeunt, quemadmodum theoremata geometriæ non redduntur inutilia geometriam exercentibus, propterea quod demonstrationes eorundem ignorant. Quis adeo vesanus est, ut a geometris theoremata accurate demonstrari nolit, quia demonstrationes non capiuntur ab iis, qui illis in praxi opus habent? Aut quis reprehendit Astronomorum profundissimas theorias, quas capere nequeunt, qui ex tabulis loca siderum computant, aut ex

Ephc-



Ephemeridibus calendaria conscribunt. Præterea verum non est a subtilitatibus metaphysicis abhorrere eos, qui negotiorum publicorum curam habent. Nota nobis sunt exempla in contrarium. Novi viros summos, qui dignitate non minus & generis prosapia, quam prudentia cum militari, tum civili eminent, & in operibus nostris metaphysicis legendis assidui sunt, exemplo suo abunde docentes a sublimi rerum cognitione minime abhorrere eos, qui publica negotia tam in bello, quam in pace administrant, nec eam propterea contemni, quod patientiam legentis facile fatigare possint, nec oculo fugitivo perlustrari queant, quemadmodum historicorum volumina percurrere solemus. Immo novi, eos non sine voluptate subtilitates, quas vulgus eruditorum accusat atque damnat, expendere ac de earum utilitate secus quam hoc statuere. Quid quod nec Principum desint exempla, qui ad scripta nostra philosophica legenda eam attentionem afferunt, qua in mundo rationali versaturo opus est? Nota sunt

non minus aliis, quam nobis tanta exempla, ut ad ea provocasse sufficiat, præsertim cum jam alii quædam publice laudaverint. Legantur Dedicationses, quarum alteram ad Serenissimum Principem regni Borussici hæreditarium versioni Gallicæ Logicæ a nobis idiomate Germanico conscriptæ præmisit doctissimus interpres, alteram editioni Veronensi Cosmologiæ ad Illustrissimum S.R. I. Comitem de *Schulenburg*, Supremum copiarum terrestrium apud Venetos Præfectum præfixit vir omni scientiarum genere præstantissimus, qui omnem movet lapidem, ut opera nostra tam philosophica, quam mathematica sermone Latino a nobis publicata & nitide, & correcte impressa in Italia facile haberi possint. Nec illud dubium nos angit, quod, qui negotia publica gerunt, non abundant otio, ut per tantas ambages ad cognitionem veritatum sibi scitu necessariorum contendant, quantas requirit methodus demonstrativa. Qui enim in juventute methodum demonstrativam sibi familiarem reddidit & notionibus fœcundis animum imbuit; hi in lectione librorum accurata metho-



thodo conscriptorum celeriori passu progrediuntur, quam in lectione aliorum vulgari modo confarcinatorum, in quibus continuo sese offerunt, quæ progressum remorantur. Quod si ergo methodo nostra philosophabuntur posterius & ad systema, quod in adolescentia & prima juventute animo comprehenderunt, omnes referent veritates, quas in usum vitæ memoria teneri consultum est, nec conquiri poterit negotiorum publicorum mole obrutus deesse sibi otium, quale ad veritates intime perspiciendas requiritur. Quid quod Principes, qui de administratione imperii philosophabuntur, neminem tanta negotiorum negotiorum mole obruturi sint, ut veritatum ad negotia publica feliciter gerenda necessariarum cognitioni ulteriori vacare minime queant. Sed alio forsan tempore disertius docere licebit, quomodo systema veritatum sibi comparare, semel acquisitum conservare ac idem novis accessionibus continuo augere liceat, ne veritatum ignorantia laboremus, quæ ad iuste ac recte agendum & scitu neces-

sariæ sunt, & sciri possunt. Tace-  
mus alia, quæ breviter dici nequeunt,  
nisi verendum, ne perversæ interpre-  
tationi fiant obnoxia. Denique oppi-  
do falluntur, qui sibi persuadent, eo-  
rum ingenia, qui in negotiis geren-  
dis toti sunt, ad speculandum parum  
apta deprehendi. Modo enim spe-  
culationes recta methodo procedant  
& circa veritates cognitu utiles ac ne-  
cessarias versentur, nemo ad eas ani-  
mum magis dispositum habet, quam  
qui negotia publica cum laude admi-  
nistrat, cum in hisce administrandis  
eadem methodo utatur, qua nos sola ri-  
te philosophari contendimus. Sed hoc  
etiam apertius dicere licebit, ubi no-  
bis dabitur occasio de usu methodi de-  
monstrativæ in negotiis humanis expe-  
diendis dicendi. Puto igitur nos satisfe-  
cisse dubiis; quæ contra utilitatem sy-  
stematis juris naturæ ac gentium me-  
thodo demonstrativa ex genuinis prin-  
cipiis adornati proferuntur. Nihil  
adeo nos deterrebit a systemate isto  
condendo, nec dubitamus fore, ut  
ejus utilitatem ipso opere experian-  
tur, qui publica negotia curant.

§. 7.

Negotia publica res civitatis respiciunt (§. 2). In civitate suprema lex est salus & tranquillitas publica. Nemo non eandem agnoscit, nec noviquenquam, qui eam subvertere ausus fuerit, etsi praxis haud raro ab eadem abeat. Quamobrem id demum expedit in negotiis publicis, quod ad salutem & tranquillitatem publicam quomodocunque facit. Quænam e re civitatis sint, in Philosophia civili seu Politica docetur. Quoties igitur de eo, quod expedit in negotiis publicis, incidit quæstio, ex Politica desumenda sunt ad formandum judicium dianoëticum principia. Altera adeo quæstio, quando de negotiis publicis deliberatur, cum sit de eo, quod expedit (§. 4); theoriæ negotiorum publicorum fons alter est Politica. Quodsi theoria prudentiæ civilis completa fuerit, theoriam quoque ejus, quod in negotiis publicis utile est, continebit. Qui igitur systema Politicæ condit, quod nomen suum tuetur, negotiorum publicorum theoriæ partem alteram tradit.

*Fons alter theoria negotiorum publicorum.*

N 5 Sane



Sane non alio fine docetur Politica, quam ut discatur, quænam sint e re civitatis, consequenter ut ad negotia publica prudenter administranda profint. Quamvis vero quæ vulgo in scholis docetur Politica parum utilitatis afferat iis, quos prudentia civili instructos esse oportet; negari tamen haud quaquam potest, passim occurrere in libris autorum laude sua minime defraudandorum, quæ in condendo systemate usui esse possunt. Quamvis enim plerumque non satis determinata sint, quæ traduntur, ab eo tamen, qui methodi gnarus est, ad notiones determinatas facile revocantur, &, ubi notionibus generalibus foecundis imbutum habet animum, sine quibus nec rite determinare licet, quæ satis determinata non sunt, ex primis suis principiis eadem demonstrabit. Continetur hæc quoque theoria in mundo rationali, de quo supra diximus (§. 4. 5), quem in operibus nostris spectandum exhibere nobis proposuimus. Quamobrem ubi Philosophiam trademus civilem, systemate juris naturæ ac gen-

gentium absoluto, nostrum quoque erit dare operam, ut quoad prudentiam civilem, qua in negotiis publicis gerendis opus est, instituto nostro satisfaciamus. Etenim ubi systema juris naturæ ac gentium absolverimus & Philosophiam moralem ad finem perduxerimus, ad civilem accedemus: neque enim ante ad eandem patet aditus, nisi jure naturæ ac gentium atque Ethica præmissis, cum, quæ in Politica demonstranda sunt, absque principiis ex isto jure atque hac scientia petitis demonstrari haud quaquam possint, nisi sumere velis ea, quorum demonstrationem jure exigit assensum non præbiturus, nisi is rationibus intrinsecis eliciatur.

§. 8.

Elucet hinc neccitas philosophiam *Neccitas*  
 civilem sive Politicam excolendi, ut *excolendi*  
 adeo inanem operam nos minime sum- *Philoso-*  
 turos confidamus, ubi ad eam excolen- *phiam ci-*  
 dam eandem industriam afferemus, *vilem,*  
 qua in ceteris partibus Philosophiæ u-  
 timur. Utilitatem in negotiis publicis  
 spectandam esse, nemo in dubium

vocat, ita ut nonnulli sola utilitate eadem metiantur & justitia, quam publicam appellare lubet, inane nomen habeatur. Quemadmodum jam ante monuimus, prudentiam a justitia sejunctam esse nullam (§. 6.); ita quoque pro certo habendum, utilitatem veram ab apparente distinguendam, quæ fallaci specie incautis imponit, æternis subjacere legibus hominum opinione non immutandis. Vera nimirum utilitas non est, nisi quæ tendit ad salutem & tranquillitatem publicam tanquam finem ultimum, ita ut se habeat ad eundem per modum medii. Hæc suprema lex est, unde tanquam rivuli deducuntur leges istæ æternæ, quas diximus, omnis utilitatis norma. Apparens itaque utilitas est, quæ finem istum ultimum minime respicit, sed eidem vel aperte adversatur, vel ad eundem saltem conducere videtur. Non adeo facile est veram utilitatem ab apparente certo distinguere in omni casu, quemadmodum vulgo creditur. Unde haud raro imprudentiæ notam incurrunt, qui omnes prudentiæ partes se adimplevisse sibi videntur & quod male



male civitati consuluerint eventus docet, qui optime eidem consulere & intendebant, & credebantur. Qui vel huc animum adverterit, abunde intelliget, quam sit necesse prudentiam civilem, qua in gerendis negotiis publicis opus est, certis adstringi legibus, nequaquam vero sufficere ut consilia aliorum, de quibus ex eventu statuitur, coeco imitandi studio nostra faciamus. Quænam sint illæ leges, in Politica demonstrandum. Per has evertuntur noxia quorundam pseudopoliticorum præjudicia, quæ florentissimis civitatibus interitum minantur, nisi malo invalescenti tempestive medeamur. Inter hæc præjudicia, quæ suo loco notanda erunt, refero perversam illorum opinionem, qui utilitatem imperantis ab utilitate civium sejungunt, quasi illa absque hac diu consistere possit, & illam huic male opponunt ac tanquam potio- rem eidem præferendam esse præpostere judicant. Videas hodie haud paucos, qui ut placeant principibus & commodis suis velificent, prætextu utilitatis imperantium in viscera Reip.

scvi

favire ac dum salutis publicæ nocent  
 ipsis quoque imperantibus damna  
 dare. Apprime igitur necessarium  
 est, ut dependencia mutua salutis im-  
 perantium ac subditorum atque floris  
 civitatis a se invicem probe cog-  
 nita & perspecta sit, nisi consilia in  
 detrimentum civitatis vergere debe-  
 ant. Id vero in aprico positum est,  
 ubi veritates politicæ inter se conexæ  
 in systemate veri nominis exhibentur,  
 consequenter ubi Politica methodo  
 demonstrativa pertractatur, & cum  
 ceteris disciplinis amico vinculo co-  
 pulatur.

## §. 9.

*Vnde  
 baurien-  
 da sit  
 theoria  
 negotio-  
 rum pu-  
 blicorum*

Ex iis adeo, quæ hætenus dixi-  
 mus, patet, theoriæ negotiorum  
 publicorum contineri in jure naturæ  
 & gentium atque Philosophia civili  
 seu Politica, ut adeo, quo magis hæ  
 philosophiæ partes fuerint excultæ,  
 eo plenior quoque theoria negotio-  
 rum publicorum proftet. Quodsi  
 vero systema juris naturæ ac genti-  
 um, itemque Philosophiæ civilis non-  
 dum fuerit completum, ut omnes  
 omnino casus negotiorum publico-  
 rum

rum tum quoad id, quod iustum, tum quoad id, quod utile est, accurate definiantur; ex jure tamen naturæ ac gentium & Philosophia civili petenda sunt principia, per quæ definiuntur, quemadmodum ex jure civili eidem conformiter definiuntur casus in legibus non comprehensi. Nimirum tunc defectum theoriæ supplere tenetur, qui de negotio nondum definito statuere debet, & inventorem ejus agat necesse est, quod adhuc desideratur. Quoties enim istiusmodi casus occurrit, toties problema novum resolvendum proponitur. Quamobrem cum incognitum ex iis, quæ cognita sunt, deducendum, aut, ubi principia ad inveniendum, quod quæritur, nondum sufficientia prostant, fatendum solutionem nondum esse in potestate nostra, nisi ex principiis, quæ jam cognita atque perspecta sunt, adhuc latentia detegi a nobis possint, per quæ ad solutionem patet aditus. Quodsi in talis principum essent, qui philosopharentur, & iis problemata casibus novis emergentibus solvenda proponerent.

nerentur; solutionibus istis problematum ad generalem formam revocatorum tanquam novis inventis in futurum quoque usum theoria locupletari poterat. Perviderunt hoc jam olim Sinae, quorum primi non modo Imperatores erant philosophi, ut forma regiminis non per præcipitantiam definiretur; verum etiam philosophi ad vitam recte instituendam & regimen optime administrandum omnem suam cogitationem advertentes in casibus nondum exploratis in consilium vocabantur. Non temere provoco ad exemplum Sinarum, quorum imperium cum sit antiquius ceteris omnibus, quorum memoriam Historiarum pandectæ nobis conservarunt, unum adhuc hodie subsistit, ac citra commercium cum gente ulla per aliquot annorum millenarios floruit, cum cetera omnia etsi florentissima dudum fuerint extincta continuis revolutionibus obnoxia. Novi enim plerosque, qui de philosophia & philosophis ex iis statuunt, quæ vulgo in scholis docent Philosophiæ Professores, Theologiæ plerumque Can-  
dida-

didat, abjecte admodum de Philosophia & Philosophis sentire: quibus, cum ratione convinci minime possint, (§. 991 *Log.*), satisfaciendum est auctoritate nullo argumento labefactanda. Providentiæ divinæ relinquendum est, num & quando Deo visum fuerit mundum ratione, non opinionibus regi, ut in negotiis publicis insit veritas intemerata & civitates in terris florentes eas repræsentent, quæ in mundo rationali dantur, quemadmodum singularia acumine præditis universalia spectanda exhibent. In potestate nostra positum non est, quam ut palam dicamus, quæ in mundum rationalem admissi spectavimus. Erit dies, quo quæ diximus accuratius ponderabuntur non sine felicitate generis humani.

§. 10.

Qui negotia publica recte gerere debent, illis minime sufficit, ut eorundem theoriam animo comprehendant; sed præterea requiritur, ut in dato casu rite applicent. Quæ applicatione tenenda sunt, ex iis in-

O

tel-

*Quantum de applica-  
tione theoria  
negotio-  
rum pu-  
blicorum  
tenenda  
sint.*



telliguntur, quæ de usu Logicæ in praxi vitæ integro cagite primo Sect. 6. Part. 2. Logicæ docuimus. Nimirum in Theoria casus negotiorum per circumstantias suas rite determinati (§. 180 *Part. II. Phil. Pract. univ.*) regulis Logicæ convenienter definiuntur & sic genera ac species negotiorum publicorum constituuntur (§. 179 *Log.*). De hisce casibus universaliter enunciatur, quid justum sit & utile, seu juste ac prudenter in iisdem fiat. Theoriæ igitur nullus erit usus, nisi casum præsentem per suas circumstantias accurate determinaveris, ut constet, sub quonam genere vel quanam specie contineatur, & quænam adeo propositio universalis ad eam applicari debeat. Circumstantiæ desumuntur a statu præsentem tum civitatis, tum gentium illarum, cum quibus est negotium. Atque adeo patet, si vel maxime theoria fuerit perfecta ac omnibus suis numeris absoluta, nullum tamen esse ipsius usum, nisi quoque statum civitatis omnem habueris perspectum, & status quoque gentium aliarum, cum qui-



quibus tibi negotium est, probe cognitum fuerit. Hinc accidit, ut imitatio aliorum haud raro infelicitur cedat, quia fit in casu dissimili, etsi deficiente adhuc theoria frequentissima sit. Non cœca esse debet imitatio, sed oculata. Oculata vero non est, nisi casum, in quo negotium feliciter cessit, accurate determinatum perspexeris, nec minus eum sufficienter determinaveris, in quo alterum imitari volueris. Utrumque fieri non posse, nisi statu utriusque civitatis explorato, modo vidimus. Hæc etiam ratio cur reprehensionem incurrant, qui ad consilia adhibent peregrinos, quibus status civitatis non est perspectus, etsi alias sint rerum intelligentes & prudentes, nisi una concurrant alii, qui eundem cognitum atque perspectum habent, & peregrini in hisce facilem ipsis præbeant aurem, ut symbolis collatis decernatur, quid fieri debeat, nec horum unice standum sit auctoritate. Similiter quia pactis acquiruntur jura, quæ violanda non sunt, cum juste non minus, quam prudenter gerenda sint negotia (§. 4);

pacta quoque non ignorare debet qui quid juste fieri possit statuere voluerit. Etsi itaque abunde perspecta sit juris naturæ theoria, qua quid circa pacta justum sit exponitur; non tamen juste ager, qui pacta ignorat vel perversè interpretatur, quorum in negotio aliquo habenda est ratio. Cognitio omnis, de qua modo diximus, historica est. Historica igitur cognitio nisi cum theoria jungatur, nunquam te justum ac prudentem in gerendis negotiis probabis, sed casui committenda erunt omnia, ita ut nihil laudis tibi relinquatur, etiamsi bene cesserint omnia. Equidem non nego casum, qui ex parte Dei nullus est (§. 462 *Part. II. Theol. nat.*), subiacere legibus providentiæ divinæ; non tamen propterea unum idemque est casui relinquere omnia & providentiæ divinæ committere negotia: neque enim providentia justitiam & prudentiam excludit, ad quam utramque Deus nos obligat & cujus gratia facultates animæ nobis fuerunt concessæ ac providentia ipsius in iis collocati fuimus circumstantiis, ut re-

Etum

Etum earundem usum facere possumus, modo velimus. Sed quomodo providentiæ divinæ committantur negotia, suo demonstrabitur loco, quando officia erga Deum sumus explicaturi: tumque dilucide constabit, id tum demum fieri posse, ubi omnem feceris facultatum usum, quem facere poteras ac debebas, ita ut nihil tibi imputari possit, sed ab omni culpa vacuus sit animus: quod quomodo obtineatur, ex iis intelligi potest, quæ de culpa satis prolixè tradidimus in parte prima Philosophiæ practicæ universalis & suo loco uberius explanabimus.

§. II.

Ex hætenus dictis intelligitur, <sup>Quanam</sup> quanam discenda sint ei, qui ad ne- <sup>discenda</sup> gotia publica gerenda adspirat. Im- <sup>sint ad</sup> buendus est animus certa theoria ( §. <sup>negotia</sup> 9) & factorum cognitione ( §. 10 ), <sup>publica</sup> & is acquirendus est facultatum <sup>gerenda</sup> animæ usus, sine quo legitimam <sup>adspi-</sup> theoriæ ad facta applicationem sperare minime licet. Ut theoria ad facta legitime applicetur, necesse est, ut <sup>ranti.</sup> O 3 eam

eam & applicare possis, & velis. Prius supponit rectum facultatis cognoscitivæ, posterius rectum facultatis appetitivæ usum. Illum docet Logica, quæ tradit modum dirigendi facultatem cognoscitivam in cognoscenda veritate (§. 1. *Log.*); hunc vero Philosophia practica, quæ modum exponit dirigendi facultatem appetitivam in eligendo bono & fugiendo malo (§. 62 *Disc. prælim.*), ac in specie ea ejus pars, quam Ethicam appellamus, quippe quæ ostendit, quomodo actiones liberæ diriguntur in statu naturali, seu quatenus homo consideratur sui juris (§. 64 *Disc. prælim.*). Habitus utendi regulis logicis comparatur assidua lectione scriptorum scientifica methodo conditorum, veluti mathematicorum accurata methodo configuratorum (§. 1230. 1232 *Log.*). Hinc conficitur, ad negotia publica adspiranti opus esse studio Logicæ & Mathematicos, ut facultate cognoscitiva prompte ac dextre uti detur: id quod requiritur tum ad theoriam scitu necessariam acquirendam, tum ad eandem in dato quocunque casu rite applicandam. Non minus liquet, opus esse  
esse



esse indefesso studio Philosophiæ moralis, ut facultatis appetitivæ legitimus fiat usus: id quod indispensabilis necessitatis est, ut theoriam, quam nosti & applicare vales, etiam applicare velis. Quemadmodum vero cum studio Logicæ conjungenda sunt continua exercitia, quibus lectio librorum scientifica methodo conscriptorum prolixè satis a nobis exposita Logicæ part. 2. sect. 3. c. 6. §. 945 & seqq. absolvitur, ubi regulas Logicæ ad praxin transferre volueris, ne in spem futuræ oblivionis addiscantur; ita similiter non sufficit philosophiæ moralis præcepta animo comprehendisse, verum etiam opera danda est continuis exercitiis, quibus habitus virtutum comparantur & odium vitiatorum indies incrementa capit, ubi voluntas emendari debet, ne philosophia moralis in spem futuræ oblivionis addiscatur. Dolendum itaque est, quod, qui in Academiis studiis operum navant, de voluntate emendanda prorsus non cogitent, sed sui juris facti libertatem in licentiam vivendi convertant & pravis sodalitiis non

una de causa corrumpantur boni mores. Immo maxime dolendum est, quod Professoribus, quibus salus studioforum unice curæ cordique est, tor objiciantur obstacula insuperabilia, quæ paucis commemorari non possunt, ne salutaria juventuti consilia exequi valeant. Quænam vero hinc damna redundent in Remp. dici vix potest, & facultate cognoscitiva, etiam superiori, sive intellectu abutuntur, qui facultatem appetitivam, præsertim superiorem, seu voluntatem, ad rectitudinis normam nondum composuerunt. Ipsos sane Theologos abuti videas veritatibus salutaribus, ubi a vera pietate animum habent alienum, ut in monstrum hominum degenerent, qui virtutum exemplar aliis esse debebant. Inde est, quod odium theologicum dicatur pejus diabolico & nemo boni incremento magis adversetur Theologo malæ voluntatis. Apprime igitur necessarium est, ut cum cultura intellectus conjungatur cultura voluntatis: nec erit maiorum in Ecclesia atque Rep. finis, nisi ad virtutem cum solida doctrina copulan-



pulandam adducatur juvenus. Quæ de studio Logicæ ac Philosophiæ moralis diximus, de omnibus promiscue intelligenda sunt, qui studiis literariis in Academiis operam navant, etsi instituti præsentis ratio postulabat, ut idem potissimum urgeremus in iis, qui ad Remp. administrandam adspirant. Quoniam vero theoria negotiorum publicorum ex juris naturæ ac gentium systemate & ex Politica haurienda, aut, quamdiu hæ Philosophiæ partes nondum omnibus suis numeris sunt absolutæ, saltem principia inde petenda (§. 9); nemo non videt, qui olim negotia publica juste ac prudenter gerere voluerit, ei inprimis incumbere, ut jus naturæ ac gentium & Philosophiæ civilis dogmata sibi familiaria reddat. Cum vero plurimum intersit, ut veritatis convincantur, ne invitante occasione ab eadem recedant; demonstrationibus opus est, quarum vi extorqueatur firmus ac immotus assensus. Quoniam itaque jus naturæ ac gentium demonstrari nequit sine principiis metaphysicis, quæ tanquam cog-

O 5 ni-

nita præsupponenda, nec dogmata Philosophiæ civilis absque iis ac principiis Philosophiæ moralis, quæ & ipsa in demonstrationibus ex Metaphysica petit principia, demonstrari possunt; quin Metaphysicæ studium necessarium sit ad negotia publica cum laude gerenda adspiranti dubitandum non est, modo verioris Metaphysicæ, qualem nos dedimus, notionem habueris. Simul autem patet ex Metaphysicis ea potissimum esse delibanda, quorum in jure naturæ ac gentium, Ethica atque Politica maxime usus elucet. Constat autem huc imprimis facere Ontologiam & Psychologiam empiricam cum Theologia naturali. Quoniam tamen Theologia naturalis Cosmologiæ ac Psychologiæ rationalis opem haud raro implorat, nec hæc Metaphysicæ partes prorsus negligendas esse constat: sit ita quod haud pauca in iis occurrant, quibus carere potest negotiorum publicorum gestor. Nosse superflua nunquam nocet; sed hæsitare in iis, quæ scitu necessaria sunt, damno nunquam caret. Quodsi excipias, studi-

um

um metaphysicum esse nimis prolixum, si singulas ejus partes ea industria pertractare volueris, quam methodus demonstrativa exigit; haud difficilis est responsio. Tyronum usui inserviunt compendia, in quibus palmariae veritates demonstrantur. Hisce enim perceptis & animo probe infixis systemata majora, in quibus plenior theoria continetur, proprio perlegent Marte utiliter, ut successive augeant scientiam. Factorum cognitio historica est. Quomodo vero tractandum sit studium historicum, ut profit ei, qui ad Remp. administrandam consilia salutaria olim daturus, paucis exponi non potest, & a praesenti instituto alienum est, cum nobis docere propositum sit, quomodo theoria negotiorum publicorum comparetur, non vero quæ in eadem applicanda usui sunt. Sufficit itaque ostendisse, qualis factorum notitia hic supponenda (§. 10). Observamus potius, quo ordine tractanda sint, quæ ad theoriam istam addiscendam requiruntur. Quod si igitur ad ea, quæ modo diximus, animum advertas, facile constat.



stabit, cum studio Logico utiliter  
conjugi mathematicum. Huic suc-  
cedere metaphysicum, metaphysico  
studium juris naturæ & gentium: quo  
absoluto, progrediendum ad Philo-  
sophiam moralem, tandemque ad Po-  
liticam. Generalis enim lex est, di-  
sciplinas philosophicas eo tractandas  
esse ordine, quo veritates in iisdem  
demonstratæ a se invicem dependent.  
Studium Logicæ & Matheseos præpa-  
ratorium est, adeoque præmittendum.  
Metaphysica in demonstrationibus suis  
non aliunde haurit principia. Jus  
naturæ ac gentium Metaphysicam sup-  
ponit, Ethica vero jus naturæ, & Po-  
litica denique Ethicam cum jure na-  
turæ atque gentium. Non ne-  
go Historiam quoque naturalem &  
Physicam subinde usui esse posse in  
negotiis publicis; sed veritates inde  
petendæ particulares sunt, ut ideo stu-  
dium physicum tanquam apprimæ ne-  
cessarium urgendum minime veniat.  
In Imperio nostro Romano-Germa-  
nico juris quoque publici habendam  
esse rationem in negotiis publicis, ne-  
mo in dubium vocaverit. Quemad-

mo-

modum vero iisdem forma imperii, quemadmodum legibus quibusdam fundamentalibus forma civitatum reliquarum continetur, quæ a Monarchia recedunt; ita jus publicum perinde ac jura statuum Imperii, quæ ex pactis nascuntur, ad cognitionem factorum pertinent, adeoque ad Historiam spectant, non vero ad theoriam illam negotiorum publicorum, de qua hic nobis sermo est. Idem dicendum est de legibus positivis, juxta quas autoritate publica deciduntur controversiæ de juribus privatorum in civitate data. Et si enim hæc leges, si nihil in ipsis desideretur, theoriæ naturali legum civilium, quæ juris naturæ pars est hætenus neglecta, convenire debeant, adeoque si rite se habeant, ex eadem demonstrari possint; leges tamen positivæ ipsæ, quatenus vim obligandi habent, ad facta referuntur, consequenter respectu theoriæ negotiorum publicorum ad historicum studium referuntur. Quemadmodum vero de factis quibusvis philosophari licet, nec inutiliter philosophatur, qui principiis philosopho-

lofophicis imbutum tenet animum; ita quoque juris positivi interpres non inutiliter philosophatur de legibus positivis, ut studium juris non fit mere historicum, sed scientificum evadat. Absit itaque, ut quis existimet, nos a studio juris positivi avocare velle eos, qui ad negotia publica gerenda adspirant. Ad hæc enim negotia etiam pertinent, quæ jura civium privata autoritate publica definienda concernunt. Ecquis vero neget, legum positivarum hic præsupponi notitiam? Nec negandum est, subinde etiam in negotiis, quæ superiori cum subditis intercedunt, ad eas recurrendum esse. Oppido autem falluntur, qui juris positivi notitiam cum theoria negotiorum publicorum confundunt eodem errore, quo nonnulli eandem ex Historia hauriendam esse contendunt.

## §. 12.

*Num ne-  
gotia pu-  
blica ha-  
tenus  
gerantur  
absque  
omni the-  
oria.*

Restat ut adhuc expendamus, num negotia publica gerentibus nulla hætenus sit theoria, & si qua datur, quomodo ad ejus notitiam perveniatur. Absque theoria definiri

**non**



non posse, quid juste ac prudenter fiat in casu dato, haud difficulter probatur. Etenim iudicium de eo, quod justum est & quod expedit in casu dato, eliciendum est syllogismo, cujus major est propositio aliqua universalis, ad theoriam negotiorum publicorum spectans (§. 3.). Iudicium igitur istud laturus aut hæsitabit, dubius in quamnam contradictionis partem determinandus sit assensus; aut vi principii alicujus inferet, hoc potius fieri debere, quam aliud: sit ita quod distinctis ratiociniis minime adfuetus ipsemet non advertat, cujusnam principii ope ita potius judicet, quam aliter. In priori casu deficit theoria, & absque ea nihil agitur: in posteriori theoria non destituitur, qui quid fieri debeat pronunciat, utut fieri possit, theoriam, qua nititur, falsam esse, non veram. Neque enim jam quæritur, num vera sit theoria negotia publica definientibus, sed num sit aliqua. Sufficit enim agnosci, absque theoria impossibile esse, ut in casu dato decernatur, quid fieri debeat. Inde est, quod consilii inops  
dica-

dicatur, qui nescit in quamnam partem sese vertere debeat, hoc est, nulla prorsus theoria instructus, eidemque opponatur, qui in consiliis dandis promptus est, hoc est, qui theoria instructus. Quæritur itaque, quomodo ad theoriæ illius notitiam perveniant, qui negotia publica gerunt. Quicquid cognoscimus, aut a priori cognoscimus, aut a posteriori (§. 435 *Psych. empir.*). Quamobrem & theoria, de qua jam nobis sermo est, aut a priori cognoscitur, aut a posteriori. Eam a priori non cognosci, satis pater. Restat igitur, ut cognoscatur a posteriori: quod quomodo fiat, paulo distinctius nobis est dicendum. Civitates non nunc demum constituuntur, sed dudum constitutæ sunt, nec forma regiminis hodie demum definitur sed dudum definita fuit, etsi subinde quædam in eadem immutari contingat. Juxta formam præscriptam dum expediuntur negotia, non sine theoria geruntur. Insunt enim universalis singularibus (§. 232 *Ontol.*), adeoque quæ quoad administrationem Reip. usu receptæ sunt notiones universales continent,

quæ

quæ ad theoriam spectant (§. 2.). Qui adeo ipso usu discit, quomodo negotia publica curæ suæ commissa sint expedienda, theoriæ quandam notitiam a posteriori sibi comparat, etsi plerumque confusis tantummodo notionibus contineatur, nec rationes ejus pateant, ad quas vulgo ne animus quidem advertitur, cum plerique contenti sint nosse hæc ita fieri debere. Præterea constat, eos, qui theoria destituuntur, actiones suas dirigere per antea facta in casu simili, quem modum dirigendi actiones expectationem casuum similium diximus (§. 504 *Psych. empir.*) & quando rationi æquipolleat, demonstravimus (§. 507 *Psych. empir.*). Notiones adeo universales, quæ antea factis insunt, theoriæ loco sunt, ad quam etiam spectant (§. 2): sit ita, quod eas distincte non agnoscat agens, nec veritatem earundem perspiciat (§. 513 *Log.*). Hæc theoria per speciem quandam traditionis propagatur & in voluminibus Historicorum conservatur. Non alia de causa profecto contingit, ut multorum animos ea occu-  
P pa-

paverit opinio, quasi prudentia politica ex Historia sit addiscenda, quam quod inde innotescat, quo eventu hoc vel istud factum fuerit in tali casu. Unde & *Confucius* sapientem ac prudentem actionum suarum directionem & rectam Reip. administrationem cogniturus totum se dedit lectioni Annalium gentis suæ, quos singulari ratione ad hunc usum compositos esse in Notis ad Orationem de Philosophia practica Sinarum jam monuimus. Denique notandum est, negotia publica revocari posse ad notiones communes, quatenus cum negotiis communissimis hominum similitudinem quandam habent. Quemadmodum vero principium reductionis, quo objectum aliquod, de quo quid quæritur, ad aliud notionem quandam communem habens reducitur, ut ea, quæ de hoc nobis innotuere, vi notionis communis ad illud quoque applicari possint (§. 472 *Psych. empir.*), magnum usum habent in veritate latente detegenda, exemplo ipsorum Mathematicorum, qui eodem tanto felicius atque frequen-

tius utuntur, quanto sunt ingenio-  
siores; ita quoque illi, qui publica  
gerunt negotia, ad notiones generales,  
in negotiis quam communissimis ob-  
vias, animum advertunt, ut videant,  
quid sit agendum, etsi ipsimet igno-  
rent, quomodo cogitatio ejus, quid  
fieri conducatur ac debeat, animum  
subeat, destituti quippe eo accumi-  
ne, quod ad distincte percipienda,  
quæ in anima contingunt, requiritur  
sine intimiori Psychologiæ cognitione  
non acquirendum. Nimirum vi ne-  
gotii illius communis notio univer-  
salis, quæ eidem inest (§. 57 *Log.*),  
animo ad idem attento insinuat. Ne-  
gotio publico oblato vi similitudinis,  
hoc est ejus, quod cum communi  
quodam commune habet, hujus idea  
reproducitur (§. 117 *Psych. empir.*)  
& attentionem in notionem univer-  
sale, quæ similitudine negotii pu-  
blici cum communi constituitur (§.  
232 *Ontol.*), trahit, utpote in quam  
mentis aciem nunc potissimum in-  
tendimus, cum quid fieri debeat de-  
liberamus. Quamobrem dum be-  
neficio memoriæ ideam istam recog-

noscimus (§. 175 *Psych. empir.*),  
 adeoque confuse saltem nobis conscii  
 sumus, nos eam jam antea habuisse  
 (§. 173 *Psych. empir.*), ut ipsimet  
 explicare non valeamus, undenam sit  
 evidentiae istius sensus, quo persua-  
 demur in dato casu hoc esse facien-  
 dum (§. 39 *Psych. empir.*); cogitatio  
 de eo, quod fieri debet, animum su-  
 bit. Quodsi ergo modo dicta accu-  
 ratori mentis lance expendas; dicen-  
 dum erit, consistere in hoc imitatio-  
 nem ingeniosam eorum, quæ vel in  
 communissimis ac maxime obviis ne-  
 gotiis facta sunt, in negotiis publicis.  
 Hinc videas rerum vulgarium noticia  
 instructos, modo acumine ac inge-  
 nio polleant, in arripiendis consiliis  
 promptissimos deprehendi, ut inde  
 manaverit præjudicium, quasi nosse  
 literas non modo nil profit negotia  
 publica gerenti, sed prorsus obsit.  
 Notandum vero est, quæ de redu-  
 ctione negotiorum publicorum ad no-  
 tiones communes diximus, non mo-  
 do obtinere, quando de eo incidit  
 quæstio, quid fieri conducat, verum  
 etiam quando quæritur, quid juste  
 fiat.



fiat. Nimirum vulgo animis hominum ea sedet opinio, quod quid iuste fiat, ubi alteri nulla est de nobis conquerendi ratio: cui omnino aliquid veri inest, modo notio rite determinetur, quemadmodum ex iis intelligitur, quæ de notione iustitiæ in Horis hisce subsecivis alibi tradidimus. In negotiis communibus levi attentione advertitur, num alteri de facto alterius conquerendi ratio sit, & factum alterius defenditur principiis communissimis, quibus vulgo statuitur. Judicium adeo istud transfertur ad negotium publicum, utut ita iudicantes ipsimet ignorent, cur ita iudicent: neque enim rationem reddere valet, nisi qui mentis humanæ indolem ex Psychologia cognitam atque perspectam habet, ne desint notiones distinctæ eorum, quæ in anima nostra contingunt. Hinc enatum est præjudicium, quasi theoria juris naturalis paucis principiis atque ab omnibus concessis contineatur, immo ea de causa nonnulli gustum quendam moralem commenti sunt, quo iustum ab injusto, æquum ab iniquo

eadem facilitate discernatur, qua sensibilia sensu distinguuntur, & censuram incurrit Philosophus, si theoriam illius juris profundius scrutatur, ut quoad ipsa principia satisfaciatur etiam iis, quorum assensus aliter, quam vi demonstrationis extorquenti nequit, & ut ex ipso fonte huius juris eadem deducantur: id quod utilitatem affert, quam aliunde sperare minime licet. Illud quoque silentio prætereundum non est, subinde veritatem adeo obviam esse, ob circumstantias casus præsentis, ut oscitantia tribuendum sit, nisi eam animadvertas, quæ illis absentibus non nisi multo acumine & longa ratiociniorum serie eruenda, ita ut eam invenire nequeat qui arte inveniendo præstat, deficientibus adhuc principiis, quibus ad ratiocinandum opus est. Quod si igitur hætenus dicta ad animum revocare volueris, haud obscure intelliges, quomodo veritates ad theoriam negotiorum publicorum spectantes reperiri potuerint ac hodiernum subinde reperiantur, quas deinde factorum alienorum imitatores in rem suam convertunt, nunc feli-

felici, nunc infelici successu, prout fortuna eos juvat, vel repellit, aut vel cœca fuerit imitatio, vel rationalis. Accedit & hoc, quod tentando eruatur veritas, quemadmodum facere solent artifices circa ea, quæ sunt artis suæ, ut ob rationes probabiles aliquid fiat & ubi eventus voto minime respondet in rationes inquiretur, cur spes fefellerit, ac error his sæpe invitantibus emendetur, donec multiplici experimento eruatur veritas. Exemplum præbet Architectura militaris, ubi constiterit, quomodo ars muniendi ad præsentem formam tandem fuerit perducta, quamvis etiam Astronomia & Philosophia experimentalis talia suppeditet. Existimandum non est artis inveniendi nihil prorsus esse hominibus, qui scientiis excolendis operam suam minime ad dixerunt. Abunde igitur patet, esse aliquam theoriam, juxta quam expediuntur negotia publica, & ex quonam fonte ea manaverit.

§. 13.

Restat vero, ut dicamus, qualis sit ista theoria, ne quis existimet, super-

*Qualis sit theoria juxta*

quam  
hactenus  
negotia  
publica  
gerun-  
tur,

flua esse, quæ supra de theoria negotiorum publicorum satis prolixè differruimus. Neque enim dubito fore haud paucos, qui ex modo dictis illaturi sunt, non opus esse scrupulosa ista, quam nos commendamus, obtentu difficili theoria, cum proftet longe facilior, diuturno usu comprobata, ad quam facilis est accessus. Tenendum itaque est, theoriam istam, quæ ob facilitatem laudatur, notionibus plerumque nonnisi confusis contineri, quatenus universalialia in singularibus notis continentur, & notiones istas haud raro esse indeterminatas, præsertim ubi propositionibus hypotheticis respondent. Quade causa contingit, ut propositiones hypotheticæ habeantur pro categoricis, quasi in omni casu verum sit, quod non nisi in aliquo succedit, sicque theoria non subsistat vera, sed in falsam abeat, quæ eventum potestati fortunæ prorsus subjicit, ut hinc prono alveo fluant querelæ de incertitudine negotiorum humanorum. Deinde notandum est, theoriam istam non esse rationalem, sed totam empiri-

piricam, ut adeo veritatem certo non agnoscant, qui in eadem acquiescunt, sed ea ob probabiles saltem quasdam rationes pro vera habeatur. Nec hoc negligendum est, quod theoria ista sit admodum imperfecta, cum plurima in eadem desiderentur, quæ ad exasciatam requiruntur, qualem praxis certa requirit: ne dicam de eo, quod sit maxime incompleta, quæ nonnisi audacioribus satisfacit, non vero prudentiæ locum relinquit. De his singulis ut dicamus apertius, præsentis instituti ratio non fert. Quod si quis ea, quæ de theoria vera & exasciata prolixè inculcavimus, cum hac altera, quam paucis tetigimus (§. 12), conferre voluerit, dictis facilem habebit fidem, modo notetur non omnia, quæ in theoria hætenus frequentata continentur, eodem pretio esse taxanda. Neque enim particularia a se invicem distingui possunt, ubi in genere ferendum iudicium, quod cum plurimis consentire sufficit. Nihil adeo malum est, quin ei admixtum sit aliquid boni, nec quicquam adeo imperfectum est, quin ei adhæreat quod

ad perfectum requiritur, quemadmodum & erroribus aliquid veri inesse contingit. Non nego utilem operam sumi in singulis, quæ de theoria ista strictim dicta sunt (§. cit.), justo pretio taxandis, dicique a nobis poterant non modo certissimam, sed etiam amplissimam utilitatem habitura. Enimvero diffusa hæc tractatio non modo limites excederet, quibus jam circumscribimur; verum etiam a præsentē instituto ad alienum nos avocaret. Nobis enim propositum erat evincere, quod detur aliqua theoria negotiorum publicorum, & docere, quænam ea sit, ex quo fonte manet ac quomodo ad eandem perveniatur; non vero taxare negotia publica, qualia nunc geruntur. Quod si vera illa theoria & rationalis, quam urgemus, fuerit detecta, & ab iis, quorum interest, agnita ac in usum deducta, modum, quo nunc geruntur negotia publica, unusquisque ipsemet taxabit, nec opus est ut alius opus invidiæ plenum aggrediatur. Corruent enim præjudicia sua

ye



veluti sponte, quæ nunc multorum animos occœcant, ut veritatem videre nequeant, & malevolis ansam calumniandi dant. Absit autem ut quis existimet, nos theoriam istam, quæ usu addiscitur & per traditionem propagatur, ac experientia domestica locupletatur, immo subinde proprio acumine ampliatur, damnare ac tanquam spuriam totam rejicere; hæc enim a mente nostra procul absunt, qui non reprehendimus, quod hoc Catone contenti sint negotiorum publicorum curatores, quamdiu verior illa & magis exasciata horum negotiorum theoria nondum prostat. Ecquis enim adeo vefanus erit, ut eos nihil agere velit, quorum est curare ut negotia publica habeant exitum? Et quis humanæ fortis adeo parum memor erit, ut nolit eum facultatum nostrarum usum fieri, qui conceditur, quando is nondum in potestate est, qui nulla ex parte a rectitudine deficit, & omnium simul legitimus usus negatur? Nequaquam exigimus, quæ inter moraliter impossibilia recte referuntur, nec eam re-

qui-

quirimus negotiorum humanorum, qualia etiam sunt publica, exactitudinem, ne ulla imperfectionis labe inficiantur. Id unice jam intendimus, ut ad rectitudinis normam adeo prope accedant, quantum datur, ne defectus agenti imputari possit, & hoc urgemus, ut ad omnimodam rectitudinem contendamus, quantum per eum, qui nobis conceditur, facultatum usum fieri potest, utque illi, quibus amplior facultatum usus divina providentia concessus est, pro virili propositum hoc promoveant, ne defint obligationi, qua tenentur ad felicitatem generis humani promovendam. Quoniam itaque theoria verior & magis exasciata negotiorum publicorum, quam in anterioribus delineavimus, ad hunc scopum collineat; in id incumbendum esse contendimus, ut ea in apricum producat ac collatis plurimorum operis, quantum datur, continuo magis magisque perficiatur: neque enim existimandum est unius hominis esse completam condere theoriam, quæ aliorum industriæ nihil superaddendum

relinquat. Id autem pro certo habemus multum præstare, ut aliqua, quamvis manca adhuc & mutila proset, quam nulla: inventis enim facile est addere & imperfecta facilius emendantur & ad ulteriorem perfectionis gradum evehuntur, quam primum deteguntur. Haud difficile foret exemplo Mathematicorum hoc docere &, qui philosophus audio, rationibus quoque idem confirmare poteram invictis; sed in tantas ambages descendere a præsentē instituto alienum putamus. Utilitas & necessitas theoriæ rationalis, quam empiricæ opponimus, ex superioribus abunde elucet. Nec multa attentione, acumine multo opus est, ut agnoscas, theoriam rationalem multis parasangis post se relinquere empiricam. Quamobrem si vel maxime largiamur, quod tamen prætendi nullo modo potest, theoriam, quam diximus, empiricam esse completam, ut nihil amplius eidem accedere queat; id tamen minime obstabit, quo minus ad rationalem reducatur & hæc omni, quo fieri potest, modo excolatur. Lucem his affun-

affundunt, quæ de Logicæ naturalis & artificialis differentia hujusque præ illa utilitate demonstrata sunt in Prolegomenis Logicæ.

## §. 14.

*An even-  
tus cer-  
tus pen-  
deat a  
theoria  
rationali  
negotio-  
rum pu-  
blicorum.*

Satisfaciendum denique est quæ-  
stioni, num eventus negotiorum hu-  
manorum certus sit, si secundum theo-  
riam rationalem dirigantur, quem  
nunc incertum esse constat, ita ut  
spem maximam haud raro fallat. Ad  
judicium definitivum, quo nititur  
decretum & propositum agendi, re-  
quiritur notio distincta casus præsen-  
tis & principium generale, quid in  
eo juste ac prudenter fiat, ex theoria  
petendum. Illa in ratiocinio defini-  
tivo minoris, hoc majoris locum su-  
bit. Si vera esse debet conclusio,  
quod ipsum judicium definitivum est,  
utraque præmissa vera esse debet (§.  
537 *Log.*). Necesse igitur est, ut  
non modo principium, quod ex theo-  
ria petitur, verum sit, sed etiam ut  
casus præsens rite fuerit determina-  
tus. Casus datus determinatur per  
circumstantias præsentis (§. 180 *Part.*

*II.*



*II. Phil. pract. univ.* ). Quamobrem nisi circumstantiæ omnes tibi fuerint cognitæ atque perspectæ, casum rite determinare had quaquam potes, consequenter licet negotiorum publicorum theoriam completam habueris, iudicium tamen definitivum minime fallax formare non valebis. Applicabis enim principium, sub quo continetur casus, qui tibi videtur, non vero illud, sub quo continetur qui est. Eventus adeo certus non est, cum certitudo pendeat a veritate iudicii definitivi. Et si vel maxime noris, circumstantias omnes tibi non esse perspectas, cum tamen agendum sit, quod jam supponitur, secundum probabilitatem per eas, quæ tibi innotuere, circumstantias, vel quas præterea conjectando assequeris, determinandus erit casus præsens & ex theoria applicandum principium, sub quo casus probabiliter determinatus continetur. Nemo autem Logicæ gnarus ignorat non maiorem esse certitudinem in conclusione, quam fuerat in præmissis, consequenter patet, non nisi probabile esse, quod sic iuste

ste ac prudenter agat, atque adeo fortunæ aut, si mavis, providentiæ divinæ committendus est eventus. Dubius adeo adhuc eventus est, etiamsi theoriam maxime completam possideas, cumque in potestate tua positum non sit detegere omnes circumstantias, quas ad casum præsentem rite determinandum nosse debebas, nec prævidere liceat circumstantias in executione negotii sese oblaturas, impossibile quoque est ut de eventu certo tibi constet. Absit igitur, ut tibi persuadeas, a theoria negotiorum publicorum rationali expectandum esse, ne spes concepta unquam fallat. Neque vero existimandum est, tum nullum esse theoriæ rationalis effectum: etenim ab omni culpa te immunem præstat. Quanti vero sit possidere animum ab omni culpæ sensu liberum, ubi negotium ex voto non succedit, nec in hoc quicquam tibi imputari potest; abunde intelliget, qui principia theoriæ ac praxeos Philosophiæ practicæ universalis perspecta habet, quæ in utraque ejusdem parte a nobis demonstrantur. Ultra ho-  
minum



num fortem positus esse debet, qui in omni casu negotii eventum certo prævidere voluerit. Habet equidem theoria rationalis negotiorum publicorum aliquid singulare, quod ubi fuerit familiaris casibus etiam minime prævisis medeatur, circumstantiis ex improvise emergentibus, dum in ipso actu constitutus; veruntamen de eo in præsentem non dicam. Quæ dicenda sunt, ab iis pendent, quæ de præparatione ad casus futuros demonstrantur in parte altera Philosophiæ practicæ universalis: inter casus enim futuros, ad quos nos præparare debemus, referuntur quoque casus subiti ac improvise, quibus omnino accensendi ob circumstantias non cognitatas minime determinabiles, dum deliberabatur. Denique hoc quoque notandum venit, quod, qui secundum theoriâ rationalem probabiliter agit, quatenus scilicet eandem ad casum præsentem probabiliter applicat, de eventu magis securus esse possit, quam qui nulla probabilitate agit, sed temerario ausu negotium aggreditur. Sed quæ a principiis

Q

Lo-

Logicæ probabilium, quæ hætenus in desideratis est, pendent; de iis vix consultum est ut dicatur.

## II.

*De Versione Librorum juxta Philosophiæ nostræ adornanda.*

## §. I.

*Institu-  
tum An-  
torit.*

**D**udum in more positum est iis, qui sub signis infensissimi scientiæ ac virtutis infucutæ hostis militant ac stipendia merent, ut, si quid male factum appareat ab iis, qui velle-ctionibus nostris interfuerunt, vel libros nostros legerunt, vel quæ fando de iis perceperunt, approbarunt, vel principiis quibusdam nostris sive utuntur, sive abutuntur, id omne Philosophiæ nostræ imputetur & cap-tiosa dictione fructus Philosophiæ nostræ appelletur. Cum enim legerint simile quid olim objectum fuisse a Gentilibus doctrinæ christianæ; cœci aliorum imitatores idem telum in Philosophiam nostram vibrant. Et quia etiam canum mores imitantur, latrante Cerbero statim latrant omnes.

La-

Latrant cum molossis catelli, & multitudo philosophiam nostram conlatrantium invictissimum præbet argumentum periculi summi ab ea Ecclesiæ ac Reip. imminentis, quasi nostris temporibus multitudo errantium patriat errori patrocinium. Quodsi ergo quis vel librum aliquem male vertit ex uno sermone in alterum, quod in versione reprehenditur, fructus philosophiæ nostræ perhibetur, etiam si in vulgus notum sit, quorumnam vestigia secutus fuerit interpret. Illustre in medium proferre poteram exemplum, nisi dudum decrevissem ad apertas fatuantium calumnias nihil reponere, aliis causam pro me accurate eleganterque dicentibus, ne, quod unice in votis habent, circulos meos turbari sinam. Nec est quod a proposito meo me diverti patiar, cum allatæ criminationes, quo sunt acerbiores, tanto magis faciant ad philosophiam nostram propagandam, ut non modo imprudens foret omnis de iis repellendis cogitatio; verum etiam ingritudinis quandam notam incurere viderer, nisi zelum tantorum

Q 2

præ-

præpagatorum saltem silentio venerar. Qui philosophus mentis aciem in id convertere soleo, quod boni actionibus aliorum vitiis inhæret: præfertim cum alii eundem publico cultu dignum judicent, teste dedicatione duobus sermonibus de mysterio natiuitatis Christi a Theologo eminente Reinbeckio in præsentia Regis Prusiae recitatis atque ejus jussu publici juris factis ac postea in Sermonem Gallicum versis præmissa, cui maxime applaudunt æquissimi rerum æstimatores, nec desunt approbatores, quorum sacratissima nomina dicere religio est. Quemadmodum vero nobis in more positum est calumniis opponere veritatem ad erudendum dociles, altercari autem mulierum ritu cum rixatoribus famosi sumus, qui nulla veritatis ac virtutis reverentia, nec agendi more ac modo continentur, ingenuo homine indignum semper visum; ita quoque quod nostrum est nos facturos existimamus, si de versione librorum juxta principia Philosophiæ nostræ adornanda commentationem in publicum

cum

cum proferremus. Quemadmodum enim vilis & abjecti animi est ad captandam gloriam aliorum famam lacerare; ita quoque nos a censendis ac refutandis aliis semper fuimus ac erimus alienissimi nominatim perstingentes neminem, & nobis sufficit nostram dixisse ac rationibus stabilivisse sententiam. Per nos unusquisque suo abundet genio & laude sua, quam nec immeritam alteri invidemus, fruatur.

## §. 2.

Qui librum aliquem conscribit, id Intentio  
libros ex  
uno ser-  
mone in  
alium  
verten-  
tium. omnino intendere debet, ut eundem legentes mentem ejus percipiant. Quamobrem qui librum ex eo, quo conscriptus est, sermone in alium vertit; non aliud intendere potest, quam ut versionem legentes mentem auctoris assequantur, ut perinde sit ac si textum authenticum legerent. Scripsimus nos Logicam lingua vernacula in usum prælectionum academicarum, quem etiam ipsimet in Latinam transferre coacti sumus, in Gallicam, Italicam & Belgicam transtulere alii. Qui hasce dedere versiones, voluisse

Q 3

uti-

utique dicendi sunt, ut ea, quæ Germanice scripsimus, intelligantur etiam ab iis, qui versiones legunt. Unde scopo suo satisfecisse dicendus est interpretes, si perinde sit, siue quis librum Germanicum, siue versionem legat. Quod hic sumo, adeo evidens est, ut a nemine in dubium vocetur. Habemus adeo principium certum & ab omnibus concessum, ex quo deducenda sunt, quæ de libris ex uno sermone in alium vertendis præcipiuntur. Cum nostra, qua philosophamur, methodus non admittat, ut sumantur, nisi quæ ab omnibus conceduntur, saltem concedi debent, nisi insanire voluerint, nec permittat ut affirmentur, nisi quæ vi principiorum alibi jam demonstratorum ex assumpto deducuntur legitimo rationum nexu, nemo sanus intentionem interpretis, quæ ab ea, quam diximus, abit, principiis Philosophiæ nostræ conformem dicet. Ponamus itaque interpretem id agere, ut alium a sensu Autoris menti lectoris instillet; intentionem ejus philosophia nostra damnat, nec dici potest, quod  
in



in vertendo libro observaverit, quæ de iisdem vertendis præcipit philosophia nostra. Intentio diversa ab ea, quam hic in interprete requirimus, methodo, qua philosophamur, e diametro repugnat, &, si eandem probare vellemus, methodum istam reprobare teneremur, qua philosophia nostra ab omni alia distinguitur. Id adeo verum est, ut, etiamsi meliora & veriora tradere voluerit, quam tradidit autor, id tamen minime ferat philosophia nostra, quæ notiones diversas non confundere finit, aliud autem est vertere, aliud emendare librum alterius (§. 183 *Ontol.*). Multo minus autem ea fert, ut verba Auctoris studio pervertantur, quo gignant sensum a mente ipsius alienum: neque enim solum diversa sunt vertere & pervertere verba, quæ duo confundi non finit Philosophia nostra; verum etiam hic ipse ausus, quocunque animo fiat, principiis Philosophiæ practicæ pro diversitate intentionis diversis repugnat. Nemo itaque dixerit absque injuria intentionem ab ea, quam in interprete requisivimus,

Q 4

vel

vel in minimis quomodocunque differentem esse principiis Philosophiæ nostræ conformem.

## §. 3.

*Regula  
prima  
de identitate  
significatus  
vocabulorum  
in  
textu  
authentico  
&  
versione  
sibi  
mutuo  
respondens.*

Cum igitur ratum sit, qualis esse debeat intentio ejus, qui librum ex sermone, quo conscriptus est, in alium vertere decrevit, nunc porro disquirendum, quomodo huic intentioni satisfiat. Vocabula sunt signa nostrarum perceptionum, seu rerum per eas repræsentatarum (§. 271 *Psych. empir.*). Mentem adeo auctoris intelligimus, si easdem perceptiones in anima nostra excitantur, seu res eadem in ea repræsentantur, quas iisdem indigitare voluit. Nimirum qui mentem ejus intelligere voluerit, s& perspectos habere debet terminos, quibus utitur, nosseque notiones iis jungendas (§. 118 *Log.*). Secus qui facit, mentem alterius non intelligit. Quamobrem cum perinde esse debeat, si quis textum authenticum, si versionem legat (§. 2); necesse est, ut per vocabula, quæ in versione leguntur, eadem perceptiones, seu notiones in anima excitentur, quæ in ea-

eadem excitantur per vocabula in textu authentico iisdem respondentia. Atque adeo patet, vocabula Autoris & ea, per quæ redduntur, in versione eundem prorsus significatum habere debere. De regulæ hujus veritate nemo ambigit, ita ut haud paucos fore non dubitem, qui eam absque probatione admittant, immo qui reprehendant, quod per se manifesta nec ab ullo sano in dubium vocanda demonstremus. Enimvero hi erunt, qui & officium Philosophi ignorant, & a præsentis instituti ratione animum avertunt. Philosophi est rationem reddere eorum, quæ sunt (§. 46 *Disc. prælim.*), adeoque etiam rationem reddere tenetur, cur identitas significatus vocabulorum in textu authentico occurrentium & in versione iisdem respondentium sancte sit observanda, quo scilicet per naturam vocabulorum & intentionem interpretis intelligatur, cur id fieri necesse sit (§. 56 *Ontol.*). Philosophus rationem quoque reddit eorum, quæ quod sint in vulgus notum est. Neque enim id facit eo fine, ut ali-

os convincat, verum esse quod hoc sit, sed ut doceat, cur sit. Rusticis notum est stercoratione agrum refoveri: hoc tamen non obstante Philosophus inquit in rationem, cur stercola agro concilient fertilitatem. Porro nobis jam propositum est ostendere, quænam versio sit principiis Philosophiæ nostræ ac methodo, qua philosophamur, conformis (§. I.). Necessè igitur est, ut ex principiis, quæ in operibus nostris philosophicis stabilimus, eadem methodo deducamus regulas, quas unanimiter admittunt omnes, ut earundem cum Philosophia nostra manifestus sit consensus. Quodsi enim contingat interpretem libri cujuscunque in hasce regulas impingere, a veritate alienum est, quod Philosophiæ nostræ tribuendum sit, cur in eas impegerit. Alia adesse debet ratio, cur a regulis philosophiæ nostræ conformibus aberraverit, quæcunque tandem illa fuerit, & absurdum est pronunciare, quod interpres ad principia Philosophiæ nostræ animum advertens ab iis necessario recedere debuerit.

§. 4.

Quæ de identitate significatus vocabulorum in textu authentico & in versione sibi mutuo respondentium præcipiuntur, etsi adeo manifesta sint, ut citra manifestam absurditatem in dubium revocari nequeant, adeoque omnes eadem largiantur (§. 3); non tamen eadem facilitate iisdem satisfacit, quæ præcipiuntur. Quod si enim versiones librorum, quæ prostant, cum textu authentico, ex quo in alium sermonem translati sunt, conferas; quam sæpe in hanc regulam, quæ identitatem significatus vocabulorum in textu authentico & versione sibi mutuo respondentium urget, impingatur, animadvertes, ut non nudius tertius demum auditæ sint querelæ de paucitate bonarum versionum, & textus authenticus ideo præferatur versioni, immo in Theologo & verbi divini Ministro linguæ Hebraicæ atque Græcæ noticiam requirant Protestantes, quod Bibliorum versionibus non semper tuto fidatur. Sane cum agnoscere teneamur, quotquot scripturam sacram pro oraculis divinis habemus,

*Quanam  
de appli-  
catione  
regula  
primæ te-  
nenda.*

mus, vocabula singula ea circumspeditione fuisse selecta, ut, quod significare debent, quam exactissime exprimant, & minime omnium negare possint, qui ipsa verba autoribus divino spiritu afflatis inspirata contendunt; nullibi magis hæc regula adeo stricte observari debebat, quam in versione Bibliorum. Videmus tamen hoc non obstante interpretes, qui optimi celebrantur, nunc idem vocabulum reddere per diversa, etiam si idem πολύσημον esse seu plures diversos significatus admittere probari minime possit, nec ulla urgeat ratio, cur ab eodem significato recedatur; nunc vero plura diversa vocabula exprimi per unum; ut ut ne minima quidem adsit probabilitatis ratio, quæ suadere possit, eidem rei ab Hebræis atque Græcis plura diversa imposita fuisse nomina. Nemo hoc ignorare potest, nisi qui versiones Bibliorum nunquam cum textu authentico contulit, & ubi temere negare ausit, quod pro experto habendum, contrarii exemplis manifestis in ruborem extemplo datur. Stet per nos stabitque versio-

ni



ni vernaculæ Bibliorum a Luthero factæ suus honos ( neque enim nostrum est emendare versionem Germanicam Bibliorum in Ecclesia Protestantium usu receptam ): hæc ipsa tamen nobis suppeditat luculentæ ejus rei exempla. Monuimus jam alibi (§. 380 *Met.*) necessitate ita exigente, Lutherum decem minimum vocabula Hebraica & triginta fere vocabula Græca per Germanicum *Vernunft*, quod eam animæ facultatem denotat, quæ rationis nomine venit, & qua homo a brutis potissimum distinguere solet, reddidisse. An vero a te impetrare poteris, ut tibi persuadeas, Hebræos unam istam eandemque rem decem diversis nominibus, Græcos vero triginta eandem insignivisse? Absconum sane videbitur unicuique præter ullam necessitatem multiplicare tantopere nomina rerum, nec ulla censebitur gens adeo absurda, ut tanta nominum multitudine delectetur. Philosophia nostra, quæ omnimodam actionum rectitudinem tanquam obligationem naturalem urget (§. 189 *Part. I. Phil. pract. univ.*), istiusmodi

di vocabulorum substitutionem minime fert, sed ut regulæ de identitate vocabulorum in textu authentico & in versione exacte satisfiat quam rigorosissime exigit, etsi humanæ fortis memores aberrationes ab eadem in interpretibus æquo animo feramus &, quantum datur, excusemus, nec propterea eorum meritis, quorum laude merito fruuntur, quicquam detrahimus: etenim & hoc ipsum Philosophiæ nostræ principiis conveniens esse cum qua theoriam, tum qua praxin suo constabit loco. Enimvero ut rectius intelligatur, quomodo regulæ isti satisfiat, distinguendum est inter vocabula simpliciter posita, & inter loquendi formulas ex pluribus vocabulis compositas, quas *phrases* appellamus. Vocabula singula in se spectata in qualibet lingua ex usu loquendi proprium quendam habent significatum, quatenus certam quandam perceptionem, adeoque certam quandam rem eadem repræsentatam denotant, etsi per inconstantiam loquendi nonnunquam notionibus, quæ iisdem respondent, pro diversitate circumstantiarum aliquid

quid adhæreat peregrini non semper idem, ut vagus hinc nascatur significatus, quatenus ad hoc ipsum significandum vel simul, vel præcipue a loquente adhibetur. Quodsi ergo regulæ de identitate significatus vocabulorum in textu authentico & versione satisfaciendum; si in illo vocabulum aliquod simpliciter ponitur, eidem in hac substituendum est, quod eundem significatum proprium in eo sermone ex communi loquendi usu habet, in quem vertitur. Quodsi contingat, autorem sumere vocabulum in significatu vago, in versione ponendum est, quod eundem significatum vagum in altera lingua admittit, aut vocabulo in proprio significatu accepto adjiciendum est aliud, quod ideam secundariam, ad quam in vago significatu respicitur, denotat, ubi in versione ex contextu secus conjectando assequi non datur, quod in textu authentico satis manifestum. Minime igitur probandum, si vocabulis autoris substituantur alia, quæ quid denotant, unde illud colligitur, quod is indigitare voluit: quodsi

quodsi enim autor vocabula, quibus utitur, probe ponderat, num ad mentem suam rite exprimendam conducant, adeoque non sine judicio scribit, in ipso contextu continetur ratio, cur hoc potius vocabulo uti maluerit, quam alio, & in hoc emphasis verborum consistit, quæ omnino perit, si aliud in versione substituat, et si citra errorem hoc fieri posse videatur. Nemo non hoc admittere tenetur, qui vim ac potestatem verborum novit, quibus regula enunciatur. Secus tamen haud raro faciunt interpretes. Nullibi magis observari debebat, quod ad emphasis verborum quomodocunque facit, quam in versione scripturæ sacrae, cum nobis persuasissimum esse debeat, autores sacros summo studio elegisse vocabula, ita ut, si non uno modo mentem suam exprimere potuissent, semper dari possit ratio, cur hoc potius modo eandem exprimere maluerint, quam alio. Hoc tamen non obstante optimas, quæ laudantur, versiones in eo deficere deprehendimus. Occurrunt exempla in Theologia natura-

turali, ubi ea, quæ ex principiis rationis de Deo demonstravimus, scripturæ sacræ conformia esse ostenditur. Exempli loco sit, quod de incorruptibilitate Dei diximus (§. 95 *Part. I. Theol. nat.*). Nimirum Apostolus *Rom. I. 13* Deum appellat ἀφθαρτον, quemadmodum hominem φθαρτον vocat. Vocabulum istud significat incorruptibilem, quemadmodum vertit interpret vulgatus verborum proprietati inhærens. *Castellio* vero id ipsum reddit per immortalem, & *Lutherus* per vocabulum vernaculum *unvergänglich* seu non transitorium. Non est quod dicas, perinde esse siue Deum dicas incorruptibilem, siue immortalem, cum incorruptibilis esse debeat, si immortalis est, immo immortalitas proprie magis de Deo incorporeo prædicetur, quam incorruptibilitas, cum corporum sit corruptibile esse. Nihil adeo reprehendendum esse in versione *Castelliana*. Similiter cum vernaculo sermone corpora dicamus *vergänglich* seu transitoria, quia sunt corruptibilia: id transitorum non est, quod incorru-

R

pti-

ptibile, adeoque sermone vernaculo recte dici *unvergänglich*. Neque adeo censuram mereri *Lutherum*, quod Deum non dicat *unverweslich*, sed *unvergänglich*. Immo forsan erunt, qui sibi persuadebunt, vernaculo sermone Deum multo significantius vocari *unvergänglich*, quam *unverweslich*. Enimvero in Theologia naturali (*loc. cit.*) jam annotavimus, non esse vocabulum, quod durationem Dei indefectibilem scopo Apostoli amentiam gentium ob idololatriam accusaturi convenientius exprimat, quam incorruptibilitas, ut adeo pereat emphasis omnis, quæ verborum Apostoli est & animum ad ea attentum luce sua percellit, si vocabulum quodvis aliud, quo eadem duratio indigitari potest, substituatur. Dicendum itaque est mentem Apostoli nec a *Castellione*, nec a *Luthero* exacte exprimi. Nec utrumque interpretem rite ponderasse verba Apostoli, & in rationem inquisivisse, cur Deum potius incorruptibilem, quam immortalem aut non transitorium appellare maluerit. Plura istiusmodi  
spe-



specimina in medium proferre poteramus, quibus palam fit, interpretes scripturæ sacrae non ea usos esse attentione, qua opus est, si regulæ de identitate significatus vocabulorum in textu authentico & versione ex æse satisfaciendum. Tanto autem facilius attentionem istam in se desiderari passi sunt, quod in notionibus confusis acquiescentes determinatum vocabulorum significatum minime expendunt, ut adeo pateat, quantum valeat censura illorum, qui ferre nolunt incorruptibile, immortale & non transitorium accuratis definitionibus a se invicem distingui, & tantum non in crimen vertunt, si quis in explicanda scriptura sacra vocabula, quæ per notiones confusas ex communi loquendi usu iisdem adhærentes intelligi satis putantur, ad definitiones confugit, sine quibus perspicere non licet, quantum significatus unius a significato alterius differat, nec mentem loquentis sufficienter inspicere licet, qui ad eam exprimendam seligit, quod convenientissimum est. Utinam prostaret Lexicon Biblicum,

in quo genuinus vocabulorum Hebraicorum & Græcorum in libris utriusque foederis occurrentium significatus per exactas definitiones stabiliretur, & phrasæ similiter explicarentur; nullus dubito fore, ut majorem inde utilitatem in explicanda scriptura sacra & ad varios usus applicanda, quam ex vastis commentatorum multorum voluminibus perciperemus. Obiter hic notamus, ex iis, quæ de vertenda Scriptura sacra in sermonem alium modo dicta sunt, haud difficulter colligi, quid sentiendum sit de ausu illorum commentatorum, qui exiguo temporis spatio vasta volumina in publicum protrudunt, ex diversis aliorum voluminibus male cohærentia compilantes & exercitiorum styli memores, quæ pueris in Scholis commendantur propter verborum copiam, dictionem variant, ne plagarii dicantur. Parum reverenter verbum Dei habent, qui hoc faciunt, præsertim ubi non alio fine quam crumenæ locupletandæ gratia hoc faciunt, ac ideo omni studio coactos quærunt emtores. **Urgent**

gent Theologi Protestantes linguæ Græcæ atque Hebrææ notitiam in eo, qui Scripturam sacram aliis explicare voluerit, ne versione nimium fidens mentem auctoris sacri non satis assequatur & ab ea aliena pro verbo Dei venditet. Ad verborum itaque significatum probe ponderandum, quantum sufficit, ut mentem auctoris sacri habeas perspectam, plus temporis requiritur, quam istiusmodi sarcinatores verbis consarcinandis impendunt, præsertim cum versiones, quæ hætenus prostant, loquantur, verba textus authentici hætenus non satis fuisse ponderata ab interpretibus: id quod omnes confiteri tenentur, qui studium linguæ Hebraicæ ac Græcæ tantopore urgent, nisi præter rationem id a se urgeri concedere velint in omnibus promiscue Theologiæ studiosis. Sed hæc dicta sunt de vocabulis absolute positis. Phrases quod spectat, nemini ignotum est, etsi ex pluribus vocabulis componentur, eas tamen spectandas esse instar termini unius, cui quædam respondet notio complexa, per ipsum

significata non vi vocabulorum, sed ex usu loquendi, utut ratio denominandi hinc subinde desumpta sit, quemadmodum etiam contingit, vocabula derivativa & composita rationem significatus etymologicam habere. Rarissime autem obtinet, ut eadem phrasēs sint pluribus linguis communes; quin potius unicuique proprias esse phrasēs deprehendimus. Quodsi itaque regulæ de identitate significatus vocabulorum in textu authentico & in versione satisfacere volueris; phrasēs vertendæ sunt per alias in altero sermone receptas & istis quoad significatum æquipollentes, non vero vocabula singula reddenda sunt per ea, quæ iisdem in altero sermone quoad significatum singulis in se spectatis competenter respondent. Ita Latinis omnem movere lapidem dicitur, qui omnia conatur & experitur. In vernaculo sermone dicimus sich auf das äußerste bemühen. Hæ duæ phrasēs eundem habent significatum, nullum tamen vocabulum in una lingua respondens cuidam in altera. Similiter in sermone

Latino lapidem ferre altera manu, panem ostendere altera dicitur, qui coram alteri blanditur, clanculum vero inimicum erga ipsum ostendit animum. In vernaculo sermone dicere solemus, *sich vorwärts gut stellen, hinter dem Rücken aber sich feindseelig bezeigen*. Significatus phrasium idem est, vocabula tamen singula in utroque prorsus diversa. Quodsi ergo secundum literam vertantur phrasēs, versio haud raro adeo obscura evadit, ut mentem auctoris non assequatur, qui hanc legit, immo prorsus nesciat, quamnam verbis notionem jungere debeat.

## §. 5.

Inquirendum adeo est interpreti in <sup>*Regula*</sup> notionem, quæ phrasi auctoris jun- <sup>*secunda*</sup> genda, ac deinde dispiciendum, qua- <sup>*de phra-*</sup> nam phrasi in altero sermone eadem <sup>*sibus*</sup> indigitetur. Dum phrasibus vindi- <sup>*verten-*</sup> cantur notiones determinatæ, idem <sup>*dis.*</sup> agitur, ac si vocabula accurate definiuntur. Unde denuo patet, quantum utilitatem interpreti afferant notiones distinctæ, si certus esse velit,



se mentem auctoris rite expressisse, ita ut nihil desiderari in versione possit. Neque vero putandum est hoc adeo facile esse, ut levem saltem attentionem, acumen nullum postulet. Qui distinctis notionibus animum non habent refertum, nec quid intersit, utrum distinctas, num confusas saltem habeamus notiones, experti sunt, de phrasium æquipollentia judicium exactum ferre nequeunt. Unde videas in eodem sermone sæpissime pro æquipollentibus haberi & promiscue usurpari, quibus tamen non præcise eadem notio respondet. Dantur etiam phrasæ in uno sermone, quibus aliquam æquipollentem in altero sermone reperire minime licet, ut adeo versio mutanda sit in periphrasin: quo tamen non obstante haud raro perit emphasis. Atque hæc prægnans ratio est, cur qui Scripturam sacram aliis explicare voluerit, Linguae Hebraicæ atque Græcæ non sit ignarus, ne minus dicat, quam scriptores sacri verbis suis insinuare voluerunt, neque addat a mente ipsorum aliena. Arduum igitur censeretur verbum  
Dei



Dei interpretari & explicare aliis, non idem minus reverenter habeamus, quam par est. Utinam hoc perpenderent, qui Commentarios in Scripturam sacram conscribere pro modo acquirendi Theologis proprio habent! Non jam descendimus ad particularia, quæ de vertendis phrasibus dici poterant. Supponunt enim phrasium theoriam, quam inter desiderata referre tenemur, cum nondum proffet Philosophia verbalis, disciplinis ad eam spectantibus, quales sunt Grammatica generalis & Rhetorica, ad rationes solidas methodo demonstrativa nondum revocatis. Habent etiam phrasen in qualibet lingua suas rationes, quæ a generalibus pendunt principiis methodo demonstrativa stabiliendis. Ubi Philosophia realis satis fuerit exculta, erunt etiam qui ad verbalem excolendam utiliter animum appellent. Sufficiat igitur nos hic tradidisse, quæ acumine præditis ad ulteriora profunt.

§. 6.

Dantur etiam modi loquendi, linguæ uni ita proprii, ut in alia nullum

*Regula  
tertia de  
Idiotismis*

R 5

ha-

lingua-  
rum.

habeant locum, quos *Idiotismos* appellamus. Per se patet, hos quoad literam verti minime posse. Quamobrem si idiotismi occurrunt, in versione utendum est vocabulis, quæ ex consuetudine loquendi in isto sermone, in quem transfunditur quod alio scriptum, idem significant, quod autor indigitare voluit. Tyronibus linguæ Hebrææ notum est, Hebræos superlativum exprimere per positivum adjecta particula valde, ita ut quod optimum dicitur, valde bonum dicant. Quamobrem cum Gen. I. 31. Moses narrat, Deum vidisse cuncta, quæ fecerat, & fuisse valde bona; nemo non videt, dicendum esse, quod fuerint optima, consequenter in versione Germanica legendum esse non, ut Lutherus vertit, es war alles sehr gut, sed potius: es war alles auf das beste gemacht, quemadmodum pluribus docuimus, cum evincemus doctrinam de mundo optimo a Deo creato esse Scripturæ sacræ conformem (§. 406 Part. I. Theol. nat.). Sane neque in lingua Latina valde bonum & optimum, neque in Ger-

ma-

manica sehr gut & auf das beste gemacht, idem significant. Quod valde bonum est, idem melius esse non repugnat, adeoque optimum nondum est. Similiter idiotismus linguæ Hebraicæ est, quod ignis Dei, vel caligo Dei, denotet ignem maximum, vel calliginem maximam. In versione igitur male legitur ignis Dei vel caligo Dei, cum versionem legentes minime intelligent, quid autor hac appellatione sibi velit. Monuimus quoque jam alibi (§. 416 *Part. 1. Theol. nat.*), idiotismum linguæ Hebrææ, qui unico vocabulo Hebraismus in specie dici solet, esse quod omne verbum idem significet ac omne ens seu rem omnem, aut stylo Germanico alles, was genannt mag werden, hoc est, quicquid nominari potest. Unde versio vulgata Jerem. XXXII. 17. Hebraismus facit, quando in ea legitur, non erit tibi difficile omne verbum, & laudavimus *Castellionem*, qui ita vertit: non est tibi ardua res ulla, atque *Lutherum*, qui eundem Hebraismus evitaturus verba angeli ad Mariam Luc. I. 37. reddit: *Sein Gott ist kein Ding*

**Ding unmöglich.** Nemo non videt hic quoque, non esse unum idemque, siue in Latino sermone dicas, non est impossibile apud Deum omne verbum, siue neges rem ullam Deo impossibilem esse. Etenim si ad verba priora, quæ Hebraismum sapiunt, animum advertas, tibi persuadebis, dici ab angelo, quod Deus facere possit, quæ dicit; cum potius insinuet eum ens omne ad actum perducere posse, seu facere posse, quicquid possibile. Si verba angeli ratione Hebraismi habita vertantur, argumentum pro omnipotentia Dei supeditant; minime autem, si Hebraismus infertur in alium sermonem, in quo eidem locus non est. Et quamvis quod per Hebraismum minus recte retentum insinuat a veritate non abhorret; in contextu tamen omnia magis ac melius cohærent, ubi agelum ad omnipotentiam Dei provocare intelligis: id quod hic latius deducere non est nostri instituti. Abunde igitur patet, idiotismos in versionibus summo studio esse vitandos & scopo interpretis repugnare,

fi



si eosdem in versionem inferat (§. 2). Quod vero de phrasibus paulo ante monuimus (§. 5); idem quoque de idiotismis tenendum. Scilicet dantur quoque idiotismorum rationes, quæ ad rationes generales revocari possunt in Philosophia verbali explicandas. Eadem igitur ratio, quæ non permittebat, ut de phrasibus vertendis particularia in medium proferremus, etiam obstat, quo minus hic ad particularia descendamus. Nobis enim in more positum est nihil affirmare, nisi quod ex principiis a nobis jam alibi demonstratis fluit. Sufficit & hic aliorum provocasse attentionem & excitasse acumen, uti videant, qua via sit eundem, si ad ulteriora progredi voluerint.

§. 7.

Ex hætenus dictis prona consequentia inferitur, interpretem appropri-<sup>Quantum requirantur in interpretatione</sup> me gnarum esse debere & illius sermonis, quo liber in alium vertendus conscriptus est, & alterius, in quem eundem transferre debet. Veluti si quis Bibliorum versionem Germanicam

cam dare voluerit; in eo requiritur & linguæ Hebrææ atque Græcæ, & linguæ Germanicæ accurata notitia. Etenim interpreti perspectus esse debet in utraque lingua proprius vocabulorum significatus (§. 3), perspectæ esse debent phrasæ in utraque sibi mutuo æquipollentes (§. 4), perspecti denique sint necesse est idiotismi (§. 6). Ecquis ergo non videt, linguæ utriusque genium interpreti quam optime perspectum esse debere? Ad rimandum proprium verborum significatum & phrasium in utraque lingua æquipollentiam mirifice conducunt notiones rerum distinctæ (§. 4. 5), immo subinde adeo necessarium est, ut sine illarum subsidio officio boni interpretis satisfacere non possis. Interpretes adeo rerum quoque cognitione exquisita instructus esse debet, de quibus agitur in libro, quem transferre in alium sermonem decrevit: id quod in primis tenendum est de libris dogmaticis. Qui mathematicum rudis est, non bene vertit libros mathematicos: qui in omni philosophia peregrinus ac hospes est,

ab



ab eo non expectabis translationem librorum philosophicorum, quæ satisfacit: qui juris imperitus est, versionem librorum juridicorum non dabit, quæ commendari possit. Sed cum nemo sit, qui hæc in dubium vocat, ut multa eam in rem dicamus opus non est. Non nego fieri posse, ut duo collatis operis vertant librum, quorum alter rerum probe gnarus, de quibus in eo agitur, sermonis autem ignarus, in quo conscriptus est; alter vero gnarus sermonis, ignarus rerum. Etenim tum duo simul funguntur officio interpretis & unam præsentant personam, adeoque perinde est siue ea requisita, quæ sunt boni interpretis, insint eidem subjecto, siue diversis. Illustre habemus exemplum, quo idem confirmatur. Desiderabantur Libri quintus, sextus & septimus Conicorum Apollonii injuria temporum deperditi. Extabat Codex Msc. arabicus in Bibliotheca Serenissimi Magni Ducis Etruriæ. *Abrahamus Ecchellensis Maronita*, Romæ linguarum Orientalium Professor, linguæ Arabicæ notitia pollebat,

bat, sed Mathesin nunquam delibaverat: *Joh. Alphonsus Borellus*, in Pisana Academia Matheseos Professor, in Geometria erat versatissimus & methodum demonstrandi veterum optime callebat. Libros istos Latinos reddidit *Maronita*; curam in Geometricis versioni contulit *Borellus*. Collatis operis anno 1661 Florentiæ prodiit versio, quæ Geometrarum expectationi satisfacit. Illud quoque notandum est, rerum intelligentiam supplere defectum peritiæ sermonis, ita ut conjectura minime fallaci assequamur mentem autoris ex verbis minime percipiendam. Neque hoc mirum videri poterit, cum eodem modo sensus, qui per verba obscurior relinquitur, ex contextu pateat. Qui igitur distincte novit, quomodo sensus verborum per se obscuriorum ex contextu eruatur; ei etiam perspectum est, quomodo rerum gnarus conjectando assequatur mentem autoris, quam ex verbis non satis intellectis, immo sibi nondum notis, percipere nequit. Nimirum in utroque casu ipsa rei notio animo leg-

gen-

gentis obversatur, quæ verbis non intellectis aut obscurioribus jungenda verbis aliis perspicuis excitata. Quamobrem si in eam mentis aciem convertis, haud difficulter perspicit, quænam in ea verbis obscurioribus respondeant. Facile unusquisque in seipso hujus rei experimentum capiet, qui ad operationes animæ attentionem sufficientem afferre didicit & eo pollet acumine, quod iis, quorum sibi confectus est, a se invicem separandis sufficit.

## §. 8.

Qui librum vertit, verba autoris <sup>Regula quarta de explanatione sensus versionis non inferendis.</sup> idem significantibus in alia lingua reddere tenetur (§. 2. 3.), & quantum hic requiratur rigor, ne minus, vel plus dicatur, aut a mente ipsius aliena proferantur, præsertim in translatione scripturæ sacre, supra monuimus (§. 4). Qui verba autoris explicat, non tam autoris, quam suis verbis enunciat, quamnam notionem animo legentis insinuare voluerit autor, ut a lectore suo melius intelligatur. Officium adeo interpretis restrictius est; multo autem li-

S be-

berius ejus, qui mentem autoris explicare intendit. Hic enim tantummodo de sensu follicitus, non de verbis, & laudatur si mentem autoris, quamvis verbis aliis ac pluribus explanet. Nemo igitur non videt, cavendum esse interpreti, ne explicationem autoris aut periphrasin cum versione confundat, & versioni inferat, quæ ad mentem autoris explanandam arbitratur. Qui mentem autoris explicat, sive commentatione in verba ejusdem, quemadmodum faciunt Commentatores, sive brevi expositione, quemadmodum solenne est Paraphrastis; is contendit, hunc esse sensum verborum autoris, quem ipsis tribuit: qui vero librum aliquem vertit, is verba autoris aliis tantummodo linguæ alterius reddit lectori relinquens, ut in mentem ipsius inquirat. Commentator adeo & Paraphrasta contendit, hunc, non alium esse sensum verborum autoris: interpres vero non contendit, nisi quod verba autoris fideliter ac rite reddiderit, ita ut si is eodem sermone, in quem librum transtulit, eundem scrip-



sisset, iisdem verbis usus fuisset, seu uti debuisset, aut, si autor ipse versionem legat, mentem suam ex his verbis percipiat. Duo hæc a se invicem differre, agnoscere tenetur, qui notionem diversitatis admittit (§. 138 *Ontol.*) & ad eandem animam advertit. Quod autem Commentatoris & Paraphrastæ est, id non esse interpretis, ex iis liquet, quæ de rigore observandi regulam de identitate significatus verborum autoris & interpretis supra inculcavimus (§. 4). Nullibi magis hoc observandum, quam in versione Scripturæ sacræ. Cum enim agnoscamus, eam esse verbum Dei, sollicite cavendum, ne aliorum explicationes pro eodem venditemus. Qui Scripturam sacram explicat, demonstrare tenetur eam esse autoribus sacris mentem, quam ipsis tribuit: cum vero demonstratio omnis procedat ex assumpto (§. 85 i & seqq. *Log.*), præter verba autorum aut ipsis respondentia in versione rite adornata juxta superiora non est, quod sumi potest aut quod sumere licet. Quamobrem

si quis versionem Bibliorum datu-  
 rus commentatores consulit, & quem  
 illi probant sensum literalem versioni  
 infert; is non textum, sed explica-  
 tionem vertit, quam ex Commenta-  
 rio hausit. Nec est quod excipias,  
 id culpandum non esse, ubi textus  
 intellectu difficilis ad faciliorem intel-  
 ligentiam hoc pacto reducitur, sed  
 laudandum potius esse, præsertim si  
 versione hebetudini consulitur. Ete-  
 nim adjectis versioni notis idem obti-  
 netur textus integritate salva. Aut  
 textui adjicienda Paraphrasis, quem-  
 admodum quoad Novum Testamen-  
 tum fecit *Hammondus*. Nemo igno-  
 rat, eundem Scripturæ sacre textum  
 non eodem modo explicari ab omni-  
 bus, etiam ubi de sensu literali qua-  
 estio est. Quod si ergo interpretes  
 Bibliorum versionibus inferrent expli-  
 cationes sensus literalis, quas pro ve-  
 rioribus haberent; versiones haud ra-  
 ro sibi mutuo contradicerent, ac fre-  
 quenter accideret, ut hominum opi-  
 niones pro verbo Dei venditarentur.  
 Notum est *Herrmannum von der*  
*Hardt* diluvium explicasse per bel-  
 lum



lum, & arcam Noë per munimentum. Ponamus itaque interpretationem hanc explicationem approbare. Ecquis ferret, ut historiam diluvii, quale a Mose narratur, redditurus describeret bellum, quale fuisse contendit *Hardtius*?

### §. 9.

Vides itaque quænam sint principia generalia librorum vertendorum Philosophiæ nostræ conformia, unde deducuntur regulæ speciales. Neque enim nostra philosophandi methodus fert, ut alia admittantur, quam quæ iisdem consona sunt, adeoque per ista demonstrantur. Quodsi itaque interpres librum ita vertit, ut ex principiis a nobis hic expositis ac iis regulis, quæ porro ex iisdem derivantur, ratio reddi possit, cur verba autoris sic potius vertere maluerit quam aliter; versio ejus principiis nostris convenit, nec per ea quicquam in eadem reprehenditur. Quodsi vero aliter facit, a principiis nostris versio abhorret, & quid in ea reprehendendum sit, vi eorundem concluditur. Quemadmodum vero nulli dubitamus, neminem fore, qui principia,

*Quando  
nam  
versio  
sit prin-  
cipiis au-  
toris con-  
veniens.*

quæ defendimus, veritati consentanea non agnoscat; ita quoque nemo non fateri cogitur, versionem principii Philosophiæ nostræ consentientem reprehendi minime posse. Quamobrem si qua detur versio, in qua jure quid reprehendi queat; ea principiis nostris contraria esse debet, immo ex his ipsis reddi poterit ratio, cur hoc, vel istud in versione minime sit probandum. Si quis vero per ea de versione quadam data judicium ferre voluerit; is ea circumspeditione uti tenetur, qua in omni applicatione principiorum generalium opus est. Nimirum judicium verum supponitur de facto interpretis, quod ex collatione versionis cum textu authentico formandum & in ratiocinio, per quod tanquam conclusio inferitur de versione judicium, minoris locum tuetur, principium vero nostrum tum demum in locum majoris succedit, ubi istud ponitur (§. 360. 361 *Psych. empir.*) Quamobrem si contingat judicium de facto interpretis a veritate aberrare; censuram interpretes incurrit non vi principii nostri, sed ob falsam ejusdem

dem applicationem, nec ubi laudatur, principiis nostris, sed perversæ eorundem applicationi tribuendum est, quod laudentur, quæ reprehendi debebant. Quemadmodum itaque Philosophiæ nostræ ac nostræ philosophandi methodo tribui nequeunt lapsus ab interprete in versione admissi; ita nec immeritas versionum laudes ad eam referre licet. Nec est quod excipias, interpretem vel encomiastam principia philosophiæ nostræ nostramque philosophandi methodum probare. Ecquis enim est, qui nesciat, vel summos viros in eas impingere regulas, quas præscribunt aliis & erronea eorum de factis aliorum judicia falsa principiorum applicatione niti? Constat *Cartesium* inculcasse, quod semel in vita de omnibus sit dubitandum, in quibus vel minimam incertitudinis notam deprehendimus, ubi scilicet integrum rationis usum habemus, hoc est, ubi eum facultatum nostrarum usum consecuti sumus, qui accuratæ discussioni sufficit, rigoroso examini subicere debeamus, quæ antea tanquam vera vel falsa ad-

misimus, ubi idem nobis nondum concedebatur. Nec minus constat eundem nullum pronunciasse usum Syllogismorum in veritate investiganda, etsi inter inventores eminentem obtineat locum: id quod veritati minime consentaneum esse, abunde ostendimus. Cur vero veritatem satis obviam non viderit vir tanti acuminis, ratio alia reddi nequit, quam quod regulæ suæ oblitus accuratiori discussioni præjudicii vacare noluerit, quod maturo nondum judicio animo ejus sese insinuaverat. Non semper omnes animum ad regulas, quas probant, advertunt, ubi iisdem utendum erat, etsi non deessent vires iisdem satisfaciendi. Immo non una de causa accidit, ut qui secundum regulam agere intendit, ab eadem aberret & in contrarium abeat. Cur vero contingat ex veris principiis de facto alterius legitime ratiocinantem per errorem de eodem judicare, ex iis intelligitur, quæ paulo ante diximus. Nostrum non est judicium de versionibus librorum ab aliis factis: neque enim nobis orium est conferendi versiones



cum textu authentico, quibus alia agenda sunt. Quamobrem nec nostrum facimus de ulla versione iudicium, nec ullus a nobis de versione aliqua iudicium requirat, vel expectet. Quæ de versionibus Bibliorum in anterioribus notavimus, ea nobis innuere, dum probationes dogmatum ad examen revocavimus, quæ credenda sunt, ne incerta esset fides, & dum inquisivimus, num quæ in Theologia naturali demonstrantur, Scripturæ sacræ conformia sint. Atque hæc dicta sufficiant ad repellenda citra ullius injuriam sinistra malevolorum de philosophia nostra nostraque philosophandi methodo iudicia ex facto interpretum derivata, quæ tanquam temeraria a nobis hætenus contemta fuere ac in posterum contemnentur.

### III.

*De Usu methodi demonstrativæ in explicanda Scriptura sacra.*

#### §. I.

**E**x quo methodo demonstrativa philosophari coepi atque monui cande-

*Institu-  
tum au-  
toris.*

§ 5

dem

dem ubivis utiliter adhiberi, ubi certa quæritur cognitio; alii quoque eandem methodum in Medicina, Jure & Theologia adhibere coeperunt, quamvis non semper eodem successu. Non defuere, qui summopere improbarent hunc ausum, ac vel hoc nomine omnes diras evomuerunt in philosophiam nostram, quasi hinc metuendus sit interitus Reip. ac Ecclesiæ. Equidem risisse tam ineptas opinationes est eas refutasse, præsertim ubi negotium est cum hominibus, qui nec sapere possunt, nec volunt: quoniam tamen didici, non omnibus satis esse perspectum, quomodo utendum sit methodo demonstrativa in superioribus, quæ dicuntur, facultatibus, ne usus ejus minus rectus vel etiam abusus mihi imputeretur, & ut aliorum juvarem conatus, dudum consilium coepi usum methodi demonstrativæ in Medicina, Jure & Theologia in Horis hisce subsecivis explicandi. Ea de causa in Horis subsecivis Anni 1730 docuimus, quomodo methodus demonstrativa ad Jura Romona applicari possit, & quo-



quomodo in genere jura civilia ad formam demonstrativam redigantur. Restabat, ut etiam diceremus de ejus usu in Theologia & Medicina. Quamobrem cum ad Horas subssecivas continuandas redeamus, a quibus hactenus nos avocarunt negotia alia & impedimenta complura, nostrum esse duximus aperire, quid de usu methodi demonstrativæ in Theologia sentiamus. Quoniam igitur Theologus principia sumit ex Scriptura sacra, adeoque prima ipsius cura est de eadem rite explicanda, necesse omnino est ut ostendamus, quemnam usum in scriptura sacra explicanda præstet methodus demonstrativa. Patebit autem eum esse prorsus insignem, & vanum esse omnem metum, ne, si eadem utamur, mentem Scriptorum sacrorum pervertamus. Constat potius, nos non magis certos ac securos esse posse de vero sensu Scripturæ sacre, quam ubi ad methodum demonstrativam exigitur explicatio.

## §. 2.

Qui Scripturam sacram alteri explicat, is eum docet, quinam sit sensus

*Quid sit  
explicatio.*

fus

re Scri-  
pturam  
sacram.

sus verborum Scripturæ sacræ, ut mentem Scriptorum sacrorum intelligat, quam per se assequi non potest. Est itaque *Scripturæ sacræ explicatio* oratio, qua alteri significatur, quinam sit sensus verborum Scripturæ sacræ. Ex. gr. Christus Joh. III. 14 affirmat, lucem venisse in mundum & dilexisse homines magis tenebras, quam lucem, quia eorum opera mala erant. Verba hæc explicaturus docere debet, quidnam per lucem, quidnam per tenebras, quidnam per opera mala intelligatur, quid sibi velint hæc verba lucem venisse in mundum, quid dicat dilectio tenebrarum, & quomodo dilectio tenebrarum cum malis operibus cohareat. Etenim si hæc intelligis, sensus verborum Christi manifestus est, qui non statim unicuique patet, quando eadem legit. Nihil hic sumitur, quod non ab omnibus concedatur, saltem concedi debet, nisi se ignorare confiteri velit, cur Scriptura sacra sit explicanda. Ex hac igitur definitione patet, quinam sit finis, quem intendit scripturam sacram explica-

tu-

turus, significare nimirum alteri verborum intellectum, ut norit, quidnam iisdem indigitetur. Quod si itaque ostendi possit, methodum demonstrativam aliquid conferre ad hunc finem obtinendum; nemo ejus usum in explicanda Scriptura sacra negare potest. Tanto autem magis idem admittendus, si ea præstat, quæ aliunde expectare minime licet. Equidem cum usum Logicæ in interpretanda Scriptura sacra peculiari quodam capite exposuerimus, cum praxin Logicæ traderemus (§. 968 & seqq. *Log.*), methodus autem demonstrativa in exacta Logicæ applicatione consistat; quæ de usu methodi demonstrativæ in explicanda Scriptura sacra dicenda sunt, jam tradidisse videri poteramus, ut adeo necesse non sit alibi jam tradita hic denuo repeti; quoniam tamen nondum vulgo agnoscitur, methodo demonstrativa uti & Logicam exacte applicare esse unum idemque, nec quæ de usu methodi demonstrativæ in explicanda Scriptura sacra dicenda sunt, unicuique statim aperta sunt per ea, quæ de usu

Lo-

Logicæ in eadem interpretanda demonstravimus; hæc ratio nos minime movet, ut ab instituto præsentē recedamus.

## §. 3.

*Summa  
dicendorum.*

Methodus demonstrativa, quam philosophicam diximus respectu Philosophiæ (§. 115 *Discurse prælim.*), requirit definitiones accuratas (§. 116 *Disc. prælim.*), propositiones determinatas (§. 121 *Disc. prælim.*), demonstrationes exactas (§. 120. 124 *Disc. prælim.*) & ordinem legitimum (§. 132. 133 *Disc. prælim.*). Quamobrem si methodi demonstrativæ aliquis esse debet usus in explicanda Scriptura sacra, necesse est, ut ad intellectum verborum faciant definitiones accuratæ & propositiones determinatæ, & ut demonstrationibus ac ordini, qualem methodus demonstrativa exigit, aliquis sit locus. Nos igitur, qui usum methodi demonstrativæ in Scriptura sacra defendimus, ad mentem Scriptorum sacrorum assequendam & intimius inspiciendam mirifice conducere accuratas definitiones & determinatas propositiones, & ut de

in



intellectu verborum certus reddaris opus esse demonstrationibus & legem ordinis demonstrativi summa cum cura observandam esse. Satisfaciemus itaque instituto præsentis, ubi ostenderimus, quinam sit usus definitionum accuratarum & propositionum determinatarum, undenam illæ desumendæ, quomodo hæ ex contextu eruendæ. Utque manifesta evadat utilitas a demonstrativa methodo speranda, demonstrandum quoque est, quod hoc pacto intimius mentem Scriptorum sacrorum inspiciamus, quam absque hisce subsidiis permittitur. Porro dicendum est, quænam in explicanda Scriptura sacra sint demonstranda, nec absque demonstratione admitti possint, ubi certam rerum cognitionem curæ cordique habes, nec in aliorum auctoritatem resolvere voveris fidem tuam. Denique & monstrandum, in quibusnam tenendus sit ordo, qui in tradendis dogmatis juxta leges methodi demonstrativæ observandus. Ita futurum confidimus, ut non modo agnoscatur, quam luculentus sit methodi demonstrativæ  
usus



usus in Scriptura sacra interpretanda, sed eorum quoque conatus juvemus, qui eadem uti voluerint. Qui vero habent animum a præjudiciis liberum hinc intelligent, quam insulfæ sint contra hanc methodum debachantium querelæ, solo contemptu vindicandæ.

#### §. 4.

Quando  
defini-  
tiones u-  
sui sint  
in expli-  
canda  
Scriptu-  
ra sacra.

Scripturam sacram intelligit, qui cum singulis verbis eas conjungit notiones, quæ ex intentione autoris cum iisdem jungendæ (§. 969 *Log.*). Quamobrem cum eandem explicaturus alteri, eum docere debeat verborum intellectum (§. 2); necesse est ut ejus animo insinuet notiones eorum vel distinctas, vel confusas. Si tibi notio fuerit distincta, in re percepta plura sigillatim enunciabilia distinguis (§. 38 *Psych. empir.*): si vero fuerit confusa, plura sigillatim enunciabilia minime distinguis (§. 39 *Psych. empir.*). Quamobrem in casu priori fieri potest, ut solis verbis notionem, quam habes, cum altero communices; in casu autem posteriori hoc fieri minime potest, sed cu-

ran-

randum ut alter res ipsas, quæ vocabulis indignantur, percipiat. Quodsi ergo alteri Scripturam sacram explicare volueris, necesse est ut tibi sint notiones distinctæ eorum, quæ verbis a te explicandis ab autore sacro significantur. Quodsi vero alter rem illam, de qua sermo est auctori sacro, agnoscere, nec cum aliis confundere, adeoque mentem ejus ex asse assequi debet; nemo non fatebitur, eas ipsi recensendas esse notas, quæ ad rem denotatam agnoscendam sufficiunt, nec plures, nec pauciores esse enumerandas, quam quæ sufficiunt, consequenter Scripturam sacram explicaturo esse debere notiones completas & determinatas (§. 92. 123 *Log.*). Enimvero oratio, qua significatur notio completa atque determinata termino cuidam respondens, definitio est (§. 152 *Log.*). Vides adeo definitionibus opus esse ad Scripturam sacram exacte explicandam. Sed paulo distinctius adhuc docendum, quandam iis sit opus, ne quis male utatur methodo demonstrativa in explicanda scriptura, nec methodo tri-

T                      bua-

buatur ab ignaris, quod vitio eadem abutentis, tribuendum. Methodus demonstrativa non omnium promiscue vocabulorum definitiones urget, sed quorundam significatum per notiones communes, etsi confusas, notum sumit, ubi terminorum definitiones non subeunt locum principiorum in demonstrationibus subsequenter. Ita *Euclides*, non definit, quid sit totum, quid sit pars, quid æquale, quid majus, quid minus, cum hæc vocabula per notiones confusas, quæ ex communi usu loquendi iisdem adherent, satis intelligantur, distinctis vero notionibus ad alia demonstranda non habeat opus. Quamobrem qui leges methodi demonstrativæ in Scriptura sacra explicanda observare voluerit; is ad definitiones confugere minime debet, ubi vocabula unicuique nota per notiones confusas ex communi loquendi usu iisdem jungendas, ut istis auditis hæc statim ipsorum animos subeant (§. 273 *Psych. empir.*). In hoc autem casu nulla opus est explicatione: cum enim unusquisque vocabulis auditis intelligat,

gat, quidnam iisdem significetur, non opus est ut ab alio idem doceatur. Censuram merentur, qui hoc faciunt, siquidem secundum leges methodi demonstrativæ ferendum iudicium. Ita methodus demonstrativa nullam admittit explicationem verborum Evangelii: *Matth. IX. 1.* Iesus ascendebat in navem. Etenim si ea explicari deberent, recurrendum esset ad definitionem aut saltem descriptionem navis, & actus in navem ascendentis. Sed hoc demum opus foret, si quis nunquam vidisset navem nec de ejus usu fando quid percipisset, neque vel ipse unquam navem conscendisset, vel alium conscendere vidisset. Quod si excipias, concionatores istorum verborum explicationi integras horæ quadrantes impendere, non tamen vel navem, vel actum, quo ea conscenditur, definire aut describere, consequenter exinde, quod definitionibus nullus concedatur locus, inferri minime posse, explicatione nulla esse opus: parum nos moveret exceptio, quibus praxis concionatorum non probatur, nisi fuerit

rationi consentanea. Ecquis vero defendere aufit, verba, quæ intelliguntur, quamprimum audiuntur, explicatione indigere, & si qua alia proferuntur, quæ ad ea intelligenda non faciunt, ad explicationem eadem recte referri? Nemo sane, nisi qui vel ignorat, quid sit verba alterius explicare, vel non perpendit, quomodo id fieri possit ac debeat. Quæ occasione verborum alterius dicuntur, ea verba alterius non explicant, sed à scopo loquentis maxime aliena esse possunt. Et quis est, qui nesciat, quam absona in medium proferantur etiam ab iis, qui præ multis aliis laudantur, præsertim ubi sensus mysticos & cum Coccejanis typicos fingunt. Nobis hic de sensu liberali sermo est, cui soli explicando inserviunt definitiones.

## §. 5.

*Vnde nam definitiones haberienda, qua in Scriptura sacra explican-* Quod si definitionibus in explicanda Scriptura sacra utendum, cautione opus est, ne in seligendis & applicandis definitionibus a veritatis tramite deflectas. Apprime igitur necessarium est, ut ostendamus, unde nam



nam definitiones sint desumendæ & <sup>da usui</sup> ~~sunt.~~  
 quomodo examinandæ, antequam iis-  
 dem utaris. Alias enim verendum, ne  
 Scriptoribus sacris tribuas quod a men-  
 te ipsorum alienum est, aut ne men-  
 tem ipsorum imperfecte explices. Ali-  
 bi jam demonstravimus (§. 97 *Log.*),  
 in Scriptura sacra non alias supponi  
 notiones, quam quæ animo nostro  
 jam inhærent, aut quas in nobis ha-  
 bemus, dum in nobismetipsis ea ex-  
 perimur, de quibus loquitur. Nemo  
 non videt, in casu priori vocabula in  
 communi sermone usitata in eo sumi  
 significato, quem ex usu loquendi  
 habent. Quamobrem ante proban-  
 dum est, definitiones esse usui loquen-  
 di conformes, quam per eas mentem  
 Scriptorum sacrorum explicare licet.  
 Quomodo hæ definitiones investi-  
 gentur, in Philosophia rationali do-  
 cuimus (§. 150 *Log.*). Exempla de-  
 monstrationum, quibus evincitur de-  
 finitiones usui loquendi conformes  
 esse, plura occurrunt in Ontologia.  
 Immo definitiones esse menti auto-  
 rum sacrorum conformes ex ipso con-  
 textu & locis parallelis probari po-  
 test,

test, neque hoc unquam negligendum, ubi id fieri potest. Dedimus autem in Theologiæ naturalis parte prima exempla bene multa, quando ostendimus, quæ de Deo ex principiis rationis demonstrata fuere, in eodem prorsus significatu Deo tribui in Scriptura sacra. Quamobrem non probamus, si definitiones ex philosophia nostra petitas ad explicandum significatum verborum Scripturæ transferantur, nisi ostendatur, quemadmodum a nobis in Theologia naturali factum, eas esse menti autorum sacrorum conformes. Quodsi ergo contingat, aliquem alieno in loco uti definitionibus nostris, ut prodeat sensus a mente Autorum sacrorum alienus; id non nobis & definitionibus nostris, sed earundem abusui seu perversæ applicationi tribuendum. Notandum vero in definitionibus ad explicanda verba Scripturæ sacra transferendis non tam ad definitum, quam ad definitionem respiciendum esse. Etenim alii haud raro in Scriptura sacra occurrunt termini, quibus idem significatur, quod aliis indigitatur in Philosophia. Quoniam

niam termini eandem rem denotant, necesse est ut eandem habeant definitionem. Quamobrem si ex contextu probari potest, quidnam vocabulo aliquo indigitetur, & ex Philosophia constat, quoniam termino idem in eadem compelletur, quin definitio ex philosophia petita utiliter ad Scripturam sacram explicandam transferatur, dubitandum non est. Ita novimus stylo Apostolorum appetitum sensitivum appellari carnem, appetitum vero rationalem, quatenus a ratione illuminata pendet, vocari spiritum. Quamobrem quid sit caro, explicatur per definitionem appetitus sensitivi, & quid sit spiritus in oppositione ad carnem ita dictus per definitionem appetitus rationalis, habita tamen ratione differentia, quæ inter rationem sibi relictam & rationem illuminatam intercedit. Similiter in Scriptura sacra cordis nomine venit appetitus in genere sumtus in ea latitudine, ut simul aversationem sub se comprehendat. Quamobrem ad cordis explicationem recte utimur definitione appetitus in gene-

re, & averſationis in genere. Hæc inprimis tenenda ſunt, ubi concordiam rationis ac fidei demonſtrare voluerimus in articulis mixtis. In Scriptura ſacra occurrunt veritates ex principiis rationis indemonſtrabiles. Ubi de hiſce fuerit ſermo, definitiones petendæ ſunt ex ſyſtemate theologico, vel ex collatione locorum Scripturæ ſacræ de objecto natura ignoto agentium eruendæ, veluti ſi agitur de fide ſalvifica, de regeneratione, de illuminatione, de ſanctificatione. Notandum vero & hic eſt, occurrere ſubinde terminos theologicos, in Scriptura ſacra minime extantes, quibus tamen designantur, quæ per eandem nobis innotuere. Quod igitur modo de definitionibus terminorum philoſophicorum inculcavimus, idem quoque tenendum eſt de terminis theologicis, qui *ἀγροφοι* dicuntur. Unde intelligitur, quantum conducat in ſyſtemate theologico tradi definitiones accuratas in uſum illorum, qui ſcripturam ſacram aliis explicare voluerint. Quodſi notiones eorum, quæ divinitus

tus



tus revelantur, nobis non sunt, nisi quatenus ea, de quibus loquitur scriptura sacra, in nobismetipsis experimur, qui acumine psychologico gaudet, ad ea, quæ in anima contingunt, a se invicem distinguenda, definitiones equidem condet, per quas alteri patet, quidnam denotet definitum; quoniam tamen sumenda sunt, quæ num fieri possint alteri minime patet, domestica experientia nondum instructo, notionis realitatem demonstrare minime valet, adeoque necesse est, ut, si hic definitionem intelligere velit, ea in seipso experiatur, quæ experientiæ spirituali convenienter sumit definitionis conditor. Sed ea de re plura dicenda erunt, ubi usum methodi demonstrativæ in Theologia exposituri sumus. Dicta igitur sufficiant de questione, undenam desumendæ sint definitiones, quæ in explicanda Scriptura sacra usui sunt.

§. 6.

Quod si jam porro quæsieris, quomodo definitiones sint examinandæ, antequam ad Scripturam sacram ex-

*Examen  
definitio-  
num ad  
S. S. ex-*



*applican-  
dam ad-  
hibenda-  
rum.*

plicandam adhiberi possint; haud difficilis est responsio. Methodus demonstrativa requirit definitiones regulis istis conformes, quas in Logica demonstravimus. Cum iis consentiunt definitiones tam nominales, quam reales Geometrarum, quas esse accuratas atque tales, quales methodus demonstrativa exigit, nemo in dubium vocaverit. Examinandæ igitur sunt juxta regulas logicas a nobis demonstratas: quæ enim iisdem conveniunt, accuratæ sunt, ut tuto iisdem fidereliceat. Usus definitionum accuratarum in explicanda Scriptura sacra cum evicerimus (§. 4); hinc porro colligitur, quam necessarium sit studium Logicæ illis, qui Scripturam sacram aliis explicare voluerint. Quamobrem facile patet, quid sperandum sit de commentatoribus, qui vel Logicam prorsus non didicerunt, vel saltem verioris notitiam nullam habent, vel habitum regulas Logicæ dextre applicandi sibi minime acquisiverunt, destituti Logica artificiali utente (§. 12 *Log.*), immo qui in Logica veriori adeo pe-

re-

regrini ac hospites sunt, ut definitiones accuratas ferre nequeant, sed atro carbone notent, notiones distinctas, in quibus promiscue prædicta definiti cumulantur, cum definitionibus perperam confundentes & quæ demonstranda sunt per ea, quæ sumuntur, cum iis, quæ sumenda sunt, miscentes, ut nullus earum usus sit in methodo demonstrativa, nec in accurata scripturæ sacre explicatione. Sed hi sunt mores imperitorum ridiculo fastu turgidorum, qui iudicis partes sibi arrogant de iis, quæ non intelligunt, quasi artifex habendus sit is, quem fortuna cœca artem profiteri jubet, veluti si Grammaticum ad dignitatem Theologi evehit. Ecquis vero adeo luscus est, ut non videat, multos Theologos dici, qui non sunt? Quicquid igitur ogganniant hujus farinae homines, nunquam tamen a philosopho impetrabunt, ut ipsis largiatur, definitiones aliter, quam juxta regulas Logicæ verioris dijudicandas esse: quomodo vero hæc agnoscatur, & a spuria, qualis hodie non sine vulgi eruditorum applausu a sciolis obtru-

obtruditur ignaris, discernatur, dum docuimus (§. 26 & *seqq. Log.*). Tanto majori autem cura instituentum est definitionum examen, quibus in Scriptura sacra explicando utendum, quanto majori sollicitudine cavendum, ne male explices mentem autorum sacrorum. Legenda hic sunt, quæ de dijudicandis libris dogmaticis demonstravimus integro capite, cum praxin Logicæ hætenus parum ex cultam traderemus (§. 802 & *seqq. Log.*). Reperies enim haud pauca, quæ impediunt, quo minus in explicanda Scriptura sacra a veri tramite aberres. Rationibus extrinsecis, quibus fucum facere licet imperitis, philosophus parum movetur, qui non nisi intrinsecis stare solet. Quemadmodum non aliæ homini sunt facultates, quibus utitur in cognoscendis iis, quæ Scriptura sacra docet, quam quæ ad cognoscenda lumini naturali pervia concessæ sunt; ita nec alia datur Logica, quæ in Scriptura sacra explicanda usui est, quam quæ usum illarum in veritate cognoscenda declarat easque dirigit, ne nubem  
pro

pro junone amplectaris. Quamobrem nec aliæ dantur regulæ definitionum ad Scripturam sacram explicandam requisitarum, quam quas urget Logica & Mathematici rigorosissime observant. Juxta has itaque, non alias examinandæ sunt definitiones, quibus ad mentem autorum sacrorum explanandam ut volueris. Examen rigorosissimum definitionum cum urgeamus, methodo, qua philosophamur, imputandum non est, si quis, definitionibus parum limatis ad verba Scripturæ sacræ applicatis, sensum eorundem non satis exactum aut menti Scriptorum sacrorum minime conformem elicit. Nos profecto asserere non veremur, quod, si quis ea observaverit, quæ de definitionibus hactenus præcepimus, proditurus sit sensus autoribus sacris dignus & haud raro profundior, quam putabatur. Dedimus specimina in his ipsis Horis dabimusque in posterum alia, si Deus vitam concesserit ac vires corporis animique conservaverit. Ceterum quemadmodum nos æquo ferimus animo, si qui vulgari modo Scri-

Scripturam sacram explicantes parum accuratos in re tam ardua sese præbent; ita æquum existimamus, ne nimii simus in exaggerandis nævis illorum, qui ope definitionum mentem autorum sacrorum distincte explicaturi non per omnia satisfaciunt, nec ullo modo tueri licet praxin consequentiariorum, qui argumento ab invidia pugnant & lapsus intellectus facile a quovis committendos in malitiam vertunt, innocentibus vexas diras creaturi eorumque famæ maculam adspersuri. Sane si quis eodem modo cum ipsis agere vellet, multo majore cum specie in ipsos retorquere liceret convitia, quæ in alios evomunt, cum non sint tanti Apollines, quanti sibi videntur. Commendamus igitur illis pericopam evangelicam de festuca in alieno oculo visa, trabe autem in suo non animadvertsa, qui animum avertentes a verbis Apostoli *Col. III. 31.* Omnis amaritudo, & ira, & indignatio, & clamor, & blasphemia tollatur a vobis cum omni malitia, horrendo botatu ætherem replent, ut, si superiores



ros flectere nequeant, acheronta moveant. A veri tramite deflecentes omni mansuetudine in viam rectam reducere, id demum est quod probat Philosophia nostra: id quod fieri docendo, non vero convivando & nocendo nemo non fateri cogitur. Nec alia intentione de usu methodi demonstrativæ in explicanda Scriptura sacra hic commentamur, quam ut dociles erudiamus, & iis, qui a via adhuc aberrant, in eandem reducamus.

§. 7.

Phrases seu loquendi formulæ sunt termini complexi, ex pluribus quippe vocabulis compositæ. Denotant eadem res cum suis attributis, modis ac relationibus (§. 108 *Log.*), atque adeo iisdem non minus quam terminis simplicibus notio quædam determinata respondet. Quodsi ergo ea enumerentur, quæ in notione ista continentur, ut completa evadat notio, quæ nempe sufficit ad rem denotatam cum iis, quæ eidem insunt vel adsunt, agnoscendam, quin hæc oratio, qua notio ista completa atque determinata significetur, sit defini-

finitio dubitari nequit (§. 152. 349 *Log.*). Patet adeo distinctam phrasium expositionem esse quandam speciem definitionum: sit ita quod vocabulum definitionis restrictiorem communiter significatum habeat. Sufficit non invito principio reductionis (§. 472 *Psych. empir.*), cujus in invenienda veritate tantus usus est (§. 471 *Psych. empir.*), explicationem phrasium ad definitiones reduci. Neque a praxi Mathematicorum abhorret, quod phrasēs, veluti quando magnitudo aliqua potentia multipla dicitur magnitudinis alterius, definiant & earum explicationes in numerum definitionum rejiciant. Absit autem, ut quis existimet, phrasium explicationes inutiliter ad definitiones reduci. Etenim hac reductione obtinetur, ut ea, quæ de definitionibus præcipiuntur, mutatis mutandis, hoc est, considerando ea, quæ ad notionem determinatam phrasi respondentem requiruntur, instar notarum rei in dato casu constanter inhærentium, quemadmodum determinationes essentielles constanter insunt in omni casu, nec ulla

ulla illarum abesse potest, ad explanationem phrasium transferuntur. Quodsi hoc observaveris, haud difficulter condēs theoriam demonstrativam explanationis phrasium, quæ eundem usum pollicetur in iis explicandis, quem præstat theoria definitionum in definitionibus condendis & examinandis.

### §. 8.

Enimvero non sufficit, vocabula <sup>Demon-</sup> in Scriptura sacra obvia & phrasēs in <sup>stratio-</sup> iis occurrentes explicare per defini- <sup>num usus</sup> tiones accuratas; verum etiam de- <sup>primus</sup> monstrandum est definitiones istas ef- <sup>in vindi-</sup> fectas menti Scriptorum sacrorum con- <sup>candis</sup> formes. Etenim tum demum men- <sup>definitio-</sup> tem alterius intelligis, si cum verbis <sup>nibus.</sup> alterius eas conjungis notiones, quas ipsemet conjungit ( §. 117 Log. ). Quodsi adeo cum iisdem jungis notiones diversas, alium verbis ipsorum fingis sensum, quam quem habent, consequenter mentem alterius pervertis. Quamobrem cum tu contendas, hunc esse verborum sensum, quem definitiones tuæ produnt; hoc

U

uti-

utique non nude affirmandum, sed demonstrandum est. Si negas, demonstratione esse opus, absurditatis facile convinceris. Etenim quis est, qui nesciat, eadem Scripturæ sacræ verba non uno modo explicari a Commentatoribus, ita ut iidem haud raro in contradictoriis versentur. Aut igitur affirmandum, utrumque sensum esse verum, aut nulla erit ratio, cur is potius admittendus, quem tu defendis, quam quicumque alius. Prius absolum esse, nemo non ultro fatebitur. Nec posterius absurditate vacat. Quo enim jure tu contendis eum esse verborum sensum, qui tibi videtur; eodem jure contendit alter, sensum, qui sibi videtur, esse genuinum. Quodsi rationibus extrinsecis standum, veluti quod altero sis linguæ authenticæ magis gnarus, vel in explicanda Scriptura sacra magis versatus; probabilitas hinc nascitur, quæ in incerto sententiam unam alteri præferri permittit, nulla vero certitudo, qualis hic desideratur. Nemo igitur sanus negabit, demonstrandum esse, quod is sit verborum sensus, quem  
ipfis

ipsis tribuis. Neque enim jure ullo exigere potes, ut alter stet auctoritate tua, nisi fidem alterius in auctoritatem tuam resolvi velis, quæ in divinam resolvenda. Verba, quæ explicantur, esse divina constat, & vera esse illa, quæ istis indignantur, non minus certum est. Sed explicationem tuam esse veram, probandum utique, gratis concedi minime potest, quantuscunque tibi videaris Apollo. Etsi hæc satis manifesta sint, ut vix fore existimem aliquem, qui idem negare audeat; nemo tamen est, qui nesciat, Commentatores plerumque parum sollicitos esse de explicatione demonstranda. Et, ubi subinde rationem reddunt interpretationis a se factæ, in probationibus ipsorum plurima desiderantur, quo minus pro demonstrationibus haberi possint. Nemo hoc diffitebitur, nisi qui quid sit demonstratio ignorat. Vides adeo usum primum, quem habent demonstrationes in explicanda Scriptura sacra, nimirum ut certus reddaris te mentem Scriptorum sacrorum fuisse affecutum, & ut certos reddas alios,



explicationem tuam esse menti ipsorum conformem. Hanc certitudinem requiri, ubi dictis Scripturæ sacrae articuli fidei probandi, in dubium vocari nequit. Usus adeo demonstrationum in explicanda Scriptura sacra prorsus insignis est, etiamsi præterea non esset alius. Mox tamen constabit dari adhuc alium non minus præclarum. De forma demonstrationis diximus in Logica (§. 551 & seqq.); ubi vis eadem, utpote a natura intellectus, non a materia dependente, quemadmodum sibi persuadent, quid demonstrationes ad Mathesin relegant, extra eandem nulli bi tolerare volunt. Non igitur opus est, ut hic exponamus, quomodo concinnanda sit demonstratio, quæ evincitur, quod explicatio sit menti autorum sacrorum conformis. Eodem modo ubi vis ratiocinamur & ratiocinia ubi vis eodem modo concatenantur, si legitime sese habeant singula, nec lapsus committantur. De principiis adeo tantummodo quæ potest, undenam sint petenda. Prolixæ foret responsio, si quæstioni ex asse

satisfieri deberet, accurata enumeratione fontium facta, unde petenda sint principia, modoque ostenso, quo inde eruuntur. Eruuntur enim ex contextu, ex locis parallelis, ex natura ipsius rei. Mutuo etiam petenda sunt ex philosophia, & phrasēs sapius supponunt antiquitates ac mores Gentium Orientalium. Dedimus specimina complura, cum in Theologia naturali consensum eorum, quæ de Deo ex principiis rationis demonstravimus, cum Scriptura sacra evinceremus: dedimus etiam aliqua in his ipsis Horis. Consulat ea, qui mentem nostram clarius perspicere voluerit. Neque enim nostrum jam est præcepta Hermeneuticæ sacræ demonstrare, qui tantummodo usum demonstrationum in explicanda Scriptura sacra evincere tenemur. Unicum tamen est, de quo quædam moneri non inconsultum ducimus. Diximus ad demonstrandum sensum verborum subinde confugiendum ad loca parallela, hoc est, conferenda esse loca alia, ubi idem vocabulum, vel phrasis eadem occurrit,

vel de eadem re agitur, quemadmodum etiam a nobis factum in iis, quæ modo exemplorum loco adduximus, speciminibus. Quæritur adeo, num in iis, quæ longo tempore ante scripta fuerunt, recurrere liceat ad ea, quæ demum multo tempore post scripta sunt. Quod si neges, propterea quod Deus dicendus sit adeo perspicue locutus, ut illo ipso tempore, quo ea literis consignata fuerunt, intelligi potuerint, non verborum intellectus demum post multa secula expectari debuerit; nobis hæc negandi ratio sufficiens minime videtur. Etenim fieri potest, ut veteribus consuetæ fuerint loquendi formulæ, ab omnibus satis intellectæ, sed nobis jam ignotæ, quemadmodum etiam apud nos in vernaculo sermone occurrunt plures. Quod si ergo in libro recentius scripto eadem formula occurrit, ubi ex contextu perspicitur ejus significatus; absolum non est, ut ex hoc loco Scripturæ sacræ explicemus alium interpretationis dubiæ, modo explicationem ferat contextus. Nemo non hoc admittit  
in

in interpretatione scriptorum profanorum, nec ulla subest ratio, cur admittere minime debeamus. Sane multa occurrunt in libris, quæ nostro ævo sermone vernaculo scribuntur, quæ a nobis optime intelliguntur, non autem intelligi poterunt ab aliis Gentibus eorum ignaris, quæ nobis sunt notissima. Quid ergo obstet, quo minus ex libris multo tempore post scriptis petantur, quæ sensum verborum obscuriorum manifestum reddunt. Verum omnino est, autorum sacrorum verba eo tempore, quo literis consignata fuere, intellecta fuisse ab hominibus tunc viventibus. Sed ex eo non sequitur, quorum sensus jam nobis videtur dubius, ea obscura fuisse hominibus olim viventibus. Demus exemplum aliquod, ne gratis hæc dixisse dicamur. Constat *Luc. II. 30.* Simeonem agnovisse, quod Christus infans sit Messias, & eundem vocasse salutem Dei. Haud obscure hinc intelligitur, apud Judæos usu receptum fuisse, ut per hanc formulam loquendi Messiam indigita-  
rent. Ponamus jam in antiquo fœ-

dere salutis Dei fieri mentionem, nec ex contextu satis constare, quidnam hoc termino indigitetur. Quod si ergo per verba Simeonis probes, salutem Dei appellari Messiam, & postea ostendas, in loco interpretationis dubiæ ferre contextum, ut & ibidem per salutem Dei Messias intelligatur; quin per ea, quæ multis seculis post scripta sunt, diu ante scripta recte explicentur, salvo principio, quod verba intelligi debuerint illo ipso, quo literis consignata fuerunt, tempore, nullo modo dubitare licet. In principiorum applicatione non modo videndum, num verum sit principium, verum etiam num rite applicetur. Si enim vera esse debet conclusio, quam parit applicatio, non minus minoris, quam majoris constare debet veritas. Ecquis vero concedat, gratis sumi, veteribus intelligi non potuisse verba, quæ hodie a nobis per se non intelliguntur? Probandum hoc utique est, antequam in casu dato rejicias explicationem ab iis pendentem, quæ longo tempore post scripta fuere: neque enim universaliter verum esse, veteribus



bus obscura fuisse verba certo sensu accepta, quæ hodie nobis obscura sunt, ex antea dictis patet. Hinc vero magis adhuc elucescit, quantum præsidii sit commentatoribus in methodo demonstrativa, nisi explicationes ipsorum disceptationi obnoxiae esse debeant. Nullus dubito fore, ut, si quis habitu demonstrandi pollens & rerum cognitione sufficiente imbutum animum possidens explicationes scripturæ sacræ, quas tradunt interpretes, ad examen revocaret juxta methodi demonstrativæ leges, plurimos notet lapsus ignorantiae hujus methodi imputandos, quos tamen minime imputamus Commentatoribus, si ignorantia ipsis invincibilis dicenda (§ 550. *Part. I. Phil. præf. univ.*). Non vero ab omni culpa immunes sunt, qui, cum methodi demonstrativæ sint prorsus ignari, nec demonstrationis leges cognitæ atque perspectas habeant, non modo ejus ad scripturam sacram explicandam applicationem improbant & tanquam inutilem aut minus necessariam rejiciunt, cum de re sibi ignota judicantes præcipitantiam in judi-

cando agnoſcere & potuerint, & debuerint; verum etiam eos, qui ejus utilitatem urgent, convitiis plauſtris onerant, & mille iſdem vexas creare non verentur, cum ab omni malitia non liberum habeant animum & impedire omnibus viribus nitantur, quod noſtro inprimis ævo apprime neceſſarium eſt ad Scripturæ ſacræ auctoritatem & religionem chriſtianam ab eadem unice pendentem defendendam. Si incertitudinem tollere voveris, in quam verba Scripturæ adducunt interpretes tot ſententiarum divortiis, non alio modo id facere datur, quam ſi ad methodum demonſtrativam tanquam ad ſacram anchoram recurris.

## §. 9.

*Uſus pro-  
poſitio-  
num de-  
termina-  
tarum in  
explican-  
da ſcri-  
ptura ſa-  
cræ.*

Methodus demonſtrativa requirit, ut in propoſitionibus conditio accurate determinetur, ſub qua prædicatum convenit ſubjecto, ſeu ſub qua aliquid de re aliqua affirmatur, vel negatur (§. 121. *Diſc. prælim.*), conſequenter ut propoſitiones ſint determinatæ (§. 320. *Log.*). Quæritur itaque

que, num propositionum determinatarum usus etiam sit in explicanda scriptura sacra? Affirmativam tueri nulli dubitamus. Nimirum quæ in scriptura sacra docentur, ad propositiones determinatas revocanda sunt ab eo, qui eandem explicant. Immo cum factis, quæ in eadem narrantur, insint universalia, ea ad propositiones universales ab interprete scripturæ sacre revocanda esse contendimus. Constat propositiones determinatas esse utiles cum ad scientiam, ut scilicet inde alia ratiocinando deduci possint, tum ad vitam, ut actiones nostras secundum eas dirigamus, seu rite determinemus (§. 122. *Disc. præl.*). Scripturam sacram non alio fine legimus, quam ut veritates divinitas revelatas vel, si mixtæ fuerint, ut etiam lumini rationis perviæ sint, a Deo approbatas cognoscamus, & actiones nostras ad voluntatem Numinis componamus. Ex veritatibus, quæ totidem verbis in Scriptura sacra extant, per legitimam consequentiam eliciuntur aliæ, quæ non minus pro divinitus revelatis habentur,

bentur, quam quæ quoad literam in eadem leguntur, & voluntati divinæ convenire nemo dubitat, ut veritati agnitæ vitam conformem agamus, ut adeo opus non sit probari, quod confitentur omnes, qui in scriptura sacra non sunt hospites ac peregrini. Quamobrem patet, tum demum lectionem scripturæ sacræ nobis esse proficuum, ubi quæ in ea leguntur, ad propositiones determinatas revocantur. Quod si ergo scripturam sacram aliis explicare volueris, necesse est ut ipsos doceas propositiones determinatas in eadem contentas. Etenim nisi propositiones rite determinentur, subiecto omni tribuis, quod nonnisi sub certa conditione de eodem affirmari potest, & negabis de omni, quod nonnisi sub certa conditione de eodem negandum, aut saltem agnoscis posse prædicatum de subiecto affirmari, posse etiam negari. In casu priori veritati admiscetur error; in posteriori veritas insufficienter agnoscitur. Ecquis vero sibi vel aliis persuadebit, se mentem Autorum sacrorum recte ac penitus perspexisse, ubi iisdem imputat errores vel

vel veritatem, quam profitentur, insufficienter cognoscit. Vides adeo apprimè necessarium esse, ut scripturam sacram explicaturus inde elicias propositiones determinatas, sive theoretice, sive practice propositum interpretis consideres. Longum nimis foret repræsentare mala, quæ ex neglectu propositionum determinatarum consequuntur tam quoad theoriam credendorum, quam quoad praxin vitæ homine christiano dignam. In primis vero propositiones istæ determinatæ apprimè necessariæ sunt, ubi systema Theologiæ dogmaticæ ac moralis condere volueris: id quod clarius elucescet, ubi usum methodi demonstrativæ in condendo utriusque Theologiæ systemate exposuerimus. Enimvero propositionem a te rite esse determinatam, non gratis affirmandum, sed demonstrandum est: id quod duplici modo fieri potest, vel quatenus ex ipso contextu aut locis aliis in subsidium vocatis ostenditur, propositionem aliter determinari non posse, quale quid observatur, dum ex iis, quæ experimur, propositiones determinamus.



minatas elicimus, teste philosophia nostra experimentalis, vel ubi evincitur, subiecto ita determinato convenire vel repugnare prædicatum, quale quid observatur, dum propositiones demonstramus, teste philosophia nostra reliqua, præsertim Latina. Nimirum tunc demum mentem auctoris sacri rite perspectam habes, si propositionem eidem convenienter determines. Alias enim tibi affirmandum esse continget, quod ex mente ipsius negandum & contra. Quoniam vero supponendum, auctores sacros ab omni prorsus errore fuisse imminunes, neque adeo quemlibet eorum sibi met ipsi, nec unum alteri contradixisse; ideo non modo ex contextu vel locis aliis collatis demonstrari potest, propositionem rite esse determinatam, sed idem etiam ostenditur, quod propositio sic determinata sit demonstrabilis, adeoque vera (§. 544. 557. *Log.*): quorum hoc in auctoribus profanis nonnisi in casu dubio ex æquitate præsumendum (§. 921. 922. *Log.*). Præstat alteri in casu dubio tribuere veritatis agnitionem, quam minime cognovit,

gnovit, quam imputare errorem a mente ipsius alienum. Facile ostendi poterat, esse idem doctrinæ Apostolorum conforme: a qua quam longe recedant, qui omni studio mentem aliorum pervertunt, ut argumento ab invidia ducto contra eos pugnare possint, nemo non videt.

§. 10.

Atque hinc elucescit Demonstrat-<sup>usus sa-</sup>  
tionum usus alter in explicanda scri-<sup>cundus</sup>  
ptura sacra, ut certo constet, nos do-<sup>demon-</sup>  
gmata menti autorum sacrorum con-<sup>stratio-</sup>  
formia cum de credendis, tum de a-<sup>num in</sup>  
gendis rite cognovisse. Dogmatum  
horum gratia cum scriptura sacra ex-  
plicetur, ut, qui majore acumine  
pollent, acumine suo juvent alios, ne  
ignorantia doctrinæ salutaris teneatur  
ipsorum animus; quam necessariæ sint  
demonstrationes, quibus evincitur,  
propositiones menti autorum sacro-  
rum convenienter esse determinatas,  
haud difficulter perspicitur. Non est,  
quod excipias, probari hoc aliter pos-  
se, nec opus esse demonstratione, ni-  
si Logicæ te imperitum probare velis.  
Neque

Neque enim demonstratio ab alia probatione differt, nisi principiis, quæ in illa evidentia sunt, ut in dubitationem adduci minime possint nisi ab ignorante, in hac autem nondum prorsus certa & explorata sunt; Illa sola certitudinem parit & assensum immotum præstat; hæc ultra aliquem probabilitatis gradum minime progreditur. Ecquis vero contendere audeat, non opus esse, ut de mente auctoris sacri nobis certo constet, sed sufficere, ut probabiliter agnoscamus, dogmata, quæ ex Scriptura sacra hauriuntur, esse menti auctorum sacrorum conformia? Et quomodo interpretatio vera a spuria distinguetur, si superfluum esse putas curam ac sollicitudinem de certitudine interpretationis rite factæ?

## §. II.

*Demonstratio-  
num usus  
tertius  
in expli-  
canda  
s. s.*

Propositiones istæ determinatæ, quæ ex verbis Scripturæ eliciuntur, vel ad veritates mixtas, vel ad pure revelatas spectant. Utrasque demonstrabiles esse, ostendimus alibi (§. 979. 980 *Log.*) Demonstrationes il-  
la-

larum ex philosophia, harum vero demonstrationes ex Theologia petendæ, si quidem supponas systemata, in quibus eadem jam sunt ab aliis demonstratæ. Quodsi vero alibi demonstratæ nondum prostant, illarum tamen demonstrationum principia ex philosophia, harum vero principia ex Theologia revelata petenda. Quoniam tamen Philosophia nonnisi in subsidium vocatur, quando Theologia eadem habet opus; si eadem principia, quæ Philosophia offert, in ipsa Scriptura sacra occurrunt, ex hac potius, quam ex illa esse desumenda nemo sanus negare potest, nisi, quod admittunt omnes, negare velit, Scripturam sacram per scripturam esse explicandam. Dubium, quod hic moveri poterat, ne hoc pacto fides cum scientia confundatur, dudum sustulimus (*not. s. 980 Log.*). Multa hic dicenda forent, si Hermeneuticæ sacrae regulas demonstrare nobis jam esset propositum. Uberior tamen lux iis, quæ diximus, affunderetur, ubi ostendemus,

X

mus,

mus, quomodo methodus demonstrativa ad Theologiam sit applicanda. Legi autem merentur demonstrationes, quibus in parte prima Theologiæ naturalis consensum dogmatum a nobis ex principiis rationis cum Scriptura sacra evicimus, & specimina, quibus in his Horis usum Philosophiæ nostræ in explicanda Scriptura sacra comprobavimus. Insinuentur enim animo lectoris attentæ ideæ exemplares, quæ regularum vicem præstant easdem in casibus aliis imitaturis. Quanta vero sit vis harum idearum, ex iis intelligitur, quæ in parte altera Philosophiæ practicæ universalis de exemplis demonstravimus, quemadmodum proxime constabit, ubi eandem publici puris facere licebit. Quantus sit hic demonstrationum usus in Scriptura sacra explicanda, paucis adhuc edisserendum. Id nimirum præstant, ut mentem Autorem sacrorum intime perspicias, & omnimoda tibi sit certitudo, quod eandem rite ac penitus perspexeris. Etenim si distinge te explicare vales notionem verbis

re-



respondentem, & quæ enunciantur iisdem ad propositionem determinatam revocare ac rationem a priori reddere potes; nihil amplius requiri potest ad mentem auctoris sacri perspicendam, adeoque eam penitus perspicias. Nosti quomodo accurate intelligenda sint verba ipsius, quicquid affirmet, vel neget, & cur id affirmet vel neget. Nemo igitur non videt, nihil amplius desiderari posse. Quæ autem demonstrantur certa sunt (§. 568 *Log.*) & veritatis assertorum nos convincunt (§. 990 *Log.*), ut dubitationi ne minimus quidem relinquatur locus: id quod exemplo Geometrarum a posteriori confirmatur. Major itaque certitudo desiderari nequit. Quod vero alia via in mentem Auctorum eodem modo penetrare & majorem certitudinem obtinere non liceat, experimento comprobatur, ubi explicationes commentatorum cum ea, quæ applicationi methodi demonstrativæ debetur, conferre volueris, modo id tibi fuerit acumen, ut certitudinem, quam parit demonstratio, discernere

valeas lab opinione certitudinis, quæ incautis & imperitis imponit, consequenter veritates demonstratas bene multas comprehenderis. Qui in demonstrationibus multum sunt versati, præstantiam usus, quem prædicamus, facile capient: surdis autem narratur fabula, ubi nobis res est cum hominibus, qui nec distincte cognoscunt, quid sit demonstratio, nec ullam unquam demonstrationem veri nominis perceperunt. • Horum igitur nulla hic habenda ratio est. Quodsi more suo contemnant, quæ non intelligunt, & cultu idololatræ suam extollere malunt Dianam, quam veritati facilem præbere aurem; per nos hoc faciant: neque enim nostrum est curare, ut sapiant, qui vel sapere nolunt, vel non possunt. Non deerunt alii, qui veritati victas dabunt manus.

## §. 12.

*Usus ordinis methodi demonstrativa in explanatione.*

Jubet methodus demonstrativa, ut ea præmittantur, per quæ sequentia intelliguntur, & demonstrantur, vel probabiliter adstruuntur (132 *Disc. prælim.*), seu ut præcedere debeant, un-

unde quomodocunque pendet cognitio sequentium (§. 134 *Disc. prelim.*), & in demonstrationibus propositiones singulæ eo ordine collocentur, quo subeunt animum demonstrationem concipientis (§. 124 *Disc. præl.*). Quoniam demonstrationum multiplex usus est in explicanda scriptura sacra (§. 8 & seqq.); per se patet, ordinem propositionum, quem requirit demonstratio ordinata, in præfenti quoque habere locum, & eundem hic polliceri usum, quem ubi-vis habet, scilicet quod facilius intelligatur demonstratio, quod animum legentis plenius convincat, quod denique genuinam demonstrationis ideam distinctam animo ingeneret, quam in casu alio ducem sequaris (§. 858 *Log.*). Quia vero dum dicta scripturæ sacræ explicantur, nullum systema doctrinarum conditur; quæ de præmittendis iis, per quæ sequentia intelliguntur & adstruuntur, non nisi usui esse possunt, quatenus diversa, quæ exigit explicatio plena & exacta, certo ordine fieri necesse est, Quinam adeo permittatur usus hujus

regulæ, quæ de ordine præcipit observanda, res ipsa docebit. Tum vero constabit, alterum, cui scripturam sacram explicas, & facilius, & plenius a te intelligi. Docebit autem te ipsum ordinis regula, quomodo mentem tuam explicare debeas alteri, ne in ea assequenda insuperabiles relinquantur difficultates.

## §. 13.

*Monitum  
de Com-  
menta-  
riis in  
Scriptu-  
ram sa-  
cræ ho-  
die cri-  
bendis.*

Quæ modo uberius exposuimus, abunde loquuntur, quales Commentarios in Scripturam sacram postulet ætas nostra. Cum enim beneficio demonstrativæ methodi invalescat doctrina solida, qua irruens undiquaque scepticismus unice profligatur; non satisficient Commentarii nisi solidam doctrinam offerentes; immo si verum dicere fas est, plus nocent, quam profunt. Frustra itaque industriam suam defatigant, qui ex aliis Commentariis novos confarcinant, ut constet aliis, quænam explicatio ipsis probetur, quasi ab eorum auctoritate novum accedat pondus, vel ea robur acquirat, quod non habet. Si qui enim

enim fuerint, qui ultra vulgus non sapiunt, iis abunde satisfacient Commentarii, qui tanto numero ubivis prostant, ut opus non sit repetitoribus. Quodsi dicas, ea, quam nos hic urgemus, methodo brevitatis spatio Commentarios in multos Scripturæ sacre libros in publicum protrudi non posse; paucis regerimus, Scripturam sacram non eo fine nobis datam, ut ex verbo Dei quæstum faciamus, vel vanæ ambitioni litemus.

#### IV.

##### *De Notione symptomatis.*

##### §. I.

Symptoma in Medicina receptum terminus est, <sup>Institu-  
tum au-  
toris.</sup> cuius tamen vaga admodum, nec satis determinata est significatio, ut *Sennertus* (a) ejus explicationem difficilem judicet. Quamobrem cum notionem sanitatis (b), morbi (c), naturalis, præternaturalis

X 4

lis

(a) Institut. Lib. 2. part. 3. Sect. 1. C. 1.

(b) In Trim. æstivo A. 1729. Num. IV.

(c) In Trim. autum. A. 1729 Num. IV.

lis & non naturalis (d) atque causæ morbi (e) evoluerimus & ad fixum ac determinatum significatum reducerimus; nostrum quoque esse duximus in notionem symptomatis inquirere. Neque enim in praxi Medica utilitate caret, symptomata a morbis accurate distingui. Unde & *Galenus* de differentiis symptomatum data opera commentatus est, & *Cel. Bærhæve* (f) symptologiam peculiarem Pathologiæ partem facit.

## §. 2.

Quomodo  
notio  
sympto-  
matis in-  
vestigetur.

Etsi olim, teste *Galeno* (g), vocabulum generaliter usurpatum fuerit de eo omni, quod præter naturam accidit corpori, ita ut etiam sub nomine symptomatis comprehenderentur morbi & morborum causæ; hic tamen significatus dudum exolevit, ut nulla ejus habenda sit ratio. Hodie in confesso est apud omnes symptoma esse debere aliquid, quod præter

(d) In Trim. æstivo A. 1730 Num. IV.

(e) In Trim. brumali A. 1731 Num. IV.

(f) In Institut. Medicinæ p. 378 & seqq.

(g) De Diff. sympt. C. 1.



ter naturam in corpore existit, idem esse distinctum a morbo & causam morbi, quicquid denique præternaturale in corpore datur, vel ad morbum, vel ad causas morbi, vel ad symptomata esse referendum. In eo etiam consentiunt omnes symptomata sequi debere aliud, quod præter naturam in corpore existit, propterea quod *Galenus* (h) dixit, symptomata morbis supervenire eosque sequi, quemadmodum umbra corpus suum sequitur. Quamvis vero huc potissimum animum adverterint Medici, dum symptomata explicare aggressi sunt, & nonnulli symptomata ab aliis præter naturam in corpore existentibus hoc solo distinxerint, quod ex alio præternaturali, morbo potissimum, nascatur; patebit tamen deinceps, illud inter ea referri debere, quæ de symptomatis demonstranda, non sumenda sunt, nec quicquam ad hoc conferre, ut notionem generalem symptomatis investigemus. Sufficiunt enim cetera,

X 5

de

---

(h) De Differ. sympt. C. i.

de quibus primo diximus loco. Ex iis igitur methodo analytica deducemus, quæ ad notionem symptomatis accurate determinandam faciunt. Notionem ex iis deductam, quam concedunt omnes, genuinam quoque agnoscere tenentur, qui propriis principiis contradicere nolunt. Ex ea ipsa autem etiam constabit, veteres recte symptomata a morbis eorumque causis distinxisse, cum sit ens ab iis diversum, cujus non minus, quam morborum & causarum eorundem habenda est ratio, sive theoriam, sive praxin spectes. Neque dubitamus duros nos, quod imitentur alii, præsertim illi, qui Medicinam ad leges methodi demonstrativæ revocare voluerint: qua de re mentem nostram alio tempore uberius exponemus.

### §. 3.

*Quid sit  
symptoma in  
generale.*

Machina corporis nostri ex variis constat partibus vi structuræ suæ ad certas functiones aptis, & status corporis naturalis dicitur, in quo singulæ ipsius partes ad functionem suam aptæ sunt & vi principii activi corpo-

ris

ris functiones ad actualitatem perduntur (i). Enimvero haud raro contingit, structuram partis cujusdam vitium contrahere, ut ad functionem suam rite obeundam ineptum reddatur, vel a causa quadam interna partem aliquam impediri, quo<sup>1</sup> minus officio suo rite defungatur, atque hunc statum præternaturalem dixerunt veteres (k). Quoniam <sup>scilicet</sup> nptoma quidpiam præternaturale est (§. 2), eidem locus esse nequit, nisi in eo statu corporis, quo organum aliquod corporis vel officio suo prorsus non defungitur, vel saltem non rite defungitur. Quodsi pars quædam corporis vitium contraxit, ut ad usus suos, quibus per naturam destinatur, non amplius sit aptum consequenter aut functio ejus prorsus cesset, aut saltem non legitimo procedat modo, morbo laborare dicitur (l). Quamobrem cum symptoma a morbo sit di-

---

(i) In Trimestri æstivo A. 1730 Num. IV. §. 3.

(k) Ibid. §. 4.

(l) In Trimestri autum. A. 1729 Num. IV. §. 2.

diversum (§. 2.); in vitio quodam partis cujusdam machinæ corporis nostri consistere nequit. Quodsi pars aliqua corporis a causa quacunque interna impeditur, quo minus actionem edat, ad quam in se spectata producendam apta deprehenditur, error externus dici suevit (m). Quamobrem cum termini semel recepti non sint temere immutandi, nec istud impedimentum pro symptomate haberi potest. Quicquid partem aliquam corporis vitiat, ut ad functionem suam reddatur inepta & in corpore existit, causa morbi est interna (n). Cum igitur symptoma a causa morbi diversum sit (§. 2.); nec in eo consistere potest, quod vitiat structuram partis, ut ad functionem suam reddatur inepta. Nihil adeo relinquitur, quod symptoma dici possit, quam quod præter vitium partium solidarum & (cum fluidorum etiam datur morbus) fluidarum, atque impedimenta, quo minus partes officio suo fungantur, præternaturale in corpore

---

(m) Loc. cit. §. 8.

(n) Loc. cit. §. 3. 4.

pore datur. Symptoma igitur definiendum, quod sit præternaturale in corpore, quod nec partem aliquam ad functionem suam ineptam reddit, nec impedit, quo minus officio suo recte defungatur. Hoc pacto symptoma a morbo, causa morbi atque errore externo sufficienter distingui patet. Etenim quia organum corporis ineptum minime reddit ad functionem suam, nec morbus est, nec causa morbi, & quia non impedit, quo minus officio suo recte defungatur, nec error externus est. Quoniam tamen præter naturam in corpore datur, aliquid præternaturale est a morbo ejusve causa atque errore externo diversum, quemadmodum ex unanimi Medicorum sententia esse debet (§. 2). Definitio itaque nominalis symptomatis rite sese habet, cum sufficiat ad idem agnoscendum & ab aliis, quæ præter naturam in corpore dantur, distinguendum. Quod vero dentur symptomata hoc sensu accepta, a posteriori per exempla probatur. Si quis ova fricta ventriculo ingessit & mane exsurgens ructum nido-

nidorosum emittit; ea non fuisse bene concocta nemo non agnoscit. Impotentia ventriculi ova fricta bene concoquendi error externus est, quoniam vitium nullum in ventriculo latet, sed in cibo, qui qualitate sua impedit, quo minus actione ventriculi agentis, quod suum est, concoquatur. Mala vero cibi concoctio & inde ortus ructus nidorosus est symptoma. Vides hic, symptoma esse aliquid præternaturale (ventriculus enim per se dispositus est ad cibum bene concoquendum), diversum tamen a morbo, qui nullus adest, cum nullum ventriculo inhæreat vitium, ob quod male concoquat cibos, consequenter & a causa morbi, qualis non adest, diversum quoque ab errore externo, impotentia scilicet ventriculi concoquendi cibos. Similiter symptoma est, si sitis augetur in febribus. Est enim ea præternaturalis, diversa tamen a febre, adeoque a morbo, consequenter & causa hujus morbi, cum febrim demum sequatur. Porro si tumor magnitudinem partis auget, eo tamen non ob-

stan-



stante actio ejus minime læditur; symptoma est: etenim præternaturalis is est, diversus tamen a morbo, qualis nullus adest, cum parti nullum inhaereat vitium, ob quod ad actionem suam inepta sit, & ab errore externo, cum ea nullo modo impediatur. Docent exempla, dari in corpore humano præternaturalia, quæ sunt a morbis, morborum causis internis atque erroribus externis diversa, adeoque ab iis distinguenda, cumque ea symptomatum nomine veniant, symptoma recte definiri per præternaturale, quod nec partem corporis nostri vitiat, seu ad functionem suam ineptam reddit, nec impedit, quo minus ad actionem edendam per se aptum officio suo rite fungatur. Nulli igitur dubitamus, quin definitio ad symptomata agnoscenda sufficiat. *Sennertus* (o) symptoma definit, quod sit affectus seu accidens præternaturam, in iis, quæ extra constitutionem partium ad actionem determinate necessaria non sunt, aliquid aliud

---

(o) Loc. cit.

aliud præter naturam sequens, seu quod sit accidens præter naturam & mutatio ejus constitutionis in corpore, quæ ad actiones edendas determinate necessaria non est. Non dubitamus, quod hisce verbis idem indigitare voluerit, quod definitione nostra continetur. Dum enim symptoma definit per accidens præter naturam, ipsum præternaturale quid esse dicit, & perinde ac nos ad præternaturalium classem tanquam ad suum genus refert. Dum vero hoc accidens in iis esse ait, quæ extra constitutionem partium ad actionem determinate necessaria non sunt, hoc ipso concedit, symptoma non vitare, nec impedire partem corporis, quo minus officio suo fungatur. Quod vero addat in definitione priore, symptoma sequi aliud quid præter naturam; id quidem a veritate alienum non est, quemadmodum etiam exempla in medium adducta loquuntur, ex definitione tamen rectius extulatur, cum ex anterioribus demonstratur, quemadmodum mox videbimus. Arbitramur itaque, definitionem nostram

stram a mente *Sennerti* non esse diversam, qui omni studio id agit, ut symptoma menti *Galenii* convenienter explicet. Quoniam morbum, causam morbi & errorem externum independentem a symptomate definimus; Symptoma quoque definiri poterat, quod sit præternaturale quodcunque in corpore humano a morbo, causa morbi & errore externo diversum, quemadmodum in Geometria curva definitur per lineam, quæ recta non est, supposita lineæ rectæ definitione, vel in Ontologia possibile per id, quod non est impossibile, definitione impossibilis præsupposita. Etenim si præternaturale quid observatur, atque vi definitionum morbi, causæ morbi & erroris externi ostendi potest, ipsum non esse morbum, nec causam morbi, nec errorem externum; inde constat, quod sit symptoma. Non est, quod objicias, difficulter hoc pacto symptoma agnoscij, cum facilius agnosceretur, applicatione unius definitionis positivæ, quam remotione trium definitionum: etenim ubi definitio applicanda, inquir-

Y

ren-

rendum est, num singulæ rei præ-  
senti insint notæ, quæ definitionem  
ingrediuntur, & quod adfint haud  
raro ex alijs demonstrandum (§. 349.  
1218 *Log.*). Constat præterea defi-  
nitiones nominales & reales in disci-  
plinis non tradi tantummodo in eum  
finem, ut definita agnosci & ab alijs  
distingui possint; verum etiam ut alijs  
eruendis & demonstrandis inserviant.  
Immo nonnunquam rebus agnoscen-  
dis prorsus non adhibentur, sed in-  
serviunt alia inde demonstrata, per  
quæ non minus definiri res poterat:  
quæ omnia satis aperta sunt iis, qui  
attenta mente perlegerunt, quæ de  
definitionibus tradidimus in theoria  
Logicæ, vel in disciplinis methodo  
demonstrativa traditis fuere versati.  
Definitio itaque symptomatis, de qua  
sermo est, nihil vitii habet, & suf-  
ficit, quod per eam intelligatur, quid  
nomine isto designare voluerint Me-  
dici veteres, ac in theoria condenda  
eum præstet usum, quem definitio-  
nes nominales habere debent. Ipse  
tamen usus quoque docebit, applica-  
tionem illius definitionis ad sympto-  
mata

§. 4.

Y210 .a61 .o6a

sa externa, qui cum nondum lædat partium actionem, nec pro morbo, nec pro causâ morbi haberi potest, sit ita quod causis aliis accedentibus in eam degenerare possit. Erit itaque symptoma aliquod (§. 3). Refert etiam *Sennertus* (o) hunc calorem inter symptomata. Diserte enim: „Si aliquis calor, inquit, qualis a balneo, æstu solis, motu vehementiore excitatur, in partibus viventibus oritur, modo temperies illa determinata & gradus ille caloris, qui ad actiones necessarius est, nondum mutetur, non morbus est is calor, etsi non sit naturalis corpori, sed symptoma falsum. Quæstio igitur restringenda est, num symptoma aliquod, quod causam internam proximam habet, aliud quidpiam præternaturale in corpore supponat, & sic utique affirmanda venit. Etenim non datur status corporis, nisi naturalis & præternaturalis. In statu naturali singula corporis partes functiones legitime

(o) Loc. cit. C. I.



obeunt (p), adeoque nulla, subest ratio, cur in corpore nostro quidpiam rite sese non habeat. Cum enim in hoc statu corpus sanum sit (q); sanitas & morbus, quo corpus sanitate privatur, ab eadem causa efficiente eodem modo agente penderent; quod quam sit absolum, ipsum principium contradictionis, quod idem simul esse & non esse negat, loquitur. Quamobrem si symptoma aliquod causam internam habere debet, necesse est ut status corporis supponatur præternaturalis, consequenter aliud præternaturale in eodem supponendum, quod sequatur. Videmus itaque, in definitione symptomaticis in genere non sumendum esse, quod sequatur aliud præternaturale, cum non modo hoc verum non sit, ubi symptoma causam externam proximam agnoscit; verum etiam, ubi internam causam habet, demonstrari possit, quod necessario aliquid præ-

Y 3

ter

---

(p) Hor. subsec. A. 1730 Trim. æst.  
Num. IV. §. 3.

(q) Hor. subsec. A. 1729 Trim. æst.  
Num. IV. §. 3.

## §. 4.

Sympto-  
matum  
divisio a  
causa  
petita.

Tradunt Medici duplicem symptomatum divisionem. Altera desumitur a causa, altera a forma. Dicamus primum de ea, quæ a causa petitur. Quoniam vulgo non habetur ratio nisi causarum internarum, propterea quod symptoma omne dicitur sequi aliud quidquam, quod præter naturam in corpore datur; symptomata dividi solent in symptomata morbi, symptomata causæ morbi & symptomata symptomatum. Nimirum *symptoma morbi* est, quod a morbo quodam dependet, seu rationem sufficientem aut saltem aliquam in eodem agnoscit. Unde symptoma morbi non ponitur, nisi posito morbo, aut saltem poni nequit, nisi morbo posito. Quodsi enim cum ipso morbo non necessario ponatur simul symptoma, præter eum alia adhuc requiritur causa, adeoque morbus solus causa ejus sufficiens non est (§. 897. *Ontol.*). *Symptoma causæ morbi* est, quod a causa morbi dependet, adeoque rationem si non sufficientem saltem aliquam in causa morbi habet

(§. 851

(§. 851 *Ontol.*). Unde denuo patet, in casu priore causam morbi esse simul causam sufficientem symptomatis, in posteriori non item, & in priori casu symptoma simul poni cum causa morbi, in posteriori tantummodo poni posse, actu autem non poni, nisi alia causa sive interna, sive externa superaddente. *Symptoma* denique symptomatis est, quod ab alio symptomate dependet, seu rationem si non sufficientem, saltem aliquam in alio symptomate anteriore, quod sequitur, habet. Quamobrem de symptomatibus quoque symptomatum tenenda sunt, quæ modo de symptomatibus morborum & symptomatibus causæ morbi annotavimus. Quoniam error externus peculiarem quendam corporis præternaturalem statum constituit atque a morbo differt (1); hisce symptomatum speciebus addenda est quarta, quæ symptomata errorum externorum comprehendit. Est adeo *symptoma erroris externi*, quod ab erro-

Y 5

re

(1) Hor. subsec. A. 1730 Trim. aut.  
Num. IV. §. 8.

re quodam externo dependet, & de hisce symptomatis eadem tenenda sunt, quæ de ceteris modo inculcavimus. Denique cum ex anterioribus manifestum sit, symptomata quædam a causis externis pendere posse immediate, ita ut nihil aliud præternaturale in corpore præsupponant; symptomata in genere non male dividuntur in symptomata immediata & mediata. *Immediata* sunt *symptomata*, quæ immediate a causa quadam externa dependent, seu causam externam proximam sufficientem habent. *Mediata* vero sunt, quæ a causa interna dependent. Mediata subdividuntur in symptomata morbi, symptomata causæ morbi, symptomata errorum externorum & symptomata symptomatum, quæ a nonnullis in prima atque secunda dividantur, quatenus vel a nullo anteriore symptomate oriuntur, vel a priore quodam symptomate ortum suum derivant.

### §. 6.

*Divisio  
symptomata-*

Altera divisio symptomatum, quæ in foro Medicorum pervulgata ab anti-

tiquissimis temporibus, est in actionem <sup>tum a</sup> laesam, excretorum & retentorum vi- <sup>forma de-</sup> tia, & qualitates mutatas, quæ scilicet <sup>sumta.</sup> actiones corporis non laedunt.

*Actio* aliqua dicitur *laedi*, si vel prorsus cessat, aut edi nequit, vel si non eo, quo in statu naturali editur, edi potest modo. Quoniam in morbo organum aptum non est ad functiones suas rite obeundas (s) & ob errorem externum impeditur, quo minus actionem, prout decet, edere possit (t); symptomata actionum laesarum a morbis atque errore externo pendent, atque adeo symptomata morbi & erroris externi sunt (§. 4). *Actio* dicitur *abolita*, si prorsus cessat, veluti si ventriculus cibos ingestos prorsus concoquere nequit, vel ægrotus pedibus insistere non valet. *Diminuta* dicitur, si circa quantitatem notatur aliquis defectus, veluti si ventriculus cibos ingestos omnes non concoquit, aut si concoctio diuturniore tem-

(s) Hor. subf. A. 1729 Trim. Num. IV. §. 2.

(t) Hor. subf. A. 1729 Trim. Num. IV. §. 8.

temporis spatio demum absolvitur, quam fieri debebat, si respiratio fuerit difficilis, si cordis motus fuerit nimis tardus. *Aucta* dicitur, si circa quantitatem notatur excessus, veluti si respiratio vel motus cordis acceleratur, vel si respiratio fuerit magna, pulsus magnus, vigiliæ sint nimiae. *Depravata* dicitur *actio* si alia editur, quam in statu naturali edi solet, veluti si mulier gravida appetit carbonem aut alia, quæ in nutrimentum commutari nequeunt, aut si cibi in verticulo mutantur in putrem humorem. *Excrementa & retenta vitio laborare* dicuntur, si vel quantitate vel qualitate recedunt ab iis, quæ locum habent in statu naturali, vel ab hisce toto genere diversa sunt, aut alieno etiam loco excernuntur. Veluti si major multo vel minor urinæ quantitas excernitur, quam in statu naturali fieri solet, vel si color ejus fuerit insolitus, vel ei miçtus fuerit cruentus, vel cum urina calculi vel pili (quemadmodum vidit *Hippocrates*, vidit etiam *Galenus*) excernuntur, vel sanguis menstruus per mammas



mas aut oculos fluit. *Symptoma* denique *qualitatum mutatarum* appellatur, si qua qualitas corporis naturalis mutatur in præternaturalem, absque ulla tamen actionum læsione, veluti cum in ictericis color totius corporis in flavedinem abit, aut in febribus color rubicundus linguæ innigricantem convertitur; cum pedes tetrum odorem spirant, cum saliva admodum salsa, cum calore nimio æstuat corpus, vel calor quidam præternaturalis deprehenditur in parte corporis inflammata. Nemo non videt, hasce symptomatum differentias probe attendendas esse, cum eorundem in Semiotica multus sit usus. Ad particularia non descendimus, cum nobis jam non sit propositum explicare symptomata, quæ machinæ corporis nostri accidunt; sed tantummodo docere, quid symptomatum nomine veniat, ut ab aliis præternaturalibus distinguatur: id quod abunde nos præstitisse confidimus.

## §. 7.

Quoniam in corpore humano quæ *cautio in* contingunt, variis modis a se invicem *dignoscendis* de-

*sympto-  
matis ad-  
hibenda.*

dependent, haud raro difficile est, ut præternaturalia a se invicem rite distinguantur. Quamobrem saepe difficile est symptomata a morbis & a se invicem discernere, utrum scilicet morbi alicujus, num causæ morbi aut erroris externi, vel symptomatis cujusdam alterius symptoma sit. Cautione igitur opus est, ne judicium præcipites. Ubi etiam hoc notandum est, ab Autoribus subinde symptomata actionum læsarum cum vitiis excretorum confundi: id quod tamen facile evitatur modo notes vitia excretorum non considerari nisi quatenus excreta in se spectantur, nulla habita ratione actionis, qua ea excernuntur. Ita nonnulli nimiam urinæ quantitatem, vel etiam ejus paucitatem ad actiones læsas referunt, quia urinam tanquam excretum non in se considerant, sed actionem respiciunt, qua excernitur.

### *De utilitate cognitionis Figure Telluris.*

#### *§. I.*

*Institu-  
tum an-*

**V**eteres Telluri, quemadmodum ceteris corporibus mundi totalibus,

libus, immo toti mundo Figuram sphaericam tribuerunt. Argumentis invictis probarunt, eam esse rotundam, & quia Soli, Lunæ ac ceteris astris figuram sphaericam competere sibi persuadebant, sensuum magis, quam rationis judicio stantes, per analogiam intulerunt, Terræ quoque figuram sphaericam esse. Quorumcunque adeo cognitio a Figura Telluris dependet, ea eidem convenienter determinarunt. Cum seculo superiori ex observationibus pendulorum a Gallis in insula Cayenna factis gravitas sub æquatore imminuta colligeretur; exinde *Hugenius* in Discursu de causa Gravitatis, quæ Tractatui de Lumine subjungitur, & *Newtonus* in præclaro illo opere principiorum Philosophiæ naturalis mathematicorum demonstrarunt, figuram Telluris esse sphaeroidicam, ita ut diameter æquatoris excedat axem, seu rectam ex polo uno in alterum ductam, & illius ad hunc rationem, quamvis non prorsus eandem determinarunt. Cum *Dominicus Cassini* Meridianum in Gallia per observatorium trans-

eun-

euntem dimetiretur, ex inæqualitate graduum intulit, diametrum æquatoris esse axe minorem, figuram adeo sphæroidicam agnoscens, sed sphæroidem tamen prorsus aliam ab *Hugeniano* & *Newtoniano* probans. Nata est hinc inter Gallos potissimum atque Anglos (ceteri enim Mathematici a *Newtoni* potissimum partibus steterunt,) controversia de figura Telluris, per multa lustra continuata, non rationibus sed observationibus potissimum terminanda. Instituto huic convenientissimum videbatur, si gradus Meridiani sub circulo polari seu in zona frigida & gradus ejusdem sub æquatore seu in zona torrida accurata mensura determinaretur: ita enim constare poterat, num gradus versus polos decrescant, an vero crescant, quorum illud figuræ *Newtonianæ*, hoc autem figuræ *Cassinianæ* convenit. Enimvero negotium tam arduum & tot tantisque difficultatibus obseptum non erat hominis unius, sed plurium requirebat operas socias, & sumtus non privatos, sed regios postulabat. Quamobrem desperandum videbatur philo-

losophis ac mathematicis, ne unquam disceptatio illa decideretur, & quamnam sit figura Telluris certo definiretur. Verum enimvero accidit præter omnem spem ac expectationem inter medios belli tumultus, ut Rex christianissimus munificentia vere regia Mathematicos tanto molimini pares mitteret in regnum Peruvianum in Zona terra, & alios in Lapponiam sub circulo polari sitam, ut illi gradum Meridiani æquatori proximum, hi gradum ejusdem, qui circulum polarem secat, accuratissime dimeterentur. Neminem fore arbitror, qui diffiteatur, evenisse hoc præter omnem spem atque expectationem. Equis enim est, qui nesciat, sumtus etiam modicos videri immensos, quos Principes ad scientiarum incrementa promovenda impendere debent, etiam si maximis non parcant, ubi vanitati & opinioni litandum, & plusquam immensos censeri, si revera fuerint magni? Immo quis sibi persuadebit. id obtineri posse, ut ad terminandam aliquam controversiam Philosophorum & Mathematicorum

Z

fiant

fiant sumtus maximi, ubi Mars Minervæ invidus nummos omnes veluti ad se rapit? Munificentia itaque Regis christianissimi fidem omnem superat, eamque admirabuntur feri nepotes, quamdiu non deerunt, qui scientiis habebunt honorem. Eam igitur omni laude extollere tenentur, quotquot veritates momentofas thesauros generis humani esse agnoscunt, quos augere & amplificare Regum munus est, etsi vulgo non agnoscatur. Verum enimvero non unum audio susurrantem, parum referre genus humanum, utrum norint nec ne, qualis sit figura Terræ, quam nobis inhabitandam concessit Numen providentissimum. Posse homines vivere felices, etiamsi ignorent, utrum figura Terræ sit sphaerica, quemadmodum credidere majores, an sphaeroidica, quemadmodum recentiores statuunt Mathematici, & utrum Sphaeroides sit oblonga, quemadmodum hætenus visum plerisque in Gallia Mathematicis, an vero decurtata, quemadmodum defendunt ceteri. Referendam hanc quæ-



quæstionem si non inter inanes nugas, quibus tempus fallunt otiosa Mathematicorum ingenia, saltem inter steriles speculationes, quæ non placent, nisi quia difficilis ad easdem aditus non patet promiscue omnibus. Hisce igitur hominibus, adeoque plurimis, non videbitur tantopere commendandum, si Regibus persuadeatur, ut quæstionibus istiusmodi decidendis sumtus suggerant, præsertim magnos, eo inprimis tempore, quo parcendum inutilibus, immo omnibus, quos nulla cogens urget necessitas. Existimabunt enim non esse Regum, ut satisfaciant curiositati illorum hominum, qui sibi vivere, quam aliis prodesse malunt. Nostrum igitur esse duximus, ut hoc præjudicium pro virili amoveremus: Quod ut faciamus, ostendendum nobis est, a veritate plurimum aberrare eos, qui quæstionem de figura Telluris in sterilem numerum referunt, nec aliam inde utilitatem expectant, quam ut otiosa nonnulla ingenia delectet, quibus summum bonum videtur scire, quæ non sciunt omnes.

## §. 2.

*Præjudi-  
cium  
quoddam  
notatur.*

Antequam vero in utilitatem cognitionis figuræ Telluris inquiramus; præjudicium quoddam tollendum est. Oppido falluntur, qui veritatem latentem non ante investigandam esse arbitrantur, quam de ejus utilitate constiterit. Etenim quam utile sit veritatem habere perspectam, tum demum patet, ubi eandem vel ad alias veritates latentes eruendum, vel ad quædam facienda applicamus. Applicatio hæc fieri nequit, nisi veritas jam fuerit in aprium producta, nec semper prævider potest, etsi subinde eam prævidere liceat. Quamobrem utilissima haud raro negligerentur, si inventoribus hæc præscribenda lex esset, ne inquirerent in veritatem, nisi cujus utilitatem præviderent. Non uno hoc doceri poterat exemplo, si vel in sola Mathesi subsistere luberet. Nemo, qui Mathematica vel primis laboribus degustavit, ignorat, Logarithmorum inventum longe utilissimum esse, quod nunquam satis deprædicari potest. Constat inventorem Logarithmos nunquam fuisse detecturum, ni-

si ante progressionem numerorum geometricæ ac arithmeticæ inter se fuissent collatæ, quæ quod viam sternerent ad inventum adeo utile nemo prævidere poterat. Quod si ergo ob utilitatem minime prævisam, nec prævidendam, speculationes istas tanquam steriles ex lege inventoribus præscribenda de non investigandis veritatibus, quarum nulla apparet utilitas, damnasent; invento tam utili hodiernum careremus, immo ignoraremus ea omnia, quorum cognitio a Logarithmorum notitia dependet & quæ quanti sint momenti, abunde norunt, qui in Mathematicis sunt versati. Quod vero vel acutissimi non semper prævideant utilitatem veritatis jam detectæ, non minus exempla docent. Nemo Mathematicum peritus in dubium vocat, *Hugenium* inter Mathematicos summos recentiores principem quendam mereri locum, ita ut in mathematicis plurimum tribuendum sit ipsius iudicio. Constat tamen Mathematicum summum de calculo differentiali initio non adeo magnifice sensitisse, cum ejus beneficio dudum inventa aliter tantum-

modo exprimi censeret, propterea quod utilitatem ejus prævidere minime poterat. Quodsi itaque *Leibniti*us ad hunc calculum inveniendum & alii Mathematici primi ordinis ad eum ulterius excolendum animum appellere minime debuissent, antequam ejus utilitas summa ipsis perspecta fuisset, dubium non est, quin adhuc in desideratis numeraretur inventum prorsus divinum, & omnia ignorarentur, quæ ejus ope hæcenus detecta fuerunt, essentque hodieum Geometris inaccessa, ad quæ iisdem ante hoc inventum præclusus erat aditus. Apage igitur te cum præjudicio tuo, quod etsi sapientiam spirare videatur, ad stultitiam tamen referendum, & quin maxime noxium sit haud diffiteri valet, qui quomodo veritates generi humano longe utilissimæ fuerint detectæ, non ignorat. Non opus est, ut in re satis manifesta simus prolixiores.

## §. 3.

*Num  
disqui-*

Ex his, quæ diximus, conficitur, disquisitionem de figura Telluris non posse

posse dici inutilem, etiamsi nulla ad-<sup>sic io de fi.</sup>  
huc appareret utilitas. Quodsi enim<sup>gura Tel-</sup>  
ignoras, num usus utique inde re-<sup>luris tan-</sup>  
dundet in genus humanum, si certo<sup>quam in-</sup>  
constiterit, qualis sphaeroides sit Ter-<sup>utilis re-</sup>  
ra, & si Geometræ figuram hanc<sup>jicienda,</sup>  
definire & ejus proprietates per cal-<sup>si nulla</sup>  
culos suos investigare valeant; hinc<sup>hujus no-</sup>  
nondum inferre licet, quod utilita-<sup>tia appa-</sup>  
te careat. Præcipitas adeo judicium<sup>reat uti-</sup>  
ad impossibilitatem rei argumentatus.  
Tacite nimirum supponis, ea in nu-  
merum impossibilium esse referenda,  
quæ tu ignoras, adeoque tacite sup-  
ponis esse tibi eorum omnium, quæ  
possibilia sunt, notitiam & quidem  
adeo familiarem, ut quoties de ali-  
quo eorum cogitandi occasio incidit,  
id statim animum subeat. Nonne  
male sanum ipsemet dixeris, nemine  
refragante, si quis hoc de se affirma-  
ret, ita ut non refutandum, sed de-  
risui aliis propinandum judicares?  
Quo igitur jure prætendis, tuum ali-  
quid valere debere judicium, quod  
nullum esse debet, ubi sumis tan-  
quam verum, quod ipsemet maxime  
absurdum pronuncias? Necesse igi-

tur est, ut fatearis, non esse ideo inutilem de figura Telluris disquisitionem, etiamsi usum adhuc nullum prævidere possis, immo si vel maxime nec ullam prævideant utilitatem alii, quam ejus notitia parere debet: fieri enim potest, ut successu temporis detegatur maxima, quam sperare in præsentī non licebat. In iis, quorum eventus a nobis præsciri nequit, casui eundem submitendum esse unanimiter fatentur omnes, qui se prudentes probant. Quamobrem profundi sumtus dicendum non est, si quos faciunt Reges vel summi Principes, ut vera Telluris figura detegatur, sine quibus eam detegere non licet, saltem pro præsentī rerum statu, etiamsi docere nondum possis, quanam inde speranda sit utilitas. Veritates omnes adeo inter se connexæ sunt, ut per cognitionem unius pateat aditus ad alias, quæ inaccessæ erant, & humani generis utilitates cum agnitione veritatum adeo cohærent, ut cum harum incremento augeantur & ipsæ. Felicitati adeo generis humani semper consulunt Principes, si ad veri-



veritatum thesaurum amplificandum,  
quod suum est, conferant.

§. 4.

Neque vero omnino verum est, nullam prævideri posse disquisitionis de figura Telluris utilitatem, etiamsi non Archmedes aliquis, vel Apollonius fueris. In vulgus notum est, veteres sumsisse, quod figura Telluris sphærica sit, & hanc figuram supponunt Mathematici in Astronomia, Geographia, Navigatione, Gnomonica, Libellatione. Qui vel fugitivo oculo hasce Matheseos partes percurrit, is facile observabit, quam multa sint, quæ ex hoc supposito deducuntur, quod sphærica sit Telluris figura. In confesso hodie est, eam sphæricam non esse. Quamobrem nec accurata esse possunt, quæ ab eadem pendent, ubi inter figuram sphæricam & sphæroidicam, qualis Telluri revera competit, non contemnenda intercedit differentia. Hinc facile prævidere licet, longe aliam futuram partium Matheseos mixtæ faciem, si vera Telluris figura agnita in Ma-

*An aliquis usus prævideri possit.*

thesin admittatur. Suam igitur ac-  
 cuset ἀβλεψίαν seu acuminis sui defe-  
 ctum, vel omnimodam Mathema-  
 tum imperitiam vel incogitantiam,  
 si usum nullum prævidere potest.  
 Non est, quod excipias, figuram  
 sphæroidicam a sphærica adeo parum  
 differre, ut pro sphærica haberi possit  
 in iis Mattheseos partibus, in quibus  
 explicanda veniunt, quæ a figura  
 Telluris pendent: hoc enim non su-  
 mendum, sed demonstrandum est.  
 Quamobrem ut certi simus, num &  
 quando figura Telluris citra erro-  
 rem sensibilem pro sphærica habe-  
 ri possit, in veram Telluris figuram  
 inquirendum. Nostro seculo non  
 convenit sumere tanquam certa, quæ  
 quod vera sint demonstrari nondum  
 potest.

## §. 4.

*Usus pri-  
 mus in  
 Geogra-  
 phia.*

Dicta sufficere poterant pro præ-  
 senti scopo, ubi non aliud nobis  
 propositum est, quam temeritatis re-  
 daguere judicia præcipitata, quæ in  
 munificentiam Regis christianissimi  
 atque Herculeas operas virorum præ-  
 clarorum injuria sunt. Non incon-  
 ful-

sultum tamen existimamus, ut quædam specialius declarentur. Constat in constructione mapparum geographicarum gradus latitudinis, qui in Meridianis determinantur, sumi æquales, ac hinc definiri inæqualitatem graduum in parallelis, ab utriusque autem pendere distantiam locorum. Cum Telluris figura non sit sphærica, sed spheroidica, gradus Meridiani inæquales sunt, & inæqualitas graduum in parallelis alio prorsus modo sese habet, quam in hypothesi figuræ sphæricæ determinatur. Mappas igitur geographicas accuratas construere non licet, nisi vera Telluris figura fuerit cognita. Et quoniam (quemadmodum diximus) ex horum graduum quantitate præsupposita definiuntur distantie locorum; nec veras eorundem distantias exhibebunt mappæ geographicæ, nisi in iisdem construendis ratio habeatur veræ figuræ Telluris, quæ experimentis accuratissime factis comprobatur. Quoniam mapparum geographicarum constructio atque usus haud infimum sibi locum vindicant in Geographia; quin notitia veræ figuræ

gura Telluris ad perficiendam Geographiam utilis sit, in dubium revocare non licet. Non dicam in præfenti de figura globorum terrestrium artificialium immutanda, ut veritati magis consentiant, quæ in ejus superficie exhibentur, nec de aliis, quorum demonstratio a figura Telluris dependet, cum jam nobis propositum non sit singula minutissime persequi.

## §. 5.

*usus sci-  
endus  
in navi-  
gatione.*

Quæ de mappis geographicis & definiendis distantiiis locorum in Geographia modo dicta sunt; ea etiam intelligenda sunt de mappis hydrographicis, quarum usus est in navigatione, nec non de distantiiis, quas in eadem nosse tenentur, qui cursum navis dirigunt, & hic multo majorem attentionem merentur, quam in Geographia, quia distantiarum cognitio magis momentosa in navigatione, quam in Geographia: id quod non ignorant, qui navigationi præficiuntur, ac facile capiunt, qui quæ de arte navigandi demonstrantur in Hydrographia ad animum revocant. Etenim

nim si vel oculo fugitivo quis percurrere velit problemata, quæ in arte navigandi solvuntur, haud difficulter perspiciet, quandonam distantia cognita præsupponatur, & quænam ab ejusdem cognitione pendent. Navigantibus vero per vastum oceanum exploratum est, quot & quantis periculis objiciantur, si quidem in determinandis distantiiis locorum a veritate multum aberraverint. Quamobrem si non alius a cognitione figuræ Telluris expectandus esset usus, quam quem in arte navigandi promittit; hic solus sufficere poterat, ut Reges nullis parcerent sumtibus ad illam accurate definiendam requisitis. Quantum momentum in eo situm, ut ars navigandi omni modo perficiatur, abunde norunt omnes, quorum interest, ut ea ad eum perfectionis gradum evehatur, ad quem industria humana perducipotest.

§. 6.

Qui in Astromonia non sunt proprii peregrini ac hospites, iis satis superque perspectum est, in parallaxi <sup>usque</sup> Luna <sup>sus in</sup> <sup>parallaxi</sup> <sup>determinanda.</sup>

Lunæ definienda supponi non modo veram quantitatem semidiametri terrestris, verum etiam figuram Telluris, quæ nunc cum veteribus sphaerica esse supponitur. Immo idem supponi in parallaxi Veneris & Martis methodo Cassiniana investiganda notum est, unde cognitio parallaxeos Solis ac reliquorum planetarum, & determinatio magnitudinis Solis & omnium planetarum, totiusque systematis planetarii accurata dimensio pendet. Nec minus constat, parallaxin Lunæ inservituram longitudini maris determinandæ, siquidem ea satis accurate definiri possit: quod problema hæctenus tantopere exercuit Mathematicorum ingenia. Nullum igitur dubium est, quin vera figura Telluris cognita haud parum conferre debeat ad Astronomiæ perfectionem.

## §. 7.

*vis**quartus  
in eleva-  
tione.*

Denique ut alia taceamus, Geometriæ practicæ satis gnaris constat, non negligendam esse elevationem lineæ horizontalis apparentis supra veram  
in



in libellatione, præsertim ubi aquæ per longa intervalla deducendæ. Supponitur cum veteribus hætenus figura Telluris sphærica, quam veram non esse constat. Atque adeo denuo liquet, ad summum perfectionis gradum, quem ab humana industria expectare licet, perducì minime posse libellationem, nisi vera Telluris figura cognita fuerit atque perspecta. Hæc sufficere puto, ut intelligatur, utilitate maxima non carere figuræ veræ Telluris accuratam determinationem, adeoque a veritate longius distare eorum sententiam, qui sibi persuadent, quæstionem de vera figura Telluris, si non inter tricas inanes, saltem inter quæstiones curiosas collocandam esse, quarum sollutionem tuto ignorare possit genus humanum.



CON-

# CONSPECTUS TRIMESTRIS VERNALIS.

## I.

*De Theoria negotiorum publicorum,* 179.

## II.

*De Versione Librorum juxta principia Philosophiæ nostræ adornanda.* 242.

## III.

*De Usu methodi demonstrativæ in explicanda scriptura sacra,* 281.

## IV.

*De Notione symptomatis,* 317.

## V.

*De Utilitate cognitionis figuræ Telluris,* 351.

FINIS TRIMESTIS VERNALIS.



HORÆ SUBSECIVÆ  
MARBURGENSES

ANNI MDCCXXXI,

QUIBUS

PHILOSOPHIA

AD

PUBLICAM

PRIVATAMQUE UTILITATEM  
APTATUR.

---

AUTORE

CHRISTIANO WOLFIO,

NUNC

POTENTISSIMI BORUSSORUM REGIS CON-  
SILIARIO INTIMO, ACADEMIÆ FRIDERICA-  
NÆ PRO-CANCELLARIO, JURIS NATURÆ ET GENTIUM  
AC MATHESEOS PROFESSORE ORDINARIO, PROFESSORE  
PETROPOLITANO HONORARIO, ACADEMIÆ REGIÆ SCIEN-  
TIARUM PARISINÆ SOCIETATUMQUE REGIA-  
RUM BRITANNICÆ ET BORUS-  
SICÆ MEMBRO.

---

TRIMESTRE ÆSTIVUM.


---

FRANCOFURTI & LIPSIAE, MDCCXXXI.  
PROSTAT IN OFFICINA RENGIERIANA.





## PRÆFATIO.



**C**ur ad Horas Subse-  
 civas edendas animum  
 appulerim, in præfatio-  
 ne exposui, cum Anno  
 1729. primum Trimestre prodiret.  
 Constitueram tunc temporis sin-  
 gulis trimestribus fasciculum quen-  
 dam in publicum proferre: enim-  
 vero labores ordinarii nullas pro-  
 pmodum horas subsecivas relin-  
 que-

quebant, ut adeo statuto tempore trimestria prodire non possent. Fuere tamen complures, qui, cum utilitatem hujus instituti perciperent, me ad idem prosequendum hortarentur. Quamvis adeo finitis Horis Subsecivis Anni 1730. ab eo penitus desistere decreveram; ad aliorum tamen commoda promovenda pronus facile mihi persuaderi passus sum, ut Trimestre Hybernum & Vernale A. 1731. in lucem quoque publicam proferrem. Enimvero anno superiori tot sese mihi objecere obstacula, ut ne quidem laboribus ordinariis sufficerem, nedum de Horis Subsecivis cogitare daretur. Contigit vero, ut Marburgum, Musarum meorum adeo commodam sedem, relinquerem ac Halam redirem, cujus consilii rationem fusius exposui in Programme

mate



mate de Necessitate Methodi scientificæ & genuino usu Juris Naturæ ac Gentium, quo lectiones in Universitate Fridericiana in posterum habendas intimavi. Horæ igitur Subsecivæ Marburgenses Anni 1731. non erant consummatæ, deficientibus adhuc trimestribus æstivo & autumnali. Inconveniens videbatur cum mihi, tum aliis laborem cœptum ad umbilicum non perducere. Alii itaque hortabantur ut loco horum trimestrium colligerem in fasciculum Programmata, quæ Marburgi conscribenda mihi erant, cum Pro-Rectoratus munere fungerer, & Orationes, quæ mihi publice recitandæ erant, cum hoc munus in alios transferrem. Non prorsus approbavi consilium amicorum, eidem tamen penitus deesse nolui. Quamobrem ne duo trime-

stria residua anterioribus dissimilia essent, themata iisdem convenientia selegi & eodem modo pertractavi, quo feceram in præcedentibus: ne tamen nihil apud me valeret aliorum autoritas, programmata præcipua trimestri æstivo inserui, Orationes vero addere inconsultum videbatur. Earum prima erat de actione recta, quam recitavi, cum munus Pro-Rectoratus in Virum Summe Reverendum *Duyfingium*, Professore tunc temporis Theologiæ Ordinarium, nunc beatorum numero adscriptum transferrem. Enimvero quæ de rectitudine actionis tenenda sunt, ea postmodum in Philosophia practica a me demonstrata sunt, inde rectius petenda, quam ex Oratione ista addiscenda. Nulla igitur ratio suadere poterat, cur eandem typis publicis ex intervallo

lo describi curarem. Altera de libertate academica differebam, quam prouinciavi, cum munus Pro-Rectoratus in Virum Summe Reverendum *Kirchmeyerum* transferrem, qui adhuc Professioni Theologiæ Ordinariæ summa cum laude in Academia Marburgensi præest, cujus mihi memoria constanti ac perpetuæ erat voluptati, quoad vixero. Orationem hanc in gratiam Studioforum conscripseram, qui, cum distincta libertatis academicæ notionem destituantur, libertatem in licentiam vertere solent eademque multis modis abutuntur non sine maximo detrimento. Quamobrem & eam in eorundem usum publici juris facere decreveram, nisi cogitationes de mutando domicilio, quæ animum per maximam anni superioris partem an-

cupitem tenebant, eundem ab hoc proposito divertissent. Etenim mente Februario mihi offerebatur Professio in Academia Ultrajectina conditionibus prorsus extraordinariis, Loci amœnitas & philosophiæ apud externos felicius propagandæ opportunitas me facile alliciebant ad Professionem oblatam acceptandam, dissuadentibus licet amicis, ne in anno climacterico magno, qui proxime instabat, tantæ mutationis periculum subirem. Animum quoque in transversum agebat ipsum Marburgum, commodissima, quemadmodum dixi, Musarum mearum sedes, qua alibi commodior vix speranda videbatur, & summa Regis Sueciæ ac Principis Hassiæ Gubernatoris, qua fruebar, clementia, mihi nunquam satis prædicanda: quæ ipsa in causa fuerat,

fuerat, ut a Rege Borussorum piæ memoriæ bis invitatus Halam redire recusassem, lautissimis licet ac splendidissimis conditionibus oblatis, quemadmodum in Dedicatione Tomo secundo Philosophiæ practicæ universalis præmissa indicavi pluribus. Ecce autem! dum animo perplexo dubia consilia agitantur, Potentissimus Borussorum Rex, qui hodie sceptrum tenet, eundem magis adhuc perplexum reddidit, ubi me denuo ad reditum in terras suas invitavit oblatis conditionibus mihi & valde honorificis & proficuis, ad invidiam tamen conciliandam maxime compositis. Quantis animi fluctibus ab eo tempore fuerim jactatus, ex quibus nonnisi providentia divina emerſi tandem, in eo, de quo paulo ante dixi, Programmate le-

stat. Mutatio domicilii obstitit, quo minus Tomus secundus Juris naturæ lucem publicam adipiscere potuerit nundinis hisce paschalibus, nonnisi anno elapso compariturus. Danda igitur in posterum erit opera, ut tempus omne, quod muneris præsentis ratio permittet a laboribus vacuum, omni animi contentione in continuanda philosophia, quam reformare aggressus sum, consummam. Vix itaque horas subscrivas sperare licet, præsertim cum plura sese hic, quam Marburgi offerant obstacula, quæ non commode declinari possunt. Malo igitur nil promittere, quam non stare promissis, etsi ad ea, quæ fieri non possunt, nulla detur obligatio. Quodsi præter spem ac opinionem nobis suppetet otium, id omne in publicam utilitatem luben-



bentissime impendemus, cum nobis nihil magis volupe sit quam aliorum commodis velificari, neque tempus a nobis melius collocari certi sumimus, quam quod in aliorum utilitatem impenditur. Dabimus adeo horas subssecivas non certo tempori alligatas, sed quocunque tempore licebit. Sed de his, quæ in potestate nostra non sunt, statuere quid certi non datur. Hoc tamen spondemus, nos omnem moturos esse lapidem, ut damnum, quod mutandi domicilii causa passa est philosophia nostra, in posterum resarciatur. Et enim si Marburgi ut mansissemus visum fuisset Deo, Tomus secundus Juris Naturæ nunc prodiisset, cujus primus lucem publicam adspexit superiori anno. Annus itaque ab eo tempore elapsus est sine linea. Confidimus tamen fore, ut  
Deo

Deo favente annus, quem amisisse videmur, quasi postliminio nobis restituatur. Erunt forsan aliqui, qui existimaturi sunt, a conscribendis Horis Subsecivis nos in posterum tuto abstinere posse, cessante ratione, ob quam earum edendarum consilium ingressi sumus. In his ipsis Horis Subsecivis utilitatem Philosophiæ nostræ tam in Facultatibus, quas vocant, superioribus, quam in omni vita speciminibus illustrare conati sumus. Illo tempore, quo ad Horas Subsecivas primum cogitationem nostram convertimus; publicare cœpimus operis nostri philosophici in posterum continuandi partem primam, Logicam. Novum moliebamur opus, Philosophiam universam methodo demonstrativa ad certitudinem evecturi: id quod inter ea referebatur, quæ fieri non possunt.

possunt. Edideramus antea compendium quoddam ejus idiomate Germanico, in quo primaria dogmata inter se connexa exhibueramus. Hæc magna animorum contentione oppugnabantur & impietatis postulabantur, quasi recta via ad Atheismum, Deismum, fatalismum & Epicuræismum ducerent, ac omnem religionem, virtutem morumque honestatem tollerent, immo statum civilem everterent. Quicquid ad criminationes male sanas reponebatur, nulla attentione dignum judicabatur ab adversariis. Hisce applaudebant, qui scripta nostra non legerant, nec legere dignabantur, suo potius, quam meo damno, cum satis superque convictus essem omnes malevolorum criminationes sua tandem sponte in auram abituras. Consultum itaque videbatur, ut & utilitatem methodi nostræ, & ipsius quoque Philosophiæ speciminibus illustraremus, quo attentionem eorum excitaremus, qui aliorum persuasionibus facilem haberent fidem, & ipso facto contrarium ostendentes omnem suspicionem inutilitatis & nescio cujus peri-

periculi ab ea removeremus. Enimvero mutata rerum facies est. Vicimus meliorum suffragiis, qui non modo utilitatem, sed inexpectatam quoque Philosophiæ nostræ fœcunditatem & evidentiam perspiciunt. Leguntur opera nostra philosophica tam Latina, quam Germanica a multis, viris etiam generis prolapia & dignitate eminentibus cum in Germania, tum extra eandem, & ab ipsis Regibus ac Principibus aliquod iisdem statuitur pretium. Atque adeo cessat horarum subsecivarum ratio. Enimvero hoc non obstante non tamen desunt, qui non minus earum continuandarum utilitatem agnoscunt, ut adeo supervacaneæ non cenleantur, modo iis continuandis otium suppetat: quod divinæ providentiæ nunc committimus, ut alias nos & res ceteras nostras omnes. Halæ d. 15. Aprilis A. O. R. 1741.



HORÆ

# HORÆ SUBSECIVÆ MARBURGENSES

Anni MDCC XXXI.

Trimestre æstivum.

I.

*De differentia notionum metaphysicarum & mathematicarum.*

§. I.

**E**Quidem notiones metaphysicas <sup>Institu-</sup> distincte satis explicavimus in <sup>tum Au-</sup> Metaphysicis, Ontologia præ- <sup>toris.</sup> fertim & Cosmologia transcendentali, ut adeo earum a mathematicis differentia Lectori attento & Mathematicum perito per se manifesta sit, præsertim ubi ex Psychologia facultates animæ ad cognoscendum ea, quæ sub cognitionem humanam cadunt, datas earundemque usum intimius perspexit: quoniam tamen video non deesse complures, qui, cum sibi aliis plus sapere videantur, nescio quo ab autoritate aliena emendicato acumine superbientes, notiones metaphysicas cum mathematicis in præjudicium veritatis & progressus sci-  
(Hor. Subf. 1731.) B b entia-

entiarum miserrime confundunt, seque non minus, quam alios in Labyrinthum conjiciunt, ad Scepticismum tandem recta via ducentem; non inconsultum duxi, ut tempori serviturus differentiam illarum notionum perspicue exponam, cum inter usus Philosophiæ nostræ, quem in his ipsis Horis Subsecivis promovere intendimus, hic etiam referendus sit, ut imaginationis abortus ex Philosophia exterminetur, nec in errores, qui evitari poterant atque debebant, incauti nos præcipites demus, immo ut imaginaria a realibus accurate distinguantur, nec illis amplior concedatur locus, quam sine veritatis detrimento imaginarium in locum veri surrogare licet.

## §. 2.

*Idem ult.  
vius ex-  
plicatur.*

Etsi objectum Matheseos & Metaphysicæ prorsus diversum sit, cum illa de quantitate, hoc de Ente in genere agat, quatenus nimirum Metaphysica in sensu strictiore pro Ontologia sumitur, cui agnata est Cosmologia generalis, quam & transcendentalem voco; sunt tamen nonnulla, quæ & Ma-



Mathematicus & Metaphysicus considerat, veluti extensio, spatium, locus, tempus, vis motrix, motus, infinitum. Per se patet, Mathematicum agere non posse de iis, quorum nulla ipsi notio est, quocunque tandem modo circa ea versetur. Quamobrem extensionis, corporis, spatii, loci, temporis, vis motricis, motus, infiniti aliquam habere debet notionem. Cum Metaphysicus in Philosophia prima notionem entis in genere evoluit, eorundem quoque notiones explicare tenetur. Quæritur itaque, num Metaphysico eas, quæ in Mathesi usui sunt, in Philosophiam primam & Cosmologiam generalem inferre liceat, ibidem non minus usui futuras, an vero sibi cavere debeat, ne iisdem aditum patefaciat, sed majore acumine reale ab imaginario separare teneatur. De hoc adeo in præfenti potissimum dispiciemus.

§. 3.

Notionum diversitas a diversitate *Fons diversitatis notionum.* facultatum animæ ortum trahit. Sunt homini sensus, quibus quoad animam accedit facultas appercipiendi modificationes suas, seu actus eidem succes-

sive inexistentes, atque imaginatio, quæ quoad absensia sentibilia in locum sensuum succedit. Est etiam intellectus, quo non modo distinctas notiones eorum, quæ sensu percipiuntur, verum etiam ratiocinando eas consequimur, quæ cognitioni nostræ sese alias subducerent, & inprimis ad universalium cognitionem penetramus, quæ sensui ac imaginationi negatur. Sensus perceptibilia confuse repræsentant, & quamvis sensationibus etiam insint, quæ tanquam diversa repræsentantur; nisi tamen intellectus operationes accedant, vix umbra quædam notionum distinctarum in perceptionibus iteratis comparet, & si in iis acquiescimus, quæ reflectendo super iis, quæ sensu percipiuntur, in iisdem distinguuntur & a rebus perceptis abstrahuntur, progressus admodum exigui sunt. Quoniam sensus plura a se invicem distincta multiplici ratione inter se confusa tanquam unum quid repræsentant, quemadmodum in Pŷchologia rationali distinctius me explicasse memini; sensu percepta alia apparent, quam quæ sunt. Inde

Inde est, quod *Lockio* notiones simplices visæ fuerint, quasi in alias simpliciores non resolvendæ, quæ in infinitas resolvendæ, antequam ad primitivas pervenias, magno sane scientiæ detrimento. Huic enim præjudicio debetur, quod notiones rerum abstractarum vi imaginationis fingantur ad modum sensibilibum & admittantur intelligibili modo in se non explicabilia, quales sunt qualitates occultæ Scholasticorum. Est vero etiam homini intellectus, vi cujus distinguuntur, quæ sensus una exhibet atque in unum confundit. Et ejus beneficio pervenitur ad notiones rerum distinctas; etiam ab omni sensu remotas, nec admittuntur nisi talia, quæ in se intelligibili modo explicabilia sunt. Notiones adeo confusæ dum in simpliciores resolutæ ad distinctas reducuntur, res, quæ sub cognitionem nostram cadunt, longe aliæ deprehenduntur, quam apparent, nec abortus imaginationis in numerum entium recipiuntur. Quod si ergo sensui & imaginationi nimium tribuas, ad hasce facultates referens, quæ iisdem minime

subiungunt, nec intellectus sua munia rite obeat; nihil in metaphysicis profeceris. Exemplo nobis sunt non modo Scholastici, verum etiam *Cartesius*, quorum illi Philosophiani præsertim primam Cimmeriis tenebris involverunt, hic eam prorsus neglexit in notionibus confusis iisque vagis vulgi acquiescens, quasi termini abstracti, qui in Ontologia definiri debebant, in se indefinibiles sint, & quoad principia physica imaginaria cum realibus confundit, nec in Psychologia notiones facultatum animæ dedit fecundas. Quod adeo notiones habeamus confusas, sensibus debetur ac imaginationi, dum circa sensu percepta intellectus non rite fungitur officio suo. Si vero notiones fieri debent distinctæ & ab imaginibus separanda, quæ non nisi vi intellectus concipiuntur, ne imaginaria cum realibus confundantur; intellectus munia sua rite obire debet: quod quomodo fiat, in Logica veri nominis docetur.

## §. 4.

Notiones, quas Geometræ sumunt, confusæ sunt, eaque de causa terminos, qui-

*Quales  
notiones  
sumunt  
Geometra.*

quibus indigitantur, non definiunt, aut ubi eos explicare volunt, ad sensu percepta recurrunt & notiones imaginarias formant, quæ speciem distinctarum mentiuntur. Ex iis igitur non intelligitur, quales res revera sint; sed tantummodo quales appareant, quamdiu sensuum iudicio statur. Geometræ tantum inquirunt, quantæ res sint, non vero quales res sint. Ad rerum quantitatem seu magnitudinem determinandam sufficiunt notiones imaginariæ; sed ex iis nihil colligitur, quod prodest ad qualitates illarum cognoscendas. Quamobrem ubi notiones Geometrarum in Metaphysicam inferes, non modo ibidem deprehenduntur infructuosæ, sed quatenus id, quod apparet, sumitur pro eo, quod est, in errores abusus illarum te seducit & subinde in Labyrinthum incidis, ex quo nullus patet egressus. Quod si adeo quis ætatem in Geometria & calculis consumsit, ac notiones imaginarias sibi non modo reddidit familiares, sed iisdem etiam non sine successu usus fuit in Mathesi, de differentia inter notiones imaginarias & reales minime

cogitat, adeoque facile sibi persuadet, res tales esse, quales apparent, nisi manifesta quædam absurditas statim se prodât. Atque adeo facile contingit, ut sphæram suam egredi ausus in Metaphysicis hallucinetur, & quæ tanquam evidentiâ citra omnem hæsitacionem admittit, ea Metaphysicus, cui alio acumine abstracta discernere datum est, tanquam a veritate aliena rejiciat.

## §. 5.

*Illustratur  
I. notione  
extensio-  
nis,*

Ne quæ in genere dicta sunt obscuriora videantur, quam quæ satis intelligantur, nec quis objiciat, quasi Mathematicis sine ratione tribuatur defectus acuminis, quo ceteros eruditos superare ab omni ævo existimantur; per exempla eundum est, quæ palam faciunt, notiones a Geometris suppositas non esse nisi imaginarias, quarum non modo nullus est in Philosophia usus ad principia rerum naturalium rite determinanda, sed quæ etiam ad errores facile seducunt. Geometræ versantur circa figuras, quas non esse nisi limites extensi, alibi docuimus (a), &

a ne-

---

(a) *S. 621. Ontol.*



a nemine in dubium revocatur. Hinc & Geometriam definivimus (b) per scientiam extensorum, quatenus terminata sunt. Et si autem ad figuram etiam referre velis spatium, quod intra limites istos coarctatur, quemadmodum fert usus loquendi apud Geometras receptus, ut ideo figuram definiverimus in Geometria (c) per continuum perimetro terminatum, supposita nempe perimetri, quæ proxime præcedit, definitione; continuïtas tamen ista non spectatur nisi in extenso. Notio itaque figuræ notionem extensi præsupponit, in quam quippe resolvitur. Neque definitio, quam dedimus in Ontologia, adversatur alteri, quam dedimus in Geometria, sed hæc potius ex illa deducitur. Etenim in Ontologia definitionem figuræ dedimus realem, quæ docet, quomodo oriantur in extenso figuræ, & per quam intelliguntur possibiles. Ast in Geometria definitionem dedimus nominalem, quæ usui loquendi Geometrarum respondet. Limites inhærent extenso,

Bb 5

nec

(b) *Elem. Geom. §. 1.*

(c) *§. 32, Elem.*

nec sine eo concipi possunt. Unde in  
 ferre licet, extensum, cui inhæret, ad fi-  
 guram quoque referri posse, si ita visum  
 fuerit, quatenus per eam determina-  
 tur magnitudo extensi terminati. Sed  
 quicquid sit, sufficit figuram concipi  
 non posse, nisi supposita definitione ex-  
 tensi. Nemo Geometrarum extensum  
 aut, si mavis extensionem definit, ne-  
 que etiam demonstrationes geometri-  
 cæ hanc definitionem exigunt, quippe  
 quarum rigor subsistit absque hoc  
 principio. Notione igitur confusa con-  
 tenti sunt: unde & *Cartesius* in Princi-  
 piis Philosophiæ essentiam corporis in  
 extensione consistere affirmans, quid  
 sit extensio, minime explicat. Et  
*Claubergerius*, qui optimus ejus interpres  
 celebratur, extensum definit per id  
 quod habet partem extra partem,  
 quemadmodum etiam fecerat *Jungius*,  
 qui dixerat extensum id, per quod  
 substantia corporea habet partem ex-  
 tra partem. Si enim in abstrahenda  
 notione extensionis solo visus iudicio  
 statur, in extenso non discernere li-  
 cet nisi partes extra partes, nulla in-  
 trinseca differentia gaudentes, quippe  
 quæ

quæ in visum minime incurrit. Extensionem vero non nisi confuse percipi & perinde ac colorem aliasque qualitates sensibiles in numerum phænomenorum referendam esse demonstravimus (d) & quomodo confusa hæc idea in anima nascatur, abunde docuimus (e). Quodsi non minus ea, quæ de extensione tradidimus in Ontologia, quam quæ de ea demonstravimus in Cosmologia & notione ejusdem in Psychologia attenta mente lecta intellexeris; abunde patebit, notionem ipsius confusam, in qua Mathematico acquiescere licet, non sufficere Philosopho. Immo nisi fueris hospes in omni historia literaria, simul animadvertes, unde enati sint tot errores, unde tot dubitationes circa prima rerum principia. Sane quæ in Principiis Philosophiæ *Cartesii* quoad notionem corporis & motus communicationem desiderantur, notioni confusæ extensionis accepta ferenda sunt. Ex hoc fonte etiam manavit systema causarum occasionalium a corporibus deinde ad ani-

---

(d) §. 224. & seqq. *Cosmol.*

(e) §. 103. *Psych. rar.*

animam translatum. Fluxit etiam hinc error de identitate corporis & spatii, quem *Cartesius* instar veritatis manifestæ complexus est. Profluxerunt errores alii, veluti de materia uniformi, cujus divisione & compositione enata finguntur corpora, de atomis materialibus, de extensione realitate corpori inexisterente: Immo eadem extensi notio eos seduxit, qui extensionem in numerum attributorum divinorum retulerunt, & Materialismum invexit, nec non Philosophos in Labyrinthum de divisione ac compositione continui conjecit. Singula hæc demonstrare non foret difficile: tanto autem minus necessarium videtur in has ambages descendere, quia hoc per se animadvertet, qui errores istos in crustare aut in eorum fontem inquirere voluerit.

## §. 6.

2. *notione  
corporis.*

Geometra corpus sibi repræsentant tanquam extensum simile, cujus scilicet partes non differunt nisi loco, consequenter omni differentia intrinseca destituuntur, idemque tribus dimensionibus præditum, longitudine, latitudine & profunditate. Unde Corpus

pus definimus (*f*) per extensum in longitudinem, latitudinem atque profunditatem, supposita scilicet notione extensi confusa (§. 5.), quæ partium similitudinem involvit. Et quoniam extensio in abstracto non concipitur sine continuitate, partes quoque corporis non intelliguntur nisi possibiles, ita ut ipsum corpus concipiatur in partes tantummodo divisibile, nullas vero habeat partes actu a se invicem distinctas. Quoniam experientia abunde docet, corpora, quæ in rerum natura existunt, habere partes actuales, quæ a se invicem distinguuntur, prouti in primis in corporibus organicis, veluti hominum ac brutorum, conspicitur; nemo non statim advertit, corpus mathematicum a physico differre. Unde ad evitandam æquivocationem illud solidum appellari solet. Hanc vero notionem non esse nisi imaginariam, ex ipsa hujus definitione patet. Cum enim notione imaginaria ob quandam similitudinem fingatur, quod non est, ut per imaginem quandam veluti oculis præsens sistere valeamus, quod in eos non incur-

incurrit (g); qui neglecta omni partium intrinseca differentia, ex quibus constat, nec ad harum principia essendi animum attendit, & fingit extensum quoddam prorsus simile, quale non existit, secundum omnes suas dimensiones terminatum, is omnino corporis nonnisi imaginariam notionem habet. Hæc corporis notio satisfacit Geometræ, cui nonnisi magnitudo ejus curæ est de qualitatibus ejusdem parum sollicito. Perperam autem transfertur in Philosophiam, quando atomi materiales finguntur ad similitudinem corporis mathematici, ab hoc non differentes nisi mole, ut adeo corpora physica tandem in corpuscula mathematica, entia imaginaria (h), tanquam partes ultimas resolvantur, etsi rationem nullam dare possint, cur, quod imaginarium inviti agnoscere tenentur in magno, in reale degenerare debeat in parvo, quamvis ceteroquin ipsi met ab eo, quod in magno observant, continuo argumententur ad parvum, quasi

---

(g) *J. no. Ontol.*

(h) *J. 141. Ontol.*



quasi extra omnem controversiam positum sit parva concipi debere ad similitudinem magnorum, nec alia inter minima, quæ finguntur, intercedat differentia, quam quæ a mole seu magnitudine est. Non jam inquirere licet in errores, quas abusus notionis corporis imaginariæ in Philosophiam præsertim Metaphysicam & Physicam in-vexit. Sufficit monuisse, quod levi attentione animadvertatur, cur qui Mathesi, Geometriæ præsertim ac calculis se dederunt, hypothesei atomisticæ & Philosophiæ corpusculari facilem præbeant assensum, etsi in demonstrando ac inveniando rectius utantur aliis intellectus operationibus & singulare prorsus acumen prodant. Exemplo nobis est *Isaacus Newtonus* Geometra summus, qui tot præclaris inventis Mathesin ditavit & cognitioni Naturæ mathematicæ tantam lucem affudit, ut magno suo merito ubivis terrarum maximis extollatur laudibus, ubi scientiis mathematicis honos habetur. Quoniam is a Mathesi se contulit ad chronologiam veterum regnorum enodandam, adeoque tem-  
pus,

pus, quod antea impenderat speculationibus analyticis & geometricis, lectione veterum autorum & calculis chronologicis trivit, Metaphysicam, præsertim Philosophiam primam, dubio procul fastidiens ob tenebras, quæ luci in Mathesi adfuetum offendebant; in Physica sine ulla hæsitazione subscripsit hypothesi atomisticæ, lucem in tenebris sibi invenisse visus, quasi eadem luce imaginaria pariter ac realia discernerentur, ut fons omnis lucis menti expectandæ in sensu ac imaginatione sit quærendus. Etenim qui in Metaphysica non sine luce intellectus versatus imaginaria a realibus discernere consuevit; eidem non minus atomi materiales nonnisi figura ac mole a se invicem differentes obscuræ videntur, quam termini ac distinctiones Scholasticorum.

## §. 7.

3. *notione  
spatii.*

Si spatium nobis repræsentamus tanquam extensum uniforme, aut, si mavis, simile, continuum, quod est indivisibile ac immobile & a rebus existentibus penetrabile; notionem ejus esse

esse imaginariam dudum evicimus (b). Hanc sumere Geometras nemo est qui nesciat, nisi in Matthesi non satis versatus. Sane *Newtonus* (i) spatium, ait, absolutum, natura sua sine relatione ad externum quodvis, semper manet simile ac immobile. *Cartesius* agnovit eam imaginariam esse, sed corporis & extensionis notione imaginaria delusus ipsum cum corpore idem esse statuit. Quantum vero differat notio realis ab imaginaria, si vi intellectus in distinctam ejus notionem inquiremus, abunde patet ex iis, quæ de notione spatii reali (k) & modo, quo idea spatii imaginaria in anima nascitur (l), demonstravimus non acquiescentes in iis, quæ sensu confuse percipiuntur, sed vi primorum rationis principiorum confuse percepta in notiones distinctas seu intelligibilia resolventes, quemadmodum fieri debet, ubi imaginaria cum realibus confundere nolueris. Quod si spatii notio-

(Hor. Subf. 1731.)

Cc

nem

(b) §. 599. Ontol.

(i) in Princip. Schol. 2. def. 8. lib. 1.

(k) §. 590. Ontol.

(l) §. 104, 106. Psych. rat.

nem imaginariam pro reali habeas, confusa evidentia cum claritate notionum lucem mentis a sensu derivans; ipsum quoque spatium ens reale esse fingis, quemadmodum fecit *Henricus Morus* in *Enchiridio Metaphysico*. Admisso uno absurdo sequuntur plura. Si enim spatium est ens reale sublati omnibus corporibus adhuc subsistens, aut admittendum est ens aliquod Deo coæternum, sine quo mundum creare non potuisset, consequenter a quo ipse dependet in creando, aut spatium considerari debet tanquam ad ipsum Deum pertinens. Illud invisum est merito Theologis utpote independentiæ Dei omnimodæ adversum: hoc visum est *Moro* & ejus affeclis *Josepho Raphsonio*, *Newtono*, *Samueli Clarkio* & aliis. *Morus* enim contendit spatium esse ipsum Deum, propterea quod eidem convenient attributa divina: id quod *Raphson* in *Conamine de spatio, ente reali & infinito more geometrico* demonstrare infelicitè ausus est. *Clarkius* spatium fecit attributum divinum, nempe immensitatem ejus: quod quomodo cum sim-

ſimplicitate Dei conſiſtat, nemo ſanus capiet. Sed optaſſem, ut notionem diſtinctam immenſitatis dediſſet eamque ab imaginibus, quemadmodum in Metaphyſicis fieri convenit, ſeparatam. Vidiſſet enim, quam parum inter ſe convenient immenſitas Deo tribuenda & ſpatium imaginarium. Sed non opus eſt, ut de hoc hic loci dicam, quod ex parte prima Theologiæ naturalis (m) addiſci poteſt. Profecto intellectus divinus immenſus eſt, ratio divina, potentia, ſapientia immenſa eſt. Quomodo vero ex notionem ſpatii imaginaria demonſtrabis, intellectum divinum eſſe immenſum, rationem divinam, potentiam, ſapientiam immenſam eſſe. Aut ſi quis ſumit, quod omnino demonſtrabile & a nobis in Theologia naturali demonſtratum, intellectum divinum eſſe immenſum, potentiam, rationem, ſapientiam divinam immenſam eſſe; quomodo quælo hinc deducet notionem ſpatii imaginariam? *Newtonus*, cui notionem imaginariæ erant familiares,

Cc 2

qui

(m) *S.* 176, 285, 360, 693,

qui vero ad earum a realibus differentiam nunquam animum attendit (§. 6.), spatium pro organo sensorio Dei habuit. Equidem videri noluit sententiam *Mori* amplecti, quod Deus sit spatium, disertis enim verbis hoc negat (*n*); affirmat tamen, eum, quod ubique adsit, spatium constituere, ac ideo omnia in eo esse atque moveri. Cumque Deum omnipræsentem dicat per substantiam, totumque dicat oculum, totum aurem, totum vim sentiendi (*o*); videtur sibi imaginatus esse Deum, quæ sunt in spatio percipere, quatenus ipse spatium, quod omnia continet, constituit omnipræsentia sua, videns nos percipere ea, quæ nobiscum in eodem spatio coëxistunt, adeoque nobis præsentia sunt, seu quibus nos præsentem sumus. Enim vero si distinctam organi sensorii notionem habuisset, qualem dedimus in Psychologia empirica (*p*), non ignorasset, per organon sensorium intelligibili

---

(*n*) in *Princip. Schol. gen. lib. 3. p. 528. edit. Londin. A. 1726.*

(*o*) *ibid. p. 529.*

(*p*) *§. 66.*



gibili modo explicabiles esse perceptiones rerum sensibilibum, consequenter cum ex notione illa imaginaria spatii reddi nequeat ratio, cur Deus ea, quæ sunt vel fiunt in hoc universo, percipiat, facile animadvertisset spatium organum sensorium Dei inapte appellari, etiamsi concedatur, quod tamen nullo modo concedi potest, ipsum ad essentiam divinam pertinere, aut attributum quoddam ejus esse. Etenim ipse fatetur sermonem omnem de Deo a rebus humanis per similitudinem quandam desumi, non perfectam quidem, sed aliqualem tamen. Quænam vero est illa similitudo, quæ inter spatium imaginarium & organon sensorium intercedit? Similitudo rerum nulla concipi potest sine identitate quadam eorum, quæ ipsis insunt (*q*), qualiscunque tandem ea sit, etiam ubi Deo tribuuntur organa humana (*r*). Quænam igitur sunt, quæ notio imaginaria spatii cum notione organi sensorii communia habet, ut per metaphoram spatium

Cc 3

orga-

---

(*q*) *S.* 195. *Ontol.*

(*r*) *S.* 103. *part. I. Theol. nat.*

organum sensorium Dei dici possit? Nec est quod excipias, quod *Newtonus* ipse asserat, ut cæcus non habet ideam colorum, sic nos ideam non habere modorum, quibus Deus sapientissimus sentit omnia, eumque more minime corporeo, more nobis prorsus incognito sentire. Neque enim jam quæritur, quomodo Deus sentiat, quæ spatium continet, sed quænam sit similitudo illa aliqualis, ob quam spatium, si consideratur tanquam ad Deum quomodocunque pertinens, dici potest organum sensorium Dei, qualem adesse debere ipse *Newtonus* statuit. Sane qui asserit, spatium esse organum sensorium Dei, is & huic vocabulo tribuere debet significatum proprium (s), quem Deo non repugnare demonstrare tenetur, antequam definitione utatur tanquam principio demonstrandi, & præterea ex notione spatii imaginaria, de qua hic sermo est, demonstrare tenetur, spatium esse organum sensorium Dei. Secus qui facit, more vulgi de Deo differit, pro uti in buccam venit, minime autem de

---

(s) §. 149. *Disc. prelim.* & §. 148. *Log.*

de eodem philosophatur. Quod si *Newtonus* in Philosophia excolenda eandem operam collocasset, quam ad Mathesin augendam contulit; exemplo animadvertisset dari sine mente sonos, si affirmetur, spatium esse organum sensorium Dei: immo non minorem repugnantiam observasset inter simplicitatem & immaterialitatem Dei atque spatium, quam quæ deprehenditur, ubi quadrata dicuntur rotunda. Non magis intelliguntur verba, quod Deus existendo ubique constituat spatium, & quod sit totus oculus, totus auris, totus vis sentiendi. Eadem hic repetenda sunt, quæ de organo sensorio modo diximus. Quænam enim notio respondet modis huius loquendi, omnipræsentia sua constituere spatium, consequenter organum sensorium suum, esse totum oculum, totum aurem, totum vim sentiendi? Si dicas cum *Newtono*, Deum per allegoriam dici videre, audire, sentire; facilis est responsio ex primis Rhetoricæ principijs, allegoriæ non esse locum, nisi quid in re quadam ante fuerit cognitum, quod

allegorica ista dictione indigitatur. Quamobrem si per allegoriam dicis, Deum videre, audire, sentire; necesse est, ut quid de Deo ante cognoveris, quod vocabulis hisce indigitare velis, & quid Deo insit, perspectum tibi esse debet, ob quem totus oculus, totus auris, totus vis sentiendi per allegoriam dici queat. Quodsi vero demonstraveris, quænam Deo insint, per allegoriam istis modis loquendi indigitanda; quid tibi tandem cum istis allegoriis est in Philosophia, Oratoribus relinquendis? Quodsi regeras, *Newtonum*, quemadmodum in fine scholii illius generalis, quod ante citavimus, fatetur, differere ex phænomenis, in hoc scilicet mundo materiali observandis; nihil prorsus lucraris. Qui enim ex phænomenis de Deo differit, ex iis, quæ observat in mundo materiali, ratiocinando colligere debet, quænam Deo convenient attributa. Quænam igitur sunt illa phænomena, ex quibus ratiocinando colligitur Deum existendo ubique seu omnipræsentia sua constituere spatium, spatium hoc esse organum sensorium

rium Dei, Deum totum esse oculum, esse aurem, esse vim sentiendi? Ingenue fateor me in omni Metaphysica Scholasticorum nihil reperisse adeo obscurum, quod nullo modo intelligi possit. In Philosophia prima seu Ontologia non uno exemplo docui, quod verbis obscurissimis Scholasticorum respondeant notiones confusæ, quibus reducendo eas ad distinctas lux affundi potest, ut illa intelligantur. Enimvero si, quæ *Newtonus* ex phænomenis de Deo se differere profitetur, cum notionibus distinctis eorum, quæ Deo tribuenda sunt, confero, tenebræ non dispelluntur, sed spissiores evadunt. Nec te juvat, si regeras, virum summum fateri, nos humano more de Deo loqui. Etenim si humano more de Deo loqui velis ingratiam debiliorum, quibus non concessus est nisi usus facultatum inferiorum, quemadmodum facit ipsa Scriptura sacra; certus esse debes, te citra præjudiciū veritatis humano more sic de Deo loqui posse. Philosophus hoc sumere nequit, nisi ipsi quidlibet fingendi potestas concedenda;

da ; sed utique demonstrandum est hoc licere. Quamobrem necesse est, ut ante cognoscas, quid revera Deo tribui possit vi notionis, quam tanquam primam sumis & cuius evicisti realitatem, quam dispicias, quænam sint vocabula, quibus de hominibus utimur & quibus respondent notionnes aliquid cum notionibus attributorum divinorum commune habentes. Non modo hoc extra omnem controversiam positum est iis, quibus principia Logicæ methodo Geometrarum veterum conformis & Metaphoræ ac Allegoriæ notionnes ex Rhethorica perspecta sunt, verum etiam id vult Canon veterum: Quæ de Deo dicuntur humano more, ea interpretanda sunt Deo conveniente modo. Atque hæc fieri posse, ipsimet experti sumus, & fidem oculatam dedimus in Theologia naturali, ubi, quæ in Scriptura de Deo humano more dicuntur, quomodo conveniente eidem modo explicanda sint, ostendimus. Demonstravimus nimirum, quæ Deo insint, quæ vero eidem repugnant, quænam per eminentiam tribuenda. Et de his, quæ



quæ per eminentiam ipsi tribuenda sunt, docuimus, quomodo per metaphoram & allegoriam ferant morem loquendi humanum, ut facem quandam præferremus Scripturæ sacræ interpretibus ad distincte explicandum loca, in quibus ea de Deo humano more loquitur. Illa qui perpendit, modo non præpostero studio hoc faciat similis ei, qui intelligere vult Almagestum *Protopomæi*, antequam novit Elementa *Euclidis*, quantum intersit inter notiones reales & imaginarias discrimen, abunde intelliget. Quando nimirum de Deo humano more loquimur, notiones reales reducimus ad imaginarias, sed ea cautione, ne veritatis aliqua fiat jactura: id quod in Scriptura sacra exactissime observatum deprehendimus, secus ac visum est *Spinosæ* in Tractatu Theologico-politico, qui ad reductionem notionum realium ad imaginarias salva veritate animum non attendit.

§. 8.

Notio loci refertur ad notionem spatii, nec illa sine hac formari potest. Quamobrem quibus notio spatii non-  
4. notio  
loci.  
nisi

nisi imaginaria est, iis nec alia loci notio, quam imaginaria esse potest. Itaque cum Mathematicis non sit notio spatii nisi imaginaria (§. 7.) nec iisdem alia, quam imaginaria loci notio est. Et quemadmodum ipsis imaginaria spatii notio satisfacit, quamdiu in sphaera sua versantur; ita quoque non alia, quam imaginaria loci notione opus habent, quamdiu sphaeram suam non egrediuntur. Enimvero Metaphysicus realem spatii notionem habere debet, ne ex Philosophia prima in naturalem tacite irrepant errores & in hac nascantur difficultates inextricabiles, tanquam nodi Gordii non solvendi, sed secandi. Quare nec in notione loci imaginaria acquiescere potest, sed eam reducendo ad realem vi intellectus concipere tenetur, quid sit locus, ne auribus velit videre, oculis audire, & in Psychologia rationali demonstrare debet, quomodo facultates inferiores confundendo ea, quæ rebus insunt & acumine intellectus discernuntur, forment imaginem notioni imaginariæ respondentem. Notione imaginaria spatium sistitur tanquam

ex-

extensum uniforme seu simile ac immobile, & hinc locus tanquam pars illius, quam corpus occupat, quatenus corpus isti parti coëxtensum imaginamur. Hinc *Newtonus* (1) locum dicit partem spatii, quam corpus occupat. Quid sit occupare spatium, per notionem confusam intelligitur, quam sensu percepta offerunt, & imaginatio sub specie imaginis cujusdam exhibet. Immo Mathematici haud raro notionem imaginariam loci in fictam convertunt, quando utiliter imaginaria entia in ficta convertere licet. Quando igitur corpus quantæcunque sit magnitudinis, propterea quod magnitudinis nulla habetur ratio in casu dato, instar puncti mathematici considerare licet; locum quoque fingunt punctum fixum in spatio imaginario. Obtinet hoc in Astronomia, ubi locus stellæ fingitur punctum in sphaera immobili mundana, quæ sumitur pro parte spatii imaginarii in infinitum undiquaque excurrentis. Quemadmodum imaginaria, ita etiam ficta utiliter adhibentur, modo acute discer-

nas

(1) in *Princip. Schol. 3. def. 7. lib. 7.*

nas, quando imaginariis locus sit & quando fictiones admittendæ tam in inveniando, quam in demonstrando. Minime reprehendimus Mathematicos, quod imaginariis utantur notionibus & quod fictionibus indulgeant: recte enim faciunt, quod in imaginariis acquiescant, quod fictionibus utantur, ubi salva veritate, quæ cognoscenda, utrumque fieri potest. Immo in ipsa Philosophia idem non improbamus, si suo fiat loco, & ipsimet hoc fecimus faciemusque in posterum. Sed nolumus imaginaria substitui realibus & ficta haberi pro veris, ubi de realibus & veris quæstio est. In Metaphysica quæritur, quid sit locus, si notio confusa, quæ sensibus debetur, revocetur ad distinctam, ut vi notionum rerum in hoc universo existentium concipi possit, adeoque non satisfacit notio imaginaria, quæ in sensu perceptis terminatur. Quemadmodum itaque in Physica notiones distinctæ colorum vel aliarum qualitatum sensibilibum diversæ prorsus sunt a confusis, quæ ad sensus referuntur, nec imaginibus quid simile rebus corpore-

poreis inexistit, quemadmodum optime docuit *Carresius* omnium saniorum assensum dudum meritus; ita quoque toti falluntur, qui sibi persuadent, imagini loci, quæ a sensu ortum trahit, simile quid extra nos in hoc universo existere. Quænam vero insint rebus ipsis, quarum confusa perceptione oritur ista loci imago, in *Metaphysicis* docuimus, nec hic loci ut actum agamus ulla ratio suadet.

§. 9.

Mathematici tempus considerant <sup>s. notionē</sup> tanquam ens compositum ex partibus <sup>temporis</sup> successivis, quod continuo æquabiliter fluit. Hinc *Newtonus* (u): Tempus, ait, absolutum, verum & mathematicum, in se & natura sua sine relatione ad externum quodvis æquabiliter fluit, alioque nomine dicitur duratio. Num duratio cum tempore recte dicatur eadem, jam non disputo. Quod si tamen res ad vivum relectetur, a tempore utique distinguenda venit (x). Quoniam Geometræ lineam generari con-

(u) in *Princip. Schol.* 1. def. 7. lib. 1.

(x) §. 572. 578. *Ontol.*

concipiunt fluxu continuo puncti; tempus in Mathesi repræsentari solet per lineam rectam motu æquabili descriptam. Hanc temporis notionem esse imaginariam, & eidem convenienter tempus per lineam rectam fluxu puncti continuo genitam repræsentari, ostendimus in Ontologia (y). Evicimus quoque notionem communem temporis, seu ea, quæ vulgo est, eandem imaginariam esse, qua utuntur Mathematici (z). Etsi enim vulgus æstimet tempus per horas, dies, menses, annum; non tamen recte hinc colligit *Newtonus*, quod vice veri temporis utatur mensura durationis per motum. Dies, menses, annos considerat tanquam partes temporis & motus solis, quæ inest, inæqualitatem ignorans, quem tanquam mensuram temporis respicit, tacite supponit tempus tanquam mensuratum a mensura diversum æquabiliter fluere. Acquiescit nimirum in notione confusa, quæ si ad distinctam revocetur, fluxum æquabilem omnino involvit. Nullum ad-

eo

(y) §. 581. 582. *Ontol.*(z) §. 586. *Ontol.*



eo dubium est, quin temporis notio imaginaria eadem sit & vulgo, & Mathematicis, etsi ob ignorantiam motus solis irrepat error de dierumatque horarum æqualitate. Non vero quaestio est, num partes quædam temporis recte habeantur pro æqualibus, sed quamnam temporis notionem hæc divisio supponat. Sine acumine metaphyfico facile confunduntur, quæ in Metaphysicis a se invicem separanda: confusio autem distinguendorum fallacia gignit judicia. Mathematico satisfacit notio imaginaria temporis, cum ipsi nullum sit negotium nisi cum ejus quantitate, prouti vel mensuranda, vel per eam ratio aliarum quantitatum determinanda. Sed ea non æque satisfacit Metaphyfico, qui inquirere debet, quid sit tempus & quomodo confusa, quæ nobis est, notio animo ingeneretur: quorum prius in Ontologia, posterius in Psychologia rationali docuimus, ut adeo ibidem dicta hic denuo repetenda non sint. Quod si notionem imaginariam temporis in Philosophiam inferas, abortus gignuntur imaginationis & in errores facilis

(*Hor. Subf. 1731.*)      Dd      est

est lapsus. Exemplo nobis denuo est *Newtonus*, Mathematicus summus, qui Deum semper existendo durationem, hoc est, juxta ea, quæ modo diximus, tempus constituere asserit, quemadmodum ubique existendo spatium juxta ipsum constituit (a), immo unumquodque durationis indivisibile momentum ubique esse affirmat, quasi tempus per omne spatium diffundatur. Tempus adeo perinde ac spatium ad Deum refert, tanquam ejus attributum. Enimvero quæ paulo ante (§. 8.) de spatio, quod existendo ubique seu omnipræsencia divina constituatur, monuimus, ea quoque de tempore intelligenda sunt, quod existendo semper constituatur a Deo. Nullam sane habemus notionem modi, quo existendo semper constituatur tempus, adeoque verba hæc merito dicuntur sine mente sonus. Immo si ad distinctas notiones revocare coneris, quæ hic dicuntur, circulum vitiosum in iis latere deprehendet Logicæ peritus (b). Existere enim semper  
idem

---

(a) *Schol. gen. lib. 3. p. m. 528.*

(b) *S. 169, 170. Log.*

idem sonat ac existere omni tempore. Atque adeo si semper existendo constituitur tempus, dicendum est existendo omni tempore constitui tempus. Idem circulus latet in verbis, quod spatium constituatur ubique existendo. Nam existere ubique idem sonat ac existere in omnibus locis, seu omnibus spatii partibus. Quamobrem si existendo ubique constituitur spatium, dicendum erit, spatium constitui existendo in singulis spatii partibus. Ex notione reali temporis sequitur (c), tempus non dari nisi existentibus successivis in continua serie, & hinc in Theologia naturali demonstratur (d) quod Deus non sit in tempore, nec æternitas Dei sit tempus infinitum (e) : quæ sunt theses Theologis ac sanioribus quoque Philosophis dudum probatæ. Et hoc pacto Deus a rebus creatis prorsus distinguitur, qui admissa spatii ac temporis notione imaginaria tanquam reali & spatio ac tempore inter attribu-

D d 2

ta

(c) §. 574. *Ontol.*

(d) §. 1014. *part. 1.*

(e) §. 1016. *part. 1.*

ta relato cum rebus creatis confunditur, quemadmodum jam monuit Anonymus quidam Gallus in exiguo Tractatu contra hypothefin *Newtonianam* de vacuo edito. Sed de hisce disertius differere nolo, ne videar aliis imputare consequentias molestas, de quibus nunquam cogitarunt: id quod a more meo semper fuit eritque alienum.

## §. 10.

6. *notione*  
*motus.*

Motus continua loci mutatio est. Quamobrem si notionem loci atque spatii imaginariam supponis, resolvitur quoque notio motus in notiones imaginarias spatii atque loci. Cumque omnis motus fiat in tempore, ubi notio temporis imaginaria supponitur, ea quoque resolvitur in notionem temporis imaginariam. Patet itaque, si notiones spatii, loci ac temporis nonnisi imaginarias supponis; ipsam quoque motus notionem non aliam, quam imaginariam esse posse. Mathematici in notionibus spatii, loci ac temporis imaginariis acquiescunt (§. 7. 8. 9). Iisdem igitur notio motus non alia est, quam imaginaria.

ginaria. Hinc *Neutonus* (*f*) motum absolutum, quem ipsius phrasi etiam dicere poteras, verum & mathematicum, definit per translationem corporis de loco absoluto in locum absolutum. Locus absolutus est pars spatii immobilis, hoc est, imaginarii (§.5). Ergo tum corpus transfertur ex uno loco absoluto in locum absolutum alterum, ex una parte spatii immobilis seu imaginarii ipsum transferri imaginamur in partem ejusdem spatii aliam: quod fieri non posse, nisi per omnia loca intermedia, hoc est, omnes partes spatii intermediastranseat, ut successive in iisdem existat, phænomena docent, nec aliter imaginari licet. Est adeo continua loci mutatio, dum corpus de uno loco in alterum movetur, seu a termino uno ad alterum transfertur: id quod primum est, quod de motu observatur, ubi ad phænomena animum attendimus. Quoniam Mathematici in notionibus spatii, loci & temporis imaginariis acquiescere possunt, immo debent; ipsis quoque notio motus

Dd 3

ima-

(*f*) in Princip. schol. 4. def. 8.

imaginaria abunde sufficit. Neque enimaliter circa eum versantur, quam quatenus quantitates eorum, quæ in motu distingui phænomena jubent, determinandæ. Observamus, dum corpus movetur, inter terminum, in quo incipit motus, & alterum, in quo is desinit, aliquam intercedere distantiam, quam linea metimur. Atque hinc nascitur notio spatii, quod corpus mobile percurrit. Motus cum non sit nisi successivus, in tempore fieri intelligitur, quoniam continua successio sine tempore concipi nequit. Atque adeo temporis quoque, quo motus absolvitur a termino uno ad alterum, habenda ratio est. Quod si spatia, quæ mobilia eodem tempore percurrunt, inter se conferas, non eademprehenduntur semper: unde celeritatis nascitur notio, qua corpus aptum est ad datum spatium dato tempore percurrendum. Quoniam mobilia quantitate materiæ differunt, quæ pondere æstimatur, atque celeritate, qua materiæ ista quantitas per datum spatium dato tempore transfertur; ad hæc si animum attendimus, notio nasci-



scitur quantitatis motus. Et quia mobilia in motum concitata sine motore externo progredi videmus, ideo concludimus principium aliquod motus corpori inesse debere. Id quod vim motricem appellamus, quam ex actionibus corporum aut, si mavis, effectibus inde resultantibus pro celeritate ac materiæ quantitate diversam esse discimus. Unde vis motricis notionem formamus. In motu adeo Mathematici considerant spatium, quod mobile percurrit; tempus, quo idem percurrit, quantitatem materiæ, quæ cum mobili movetur; celeritatem, qua movetur, & vim motricem, quæ mobili, supposita hac materiæ quantitate & supposito hoc celeritatis gradu, inest, consequenter quæ sufficit ad tantam materiæ quantitatem dato tempore per datum spatium transferendæ. Mathematicus vero hæc omnia non spectat nisi quoad quantitatem, quatenus scilicet mensuræ sunt capaces. Quantitates adeo determinaturus, quæ phænomenis, hoc est, confuse præceptis insunt, non aliis opus habet notionibus quam

imaginariis, quæ sunt confuse perceptorum. Enimvero cum in anterioribus ostenderimus, notiones spatii, loci ac temporis imaginarias non satisfacere Philosopho, qui qualitates rerum perpendit; eandem motus notionem, quam phænomena offerunt, quod scilicet sit continua loci mutatio, in notiones reales spatii, loci ac temporis resolvere tenetur, ut intelligatur, quid revera sit motus, non qualis appareat. Constat veteres quosdam Philosophos negasse, quod datur motus. Quodsi motus intelligatur, qualis apparet, & negetur, phænomenon istiusmodi dari in mundo materiali; absurditas utique adeo manifesta est, ut refutatione non indigeat, sensu errorem statim refellente. Enimvero si negetur tale quid rebus ipsis non inesse, quale motus apparet, non magis hoc absurdum dici potest, quam si *Cartesiani* negant colores, quales apparent seu sensu percipiuntur, corporibus inhærere. Cumque a me impetrare minime possim, ut aliis imputem absurda, quamdiu eorum verba saniori quodam sensu explicari poss-



mus. Ergo dum *Achilles* unum per-  
 currit milliare, testudo miliaris par-  
 tem unam centesimam conficiet, ad-  
 eoque *Achilles* testudinem nondum  
 est affecutus. Et rursus dum *Achil-*  
*les* partem illam miliaris centesimam  
 conficit, testudo interim per millia-  
 ris partem decem millesimam reptat-  
 bit, adeoque nec adhuc testudinem  
 erit affecutus *Achilles*. Eodem mo-  
 do dum *Achilles* partem illam millia-  
 ris decem millesimam decurrit, te-  
 studo per miliaris partem millione-  
 simam promovebitur, adeoque nec  
 adhuc testudinem attingere potest.  
 Atque sic progredi licebit in infini-  
 tum, nec unquam potest testudinem  
 captare, sed semper erit aliqua inter *A-*  
*chillem* & testudinem distantia,. Viden-  
 tur enim *Zeno* hoc argumento tantum-  
 modo ostendere voluisse, si notiones  
 imaginariæ spatii, loci, motus habe-  
 antur pro realibus, exinde sequi, quæ  
 phænomenis repugnant, consequen-  
 ter hinc patere, quod reales non sint.  
 Et ita intellectum hoc argumentum  
 non solvitur per id, quod in Arith-  
 metica demonstratur, fractiones in  
 pro-

proportione geometrica continuo in infinitum decrecentes æquivalere simul numero cuidam finito, quemadmodum existimat *Keillius* (b). Si enim fractiones istæ spatii ac temporis partes designantes habeantur pro entitatibus veris in rerum natura ita existentibus, theorema Arithmeticæ infinitorum fallit, quod in infinita serie supponit terminum ultimum eumque nihilo æqualem, cum nulla entitas sit nihilum, nec, quod revera infinitum est, habeat finem. Omnes illi nodi Gordii, quorum plures in doctrina de motu occurrunt, ex eo sunt, quod imaginaria habeantur pro realibus: qua de re alio forsan loco rectius dicetur. Sufficit monuisse qua de causa in Labyrinthum deducantur Philosophi, phænomenorum motus rationem reddituri.

§. II.

Ex phænomenis colligitur, corporibus inesse vim quandam activam, si-  
7. notionem  
Sirium  
motrici-  
um.  
 ne qua actiones eorundem explicari nequeunt, nec hanc vim esse eandem  
 con-

(b) loc. cit. pag. 58.

constanter in eodem corpore, quippe dependentem a quantitate materiæ co- hærentis & celeritate, qua eadem move- tur. Constat similiter, iisdem cor- poribus inesse vim inertię, quæ dici solet, qua omni mutationi resistunt & in statu sive quietis, sive motus uni- formiter in directum perseverant, nisi is a causa quadam extrinseca mutetur. Vis inertię cum omni corpori semper inesse deprehendatur, sive quiescat, sive moveatur, a *Newtono* (i) appella- tur vis materiæ insita, quia quantitati materiæ proportionalis, & definitur per potentiam resistendi, qua corpus unumquodque, quantum in se est, per- severat in statu suo vel quiescendi vel movendi uniformiter in directum. Monet tamen ipse *Newtonus*, quod vis insita nomine significantissimo vis iner- tię dici possit, quemadmodum can- dem vocavit *Keplerus*, quia per hanc vim fit, ut corpus omne de statu suo quiescendi vel movendi in directum difficulter deturbetur. Vi inertię op- ponit idem *Newtonus* (k) vim impres- sam,

---

(i) *In Princip. def. 3. lib. 1.*

(k) *l. c. def. 4.*



sam, quam nonnisi pro actione in corpus exercita ad mutandum ejus statum vel quiescendi, vel movendi uniformiter in directum habet. Existimat enim corpus vim inertiae exercere solummodo in mutatione status sui per vim aliam in se impressam facta, & exercitium illud sub diverso respectu esse & resistantiam, & impetum: resistantiam, quatenus corpus ad conservandum statum suum reluctatur vi impressa; impetum, quatenus idem corpus vi resistantis obstaculi difficulter cedendo conatur statum obstaculi illius mutare. Vim enim impressam consistere in actione sola, neque post actionem permanere in corpore, cum hoc per solam vim inertiae in statu omni novo perseveret. Notionem hanc vis non esse nisi imaginariam & ex notione imaginaria deduci, quæ de vi inertiae & vi impressa docet *Newtonus*, facile intelligitur. Sensu percipimus, si corpus quiescens movendum, ipsum resistere actioni moventis, eamque resistantiam esse majorem, vel minorem, prouti pondus corporis, consequenter materiae quantitas major, vel minor est.

est. Nec minus deprehendimus sensu, si corpus, quod movetur, ad quietem redigendum, aut celeritas, qua movetur, quomodocunque immutanda, ut vel major fiat, vel minor, idem mutationi huic resistere. Resistentia ista in utroque casu spectatur tanquam effectus, cujus aliqua esse debet causa. Fingitur adeo aliquid materiæ inexistentis, quod resistentiam istam, qua corpus mutationi status omni reluctatur, ob quandam similitudinem, quæ in conflictu duorum corporum & duorum hominum notatur, ut per imaginem quandam vim corporis nobis repræsentare valeamus, quæ in eos non incurrit. Hæc igitur vis notio nonnisi imaginaria est (1). Satisfacit ea Mathematico, qui nonnisi quantitatem ejus considerat, parum sollicitus, qualis sit. Enimvero si Philosophus imaginariam hanc entitatem pro reali habet eamque tanquam causam considerat, per quam explicari potest resistentia corporum, qua reluctantur status mutationi; qualitatem occultam in  
Philo-

---

(1) *I, us, Ontol,*

Philosophiam introducit, & si porro ex hac imaginaria notione de viribus ratiocinatur, in errores incidit & in Labyrinthum deducitur, dumque sibi sapere videtur, dat sine mente sonos. Quod si enim quæritur, undenam sit illa vis materiæ, & quia ex notione materiæ deduci eam non posse agnoscit, a Deo in prima rerum creatione eidem eam impressam statuit, non modo dat sine mente sonos, cum nullam habeat ejus notionem, siquidem ea spectatur tanquam entitas quædam a materia diversa eidemque superaddita, neque etiam ulla ipsi sit notio impressionis ejusdem; verum etiam errat, quia ex principiis cosmologicis demonstrari potest, istiusmodi entitatem, quæ in gratiam phænomenorum explicandorum fingitur, rebus existentibus minime inesse, & ex Theologia naturali patet, Deum non creasse materiam & eidem vim impressisse: alia enim longe est creationis ratio, si ex notionibus realibus tanquam ex primis suis principiis deducitur, quemadmodum non ignorat, qui Theologiæ nostræ naturalis

utrum

utrumque Tomum attenta mente & sufficiente acumine peruestigavit. Vis illa, quamdiu in sensu perceptis acquiescis, spectatur otiosa, dum corpus quiescit, exercetur vero, dum aliud corpus in motu constitutum in ipsum incurrit aut vim ad idem movendum adhibet, adeoque tum resistit corpus. Quodsi jam quæris, quomodo corpus vim istam exerceat, & quomodo ad eam exercendam determinetur; Philosophi utique est reddere utriusque rationem, adeoque per ea, quæ insunt corporis & vis notioni, intelligibili modo explicare, quomodo utrumque fiat: sed quam parum huc faciat corporis ac vis eidem insitæ notio reipsa experieris. Nodos deprehendes insolubiles, nisi tibi quidlibet fingendi potestatem arrogare velis, quemadmodum faciunt, qui Philosophi videri volunt, sed non sunt. An materiæ tribues appetitum se in statu suo conservandi? An tribues facultatem sentiendi, qua percipit conatum alterius corporis se a statu suo deturbandi? An facultatem determinandi vim ad resistendum, seu in genere ad agendum.

dum ? Ubi hoc facis, nonne eo ipso fingis materiam instar hominis ex corpore & anima constantis, aut in Materialismum incidis ? Nonne vim materiæ insitam pro substantia habes, in quam physice influunt substantia alia, nimirum materia ? Et nonne in Materialismo, qui materiam facit subiectum perceptionis & appetitionis, tacite admittis aliud in corpore subiectum, cui inest ista percipiendi & appetendi facultas ? Ut adeo corpus constet ex tribus substantiis a se invicem diversis, quæ in se mutuo physice influunt, consequenter modo nobis incomprehensibili in se invicem agunt. Quod si his figmentis concedas locum, nova oritur difficultas. Status corporis, quem vis insita seu inertiae tuetur adversus corpora alia, duplex est, quietis scilicet ac motus uniformis in directum. Quando igitur corpus quiescit, appetitus fertur in quietem ; quando autem movetur, in motum eumque talem, qualis in præsentis est, non in alium, qui sit alterius celeritatis aliamque habeat directionem. Quænam igitur ratio est, cur amet quietem,

(*Hor. Subs. 1731.*)      Ee      dum

dum quiescit; cur motum, dum movetur; cur motum tardum, tum tarde movetur; cur celerem, dum celeri fertur; cur motum in septentrionem, dum versus hanc plagam movetur; cur vero motum in meridiem, dum in hanc plagam is dirigitur? Anne putas hæc explicari posse per instinctum naturalem, mutuando terminum ex Philosophia Scholastica, qui multo majore jure hic nihil significare dicendus est, quam quando ab ipsis de animantibus brutis usurpatur? Ipse tandem fateri cogeris, te dare sine mente sonos, quod exitum ex Labyrintho, quem ingressus es, nullum reperire possis. Quodsi existimes sufficere, ut quærenti respondeas, naturam operari more nobis prorsus incognito, cujus nos nullam habeamus ideam; lubens concedo, te nullam modi, quo natura operatur, ideam habere. Quis vero tibi persuasit, istiusmodi entitatem, qua corpus conatur statum suum conservare, corporibus inesse, prouti apparet, seu phænomena loquuntur, cum in dubium revocari nequeat, quod, quæ sola intellectus



vi dignoscenda sunt, sensu discernere velle æque absurdum sit, ac auribus velle videre colores? Quæ sensui impervia sunt, ea vi intellectus pervestiganda, resolvendo notiones confusas, quas ille offert, in distinctas: quod ubi a te præstari nequit, fatendum est te ignorare, quænam sit phænomeni causa & quænam ea sint, quorum confusione in unum nascitur confusa notio seu phænomeni perceptio, non vero nimia in seipsum fiducia concludendum, notionem confusam esse primitivam, adeoque in se irresolubilem in alias simpliciores, & phænomenon esse reale quid rebus ipsis inexistens. Multo minus Philolophi est redire ad battologiam Scholæ, ut entitas, quæ phænomenon fingitur, habeatur pro causa phænomeni, hoc est, phænomenon pro causa sui ipsius, quemadmodum verbi causa faciunt, qui gravitatem habent pro vi primitiva corpori impressa a Deo in prima rerum creatione & inde rationem reddunt, cur gravia sint, qualitaturn occultarum Patroni. Quodsi notionem vis impressæ imaginariam, hoc est, eam,

Ee 2

que

quæ ex phænomenis deducitur, pro reali habeas; nodos nectis eadem usus ad explicanda phænomena multo plures irresolubiles & in Labyrinthum multo majorem incidis, ex quo difficilius quæritur egressus, qui nullus datur. Sed nolo hisce diutius immorari, cum abunde pateat per jam dicta, notionem virium, quæ Mathematicis sufficit ad earum quantitatem pervestigandum, non satisfacere, sed nulli prorsus ului esse Philosopho, cujus est rationem reddere eorum, quæ sunt adeoque per ea, quæ corpori inesse intelliguntur, intelligibili modo explicare, cur insint.

## §. 12.

§. *notione*  
*virium*  
*particula-*  
*rium & ce-*  
*luti gravi-*  
*tatis &*  
*virium*  
*centrali-*  
*um.*

Gravia tendere ad centrum terræ phænomena docent. Si nullum adsit obstaculum, quod motum impedit, motu continuo accelerato actu descendunt; si vero tale adsit, nonnisi nisus quidam gravi inest, & gravitate premuntur corpora gravi subjecta. Mathematicus acquiescit in phænomenis & gravitatem sibi imaginatur tanquam ens quoddam, quod continuo urget materiam, ex qua corpus con-

constat, seu quæ eidem quomodocunque cohæret, ad descensum. Et hæc imaginaria notio ipsi sufficit ad motum gravium determinandum tum in hypothesi naturæ, tum in aliis possibilibus pro arbitrio assumtis. Quodsi vero eandem notionem transferas in Philosophiam, denuo nihil agis, & ubi quod apparet pro reali sumis, quæstiones extemplo irresolubiles emergunt complures. Quodsi enim quæras, quænam sit ratio, cur gravia ad centrum terræ tendant, directionis hujus nullam dare vales rationem ex iis, quæ corpori insunt. Si porro quæsieris, cur hac potius gravi cadenti insit celeritas, quam primum motus gignitur; denuo obmutescis. Si præterea quæsieris, quomodo hæc vis, quæ materiæ insita, producat motum; nec hic respondere vales, quæ intelligi possunt. Neque sufficit dicere, quod gravitas agat modo nobis prorsus incomprehensibili. Ex eo enim, quod eum ignoras, non sequitur, eum in se non esse intelligibili modo explicabilem. Faciendum potius te nescire, quomodo in rerum natura gravia efficiantur corpq-

ra, & agnoscendum, te nonnisi imaginariam habere notionem, ubi gravitatem tibi repræsentans tanquam entitatem quandam materiæ impressam, cujus actione producatum gravium motus. Nullum est dubium, gravia in aliis planetis ad centrum suorum planetarum tendere. Quænam igitur ratio est, cur alia materia tendat ad centrum terræ, alia ad centrum Lunæ, alia ad centrum alterius cujusdam planetæ? Si gravitas vis quædam primitiva est materiæ in prima rerum origine impressa, cujus nulla datur causa naturalis, per quam intelligibili modo explicari potest; nil etiam hic habes, quod respondeas. Si nutum Numinis allegas pro ratione, rationem nullam esse abunde constat ex iis, quæ de voluntate Dei demonstravimus in Theologia naturali, nec magis es Philosophus, quam qui Jovem tonare, Jovem pluere dicit, ubi docere debet, quomodo tonitru, quomodo pluvia gignatur. Taceo, quod, quando de impressione virium loquimur, notionem ejus nonnisi imaginariam habeamus, quæ a phænomenis derivatur, quatenus

nus verbi gratia videmus corpus perpendiculariter projectum recta sursum ascendere contra naturalem impetum, quo fertur deorsum, aut globum, qui quiescit, digito vel baculo impulsus in plano motu rectilineo progredi. Qui novit differentiam inter cognitionem vulgarem & philosophicam, satis intelligit se nihil adhuc intelligere, ubi in sensu perceptis acquiescit, eorum quæ ad Philosophiam spectant, etsi ultra progrediendum non sit, ut ad cognitionem mathematicam perveniat. Eodem modo sese res habet cum vi centripeta, qua Planetæ primarii a motu rectilineo continuo retrahuntur in centrum solis & in orbita sua retinentur. Mathematicos, quando in quantitatem virium harum centripetarum inquirunt, in notione imaginaria acquiescere, vel exinde intelligitur, quod resolvatur in notionem vis in genere, quam nonnisi imaginariam ipsis esse ante ostendimus (§. II.), & quod cum gravitate tanquam species sub eodem genere continetur, cujus gravitatis notionem Mathematicis nonnisi imaginariam esse

Ec 4

se

se per modo dicta constat. Notionem autem, quæ in imaginariam resolvitur, imaginariam esse & ipsam dubitari nequit. Nec minus patet, notionem, quæ eodem modo formatur, quo notio imaginaria unius speciei, imaginariam quoque esse debere. Idem autem tanto evidentius intelligitur, si ad modum animum attendis, quo Mathematicis vis centripeta Planetarum innotuit. Repererat *Galilæus* globum ex tormento explosum in vacuo parabolam describere debere, quod vi a pulvere pyrio accenso impressa continuo progrediatur, vi gravitatis vero continuo in progressu versus centrum Terræ urgeatur, seu a motu rectilineo retrahatur. Suspicebatur *Hewelius* in *Cometographia*, planetas primarios moveri circa Solem, dum vi impressa continuo progrediuntur & vi gravitatis in centrum Solis continuo retrahuntur: id quod mox audacior assererat *Robertus Hooke*, Anglus, etsi demonstrare non posset, duplici hac vi indefinenter agente prodire orbitas ellipticas *Keplerianas*, cum in Geometria sublimiori non eos fecisset progressus,  
ut



ut demonstrationi sufficeret, quam demum dedit *Newtonus* in Principiis. Vides hinc Mathematicos vires, quæ moventur Planetæ in orbitis suis, concipere ad instar virium, quibus projectilia in parabolis moventur. Quamobrem cum in notionibus imaginariis acquiescant, dum in motum projectilium inquirunt; in imaginariis quoque subsistunt, dum motum planetarum in orbitis suis determinant. Parum ipsi solliciti sunt, quænam sit causa, cur Planetis insint duplices istæ vires. Immo si fictionibus juvent imaginationem, ut facilius conservetur attentio, ipsorum instituto id ipsum minime contrariatur. Imaginare tibi spatium aliquod vacuum, in quo sit Sol, quem sub puncto quodam lucido tibi repræsentas. Imaginare tibi porro planetam instar globi tormentarii, qui ex tormento exploditur, & nullius sit gravitatis. Finge porro puncto isti lucido, sub quo tibi solem repræsentas, inesse vim attractivam, qua Planetam gravitatis expertem continuo retrahit a linea recta, qua motu sibi impresso progredi nititur. Hæ ficti-

ones omnes minime obstabunt, quo calculos tuos ad determinandum motum planetarum requisitos rite instituas, modo non sumas, quæ phænomenis repugnant, ubi ratiocinandum. Fictiones autem istæ, quæ non nocent Mathematico in suis meditationibus, sed potius adjumento sunt, nil prosunt Philosopho, quando rationes phænomenorum reddere debet: neque enim ipsi licet fingere causas pro arbitrio, nec iisdem attribuere potest, quæ cur insint ex aliis inexistentibus ostendere nequit. Non lubet plura addere in re manifesta, adeoque mitto vires attractrices, quas centripetis accenlet *Newtonus* (m), earumque actiones in distans, qualis est vis attractrix magnetis, mitto alias, quæ idem in eundem censum refert. Ex antecedentibus notiones imaginarias, quæ in foro mathematico usui sunt, facile agnoscet atque a realibus distinguet, qui cognitionis philosophicæ distinctam habet notionem. Quodsi Philosophusumat vim impressam Planetis & vim centripetam seu attractionem

---

(m) in *Princip. def. 5. lib. 1.*

nem Solis tanquam realem; extemplo emergunt quæstiones, ad quas respondere nequit, & in Labyrinthum incidit, e quo nullus patet egressus. Quod si enim quæris, quinam impresserit motum rectilineum planetis & quomodo fuerit impressus; nil respondere potes, quod satisfacit Philosopho. Si enim respondes, Deum hoc fecisse in prima rerum creatione modo nobis prorsus incognito vi omnipotentiae suæ. Philosophus in hac responsione acquiescere nequit, qui nihil adventitii rebus creatis inesse contendit, nisi quod per alia, quæ per essentiam eidem insunt, intelligibili modo explicari possit, cur insit, nec omnipotentiae divinae tribui posse agnoscit, nisi quod per essentiam & naturam rerum concipitur possibile, quodque adeo in se intelligibili modo explicabile. Quod si porro quæsieris, cur, seu qua de causa Planetæ primarii gravitent in solem; denuo nil respondere vales, quod satisfacit Philosopho. Si enim respondes, Deum impressisse Planetis gravitatem eamque consideras tanquam vim primitivam; Philosopho  
mi-

minime fatifacis. Gravitas enim, quæ vis primitiva habetur & pro causa motus versus centrum Solis allegatur, qualitas occulta est, cui dudum nuncium miserunt, qui recte philosophantur, & de impressione ejusdem a Deo facta eadem tenenda sunt, quæ modo de impressione motus rectilinei monuimus. Quodsi Soli tribuere malis vim attractivam, qua continuo Planetas versus centrum suum trahit, magneticæ similem, qua magnes ad se trahit ferrum; qualitatem non modo occultam denuo fingis, verum etiam actionem in distans admittere teneris, a sanioribus Philosophis merito explosam. Quodsi præterea quæras, cur Planetæ hanc potius gravitationis legem observent, quam aliam, denuo confiteri debes ex notione vis centripetæ imaginaria, quæ Mathematicis est, rationem nullam dari posse, adeoque ad voluntatem Numinis tanquam ad sacram anchoram confugiendum: id quod causam desperatam indicat, fatentibus omnibus, qui distinctas in Philosophia prima & Theologia naturali notiones fuerunt consecuti. Abunde igitur liquet,

quet, notionem imaginariam virium centripetarum, quæ Mathematicis satisfacit, nullius usui esse in Philologia, nisi quando phænomena per phænomena, a quibus ista pendent, explicare licet: de quo mox plura dicemus.

§. 13.

Mathematicis infinitum & intermi-  
 natum seu illimitatum synonyma sunt. *g. notione  
infinita.*  
 Numerum adeo infinitum gigni imaginantur additione unitatis aut numeri minoris nunquam terminanda: & magnitudinem infinitam oriri fingunt extenso undiquaque sine termino producto. Notioni huic imaginariæ non respondere nisi modum loquendi ostendimus in Metaphysicis (n). Quod si vero infinitudinem Mathematicorum habeas pro realitate quadam, quemadmodum faciunt, qui spatium imaginarium pro ente reali & absoluto venditant; multa sequuntur absurda, quæ tanquam vera tolerantur in Mathesi, ubi fictionibus locus est, veluti quod unum infinitum majus esse possit altero & unum infinitum ad alterum rationem habeat finitam. Ita infiniti globi

(n) §. 805. *Ontol.*

bi spatium replere debent infinitum. Quod si jam ponas infinitos globos alios, qui singuli sunt dupli globorum spatium istud infinitum replentes, hos adimplere spatium infinitum illius duplum patet. Enimvero si vel imaginari velis duo spatia infinita, quorum unum est alterius duplum; id fieri non posseprehendis, nisi minus tibi repræsentes ut terminatum, cujus adeo duplum itidem terminatum esse debet. Notio adeo imaginaria te conjicit in manifestam contradictionem, etiamsi qui confundis imaginaria cum realibus in iis, quæ imaginari potes, acquiescere velis & primitiva imaginabilia esse tibi persuadeas. Non jam urgeo, quod alibi (o) jam annotavimus, quod ipsa suppositio continuationis in infinitum principium petat. Neque etiam jam porro mentionem facere libet notionis imaginariæ infinities infiniti, quæ Mathematicis est, ex notione imaginaria infiniti, de qua modo diximus, derivata, cum enim hanc supponat



nat, quod pro reali haberi nequeat ultro patet. Quin potius quædam nobis adhuc monenda sunt de infinite parvo Mathematicorum. Infinite parvum Mathematici oriri sibi imaginantur ex divisione continui nunquam terminanda. Involvit adeo notionem numeri infiniti, quatenus repetitio actuum divisionis numerum continet. Etenim si quæris, quoties continuanda sit divisio partium in continuo, seu repetenda, donec perveniat ad partem infinite parvam, non nisi infinito numero hoc exprimi posse sumitur, quolibet numero finito leu assignabili non sufficiente. Inde est, quod quantitates infinite parvæ nullam habere possint rationem ad finitas, quarum partes infinite parvæ sunt. Infiniti numeri notio cum non sit nisi imaginaria & extensum, in quo continuum primario inesse statuitur, non minus imaginaria notione repræsentetur, quemadmodum ex antecedentibus liquet; vel ex hoc ipso intelligitur, notionem infinite parvorum, quæ Geometris est, non nisi imaginariam, consequenter infinite parva entia actu in

in rerum natura existentia minime esse. Quodsi vero notionem infinite parvorum pro reali habeas, cum Philosophia naturalis tricis inutilibus involvitur, tum & ipse in Labyrinthum de divisione continui incidis. Hinc porro patet, quid sentiendum sit de divisione infinite parvorum infinita eorumque subdivisionibus in infinitum continuandis, unde diversi emergunt infinite parvorum gradus. Enimvero quod quantitates infinite parvæ Mathematicorum non sint veræ quantitates, sed saltem imaginariæ, dudum alibi (p) ostendimus, & cur quæ de infinite parvis eorumque diversis ordinibus demonstrant Mathematici sint toleranter veræ exposuimus, qualisque sit modus loquendi docuimus (q). Non igitur hic repetimus, quæ ibi legi possunt. Realem infiniti notionem, cujus eximius usus est in Theologia naturali, quoties de infinitudine Dei incidit quæstio, in Philosophia prima dedimus (r). Nulli

autem

---

(p) §. 804. 813. *Ontol.*

(q) §. 817. & seqq. *Ontol.*

(r) §. 838. *Ontol.*

autem usui deprehendes infiniti notionem imaginariam, immo ea potius nocet, quatenus incautos deducit in errores eosque haud raro nocuos.

§. 14.

Vidimus Mathematicos lumere notion<sup>an notio-</sup>es imaginarias tanquam primas, ex<sup>nes meta-</sup> quibus deinde ceteras deducunt, & quas<sup>physicas</sup> ad reales reducere debet Metaphysi<sup>ex Mathefi</sup>cus, ne phænomena confundantur cum<sup>petere li-</sup> realitatibus, leu quod apparet habeatur pro eo, quod est. Hinc patet, notion<sup>es</sup>es metaphysicas non posse desumi ex Scriptis mathematicorum. Vidimus *Newtonum* in Principiis explicasse notionem spatii, loci, temporis, motus, virium motricium tam in genere, quam quarundam in particulari, quatenus faciunt ad cognitionem naturæ mathematicam, motus præsertim Planetarum. Pessime autem sibi ac scientiæ consularet, qui illas notion<sup>es</sup>es in Metaphysicam inferre vellet. Similiter vidimus, Geometras quandam habere notionem corporis & divisionis continui in infinitum. Sed pessime quoque sibi ac scientiæ

(Hor. Subs. 1731.) Ff tiæ

tia consulit, qui hasce notiones in philosophiam naturalem infert, & corpus in genere sibi repræsentat instar corporis mathematici, atque corpora majora componit ex corpusculis tandem mathematicis, immo istiusmodi divisionem in infinitum admittit in natura rerum, qualem sumit in Geometria Mathematicus. Etsi summum sit Geometrarum acumen, quo alios eruditos vincunt, non tamen ideo ipsorum acumen extendendum est ultra suos terminos. Notiones primæ Mathematicorum, quas sumunt & ultra quas non progrediuntur, imaginariæ sunt, quæ confusis sensuum perceptionibus totæ debentur. Ipsorum adeo acumen in sensu perceptis terminatur. Quamobrem ubi ulterius progrediendum & confuse percepta ad notiones distinctas reducenda; acumen Mathematici non sufficit, sed alio acumine opus habet Metaphysicus, de quo non cogitat Mathematicus.

## §. 15.

*An Mathematicus  
qua Ma-*

Hinc porro conficitur, Mathematicum, quatenus Mathematicus est, non

non simul esse Metaphysicum, consequenter ideo neminem pro Metaphysico haberi posse, quia Mathematicus est, multo minus pro Metaphysico summo, quia Mathematicus summus habetur. Quodsi adeo quis notiones imaginarias, quæ Mathematicorum sunt, pro realibus habet, ac propterea sibi aliisque persuadere conatur, eas esse veriores, quia videt Mathematico, qui omnium ore summus celebratur & cujus acumen admirantur omnes, istas notiones probari; is totus fallitur turpiterque errat. Quamobrem ubi eundem ea de causa supra omnes Metaphysicos extollit, quemadmodum is supra omnes Mathematicos extolli solet; Metaphysicorum Principem agnoscit, qui nullus est, nec minimum inter eos locum meretur. Nihil vero idcirco detrahitur laudi Mathematici, quod nullum sit ipsius inter Metaphysicos nomen, cum Mathematicus notionibus metaphysicis carere possit, imaginariis instituto ipsius satis facientibus: Sicuti ex adverso nihil decedit laudi Metaphysici, si idem Mathematicus non sit, cum

themati-  
cus sit  
etiam Me-  
taphysica  
cus.

notiones imaginariæ Mathematicorum ipsi nulli sint usui, sed scientiam potius labefactent, ubi iisdem uti voluerit. Immo si quis vano ausu, cum sit Metaphysicæ verioris ignarus, nec differentiam inter cognitionem philosophicam & mathematicam habeat perspectam, Mathematicum in foro suo eminentem eminenti inter Metaphysicos loco collocat notiones imaginarias, quibus in Mathesi recte utitur, pro realibus obtrudens; famam ejus potius minuit, dum Mathematicum imperiti meritis ejus pretium ex metaphysicis decernunt, in quibus nulla sunt, immo nomen ipsius penes eos, qui mathemata parum curant, in contemptum adducit. Intempestivæ laudes, quæ ab imperitis proficiscuntur, famam, quam quis meretur, non augent, sed imminuunt. Etenim in causa sunt, ut multorum ludibrio exponatur, qui laude sua frui poterat. Eodem modo contingit, ut famæ suæ noceat, qui, cum in aliquo scientiarum genere excellat, nimia in acumen suum fiducia de rebus ad se minime pertinentibus judicium sibi sumit. Ne-

mo



mo laudem meretur in eo scientiarum genere, in quo nihil præclarè dedit, aut quod prorsus non attigit, etsi summa ipsi debeatur in alio. Et si quis importune se ingerit alienis, de eo valet, quod vulgo dicitur: Philosophus mansisset, si tacuisset. Nemo judicat, utrum hac vel ista laude dignus sis, nec ne, nisi quando vel intempestivis laudibus extolleris ab imperitis aut adulatoribus, vel ipsemet parum opportuna loqueris. Mihi merita virorum in suo genere magnorum cariora sunt, quam ut laudibus, quæ in eos parum conveniunt, famam ipsorum in periculum adducam. Non tamen immeritis laudibus applaudendo ita aliorum famæ prospiciendum existimo, ut ipsorum autoritate scientia patiatur aliquod detrimentum. Justitia, quæ suum cuique tribui vult, suam quoque cuique laudem tribui jubet, non alienam, & naturæ lege, quæ nobis hanc in laudandis aliis justitiam injungit, ad veritatem quoque tuendam & obstacula, quæ eidem propagandæ obijciuntur, removenda nos obligat. Ego semper doleo, quoties viros in suo

genere magnos alienis laudibus ab adulatoribus vel imperitis exornari video, quod famæ illorum maculam quandam etsi immeritam inurunt, cum perpauci sint, qui suam cuique laudem tribuere didicerunt. Quamobrem nec probo, si quis Metaphysicum laudat eum, qui Mathematicus vel Geometra magno suo merito celebratur, inter Metaphysicos vero nomen nullum habet. Magnum enim erit per omne ævum nomen ejus, quod inter Mathematicos adeptus, etiamsi nullum sit inter Metaphysicos, quemadmodum perpetuo celebrabitur nomen ejus, qui in hoc scientiarum genere se virum præstitit, etiamsi inter Mathematicos eminere non studuerit.

## §. 16.

*An Mathematicis nil conferat ad Metaphysicam excolendam.*

Etsi autem notiones imaginarias Geometrarum in Metaphysicam transferre minime liceat, realia cum imaginariis confundendo (§. 14.); non tamen ideo negatur, Mathesin ad Metaphysicam excolendam ulli prorsus esse adjumento: contrarium enim jam monuimus alibi (§), scilicet quod illa  
uti

---

(§) *Tom. V. Elem. Mathes. §. 340.*

uti possimus ad distinctas & fœcundas in Philosophia prima notiones venandas, & uno alteroque exemplo fidem oculatam dedimus. Ingenue confiteor, me Philosophiam primam eo, quo comparuit, habitu nunquam fuisse daturum, nisi Mathesis mihi suppetias tulisset. Absit autem, ut tibi persuadeas, hæc sibi invicem repugnare. Modo intelligas modum, quomodo Mathesis serviat notionibus distinctis & fœcundis in Philosophia prima venandis, ne umbra quidem contradictionis animo tuo amplius obversabitur. Philosophia prima agit de ente in genere, & figuræ ac numeri, de quibus agit Mathesis, in numero etiam entium sunt & instar entium aliorum concipiuntur. Quamobrem quæ de ente in genere concipi possunt ac debent, entibus quoque mathematicis insunt. Constituunt adeo entia mathematica quandam entium speciem, quæ instar aliarum specierum enti in universali spectato tanquam generi suo substant, quocunque tandem nomine hæc entia ab aliis distinguere velis. A speciebus abstrahi posse notionem generis.

neris, nemo dubitat, & quomodo hoc fieri possit, docuimus in Logica (t). Tanto autem facilius hoc succedit, quod notiones entium mathematicorum sint non modo distinctæ, verum etiam determinatæ & ea, quæ iisdem insunt, ipsis oculis exhibeant spectanda, nec præterea alia: quo in casu facillimam esse notionum generalium abstractionem, nemo nisi inexpertus negabit. Ingenio equidem hic opus est & acumine quodam acquisito, quod acumen pervidendi abstracta in concretis appellare soleo (u); non tamen nobis in præsentī sermo est de dotibus animi ad notiones ontologicas fœcundas ab entibus mathematicis abstrahendas requisitis, nec disquirimus, num hæc notiones venari in Mathesi facile sit; sed tantummodo rationem reddere volumus, cur hoc fieri possit, & cur inde notio entis in genere distincta & fœcunda facilius abstrahi possit quam ab entibus aliis ab eo, qui in notionibus abstrahendis exer-

(t) §. 710.

(u) Not. §. 490. Ontol. Conf. not. §. 450. Ontol.

exercitatus est. Aliud utique est ab entibus mathematicis, quatenus tanquam species quædam enti in genere tanquam suo generi substant, notiones fecundas de ente in genere abstrahere, aliud vero est notiones imaginarias, quas phænomenis confusus sumit, nec confuse percepta ad notiones distinctas revocando in reales convertere jubet ipsius institutum, in Philosophiam primam inferre ibidemque pro realibus venditare. Habet quoque Mathesis insignem usum in notionibus metaphysicis illustrandis, ubi jam inventas alteri claras reddere voveris, ut ab eodem intelligantur, quoniam ex eadem ratione earum applicatio facilior & clarior, quam ad alia exempla, ob quam paulo ante abstractionem faciliorem, diximus. Nemo autem miretur, quod notionem distinctam illustratione per exempla clariorem reddi dicamus, propterea quod notio distincta sub clara tanquam species contineatur, atque ideo jam clara sit, quia distincta. Hæc enim utique vera sunt, si notio in se consideretur, citra respectum ad cognoscentem.

Ff 5

tem. Quoniam vero distincta notio ideo clara intelligitur, quatenus claras habes notiones notarum illam ingredients; intellecturus notionem distinctam ab alio inventam hisce notarum notionibus claris destitui potest, adeoque distincta notio clara ipsi non est, sed exemplis demum illustrata clara redditur. De aliis usibus Matheseos in Philosophia prima non est quod dicamus, cum tractatio hæc non sit huius loci.

## §. 17.

*An notio-  
nes imagi-  
naria  
prorsus  
eliminan-  
da ex Phi-  
losophia.*

Quamvis autem notiones imaginarias ex Mathesi in Metaphysicam non transferendas esse contendamus, ubi explicandum, quid sint res, quibus eadem respondent, veluti quid sit spatium, quid locus, quid vis motrix; non tamen eas ex Philosophia prorsus præscribi volumus, sed eas admittimus, ubi phænomena per phænomena explicanda, hoc est, phænomeni unius ratio reddenda ex alio, a quo pendet. Sane in Philosophia naturali multa sumere tenemur, quæ confuse saltem percipimus, nec ex primis principiis demonstrare a priori vale-  
mus,



mus, ut alia inde demonstrarentur: quī mos minime reprehendendus, sed potius laudandus & commendandus. Ita enim ad certam ac utilem rerum naturalium cognitionem pervenitur, cum ex adverso Physici, qui commentitia quædam principia sumunt & exinde phænomenorum rationes reddere conantur, sterilia proferant & ut plurimum nugentur. Neque hoc institutum abhorret a more Mathematicorum. Exemplo nobis sunt Astronomi, qui phænomena motus communis explicaturi & ad calculos revocaturi, notionem imaginariam mundi, quasi sit sphaera, cujus superficiei stellæ sunt affixæ & quæ circa Tellurem in centro ejus collocatam motu æquabili ab oriente in occidentem circumvertitur, in partem Astronomiæ sphaericam admittunt, etsi norint eandem nonnisi imaginariam esse, quod vero ita apparet, longe aliter sese habere in rerum natura. Ast ubi quæritur, qualis sit mundus, quomodo ex corporibus totalibus componatur, quænam horum quiescant, quænam circa alia moveantur, notionem istam imaginariam missam faciunt,

ciunt, & ad realem confugiunt, huicque, non isti in parte Theorica faciunt locum. Similiter ubi quæritur, cur Sol oriatur, cur occidat, cur continuo situm suum respectu fixi cujusdam in superficie Terræ puncti mutet; non rationem ex notione mundi imaginaria reddunt, sed ad realem confugiunt. Aliud vero longe est ex notione imaginaria rationem reddere phænomeni, quod a phænomeno isti respondente dependet; aliud vero est notionem imaginariam habere pro reali & ex ea rationem reddere velle eorum, quæ a reali pendent, nec sine hac concipiuntur. Etenim ubi phænomeni ex alio phænomeno redditur ratio, quorum hoc ab isto pendet; non aliud quæritur, quam cur hoc ita appareat, & id ipsum intelligitur seu quæstioni satisfactum, ubi constat, hoc ita apparere debere, quia illud tale apparet. Enimvero ubi ratio quæritur phænomeni, quæ ab alio minime dependet; quæstio huc reddit, quænam insint rebus existentibus, ob quæ hoc ita apparere debeat. Demes exemplum aliquod, ne quid in dictis relinquatur obscuri.

Corpus,

Corpus, quatenus confule percipitur, extensum apparet. Ab hac extensione pendent alia, quæ percipiuntur, veluti quod sit divisibile, quod diversas recipere possit figuras. Quando igitur quæritur, cur divisibile sit, cur diversas induere possit figuras, ex notione extensionis imaginaria rationem reddimus phænomenon unum ex phænomeno alio, a quo pendet, explicantes. Enimvero ubi quæritur quid sit extensio & quænam sit ratio, cur corpora extensa appareant; in hac notione non subsistendum, sed ex iis, quæ corporibus revera insunt, seu ex iis, per quæ constituuntur, reddenda ratio est. Habent adeo usum suum notiones imaginariæ, ubi iis explicandis sufficiunt, quorum ratio expetitur: ast ideo non probandum, quod pro realitatibus venditentur phænomena, ubi de fonte eorum quæstio est. Quemadmodum in demonstrationibus geometricis non recurrimus semper ad definitiones, sed in theorematis inde demonstratis subsistimus; ita quoque in explicandis phænomenis non semper recurrendum ad eorum fontem, sed

sed subsistendum in iis, quæ ex isto derivantur. Et quia multa nobis phænomena innotescunt a posteriori, quæ a priori ex eorum fonte deducere minime possumus; sufficit, quod certum sit, ea inde deduci posse: quemadmodum si quis novit veritatem aliquam geometricam ex definitionibus deduci posse, etsi ipsemet eo usque demonstrationes continuare nequeat, eadem nemine reprehendente utitur ad demonstrandas alias veritates, quæ inde pendent. Qui methodum demonstrativam intimius perspexit, & facultatum animæ limites cognitos habet, ei non paradoxa videbuntur, quæ asserimus. Multo minus autem negotium faceissent modo dicta ei, cui differentia inter mundum sensibilem & intelligibilem innotuit (x).

## §. 18.

*An usus  
notionum  
imagina-  
riarum  
destruat  
laudem Ma-  
themati-  
cæ.*

Totus autem fallitur, qui sibi persuadet, quasi abjecte sentiamus de Mathematicis, dum affirmamus, eos in notionibus imaginariis acquiescere, ultra quas progreditur Metaphysicus. Neque

(x) §. 203. part. I. *Theol. nat.*

Neque enim hic contenditur de majore vel minore acumine huic vel isti tribuendo, quod majorem, vel minorem pariat gloriam; sed de rei veritate, ne confundendo in unum ea, quæ diversa sunt, in errorem incidamus scientiæ damnosum. Mathesin nos semper maximi fecimus faciemusque, quamdiu auram hanc vitalem attraheamus, non, quemadmodum vulgo fieri solet, quod nostram amemus Minervam, sed ob utilitates, quas studium Matheseos cultoribus suis promittit. Quamobrem cum nos Matheseos usum longissime extendamus ultra eos terminos, qui communiter eisdem præfiguntur, prouti ex nostra de studio Mathematico rite instituendo commentatione, quæ Tomo quinto Elementorum Matheseos universæ legitur, abunde liquet; quin eam majoris faciamus, quam vulgo fieri solet, extra omnem dubitationis aleam positum est & adversus dubitantem demonstrativa ratione adstrui potest. Non vituperamus Mathematicos, quod in notionibus imaginariis acquiescant, quas Metaphysicus distincta confuse per-

perceptorum explicatione ad reales reducere tenetur, sed recte eos facere asserimus, quia notiones imaginariæ scopo ipsorum serviunt, ad quem attingendum nil conferunt reales, quæ alio prorsus fine in Metaphysica sibi locum vindicant. Immo si Mathematicus, cujus præclara sunt in Mathesin merita, per incogitantiam quandam notiones imaginarias pro realibus habet, propterea quod earum utilitatem in suo foro expertus easque familiares experitur; ea de causa merita ejus in Mathesin non facimus minora, sed suis ea encomiis extollimus, erroremque in re aliena ipsi condonandum existimamus probe gnari, tempus, quod Mathesi amplificandæ ac ornandæ impenditur, metaphysicis speculationibus impendi minime posse. Nec minus necssarium ac utile existimamus, ut Mathesis ulterius promoveatur, quam ut Metaphysica excolatur & a squalore suo purgetur contemptuque, quo premitur, liberetur. Laudes Mathematici & Metaphysici prorsus diversæ sunt, quarum una ab altera minime dependet, etsi adeo alterutra quis desti-



destituatur, non ideo laudi, quam habet, aliquid decedit. Summus erit Mathematicus, qui inter Metaphysicos ne infimum quidem locum mereatur, sed prorsus nullum, quoniam in Mathesi excellere & supra omnes Mathematicos eminere potest, qui Metaphysicam prorsus ignorat. Immo si quis sibimetipsi adulatus Metaphysicam contemnit & abjecte de eadem sentit ejus utilitatem non expertus; etsi non recte faciat, nec ullam propterea mereatur laudem, cum tamen magni merito fiat ob sua in Mathesi merita, præcipitantiam infirmitate humana facile excusamus. Infirmitates enim, quas merita præclara in genus humanum compensant, pro nullis habendas esse arbitramur, propterea quod in aliorum merita oculos convertere debemus, ne cui laudem promeritam denegemus & ut habeamus, quod imitemur; ad nævos autem aliorum animum attendi convenit, ut nobis sit, quod fugiamus, non quod reprehendamus. Quando igitur de aliorum meritis quæstio est, nævi utpote ad ea minime spectantes sepo-

(*Hor. Subs. 1731.*)      G g      nen.

nendi, quasi nulli adessent. Et hoc fieri jubet lex naturæ, quatenus famæ aliorum parcendum esse dicitur.

§. 19.

*An An-  
men stu-  
dio Ma-  
thæseos  
quæsitum  
prosit Me-  
taphysico.*

Ostendimus in anterioribus (§. 15.), non repugnare, ut quis summo acumine utatur in Mathesi, in Metaphysicis tamen cœcutiat. Videtur adeo hoc minus consentire cum iis, quæ de acuendo intellectu ope studii mathematici omni ævo fuere asserta, & vix a quoquam magis, quam a nobis urgentur in Commentatione de studio mathematico recte instituendo, quæ Tomo quinto Elementorum Mathæseos legitur. Constat studio Mathæseos perfici intellectum, quatenus habitum eodem in veritate cognoscenda confert, si in eo fueris assiduus, & quatenus rectum facultatum cognoscendi usum distincte propriis experimentis agnoscere datur, si quidem animum ad eundem advertis & multo usu acquiras acumen, quo ad notiones distinctas illius usus formandas opus est. Non igitur negamus, si quis rectum facultatum usum in veritate cognos-

cen,

scenda beneficio studii mathematici non modo sibi comparavit, verum etiam distinctam hujus usus notionem consecutus, eum in Metaphysica excolenda felicius progredi posset alio, qui & habitu rite utendi facultatibus cognoscendi & notione ejusdem usus distincta destituitur. Ingenue enim fatemur, nos neque Metaphysicam, neque ceteras Philosophiæ partes eo habitu, quo comparuerunt, induturos fuisse, nisi intellectum Matheseos studio eo modo acuere, quem in modo laudata Commentatione descripsimus, indefinenter laborassemus. Hinc tamen minime sequitur, quo quis acumine majore utitur in Mathesi augenda & amplificanda, eo majus quoque esse debere in Metaphysicis acumen. Cœcutit enim in Metaphysicis, quia ex iisdem notionibus imaginariis in Metaphysica ratiocinari audet, quas in Mathesi sibi sufficere expertus est, quodque ad Metaphysicam excolendam non eandem industriam affert, quam Mathesi impendit. Præjudicium istud facillime sese insinuat animo Geometræ, nec adeo facile eradicatur, nisi diffe-

rentia inter cognitionem philosophicam & mathematicam intime perspecta, quarum illa a principio rationis sufficientis tota dependet, nec sine distincta principii istius notione penitus intelligitur; hæc vero magis ad principium contradictionis redit, ac sine distincta principii rationis sufficientis notione intelligi potest. Adsunt etiam rationes adhuc aliæ, quæ Mathematico facile persuadent in notionibus imaginariis esse subsistendum etiam extra Mathesin & quibus tanto facilius cedit, quod in Philosophia nondum versatus satis distinctas & adæquatas facultatum animæ notiones minime possidet. Sed in tantas ambages jam descendere non convenit instituto præsentis. Cur Mathematici fastidiant studium Metaphysicæ, ex eo est, quod Scholastici terminis obscuris & distinctionibus Philosophiam primam totam repleverint, ut luce, qua fruimur in Geometria, adfuetum tenebræ istæ statim offendant, quodque nullam viderint ejus usum. Quando ergo Mathematicus, qui veriori Metaphysicæ nullam unquam operam navavit, de rebus

rebus metaphysicis sibi iudicium sumit, de rebus sibi ignotis per præcipitantiæ judicare debet, nec juvat ipsum acumen in Mathesi acquisitum, quod alibi adjumento non est, nisi quatenus supponitur principia probe perspecta, quæ lucem menti affundunt. Vides adeo, nos in præsentî schediasmate non contradicere iis, quæ alibi defendimus. Neque enim nostrum est confundere in unum, quæ a se invicem separanda sunt, neque appetitum influere permittimus in iudicia nostra, qui eadem haud raro contradictoria facit. Etsi enim vulgo defendatur, quasi extra Mathesin appetitui maxima vis sit in assensum, neque hoc negari possit, quando de facto sermo est, cum neganti experientia tota die reclamaret; philosophia tamen id dudum nos consecutos ingenue confitemur, ut assensus non minus extra Mathesin, quam in Mathesi, nobis ab omni appetitu sit prorsus independens.

§. 20.

Velim hucusque a nobis dicta pro *usum doctrinæ præcedentis.*  
be perpendant omnes, quorum est  
non suæ magis, quam aliorum famæ.

Gg 3

pro-

prospicere, nec veritati propagandæ obicem ponere, aliosque in errores ac Labyrinthum deducere, unde nullus nisi in Scepticismum patet exitus. Est autem hoc omnium, qui ad scientiam animum appellant. Discat Mathematicus, qui sibi probe conscius est, se tempus omne in Geometria & calculis algebraicis unice consumsisse, quod suum non sit de rebus ad Metaphysicam spectantibus iudicium, quantumcunque tandem ipsius sit in Mathesi acumen. Et ubi ad legenda Metaphysicorum scripta se confert, discendi animo accedat, quali ad Elementa *Euclidis* accessit. Existimet se, quamvis Geometra & Analysta summus merito habeatur, tyronem tamen esse in Metaphysicis, cujus est ante discere, quam iudicem agat, cum in omni scientiarum genere haud pauca tyroni obscura videantur, quæ clara sunt, & dubia, quæ certa, immo erronea, quæ veritati consentanea, propterea quod in animo tyronis non omnem statim claritatem ac evidentiam nanciscuntur notiones, quas primo intuitu non penitus perspicit, præsertim ubi intellectus



lectus non juvatur imaginibus, quem-  
admodum in Mathesi, cum circa ea  
versetur, quæ a sensu remota sunt &  
ab imaginibus separanda. Si cui du-  
rum videatur tyronem agere, & ad eo-  
rum subsellia descendere, cum inter  
Mathematicos eminentem locum oc-  
cupet; Metaphysica abstineat, & lau-  
de sua integra fruatur, nec eam præci-  
pitatis judiciis commaculet. Ita enim  
famæ suæ consulat, nec scientiæ pro-  
pagandæ impedimentum creabit, qua-  
tenus autoritate sua alios incautos in  
errorem minime seducit. Notiones  
imaginarias qui familiares experitur,  
non miretur reales, quibus adluetis  
non est, rerum a sensu remotarum sibi  
initio non videri satis claras & quæ  
hinc deducuntur non satis evidentia.  
Accidit hoc omni tyroni, quando  
campum ingreditur sibi antea non vi-  
sum sibi que noto dissimilem. Princi-  
pium rationis sufficientis, quod ad no-  
tiones reales ab imaginariis discernen-  
das recta via ducit, si rite intelligatur,  
etsi per singula theoremata Geome-  
triæ elementaris verificetur, nec sine  
eo a Geometria ad naturam pateat

Gg 4

tran-

transitus, Mathematico suspectum videri potest, qui sumit notiones imaginarias eidem contrarias, nec ad theoremata logice considerata animum unquam advertit, neque etiam in modum, quo a Geometria ad naturam fit transitus, data opera inquisivit, rationis notione confusa, quemadmodum vulgo faciunt omnes, contentus. Si quis per injuriam in Mathematicos dictum existimet, quod notionibus imaginariis utantur & fictionibus non nisi per eas sustinendi tribuant locum; exemplo manifesto hoc probare lubet. Constat Analystas affirmare, quod quantitas finita per cyphram divisa degeneret in infinitam, veluti si fuerit  $\frac{ab}{0}$ .

Cum cyphra non sit numerus, neque determinatus, neque indeterminatus; divisio numeri finiti vel quantitatis finitæ per cyphram sive 0 utique imaginaria est. Et si probaturus  $\frac{ab}{0}$  esse

quantitatem infinitam ex notione divisionis veræ argumenteris esse 0 :

$x = ab : \frac{ab}{0}$  notio huic analogiæ re-

spondens non nisi fictitia est, cum con-

consideretur tanquam numerus, qui non est, atque adeo ex notione divisionis imaginaria analogia derivetur. Non reprehendimus Mathematicos hoc facientes, cum idem faciamus in Mathesi ad conservandam universalitatem calculi, quæ in eo nullum errorem parit (y). Quod si tamen quod nonnisi toleranter verum est, pro absolute vero venditare velis ac hinc nescio quod mysterium fingere, eoque utique ad persuadendum mysteria religionis Christianæ, argumentando a minori ad majus, quemadmodum memini circa toleranter vera in Mathesi hoc factum fuisse a *Sturmio*, Professore quondam Altdorffino in Scripto quodam posthumo, me minime habes consentientem, qui imaginaria a realibus & fictiones inde derivatas a vero vi principiorum philosophiæ primæ discerno & cur in Mathesi tanquam vera tolerentur, quæ absolute vera non sunt, ostendo. Discat porro Mathematicus studium Metaphysicæ verioris, præsertim Ontologiæ, sibi non in-

Gg 5.                      uti-

utile esse, immo non sine damno suo idem a se contemni. Etenim majorem lucem eidem affundit quoad toleranter vera, ut eadem intimius perspiciat, nec cum absolute veris confundat, consequenter ea non ultra terminos tolerantiae promoveat Mathematicam scientiam præstantissimam in artem nugatoriam convertens & ex Demonstratore nugivendus factus. Munit etiam animum adversus præjudicia, quæ impediunt, quo minus eandem ad Philosophiam appellens veritatem assequatur. Discant etiam intempestivi Encomiastæ, quod Mathematicum, in quem laudes Metaphysici ob notiones imaginarias, quas in Mathesi recte adhibuit, congerunt, non laudent, sed vituperent. Aliis enim, quos encomiis suis fidem habere volunt, persuadere conantur, quod, qui Mathematicus fuit clarissimus, idem quoque Metaphysicus esse voluerit. Ipsi igitur tribuunt notionum imaginariarum cum realibus confusionem: id quod defectum acuminis arguit. Equis vero crediderit, defectum acuminis parere laudem, nisi qui, quid lau-

dis nomine veniat, ignorat? quis non potius pro certo habet obicere alicui defectum acuminis idem esse ac eum vituperare, modo quid sit vituperium distincte cognoscat. An non vero verendum est, ne qui defectum acuminis in Metaphysicis agnoscunt, acumen autem in Mathematicis communis tantummodo famæ fide tenent, hoc ipsum iisdem si non prorsus suspectum evadat, saltem minus videatur, quam est, cum Mathematicum ignari de ejus in Mathesi inventis statuere nequeant? Per pauci enim sunt, qui unumquodque pretio suo æstimare valent, nec in eo definiendo præcipitantes iudicium a vero aberrant. Quid quod laudes intempestivæ, ubi earum lubricitas agnoscitur, vituperandi ansam haud raro plurimis suppeditant nulla prorsus censura alias vexandos. Doleo igitur vicem virorum de scientia in suo genere præclare meritorum, si cultu idololatræ eos prosequantur inepti laudatores, præsertim ubi laudes cum aliorum contemptu conjungunt, a quo eos vindicandi occasionem aliis præbent.

## §. 24.

*An Meta-  
physicus  
curare de-  
beat obje-  
ctiones  
Mathe-  
matico-  
ziones  
imagina-  
rias cum  
realibus  
confun-  
dendis.*

Quodsi Mathematicus, quantuscun-  
que merito habeatur, notiones mathe-  
maticas cum metaphysicis, hoc est,  
imaginarias cum realibus confundens  
virgula censoria notet Metaphysicum,  
quod intelligibili modo explicet ab  
imaginibus separanda; objectionum  
ipsius non major habenda est ratio,  
quam quæ habetur a Mathematico il-  
larum, quæ a Matheleos imperitis pro-  
ficiscuntur. Quemadmodum itaque  
Mathematicus ridet objectiones eo-  
rum, qui, cum Mathematicum ignari  
sint, de rebus ad Mathesin spectanti-  
bus iudicium sibi sumunt, easque non-  
nisi contemptu vindicat; ita etiam Me-  
taphysicus eodem iure ridet obiectio-  
nes Mathematici, qui Metaphysicæ  
ignarus est, easque merito contemnit.  
Valet enim utrobique regula pervul-  
gata, contra ignorantem principia non  
esse disputandum, quod frustranea sit  
omnis adversus eum disputatio. Nec  
de hoc contemptu iustas querelas mo-  
vere potest Mathematicus artifex in  
arte sua habendus, cum ipsemet inju-  
stas esse putet Matheleos imperitorum  
quere-



querelas, ubi eorum objectiones ex ignorantia principiorum profectæ contemnuntur. Quamnam vero rationem fines, cur Mathematicus & Metaphysicus diverso uti debeant jure, quando uterque sese immiscens rebus alienis de eo sibi judicium sumit, quod non intelligit. Repugnat diversitas juris primis Juris naturalis principiis, quod naturalem omnium hominum quoad jura æqualitatem urget (z). Cum natura homini nulli prærogativa ulla competat (a), nec sine ratione duo facientes idem respectu hujus facti, eodem prorsus modo determinati, diversa habere possunt jura. In orbe literario, in quo diversitatis gentium nulla habetur ratio, non viget nisi jus naturæ, quod ex principiorum ignorantia judicium præcipitantes in omni scientiarum genere facit pares: omnes enim in universum obligat, ut a præcipitantia in judicando sibi caveant, nec rebus alienis sese immisceant, quod vero alteri parti ex hac obli-

---

(z) §. 78. 81. part. 1. *Jur. nat.*

(a) §. 94. part. 1. *Jur. nat.*

obligatione enascitur jus idem omnino esse debet. Immo eodem jure prohibentur in orbe literario lites temerariæ, quæ evitantur, ubi frivolæ objectiones, quales sunt omnes ex ignorantia principiorum profectæ, contemnuntur. Absit autem, ut tibi persuadeas contemni Mathematicum, cui debentur laudes summæ in suo genere, ubi frivolæ ejus adversus Metaphysicam objectiones contemnuntur. Aliud enim est contemnere personam, aliud contemnere factum. Facta a personis curate discernit jus naturæ, quoties jura naturalia & obligationes naturales non subsistunt sine hac distinctione. In jure naturæ hospes ac alienus sit necesse est, cui non multi casus sunt perspecti, in quibus a facto separanda persona. Immo justitiæ ut satisfiat in omni casu, nec virtus vitio commaculetur, ad hanc distinctionem haud raro animum attendere tenemur. Non alio fine hæc monemus, quam ut necessitas philosophiæ excolendæ & studii philosophici cum mathematico conjungendi elucescat, discatque Mathematicus, etsi Philosophiæ promovendæ

vendæ tempus impendere nec possit, nec debeat, quod utiliter in thesauris Matheseos amplificandis consumit, se tamen Philosophiæ ab aliis excultæ non ignarum esse debere, quemadmodum nec Philosophus ignarus prorsus esse debet Matheseos, etsi suum non sit in figuris & numeris consensescere ac tempus omne consumere. Quid juvat ardua magnitudinum determinandarum cognitio, nisi & actiones tuas eadem accuratione determinare noveris, qua in magnitudinibus determinandis uteris? Aliis dum prodes, tibi metipsi dees & in multos injurius evadis, tantoque minus tibi condonanda injuria, qua alios afficis, quanto ampliorem facere poteras in vitanda culpa facultatum tuarum usum extendendo acumen tuum ad ea, quæ non sine acumine discernuntur. Acumine vincere alios & culpæ reum esse non est ex eorum numero, quæ famam integram tuentur. Hactenus dicta in præsentī sufficiant, utut haud pauca supersint, quæ non inutiliter huic translationi infererentur.

## II.

*De usu methodi demonstrativæ in  
tradenda Theologia revelata  
dogmatica.*

## §. I.

*Institu-  
tum Auto-  
vis,*

**T**heologia revelata tradit veritates in Scriptura sacra contentas, quarum aliæ cum sint theoreticæ, aliæ practicæ, eadem in credenda & agenda dividi solent. Et Theologia, quæ dogmatica appellari suevit, speculativa a Scholasticis dicta, versatur circa credenda. Quando igitur nobis propositum est explicare usum methodi demonstrativæ in tradenda Theologia revelata; docere tenemur, quomodo veritates theoreticæ in systema veri nominis ope methodi demonstrativæ redigendæ, ut, dum omnes inter se connectuntur, eorum a se invicem dependentia appareat, sicque aliarum ex aliis ratio a priori dari possit. Non multum disputo, utrum hoc fieri possit, nec ne. Istiusmodi enim disputationes præliminares ut in omni scientiarum genere, ita quoque in præsenti argumento prorsus inutiles esse  
exi-

existimo. Veniendum in rem præsentem. Tentanti enim, modo valeant vires, ex successu constabit, quid fieri possit, quid non. Lubens fateor arduum ac difficile esse hoc opus, cum multo plura hic observanda sint, quam ubi quis Philosophiam methodo demonstrativa tradere voluerit. Rationes patebunt ex sequentibus, adeoque iis reddendis tantisper supersedemus. Methodi itaque apprime gnarum esse oportet eum, qui tantum opus aggreditur, ejusque usum in potestate sua habere debet, antequam eidem exequendo se parem agnoscere potest. Secus enim verendum est, ne scopum sibi præfixum non attingat. Quamobrem cavendum est, ne, si cui male cessit propositum, ex eo colligatur, fieri non posse, ut Theologia revelata dogmatica methodo scientifica, qua ab omni ævo usi sunt Mathematici, & qua nos Philosophiam tradere cœpimus, in ordinem redigatur. Quod enim ab uno minus recte factum deprehenditur, id ab alio recte fieri non posse minime sequitur, multo minus autem hinc colligere licet, quod in se impos-

(*Hor. Subf. 1731.*)

Hh

sibi-

sibile, quicquid minus recte factum fuit.

§. 2.

*Veritates  
theologicae  
quomodo  
disting-  
uantur &  
institutum  
uberius  
explica-  
tum.*

Veritates Theologicæ, aut, si ma-  
vis, dogmata theologica duplicis ge-  
neris sunt. Alia enim totidem verbis  
in Scriptura sacra extant, veluti quod  
Deus creaverit cœlum & terram, Gen.  
I. 1. quod Christus natus sit ex Maria  
Virgine, Luc. I. 26. c. II. 7. quod idem  
mandatum dederit Apostolis, ut eun-  
tes in mundum universum prædicarent  
Evangelium omni creaturæ. Alia ve-  
ro ex istis legitimis ratiociniis inde  
colliguntur, qualia in Scriptis Theo-  
logorum haud pauca continentur.  
Quamobrem usum methodi demon-  
strativæ in tradenda Theologia dogma-  
tica eaque revelata explicaturis incum-  
bit, ut ostendamus, quomodo metho-  
do demonstrativa utendum sit in eo  
veritatum genere, quæ immediate ex  
Scriptura sacra hauriuntur, & quinam  
sit ejus usus in iis, quæ ratiocinando  
inde ulterius colliguntur, tandemque  
quomodo hæc cum istis in ordinem re-  
digendæ, ut prodeat systema dogma-  
tum inter se connexorum.

§. 3.



§. 3.

Cum dogmata non admittantur in Theologiam revelatam, nisi quæ vel expressis verbis in Scriptura sacra continentur, vel ex hisce legitime ratiocinando deducuntur; prima omnino cura esse debet, ut colligantur illa, quæ Scriptura sacra expressis verbis docet. Ingens omnino foret labor, si quis omnes Scripturæ sacræ libros attentamente perlegere & propositiones in iis occurrentes excerpere vellet: id quod necesse foret, siquidem omnibus adminiculis destitueremur, quæ alii nobis afferre poterant. Quamobrem cum multi de Theologia revelata dogmatica jam prostant libri, in quibus dogmata theologica in certos articulos rediguntur, veluti de Deo, de Christo, de creatione, de providentia, de justificatione, & præterea extendant Bibliorum Concordantiæ, in quibus notantur ordine alphabetico vocabula in Scriptura sacra occurrentia una cum omnibus locis, in quibus eadem extant; subsidiis hisce in rem suam uti debet, qui veritates omnes in Scriptura sacra totidem verbis contentas col-

*Quomodo  
dogmata  
in Scriptu-  
ra sacra  
contenta  
inde ex-  
cerpenda.*

ligere voluerit. Inscriptio articulorum in systematis theologicis, quæ jam prostant, docet, de quibusnam rebus in Theologia revelata sit agendum. Ex Concordantiis autem discitur, quænam de iis doceat Scriptura sacra. E. gr. in systematibus theologicis extat articulus de Deo. Unde constat in Theologia revelata docendum esse, quænam Scriptura sacra Deo tribuat prædicata. Quamobrem si vocabulum Deus aliaque nomina, quibus idem in Scriptura sacra indigitatur, quæ a Theologis in systematibus suis recensentur, in Concordantiis evolvas; haud difficile erit prædicata vi verborum Scripturæ sacre Deo tribuenda reperire. Consultum vero est, ut vocabula quoque, quibus prædicata Deo tribuenda indignantur, in Concordantiis evolvantur: quod non solum haud raro usui est in genuino significato eorundem eruendo juxta ea, quæ in Trimestri superiori de usu methodi demonstrativæ in Scriptura sacra interpretanda docuimus, verum etiam subinde propositiones quasdam patefacit alias facile prætermittendas. Eodem

dem fine evolvenda sunt loca Scripturæ sacræ, quæ ad probandum dogmata in systematibus citari solent, si qua forsan occurrunt, quæ eo, quem commendavimus, modo non innotuerunt. Etsi enim negari non possit, citari loca complura, quæ prorsus non, aut saltem non evidenter probant, quod probare debebant; hoc tamen non obstante te subinde ad quasdam propositiones systemati inferendas deducant, quæ alias cognitioni tuæ sese subducerent. Quodsi igitur observaveris ea omnia, quæ hic præcipiuntur, dogmata ad singulos articulos spectantia quænam expressis verbis in Scriptura contineantur, abunde innotescet.

§. 4.

Notandum tamen adhuc in numerum propositionum, quæ expressis verbis in Scriptura sacra continentur, referendas esse etiam eas, quarum prædicatum in eadem nullibi quidem occurrit, ejus tamen notionem ingredientia subiecto tribuuntur vel in eodem, vel in diversis locis. Etenim hoc in casu perinde est, ac si definitio legeretur in Scriptura sacra, non vero

*Circa propositiones ex Scriptura sacra excerptas notandum.*

definitum. Quoniam vero definitum ei competit, cui competit definitio (b); idem omnino est, five definitio, five definitum subiecto alicui tribuatur, consequenter qui eidem tribuit definitionem, is etiam dicendus est eidem tribuere definitum. Ita qui dicit figuram aliquam tribus lateribus terminari, cum figura tribus lateribus terminata sit triangulum, dicendus quoque est affirmare, quod figura ista sit triangulum. Exemplum habemus in omniscientiâ divina. Etsi enim terminus omniscientiæ nullibi legatur in Scriptura sacra, ut adeo inter propositiones de Deo ex eadem excerptas non compareat hæc: Deus est omniscius; tribuuntur tamen eidem in sacro codice, quæ notionem distinctam omniscientiæ seu definitionem huius termini ingrediuntur (c). Nemo igitur, nisi qui nodum in scirpo quærit, contradicet affirmanti in Scriptura sacra Deo expressis verbis tribui omniscientiam, non vero demum eam ex aliis attributis, quæ in eadem de Deo enun-

---

(b) §. 349. Log.

(c) §. 303. part. 1. Theol. nat.

enunciantur , ratiocinando colligi. Quando nimirum quæritur , utrum propositio aliqua in Scriptura sacra expressis verbis legatur , nec ne ; non de eo quæstio est , num eadem præcise vocabula , quibus effertur , in Scriptura sacra legantur , sed num in eadem affirmetur , quod horum vocabulorum significatui respondit. Sive igitur vocabula sint eadem , sive diversa , modo idem sit significatus , hoc est , vocabulis diversis eadem res indigentur , affirmatio semper eadem est. Omnis nimirum quæstio ad identitatem rerum , non vocabulorum , quæ sunt earum signa , redit. Multi sunt in Theologia termini , quibus concinne efferruntur dogmata theologica , sed qui in Scriptura sacra non leguntur. Ecquis vero ideo dixerit , hæc disertis verbis non contineri in Scriptura sacra , sed ex aliis dogmatis in eadem propositis ratiocinando demum colligenda esse ? Sane quæ per dicta Scripturæ immediate probari possunt , ea etiam expressis verbis in eadem doceri dicendum est. Absit autem , ut tibi vel aliis persuadere coneris , loquendum esse de

Deo rebusque divinis nonnisi verbis Scripturæ. Cum enim verba nonnisi rerum signa sint, qui dogmata in Scriptura sacra revelata aut saltem inculcata, quatenus rationis quoque lumine eorum veritas agnoscitur, addiscere urget, eum non verborum scrupulositas, sed accurata rerum cognitio juvat. Inprimis autem apprime necessarii sunt termini, ubi dogmata theologica in ordinem digerere volueris methodo demonstrativa, ut sine eorum usu nihil profeceris: id quod quemadmodum in omni scientiarum genere obtinet, ita etiam in Theologia revelata aliter fieri nequit. Et quæ ratio jubet, ne termini in Philosophia semel recepti immutentur (d); ea etiam urget, ut in Theologiam introducti retineantur. Non eadem sentit cum Scriptura sacra, qui verbis Scripturæ loquitur; sed cujus animo notiones inhærent, quæ verbis Scripturæ indigent, siue eas ipse iisdem vocabulis indigitet, siue diversis.

§. 5.

(d) §. 147. *Disc. pralim.*



§. 5.

Quoniam itaque non sufficit verba *Quomodo*  
Scripturæ nosse, sed vim ac potesta- *proposi-*  
tem eorum tenere debet, qui dogma- *tiones ex-*  
ta in illa contenta intelligere voluerit; *plicanda,*  
ubi hæc ex Scriptura sacra excerpta  
ad propositiones determinatas revo-  
casti, in terminorum, ex quibus hæ  
constant, significatum menti Scriptu-  
ræ conformem inquirendum: quod  
quomodo fieri possit, ut de eodem  
non modo ipse certus sis, verum etiam  
alios convincere possis, hunc, non  
aliud esse posse verborum Scripturæ  
sensum, ex iis intelligitur, quæ in Trime-  
stri superiori de usu methodi demon-  
strativæ in explicanda Scriptura sacra  
prolixè inculcavimus. Nolim autem,  
ut hic fidas versionibus, quas idem vo-  
cabulum textus authenticici non sem-  
per eodem reddere in sua lingua nemo  
ignorat, qui versiones cum textu au-  
thentico contulit. Cum Scripturam  
sacram Deo auctori tribuamus in ea lin-  
gua, in qua libri ejusdem ab autoribus  
suis conscripti sunt; verba quoque,  
quibus veritates a Deo revelatæ, vel  
autoritate sua approbatæ efferuntur,  
Hh 5 non

non in versionibus ponderanda sunt, sed in textu authentico. Quamobrem liquet, qui propositiones ex Scriptura sacra extrahere voluerit, eum easdem ex textu authentico extrahere debere, non ex aliqua versione, cum in versionibus prædicata eidem subjecto tribuenda non semper in eodem loco indigentur eodem vocabulo, quemadmodum modo monuimus, adeoque ex versionibus diversis diversæ excerpantur propositiones non tantummodo terminis, verum etiam re. Neque sufficit, utramque propositionem esse veram, ubi quæritur, quid in eo loco doceat Scriptura sacra, & propositio per verba Scripturæ probanda. Ad facilitandum laborem, qui propositionibus ex Scriptura sacra excerpendis impenditur, commendavimus usum Concordantiarum (§. 3.). Quoniam itaque in Concordantiis Germanicis, quarum communis usus est, vocabulis Germanicis adscripta sunt Hebraica & Græca, quæ per ista a *Luthero* vertuntur, non opus est, ut propositiones ex ipso textu authentico excerpas, sed sufficit iisdem Concordantiis obste-

obstetricantibus in idiomate Germanico ex versione *Lutheri* excerptis adscribi vocabula textus authentici. Et horum vocabulorum significatus determinandus eo, quem in Trimestri superiori explicavimus, modo. Exempla complura dedimus in parte prima Theologiæ naturalis, quibus modus eruendi sensum verborum Scripturæ illustratur, ubi consensum Scripturæ cum ratione quoad articulos mixtos demonstravimus. Ibidem quoque passim haud pauca annotavimus, quæ ad genuinum verborum Scripturæ sensum investigandum faciunt, ut adeo nobis brevioribus hic esse liceat. Quod si ultra ea progredi nolueris in concinnando systemate juxta methodum demonstrativam, quæ in systemate aut compendio aliquo theologico traduntur; acquiescere poteris in iis propositionibus, quæ inde excerpuntur, evolvendo dicta Scripturæ, quæ probationis loco allegantur. Etsi enim jam monuimus, accidere subinde, ut nullum illorum dictorum accurate probet, quod probandum erat; hæc ipsa tamen dicta te manuducunt Concordantiarum ope ad alia,

alia, quibus fortior probandi vis inest, ut probatio rigorem demonstrandi sustineat, aut, ubi dictum istiusmodi in Scriptura reperiri nequit, id indicio erit, propositionem vel a veritate esse alienam, vel, ubi vera fuerit, ex aliis demum demonstrandam.

## §. 6.

*Quomodo  
definitio-  
nes nomi-  
nales ver-  
borum,  
quæ in  
Scriptura  
sacra ex-  
sunt, in-  
veniantur  
systemati  
inferenda.*

Quodsi in eruendo genuino verborum Scripturæ sensu nulla ex parte considerari patiaris acumen & industriam tuam; eo ipso reperiēs definitiones nominales terminorum systemati inferendas. In omni scientia humana definitiones nominales arbitrariæ sunt, cum a voluntate tua pendeat, quemnam vocabulis significatum tribuere velis. Et ubi constanter iisdem in eodem significatu uteris, verendum non est, ne propterea incidas in aliquem errorem, modo de realitate definitionis tuæ certo tibi constet: quæ omnia ex principiis Logicæ abunde perspecta sunt. Enimvero non idem obtinet in Theologia revelata, in qua verbis Scripturæ minime tribuendus significatus pro arbitrio tuo, sed is præcise, qui iisdem

iisdem ex mente Scriptorum sacrorum respondet. Quamobrem definitiones nominales singularem quandam demonstrationem exigunt, qua evincitur, eas esse menti Scripturæ sacræ conformem. Cum enim definitiones nominales non modo patefaciant, quale sit subjectum, de quo aliquid prædicetur, & quidnam de subjecto prædicetur, verum etiam inter principia demonstrandi primum sibi vendicent locum; absque illis demonstrationibus nemo certus esse potest, recte affirmari, quod in Scriptura huic subjecto hoc tribuatur prædicatum, quodque menti Scripturæ conformes sint propositiones, quarum demonstrationes tanquam principium definitiones istæ ingrediuntur. Quomodo autem demonstrationes sint concinnandæ, per ea patet, quæ de usu methodi demonstrativæ in Scriptura sacra interpretanda in trimestri superiori tradidimus, & per exempla, quæ consensum Scripturæ cum philosophia stabilituri exhibuimus in parte prima Theologiæ naturalis. Idem nimirum hic observandum est, quod tenendum, ubi systema

ma aliquod philosophicum juxta mentem Scriptoris cujusdam profani condere volueris, veluti si Philosophiam moralem & civilem ex libris Classicis Sinarum a R. P. *Francisco Noël* editis condere tibi propositum. Neque enim hic vocabulis, quibus efferuntur propositiones, attribuendus est significatus, quem alias iisdem attribuere soles, aut in quo eadem accipit quidam inter nos Philosophus; sed demonstrandum utique est, significatum istum esse menti Scriptoris profani conformem, cujus dogmata proponere intendis. Propositiones nimirum excerptere ex libro aliquo philosophico, quem ad manus habes, & conquirere v. gr. ex libris Classicis Sinarum loca, in quibus eadem vel his affinia verba occurrunt, non est tradere Philosophiam Sinarum, sed Philosophi alterius dogmata pro eadem obtrudere. Et quamvis contingat, te non aliena a Sinarum mente proferre; id tamen nonnisi casui tribuendum, nec certus esse potest lector, dogmata illa menti Sinarum conformia esse, quamdiu desunt demonstrationes definitio-  
num



num nominalium, quas hic urgemus. Multo igitur difficilius est systema aliquod juxta mentem alterius cujusdam Scriptoris, quam juxta mentem propriam condere. Quamobrem mihi, qui non eo fine aliorum scripta lego, ut quid hic vel ille statuerit, mihi constet, sed ut in veritate cognoscenda ulteriores faciam progressus, dudum in more positum est, aliorum verba, ubi præsertim dubia sunt aut difficilis interpretationis, per meas explicare definitiones & ex principiis meis, de quorum certitudine non ambigo, tentare demonstrationem: quæ ubi succedit, eam systemati meo infero parum sollicitus, utrum eadem sit menti auctoris consentanea, nec ne. Neque enim eam defendo tanquam placitum hujus, vel illius auctoris, sed tanquam propositionem veritati consentaneam, cum mihi propositum non sit lectorum in notitiam diversorum placitorum celebrium Philosophorum, sed in cognitionem veritatis deducere. Et eundem morem aliis quoque commendando, qui veritatis thesauros colligere & augmentari volunt. Enimvero

ro hoc non succedit in Theologia revelata, ubi sapere debemus ex eo, quod scriptum est, cum quæstio de eo sit, quodnam Deus dicat esse verum. Quoniam in ea sumitur, verum esse, quod Deus dicit, consequenter quod expressis verbis in Scriptura sacra continetur, non demonstrandum est, propositionem, quæ ex Scriptura excerpitur, esse veram, sed terminis, quibus constat, hæc convenire notiones ex intentione Dei, consequenter nos habere mentem Dei, si eos in hoc significatu sumamus, quem ipsis tribuimus.

## §. 7.

*Quomodo  
proposi-  
tiones ex  
Scriptura  
sacra ex-  
cerptæ rite  
determi-  
nanda.*

Antequam vero propositiones, quæ ex Scriptura sacra excerpuntur, in systema inferantur; rite determinandæ sunt, tum quoad subjectum, tum etiam quoad prædicatum, nimirum ut determinetur conditio, sub qua prædicatum eidem tribuitur, & prædicato quoque suæ adjiciantur determinationes, si non omnes in ejus definitione continentur, quales v. gr. sunt restrictiones ac limitationes. Propositiones adeo categoricæ ab hypotheticis eodem

dem modo in Theologia revelata distinguendæ, quo in omni reliqua scientia eas distingui necesse est. Neque enim propositiones veræ sunt, nisi quatenus rite determinatæ, cum veritas earundem in determinabilitate prædicati per notionem subjecti consistat (e), determinata vero propositio tunc demum dici possit, si subjectum sub ea notione repræsentetur, ut in ea contineatur ratio, cur eidem conveniat prædicatum (f), seu prædicatum per subjectum determinetur (g). Quomodo autem determinanda sit propositio, tum ex contextu, tum ex collatione locorum diversorum S. S. innotescit. E. gr. Gen. I. 31. leguntur hæc verba: Vidit Deus cuncta, quæ fecerat, & erant valde bona, sive optima. Quoniam ea leguntur in historia creationis, facere hic idem significat quod creare. Unde propositio huiusce verbis contenta hæc est: Cuncta, quæ Deus creavit, erant optima. Jam ut propositio determinetur, inspiciendus est contextus.

(Hor. Subf. 1731.)

li

Dici-

---

(e) §. 513. Log.

(f) §. 320. Log.

(g) §. 113. 56. Ontol.

Dicitur versu primo Deus creasse cœlum & terram, phrasi nempe Hebræorum, hoc est, mundum. Cuncta igitur, de quibus hic sermo est, ea sunt, ex quibus mundus integer componitur. Vi igitur contextus determinata propositio hanc induit formam: Mundus, qui a Deo creatus, optimus est. Et ita determinavimus hanc propositionem in Theologia naturali consensum Scripturæ cum Philosophia evicturi. Propositionem a te rite esse determinatam, non sumendum est, sed demonstrandum. Alias enim assensum eidem præbendum non resolvitur in auctoritatem Dei, quemadmodum fieri debet, sed in auctoritatem tuam, adeoque humanam, quod Theologiæ revelatæ notioni adversatur. Quomodo autem concinnanda sit demonstratio, partim ex modo dictis intelligitur, partim clarius perspicitur ex demonstratione ibidem allata. Per hanc quoque apparet, propositionem ex accuratiori contextus inspectione quoad prædicatum quoque determinari posse, ut in hanc abeat enunciationem: Mundus, qui a Deo creatus, opti-

optimus est tum in se spectatus, tum in relatione ad ipsum. Sed nolo hic disertius explicare, quæ ibidem legi possunt. Quod si cetera quoque Theologiæ naturalis loca perlustrare digneris, in quibus consensus Philosophiæ cum Scriptura sacra demonstratur; & modus propositiones ex eadem excerpandas rite determinandi, & modus earum determinationem rite factam esse demonstrandi clarior evadet. In Philolophia opus non est, ut demonstrares, propositionem rite esse determinatam. Quoniam enim ex iis, quæ de subiecto sumis, hoc est, ex determinationibus subiecti ratiocinando colligis in demonstratione, eidem convenire prædicatum, prouti in propositione determinatum extat; per ipsam demonstrationem patet, eam rite determinatam esse. Enimvero cum in Theologia revelata propositiones, quæ expressis verbis in Scriptura sacra continentur, non a priori ex notione subiecti demonstrantur, sed tantummodo ostendatur, quod menti autorum sacrorum conformes sint, eas a te rite fuisse determinatas, per verba Scripturæ ostendendum.

§. 8.

*Diversitas  
demon-  
strationum in  
Theologia  
naturali  
& revela-  
ta quoad  
articulos  
mixtos in  
Scriptura  
sacra di-  
fertis ver-  
bis incul-  
catos.*

Etsi adeo articuli, qui a Theologis vocantur mixti, sint propositiones Theologiæ naturali & revelatæ communes, non tamen earundem demonstrationes utrobique eadem sunt. Et enim in Theologia naturali ex notione subjecti concatenata ratiociniorum serie colligitur prædicatum, dum propositionem demonstramus, ut constet eam esse veram; ast in revelata ex ipsis Scripturæ sacre verbis ostenditur, subjectum & prædicatum rite esse determinatum, ut certi simus, eam esse menti ejus conformem. Patet autem nobis hic sermonem esse de iis propositionibus, quæ expressis verbis in Scriptura inculcantur. De hisce enim nunc agimus. Quod si quis propositiones Theologiæ naturali & Scripturæ sacre communes eodem modo in Theologia revelata demonstrare velit, quo in naturali demonstrantur; is Theologiam revelatam cum naturali confundit, rationi consentanea ostendens, quæ Scripturæ sacre consentanea esse ostendere debebat. Aliud enim est docere, quænam Scriptura sacra dicat; aliud



aliud vero ostendere, quænam rationis lumine agnoscantur vera. Illud Theologi, hoc Philosophi est: uterque si facit, quod suum est, muneris sui partes adimplevisse dicendus est. Quemadmodum non probatur, si Philosophus per dicta Scripturæ propositiones, quas demonstrare debet ex principiis rationis, probare velit; ita nec probari potest, si Theologus, quæ autoritate Scripturæ sacræ stabilienda sunt, ex principiis rationis demonstret. Noviequidem esse haud paucos, qui Philosophum Christianum decere existimant probationes per dicta Scripturæ. Enimvero Philosophus qua Philosophus Christianus non est, nec Christianus qua Christianus Philosophus est. Philosophus enim qua Philosophus assensum suum resolvit in rationem, Christianus autem qua Christianus in auctoritatem Dei in Scriptura loquentis. Quamvis adeo Philosophus & Christianus sint unum individuum physicum; duo tamen manent individua moralia a se invicem distincta, quorum diversa prorsus sunt munia quippe rationem suam in diversis prorsus notio-

nibus habentia. Et quemadmodum alias me monuisse memini, quod utile sit philosophiam servari integram, nec eam cum Theologia revelata confundi, & usus hic cedat in ipsum commodum religionis Christianæ; ita etiam utile est Theologiam revelatam cum naturali non confundi in unum : id quod apprime facit ad ejus veritatem contra hostes religionis Christianæ stabilendam, quatenus huc facit consensus fidei cum ratione quoad articulos mixtos & non repugnantia purorum cum iis, quæ in Philosophia demonstrantur, tum etiam ad illius præstantiam evincendam & prærogativam præ aliis religionibus ostendendam. Falso itaque mentem nostram interpretantur, qui aliis persuadere conantur, quasi Philosophiam puram servari contenderemus, ne dictis Scripturæ contaminetur. Veritatis, quam sectamur, studium hoc imperat. Quod si vero esse visum fuerit, consensum eorum, quæ in Philosophia demonstrata sunt, cum Scriptura sacra ostendere, si opportune fiat, minime reprehendimus. Fecimus enim hoc ipsimet in Theologia natu-

naturali, quatenus voluimus eam esse pædagogum ad revelatam. Id enim demum Philosophi, qui idem Christianus est, esse arbitramur, ut arma suppeditet, quibus religio Christiana adversus ejus hostes defenditur. Quod si vero Theologus satisfaciat officio suo, ut methodo demonstrativa in tradenda Theologia revelata omni rite utatur; labori huic supersedere potest Philosophus. Ex collatione enim librorum philosophicorum cum theologicis consensus extemplo elucescit, neque adeo opus est, ut Theologia revelata quoad articulos mixtos de credendis & agendis tota inseratur systemati Philosophiæ. Cum Theologiam naturalem scriberemus, nondum profuit systema Theologiæ revelatæ, ad quod provocare poteramus, eorum, quæ a nobis demonstrata fuerant, consensum ostensuri. Quoniam tamen ad retundendas adversariorum nostrorum calumnias necessitas ipsa urgebat consensum istum a nobis demonstrari; Theologiæ quoque naturali inseruimus, quæ ex ea abesse alias debebant. Cumque nullam prætermittamus

li 4 mus

mus occasionem , qua aliis viam ad scientias excolendas monstrare valeamus ; non inconsultum quoque duximus exemplis docere , quomodo veritates ex Scriptura sacra eruendæ sint demonstrandæ.

## §. 9.

*Termini  
theologici  
cypri-  
nos qui-  
dam &  
num resi-  
endi.*

Nemo ignorat, nisi in Theologia revelata fuerit prorsus alienus a hospes, in libris de ea conscriptis multos occurrere terminos, qui in Scriptura sacra non leguntur. Sane vocabula omnis scientia, providentia, Trinitas, persona divinitatis, unio hypostatica, communicatio idiomatum, voluntas antecedens, voluntas consequens, nullibi leguntur in Scriptura sacra. Immo non minus certum est, occurrere in Scriptis Theologorum vocabula, quæ in Scriptura sacra extant, quibus tamen non idem prorsus tribuitur significatus, quem in illa obtinent. Huc refert *Gürtlerus* (b) vocabulum processionis, quo Theologi indigitare communiter solent modum, quo Spiritus Sanctus essentiam divinam numero

---

(b) *In Institut. Theol. c. 3. §. 250.*

mero unicam cum Patre & Filio communem habet, etsi Joh. XV. 16. unde desumptum est, potius denotet missionem in corda fidelium. Exempla alia non addimus, quæ sua veluti sponte sese offerent ei, qui methodo hic præscripta dogmata theologica in ordinem redigere tentaverit. Hocce vero terminos accensemus theologice, qui in Scriptura sacra non leguntur & ἄγραφος appellari solent. Neque enim verba Scripturæ S. spectanda sunt instar terminorum inanum, quibus nulla respondet notio, cumque significatus sit de essentia vocabuli, terminorum identitas non dijudicatur nisi ex identitate significatus, cum sonus articulatus non sit vocabulum nisi quatenus significativus, quemadmodum blictri nemo habet pro vocabulo Latino, quia nullum habeat significatum, etsi perinde ac gummi sit sonus articulatus. Quamvis adeo non sine manifesta absurditate affirmetur vocabulum aliquod esse terminum Scripturæ, si alius ipsi tribuatur significatus, quam quem in hac habet, cum perinde sit, ac si quis Titium eundem manere homi-

nem pronunciaret, quando per impossibile ponitur animam Mævii in locum animæ ipsius infundi, quasi Titius non esset hic homo, quatenus ex hoc corpore & hac anima constat, solo corpore hominem non constituyente, cum nemine tamen hebetiori, cujus non est ex notionibus distinctis judicare, ea de re litigabimus, sed suo unum quemque sensu abundare sinimus: Sufficit in præsentī negotio terminos, qui in Scriptura sacra non leguntur, & eos, qui in hac quidem leguntur, quorum tamen significatus utcunque immutatur, eodem loco habendos esse, ita ut quod de uno dicatur, accipiendum quoque sit de altero. Nemo igitur Philosophiæ primæ ac Logicæ gnarus reprehendere potest, quod terminos istos ad eandem speciem referamus, aut duas saltem terminorum, qui *ἀγροφοι* dicuntur, species constituamus ex eadem notione generis de iisdem ratiocinaturi. Ceterum terminos istos, qui semel in Theologiam introducti sunt, etsi in Scriptura sacra non legantur, aut in eadem non eundem prorsus significatum obtineant, esse retin-

nen-



nendos, ex iis liquet, quæ paulo ante (§. 4.) diximus. Dogmatum enim Scripturæ sacræ, quæ non ex sono vocabulorum, sed ex notionibus iisdem respondentibus æstimantur, servari potest integritas, quibuscunque tandem vocabulis efferantur, quemadmodum ex adverso vocabulis, quæ in Scriptura extant, retentis dogmata ejus in errores abeunt, ubi a significato, qui eos terminos Scripturæ facit, recesseris & in contrarium a tota mente ejus alienum verteris. Neque existimandum est terminos, qui ἄγροι appellatur, nullius esse usus: neque enim solum faciunt propositionibus determinatis concinne exprimendis, quales requirit methodus demonstrativa; verum etiam usum prorsus insignem præstant, ubi ex iis, quæ disertis verbis leguntur in Scriptura, alia inferenda, quæ in eadem non leguntur, menti tamen ejus consentanea sunt, pro veritatibus revelatis non minus habenda, quam quæ Scriptura disertis verbis dicit, nemine Theologorum contradicente. Sine terminorum usu in nullo scientiarum genere  
amplos

amplos facere licet progressus, nec absque eo in Theologia satis prospicitur orthodoxiæ conservandæ. Quamobrem mihi non probatur illorum ausus, qui omnem terminorum usum in Theologia damnant temere ac promiscue & in solis Scripturæ vocabulis acquiescendum esse contendunt. Perperam enim sibi persuadent, ultra id quod scriptum est sapere velle eum, qui veritates in Scriptura sacra revelatas aliis verbis effert, quam quibus ea utitur, cum is demum sapere audeat ultra id, quod scriptum est, qui notionibus, quæ verbis Scripturæ respondent, aliquid addit, quod ex iis necessaria consequentia deduci nequit, vel etiam demit, quod in iisdem continetur, significatum illorum pro arbitrio suo determinans, vel denique notionem quandam prorsus rejicit. Velim hæc probe perpendant, qui licentiam quandam interpretandi Scripturam introducunt nonnisi enthousiasmi quadam specie defendendam, hoc pacto satisfacere putantes monito Apostoli Col. III. 16. Verbum Christi habitet in vobis abundanter in omni sapientia, parum  
vero

vero intelligentes, quid hisce verbis significetur, quorum significatum pro suo genio determinant.

§. 10.

Termini *ἀγροφοι* accipiendi sunt in *Termini*  
ea significatione, quam obtinuerunt *ἀγρο-*  
ex usu loquendi Theologorum. Ita *φοι quo-*  
men agendum est, ut distincta notione *modo defi-*  
explicentur, eaque rite determinata, *niendi &*  
observatis iis, quæ de definitionibus *quid circa*  
præcipiuntur in Logica. Etsi enim *hasce defi-*  
definitiones occurrant in Scriptis *nitiones*  
Theologorum, aut supponantur ex *observam-*  
Metaphysica Scholasticorum; non ta-  
men hæ sunt satis distinctæ, nec limatæ,  
quales requirit methodus demonstra-  
tiva, seu dictum de omni & nullo  
quo omnis ratiocinatio nititur, ea  
etiam, quæ in definitionum applicatio-  
ne consistit. Dum vero notiones con-  
fusæ, quæ terminis respondent & ver-  
bis minime perspicuis exprimuntur,  
ad distinctas revocantur; haud levis  
requiritur attentio, immo haud raro  
acumen non vulgare, ne significatum  
illorum immutes. Unde eadem sol-  
licitudo animum tenere debet, qua  
signi-

significatus terminorum in Scriptura sacra occurrentium ad mentem Autorum sacrorum determinatur. Quamobrem quæ hoc fine tradidimus in Trimestri superiore, cum usum methodi demonstrativæ in explicanda Scriptura sacra explicaremus; ea in præsentiam negotio subinde usui esse possunt. Et quatenus definitiones verbis obscuris conceptæ, quæ determinationes notionem distinctam ingredients non aperte exprimunt; lucem quandam in eodem negotio affundunt, quæ in Ontologia occurrunt, exempla definitionum Metaphysicæ Scholasticorum per notiones distinctas explicatarum. Quæ igitur particulatim dici poterant, ea prætermittimus lectorem ad Logicam & Ontologiam remittentes, cum abunde convicti simus, in tela præsentis pertexenda utiliter operam suam neminem collocare, nisi Logica & Ontologia intimius perspecta. Memini me alias jam observasse idemque inculcasse, quod notiones confusæ definitioni spurix verbis obscuris conceptæ respondentes vix agnoscantur ab iis, qui de distinctis  
nun-

nunquam cogitarunt , ubi ad distinctas revocantur : ut ea de causa audias querelas de recepto terminorum significato immutato, ubi idem inviolabili lege custoditur. Necesse igitur est, ut demonstres, vocabula per notiones distinctas explicata accipi in significato recepto , quemadmodum demonstrandum erat , vocabula Scripturæ sacræ eo , quo ipsamet explicas, sensu accipi in usu loquendi Autoribus sacris recepto. Demonstrationes tamen non semper eodem modo quo hic procedunt. Etenim ubi terminos Scripturæ sacræ ad notiones distinctas revocas , non definitos definis & ex ipsa Scriptura demonstrandum est, eos ad mentem Scriptorum sacrorum fuisse definitos, hoc est, animo eorundem obversatas fuisse easdem notiones , quas tu cum ipsis jungi jubes. Enimvero ubi demonstrandum est , te terminos Theologorum accipere in recepto significato, ostendendum est, verbis ipsorum obscuris insinuari eas determinationes, quæ notionem distinctam ingrediuntur termino a te attributam.

Exem-



Exempla istiusmodi demonstrationum occurrunt in Ontologia, ubi terminos a nobis distincte explicatos in usu loquendi recepto apud Scholasticos sumi evicimus. Sane verba Scholasticorum plerumque adeo obscura sunt, ut per ea non intelligatur, quidnam sit significatus definiti; sed quæ per exempla animo attento ingeritur notio confusa, eadem & definito & definitioni respondet, quemadmodum accidit in definitione lineæ rectæ ab *Euclide* datæ, quod sit ea, quæ ex æquo interjacet suis terminis, quam nemo intelligit, nisi cui ob oculos quasi versatur lineæ rectæ aut fili cujusdam extensi imago. Exempla tamen a nobis data probant, verba ipsorum obscura respicere eas determinationes, quæ notionem distinctam ingredi debent, ut adeo satis pateat eos idem nobiscum dicere voluisse, modo ea, quæ insunt notioni distinctæ, acute satis distinguere & singula conveniente nomine significare potuissent. Erunt forsitan, qui existimaturi sunt, hanc scrupulositatem non esse necessariam quoad terminos



ἡγεῖσθαι, ne æque reverenter eosdem habeamus, ac verba Scripturæ: immo acutiores nonnulli objicient, falsa verborum Scripturæ interpretatione nos incidere in errores; id quod ex immutato significato terminorum in Theologiam introductorum verendum non sit, modo tu terminis non utaris nisi in eo, quem ipsis tribuisti, significato, nec ab eodem recedas. Enimvero qui sic sentiunt, animum non attendunt ad rationes, cur termini in Theologiam semel introducti non sint immutandi, & cur tanto minus probari possit hic ausus in eo, qui methodo demonstrativa systema Theologiæ revelatæ condere voluerit. In Theologia enim consultum est, ut dogmata eadem iisdem quoque verbis seu terminis efferrantur, ne aliter sentire videaris, qui eadem sentis, & logomachiis nocivis fores pandas: qua in re, etsi lector attentus satisque acutus eas evitare potuisset, non tamen omni culpa & ipse cares, quatenus hebetiorum adeoque plurimorum rationem habere potuisses ac debuisses. Cumque vano licet metu a methodo demonstrativa sibi

(*Hor. Subs.* 1731.) Kk me-

metuant ejus imperiti adeoque plurimi, & nescio quid periculi veritati hinc imminere opinentur ; tanto majore animi sollicitudine cavendum , ne videaris in orthodoxiam peccasse, neque hoc pacto opinionem de periculo veritati a methodo demonstrativa imminentem imperitis , hoc est , plurimis, reddas probabiliorem. Notandum præterea est Theologos in definiendo ut plurimum non satis esse accuratos, cum non in usum demonstrandi definitiones condant, adeoque parum solliciti sint, utrum in definitionibus cumulentur , quæ per se invicem determinantur, nec ne: id quod tamen methodo demonstrativæ e diametro repugnat , quæ requirit definitiones regulis verioris Logicæ ad amussim respondentes, quarum non postrema hæc est, ne definitionem ingrediatur, quod per alia in eadem contenta determinatur, consequenter ex iis demonstrandum. Immo non improbatur Theologis nonnullis, si vel ea omnia, quæ in articulo aliquo de definito demonstranda, definitioni inferantur, ut definitum plenius cognoscatur, & de eo tenen-

tenenda memoriæ facilius imprimantur. Ita definitioni Dei inferunt omnia ejus attributa & operationes: id quod perinde est, ac si in Geometria triangulum defines per figuram planam, circulo inscriptibilem, quæ non modo tribus lineis rectis comprehenditur, sed tres etiam continet angulos duobus rectis æquales, cujus area æqualis est rectangulo ex dimidia basi in altitudinem & quæ usum prorsus insignem habet tum in omni theoria, tum etiam in praxi. Quemadmodum itaque in Geometria triangulum non definitur nisi per figuram planam tribus lateribus terminatam, adeoque non plura sumuntur de eodem, quam quæ sufficiunt ceteris inde demonstrandis, Logica jubente; ita etiam in Theologia in definitionibus sumere non licet, nisi quæ de definito sumi sufficit, ut cetera inde demonstrantur. Secus qui facit, Logicæ ignarum se probat, nec definitionum perspicit usum. Ubi vero definitiones, quæ per regulas Logicæ nomen suum non tuentur, in systema methodo scientifica condendum infert, ipsis statim definitionibus probat, se labori,

Kk 2

ri,

ri, quem aggreditur, esse imparem. Etsi autem superfluum videri poterat talia moneri in eorum gratiam, qui methodum demonstrativam ad Theologiam revelatam applicare voluerint, cum vix præsumi possit fore aliquem adeo audacem, ut huic labori humeros submittat, qui methodi scientificæ adeo ignarus est, ut nesciat, quæ de definito ex definitione tanquam principio demonstranda sunt, ea non ingredi debere definitionem; monendum tamen hoc erat in eorum gratiam, qui cum sint methodi hujus imperiti eamque oderint, judicium tamen de eadem sibi sumunt. Hosce enim offendere definitiones, quales methodus demonstrativa requirit & Logica sola probat, propterea quod videntur nimis jejunæ nec definitum satis declarare putantur, ipsemet expertus sum, cum Theologiam naturalem methodo scientifica pertractarem. Ceterum non adeo facile est, ex definitionibus eliminare ea, quæ per alia in eisdem contenta determinantur. Neque enim hoc in multis casibus perspicitur, nisi ubi demonstrationes jam fuerint absolute.

solutæ, ut adeo artifex in demonstrando & multa rerum cognitione instructus sit necesse est, qui in definiendo ab hoc vitio sibi cavere voluerit, consequenter haud raro opus sit definitiones minus accuratas ex sequentibus demum demonstrationibus limari.

§. II.

Quemadmodum vero in Philo-  
phia definitionum nominalium de-  
monstranda est realitas, antequam ex  
iis certo quidpiam veri concludere da-  
tur; ita in Theologia revelata demon-  
strandum, ea, quæ in definitionibus  
terminorum sumuntur, vi Scripturæ  
sacræ recte sumi, consequenter ens  
istiusmodi dari ex hujus mente, quale  
definitur & termino, qui definitur, in-  
digitatur. Neque enim sufficit osten-  
disse, quod terminis istis non alium  
tribuamus significatum, quam a Theo-  
logis ipsis attributus; verum etiam  
constare debet, Theologos non sape-  
re voluisse ultra id, quod scriptum est,  
nec finxisse a mente Scripturæ sacræ  
aliena. Neque hic requirimus, quod  
non dudum Theologis fuerit proba-  
tum.

*Definitio-  
nes terminorum  
agropho-  
rum quate-  
nam de-  
monstra-  
tiones exi-  
gant.*



tum. Ecquis enim ignorat, quod, quando terminum aliquem ἀγγραφον definiverunt, ex Scriptura sacra probare conentur, ens istiusmodi, quale definiverunt, dari? Inter terminos agraphos refertur providentia. Enimvero ubi explicavere, quid sit providentia, seu quid hoc nomine compelletur; dari providentiam divinam dictis Scripturæ probant. Idem observare licet de Trinitate & de communicatione Idiomatum. Non jam disquirimus, utrum in definiendo & definiti existentia probanda satisfecerint methodo demonstrativæ, hoc est, verioris Logicæ regulis, nec ne. Nobis enim in præsentī sufficit, ab eorum praxi non abhorreere, quod hic urgeamus. Equidem de hisce definitionum demonstrationibus multa moneri poterant, neque enim semper eodem modo procedunt; quoniam tamen in methodo demonstrativa versatus per se videt, quid in hoc vel isto casu fieri conveniat, non opus est, ut hic simus prolixiores, præsertim cum non satis intelligerentur sine exemplis, quæ vero commode non allegantur, nisi ex

syste-



systemate methodo scientifica adornato petantur. Id unum notasse sufficit, quod demonstrationes, de quibus hic nobis sermo est, non differant a demonstrationibus, quibus realitas definitionum nominalium evincitur in Philosophia, nisi in eo, quod principia demonstrandi petantur ex Scriptura sacra, quemadmodum in hisce utimur principiis rationis vel experientiae.

§. 12.

Quod attinet propositiones, quæ *Propositiones quæ expressis* expressis verbis non extant in Scriptura sacra, sed per consequentiam ex eadem deducuntur; has reperire licet, si *verbis non continentur in Scriptura sacra quomodo reperiuntur* ex propositionibus, quæ per dicta Scripturæ demonstratæ fuerunt, ratiociniis legitimis rite inter se concatenatis, quemadmodum jubet methodus demonstrativa, tanquam ex principiis inferantur conclusiones, adeoque ex Scriptura sacra eruuntur vi demonstrationis, sumtis scilicet iis, quæ docet Scriptura sacra. Nihil hic occurrit, quam quod in Philosophia obtinet, ubi ex propositionibus antea demonstratis eruuntur aliæ nondum co-

gnitæ vi demonstrationum ex iis tanquam principiis contextarum. Quod si ergo in methodo demonstrativa fueris versatus, nihil hic difficultatisprehendes. Et quo magis fueris exercitatus in propositionibus aliis ex aliis jam demonstratis deducendis, eo etiam felicius hic progredi dabitur. Qui vero observaverit, quæ hætenus a nobis inculcata fuerunt, facile in Scriptis Theologorum distinguet propositiones nonnisi per consequentiam ex Scriptura eruendas ab iis, quæ per dicta Scripturæ immediate probari possunt, sit ita quod Autor systematis, quo in suo adornando utitur, per alias probaverit, quæ per dicta Scripturæ immediate probari poterant. Etsi autem certitudini fidei non derogetur, ubi per alias propositiones autoritate Scripturæ stabilitas probatur, quod per dicta Scripturæ immediate probari poterat; nobis tamen magis arridet, ne hoc fiat temere, ut evidenter pateat, quænam disertis verbis doceat Scriptura, & quænam nonnisi per consequentiam ex eadem deducantur. Quæ porro hic notanda veniunt, ea annotabimus

mus paulo post, quando de dogmatis theologicis in ordinem redigendis agemus.

§. 13.

Haftenus ostendimus, quænam de definitionibus ac propositionibus condendis observanda sint, ut dogmata theologica penitus intelligantur & accurate enuncientur. Restat ut dicamus, quo ordine singulæ se invicem excipere debeant, & quomodo connectendæ sint, ut systema veri nominis constituent. Patet hoc per leges methodi scientificæ generales alibi (1) expositas; nimirum ut definitiones, quarum definita ingrediuntur definitiones alias, præcedant, eæ autem, in quas illa ingrediuntur, sequantur ac similiter propositiones, quæ ingrediuntur demonstrationes aliarum, ponantur loco priore, hæ autem, quæ per illas demonstrantur, iisdem subordinentur, quemadmodum factum esse videmus cum in Scriptis Mathematicorum, tum in operibus nostris philosophicis, quæ haftenus publicæ luci exposuimus &

*Ordo definitionum  
& propositionum.*

Kk 5

in

(1) *In Disc. prælim. de Philosophia in genere*  
*re. c. 4. §. 119. 120.*

in posterum, quamdiu Deo visum fuerit, continuaturi sumus. Qui ergo methodum scientificam cognitam habet atque perspectam, ejusque usum potestati suæ subjecit, quod utrumque supponendum est in eo, qui systema Theologiæ revelatæ methodo scientifica condere audet; is nihil difficultatis sentiet, præsertim ubi jam satisfecerit monitis anterioribus. Nuda definitionum collatio patefacit, quarum una præsupponit alteram, & ad circum-  
 lum in definiendo vitandum sufficit. Propositiones vero quænam alias præcedere, quænam sequi debeant, vix constare potest, antequam earundem demonstrationes tentes, per quas mutua ipsarum a se invicem dependentia innotescit.

#### §. 14.

*Circa ar-  
 ticulos  
 mixtos  
 quænam  
 in specie  
 observan-  
 da.*

Quoniam systema Theologiæ naturalis non confundendum esse jam diximus (§. 8.) cum systemate Theologiæ revelatæ, adeoque propositiones, quas Theologia revelata cum naturali communes habet, non per se invicem, quem-

quemadmodum in Theologia naturali fieri solet , seu una ex aliis anterioribus , sed per dicta Scripturæ demonstrandæ sunt ; non multam quoad hasce scrupolositatem exigit ordo , rebus magis , quam modo cognoscendi accommodandus , quemadmodum vulgo fieri suevit. Neque enim hic certitudo dependet ab evidentia rationis , quemadmodum in Philosophia & Mathesi , sed ab autoritate Dei dicentis , in quam tota resolvitur. Assensus enim non scientiæ , sed fidei est. Nimirum quæ tanquam vera admittimus in Theologia naturali , quia ea scimus ; eadem tanquam vera amplectimur in Theologia revelata , quia ea credimus fidem habentes Deo ea asserenti. Vides adeo , qui Theologiam naturalem cum revelata confundunt , & in hac articulos mixtos ex principiis rationis demonstrant , scientiam cum fide confundere & scire tantummodo velle , quæ credere debebant. Absit autem , ut tibi persuadeas , nos propterea velle , ut Theologia naturalis negligatur. Etenim id tantum urgemus , ut & scias , & credas , quæ simul sciri & credi possunt.

sunt. Scire est Philosophi, credere Christiani. Non vero convenit te ita esse Philosophum, ut aliqua ex parte desinas esse Christianus, quemadmodum nec necesse est, ut Philosophus esse nolis, quo Christianus sis. Cum Philosophia quoad articulos mixtos consentiat cum Theologia revelata, nil obstat, quo minus idem sit Philosophus, qui Christianus est, scientiam cum fide copulans. Absit, ut fides aliquid detrimenti patiatur ex scientia! Absit vero etiam, ne fides capiat ex scientia nutrimentum! Illud obtinet, si, quæ per dicta Scripturæ demonstranda erant, per principia rationis demonstrantur, hoc est, demonstrationes Theologiæ naturalis in Theologiam revelatam inferuntur, neglectis domesticis; hoc vero consequeris si & Theologiæ naturali, & revelatæ suæ relinquuntur demonstrationes: ita enim assensus, quem resolvīs in auctoritatem Dei, roboratur per assensum, qui nītur evidentiā rationis, utroque in unum coalescente, & sic fides ex scientiā incrementum capit. Immo hoc conveniens est officio hominis erga Deum, quod



quod omnium facultatum nostrarum in Deo cognoscendo usum exigit. Nostrum jam non est dicere disertius de usu, quem Theologia naturalis affert homini Christiano veritatem eorum, juxta in ea traduntur, per Scripturam am edocto: alias haud pauca addi poterant connubium scientiæ cum fide commendatura.

§. 15.

Articulorum purorum alia longe est *Circa articulos puros quænam in specie notanda.* ratio. Eos ita ordinandos esse existimo, ut dogmata sequentia ex aliis anterioribus demonstrantur eodem prorsus modo, quo in Theologia naturali propositiones sequentes demonstrantur a nobis ex antecedentibus. Harum deo propositionum duplex affertur demonstratio, siquidem in earum numero sunt, quæ expressis verbis continentur in Scriptura sacra. Una enim illarum evincitur, eas esse menti Scripturæ ex asse conformes, sive significatum vocabulorum seu terminorum, sive determinationes spectes adjectas: altera vero ostenditur, quod cum aliis dogmatis ita connectantur, ut earum ratio

ratio ex illis a priori reddi possit, ac ideo intelligantur veræ, quia illa vera esse cognovisti, seu quod perinde est, ut unum credatur dogma propter alterum. Duplex adeo hic assensus est, quem eidem dogmati præbemus & in quo actus fidei consistit. Prima demonstratio assensum parit unice ob auctoritatem Dei hoc asserentis; altera vero assensum urget ob evidentiam rationis, qua perspicitur nexus cum veritatibus aliis, quæ fide divina tenentur. Quoniam vero assensui huic posteriori locus non est, nisi prior supponatur, adeoque posterior nonnisi ad priorem accedat; ratio dicitur illuminata, cujus est perspicere nexum veritatum revelatarum, quas sine illuminatione agnoscere non licet. Assensus autem unitus fortior omnino est simplici, adeoque fides per demonstrationes posteriores roboratur. Articulos itaque puros in ordinem redaturus juxta earundem a se invicem dependentiam, primo omnium loco inquirere tenetur, quomodo ratio unius in altero contineatur, ut scilicet per hunc intelligat, cur esse debeat quod

quod illo affirmatur. Ita ex lapsu Protoplastorum & consecuta inde miseria generis humani non modo intelligitur, quod redemptore opus habuerit, verum etiam quali indiguerit redemptore. Quamobrem patet ante agendum esse de lapsu Protoplastorum & miseria humana inde consecuta, quam de redemptione per Christum facta. Similiter ratio sanctificationis redditur ex redemptione per Christum facta. De hac igitur ante agendum, quam ad illam demonstrandum accedas. Idem etiam tenendum de singulis propositionibus ad eundem articulum generalem referendis, Quod si enim aliqua saltem ex parte perspicis dependentiam veritatum revelatarum a se invicem, ubi ipsas demonstrationes tentaveris, haud difficulter animadvertes, quinam unicuique propositioni conveniat locus. Demonstratio nimirum aperte loquitur, quibusnam propositionibus tanquam principiis demonstrandi utendum sit, hæ vero omnes præcedere debent, ne circulum forsitan demonstrando committas. Quemadmodum vero in omni scientiarum  
gene-

genere accidit, ut, si præpositiones in eum ordinem redigere volueris, quem requirit sequentium per antecedentes demonstratio, non omnes de eodem subjecto agentes eodem loco collocari possint; ita idem observabis in Theologia revelata. Quamobrem consultum est, ne articuli generales, per totidem capita disponendi, nimis multiplicentur, nec nimis etiam anxius esse debes, ut omnes propositiones ad eundem articulum generalem pertinentes, si ex objecto delumitur iudicium, de quo in capite agitur, in eodem præcise capite compareant: genuinus enim cuivis propositioni locus est in eo capite, in quo ex propositionibus anterioribus systematis demonstrari potest. Ordinem hunc qui reprehendit, quid sit ordo systemati, quod veritates omnes inter se connexas exhibet, conveniens non intelligit. Censura vero ignorantis cum nulla sit, pro nulla etiam habenda meritoque contemnitur. Non omnia vero dogmata pura ex aliis tanquam le prioribus demonstrari posse, ipsa demonstrationis forma loquitur. In omni  
scien-

scientiarum genere principia quædam demonstrandi prima sumi debent, ut per ea cetera demonstrari possint. Hinc *Euclides* theorematis & problematis præmittit axiomata & postulata, quæ sumit, non demonstrat. Dogmata igitur quædam sumenda sunt, ut cetera ex iis demonstrari possint. Non tamen sumenda sunt pro arbitrio; sed quia Scriptura sacra continentur. Axiomatum a deo locum tenent in Theologia revelata propositiones, quas tantummodo menti Scripturæ conformes demonstrare licet, quarum vero veritas per alias eidem consentaneas evinci nequit. Omnis demonstratio supponit, posito uno necessario poni alterum, scilicet quod, si illud est, etiam hoc sit, atque adeo ratio, quod hoc sit, continetur præcise in eo, quod illa sint. Notandum vero dari etiam rationem, per quam intelligitur, cur quid sit, ubi supponitur, quod sit, etsi per eandem non appareat, quod sit: id quod etiam in Philosophia naturali obtinet, ubi plurimorum phænomenorum, de quorum existentia experientia nos certos reddit, rationem damus

(*Hor. Subf.* 1731.)      L I      mus



mus per ea, quæ ad eorum existentiam probandam minime sufficiunt. Quamvis itaque ex aliis dogmatis anterioribus demonstrari nequeat in Theologia revelata, quod dogma quoddam aliud sit verum, seu quod subjecto prædicatum sit tribuendum; dari tamen adhuc potest ratio, cur prædicatum subjecto conveniat. Hinc propositionum, quæ instar axiomatum sumuntur ad demonstranda alia dogmata pura, reddi subinde possunt rationes, per quas intelligitur, cur prædicatum tribuendum sit subjecto. E. gr. Decretum redemptionis sumendum est autoritate Scripturæ atque adeo propositio, qua idem tribuitur Deo, axiomatis vicem tuetur in Theologia revelata. Hoc tamen non obstante, rationes ab attributis reddere licet, cur Deus genus humanum redimere decreverit. Hæc igitur rationes aut in scholio propositioni indemonstrabili adjecto annotari convenit, aut formandæ sunt propositiones aliæ demonstrabiles veluti in exemplo dato, quod Deum deceat decretum redemptionis: id quod ex attributis divi



nis demonstrare licet. Methodi demonstrativæ gnarus ubi in rem præsentem venit, quid fieri debeat, ne rigori demonstrandi quid decedat, per se haud difficulter judicabit. Qui vero methodum demonstrativam in potestate plena nondum habet, ei parum proderit regularum, quibus obruitur, multitudo. Dedimus exemplum, ubi ratio reddi potest, cur quid sit, etsi demonstrari nequeat, quod sit, a priori scilicet. Sed ecce tibi exemplum aliud, in quo idem non succedit. Ex aliis dogmatis demonstrari nequit, quod detur Trinitas, adeoque articulus de Trinitate sumendus, ubi de altero demonstrationum genere fermo est, cum quo nobis in præsentī negotio est. Enimvero ex attributis divinis nulla reddi potest ratio, cur sit Trinitarius. Qui eam reddere voluerunt, quod detur Trinitas, sibi demonstrandum sumserunt, cumque illam reddere voluerint ex attributis divinis natura etiam nobis cognitis, seu in Theologia naturali demonstratis, Trinitatem ex principiis rationis demonstrari dogma de eadem inter articulos

mixtos ausu minime probando retulerunt.

## §. 16.

*Corpus  
Doctrina  
Christiana  
na quo  
sensu dici  
meretur.*

Quodsi Theologia revelata in hunc ordinem redigatur, ut dogmata a se invicem dependentia manifesto appareat; Corpus prodit Doctrinæ Christianæ, quod jure hoc nomen suum tuetur. Quemadmodum enim in corpore humano & organico quovis alio singulæ partes ita inter se cohærent & eo collocantur ordine, quo a se invicem in usu suo dependent; ita quoque in systemate Theologiæ revelatæ methodo scientifica condito veritates singulæ inter se connexæ sunt & eo ordine collocantur, quo una ab aliis tanquam se prioribus dependet. Si Anatomicus sectione quam accuratissime administrata singulas partes a se invicem separavit & quæ ejusdem speciei sunt, eidem loculamento indidit; non amplius corpus humanum, sed omnes ejus tantummodo partes asservat in certis loculamentis ita repositas, ut earum quamlibet facile reperire possit. Eodem modo si quis tollit nexum veritatum revelatarum, non nisi beneficio metho-

methodi demonstrativæ in apicum  
penitus producendum, & veritates  
tantummodo singulas, quasi nulla ab  
altera dependeret, ad articulos quos-  
dam generales totidem capitibus com-  
prehensos reducit; is non amplius ul-  
la veri similitudine dici potest habere  
corpus doctrinæ christianæ, cum tan-  
tummodo habeat corporis hujus par-  
tes in certas classes redactas & memo-  
riæ causa per certa capita distributas.  
Equidem nemini litem intendam, quod  
corpus doctrinæ christianæ appellet  
librum theologicum, in quo non pri-  
ma ejus saltem rudimenta traduntur,  
sed dogmata omnia coacervantur, cum  
unicuique integrum sit vocabulis pro  
arbitrio tribuere significatum, quibus  
libri sui titulum constare vult; id ta-  
men contendo, si ob quandam simili-  
tudinem cum corpore humano aut or-  
ganico quodam alio liber Theologiam  
revelatam complexus corpus doctri-  
næ christianæ dici debeat, hoc nomen  
non convenire nisi systemati methodo  
scientifica condito. Neque vero est,  
quod objicias, corpus non fore inte-  
grum, si articuli mixti tantummodo

per Scripturæ verba probentur, non vero concatenatis demonstrationibus inter se connectantur, quemadmodum supra inculcavimus (§. 14.). Etenim articuli puri, qui proprie veritatum revelatarum nomine significantur, proprium quoddam constituunt corpus doctrinæ, quemadmodum mixti. Unde corpus doctrinæ christianæ conditurus non opus habes, ut ea inter se connectas, quibus tanquam principiis uteris in connectendis articulis puris.

## §. 17.

*Annexus  
Veritatum  
in Theolo-  
gia reve-  
lata defi-  
ciat, si  
mixta  
non de-  
monstren-  
tur per se  
in vicem,*

Articuli mixti, qui expressis verbis in Scriptura sacra docentur, respectu veritatum pure revelatarum seu articulorum purorum in systema redigendorum & inter se connectendorum spectantur tanquam axiomata, quæ ob auctoritatem Scripturæ sumuntur, non demonstrantur demum ex principiis rationis, ne fides cum scientia confundatur (§. 14.). Quoniam itaque axiomata ex systemate exulare nequeunt, cum in principiorum demonstrandi primorum numero cum definitionibus sint, & cum ceteris veritatibus

tibus connectuntur, quatenus ingrediuntur demonstrationes earundem per modum præmissarum in ratiociniis; articuli quoque mixti, etsi eorum demonstrationes exulent ex Theologia revelata, quæ naturali domesticæ sunt, suum tamen in eadem locum tinentur, quem fides ipsis tribuit, & cum articulis puris connectuntur, dum in hisce demonstrandis iisdem utimur. Non igitur corpus doctrinæ christianæ, quod veriori diximus nomine (§. 16.), pro mutilo habendum, quod articuli mixti, quorum nexus ad Theologiam naturalem spectat, in eodem non eodem modo inter se connectantur, quo puri. Si quis methodi demonstrativæ fuerit gnarus, is satis percipiet, nexui veritatum theologiarum nihil decedere, quod in Theologia revelata mixti spectentur quasi indemonstrabiles. Neque vero hinc inferre licet, quod articuli mixti ex Theologia revelata sint prorsus eximendi, & tanquam cogniti ex Theologia naturali supponendi. Etenim paulo ante (§. 14.) jam ostendimus, Christianum non minus articulos mixtos, quam

puros credere debere. Quamobrem non sufficit, eos in Theologia naturali demonstratos esse, ut sciamus, quod sint veri; verum etiam in Theologia revelata ostendendum, quod sint menti Scripturæ conformes, ut credamus eos esse veros.

## §. 18.

*Quid  
conferat  
ad fidem  
roboran-  
dam me-  
thodus de-  
monstra-  
tiva.*

Enimvero hinc inferre minime licet, quod etiam sufficiat ostendisse, articulos puros esse menti Scripturæ conformes, neque adeo opus sit, ut alii ex aliis a priori demonstrentur, quia articuli puri tantummodo credi debent. Tenendum enim, methodum demonstrativam articulis puris applicatam roborare fidem. Nimirum si articuli puri methodo scientifica digerantur, eorum nexus apparet, qui absque ea minime perspicitur. Nexus hic placet intelligenti ejusque adeo animum insigni voluptate perfundit. Voluptas vero hæc influit in assensum eumque reddit magis immotum, ut scrupuli animo injecti nihil adversus eum valeant, multoque minus hunc ab eo retrahere possint. Quamvis enim appetitus non influere debet in deter-  
mina-



minationem assensus, ne pro vero habeas, de cuius veritate nondum convictus es; ejus tamen in assensum jam determinatum influxus minime dammandus, cum non alius sit ejus effectus, quam ut veritatem, cuius jam convictus es, ames & ne ejus jacturam facias, cures. Hoc vero fidei incrementum non naturæ tribui debet, quod methodi scientificæ fructus videatur. Etenim nexus articulorum purorum inest iisdem per se, divinæ adeo originis, quemadmodum veritates revelatæ ipsæ. Methodus scientifica eundem non efficit, sed tantum patefacit, adeoque nonnisi ad intimiorem veritatum revelatarum cognitionem nos deducit. Methodi scientificæ applicatio consistit in recto usu operationum intellectus, quem intimior veritatis cognitio exigit. Quis vero dixerit, in veritatibus revelatis agnoscendis nos nullum facere debere operationum intellectus usum, ne fides nostra sit opus naturæ? Qui adeo non damnat facultatum nostrarum usum in eruendo verborum Scripturæ sensu & operationibus intellectus locum.

concedit in veritatibus per consequentiam ex Scriptura eruendis, nec propterea veretur, ne fides nostra viribus naturæ tribuatur; is nec damnare potest methodi scientificæ ad veritatum revelatarum demonstrationes concinandas applicationem, ne incrementum fidei naturæ viribus adscribatur. Nullum profecto fidei incrementum naturæ viribus acceptum refertur, et si absque methodo scientifica non acquiratur. Cum enim veritates revelatæ singulæ extra nexum cum aliis habeantur pro veris ob autoritatem Dei eas in Scriptura sacra nobis manifestantis, nexus, qui inter eas ope methodi demonstrativæ detegitur, tanquam nexus veritatum admittitur ob eandem autoritatem Dei, adeoque non minus creditur, quam veritates ipsæ creduntur. Pone hominem, qui autoritatem divinam Scripturæ sacre rejicit: idem nec veritates revelatas pro veris habebit, etiamsi convincatur eas esse Scripturæ sacre conformes, nec earundem nexum agnoscat nexum veritatum, cum certum sit errores etiam inter se connexos esse, ut unus ex aliis eodem

eodem prorsus modo deduci possit, quo veritas una ex aliis vi demonstrationis deducitur. Atque adeo fati-  
liquet, nihil quoad fidem hic tribui naturæ, quod gratiæ erattribuendum.

§. 19.

In Theologia revelata non modo de-  
monstrandum est, propositionem  
quamlibet esse menti Scripturæ sacræ  
conformem, quæ per dicta ejus pro-  
batur (§. 8. 15.); verum etiam articulo-  
rum purorum ut appareat nexus, aliæ  
ex aliis demonstrandæ (§. 15.), & ubi  
ex propositionibus, quarum veritas  
hoc modo adstructa est, aliæ per con-  
sequentiam deducendæ, per se patet,  
quod eodem modo demonstrandæ  
sint, quo in Mathesi & Philosophia pro-  
positiones singulæ demonstrantur.  
Enimvero quælibet demonstratio exi-  
git principia, sine quibus nulla con-  
ditur (*k*). Quæritur itaque qualia in  
Theologia revelata principia demon-  
strandi admittantur. Equidem pro-  
positiones, quæ expressis verbis in  
Scri-

*Principia  
demon-  
strandi in  
Theologia  
revelata.*

---

(*k*) §. 551. & seqq. Log.)

Scriptura sacra inculcantur, & definitiones terminorum in eadem occurrentium, adhibendæ sunt instar principiorum, ubi propositiones alias ex aliis demonstrare volueris, cum omnia quæ hic demonstrantur, credenda sint, adeoque in auctoritatem Scripturæ omnis tandem resolvi debeat assensus; non tamen hæ solæ sufficientia principia sunt, quibus omnis ratiocinatio in Theologia absolvitur, sed ubivis utendum quoque est principiis philosophicis, siue propositionis cum mente Scripturæ conformitas, siue consensus cum ceteris demonstratur. Quamobrem Theologia revelata supponit Philosophiam methodo scientifica pertractatam, antequam eandem methodum ad ipsam transferre possis. Methodus enim demonstrativa non permittit sumi principium ad demonstrandam propositionem aliquam, quod nondum ipsum demonstratum est, nec in indemonstrabilium numero continetur. Eidem adeo contrariatur, si sumantur principia philosophica in demonstrationibus theologicis, quæ nondum demonstrata sunt. Immo pericu-

riculosus est usus principiorum philosophicorum nondum demonstratorum in Theologia. Quodsi enim contingat, ea esse falsa, quod vi illorum colligitur, veritati consentaneum non est. Verendum igitur semper, quamdiu veritatis principiorum philosophicorum convictus non es, ne menti Scripturæ sacræ non sit consentaneum, quod eidem convenire vi illorum concludis, & ne veritatibus aliis repugnet, quod cum iisdem necessario connecti vi illorum colligis. Quoniam itaque usus principiorum Philosophiæ in Theologia in dubium minime revocatur; fatendum quoque est, e re Theologiæ revelatæ esse, ut Philosophia methodo scientifica pertractetur. Vanus adeo est illorum metus, qui verentur, ne quid inde damni ferat religio Christiana. Quodsi principia philosophica, quibus uteris tum in vero Scripturæ sacræ sensu eruendo, tum in conclusionibus inde inferendis, tum in quibusque demonstrationibus theologicis, non fuerint certa, incertitudini quoque obnoxius fit sensus Scripturæ sacræ, eidem obnoxia fiunt.



funt dogmata theologica. Atque hinc periculum imminet religioni christi-  
 næ, cum facile contingat eos, qui in-  
 certitudinem istam animadvertunt,  
 Theologiam revelatam vel contemne-  
 re, vel saltem negligere.

## §. 20.

*Cur de  
 usu Theo-  
 logiæ re-  
 velatæ me-  
 thodo de-  
 monstra-  
 tivâ dige-  
 sta in præ-  
 sentinon  
 dicatur.*

Erunt forsan haud pauci, qui exi-  
 stimaturi, nos methodo scientifica in  
 Theologia revelata carere posse, quæ  
 tamdiu exulavit ex eadem. Atque adeo  
 apprime necessarium videri poterat,  
 ut utilitatem hujus instituti ostende-  
 remus. Enimvero cum prolixior fo-  
 ret tractatio, quam quæ hic locum ha-  
 bere poterat, præstat filere, quam quæ  
 non sufficiunt, dicere, præsertim cum  
 nobis propositum in præsentinon fue-  
 rit methodum scientificam commen-  
 dare, quæ in Theologiam revelatam in-  
 troducatur; sed tantummodo docere,  
 quænam ei observanda sint, qui cum  
 ejus utilitatem agnoscat, eadem in  
 adornando systemate Theolo-  
 giæ revelatæ uti de-  
 crevit.





## III.

## PROGRAMMA.

*De obligatione Ministrorum Ecclesiæ,  
qua tenentur ad docendum popu-  
lum exemplo suo.*

**N**on una homini obligatio est ad <sup>Obligatio</sup> actiones suas voluntati divinæ <sup>docendi</sup> conformandas. Vulgo non sa- <sup>alios ex-</sup> tis agnoscitur, unumquemque obliga- <sup>emplo suo</sup> ri ad docendum alios suo exemplo, <sup>stabilita</sup> quomodo actiones ad normam legis <sup>in genere</sup> divinæ sint componendæ, & præben- dum aliis bene agendi motiva, etsi ob- ligatio hæc non postrema pars sit ju- stitiæ universalis, quam olim recte ur- gebat *Aristoteles*, sed parum intellexe- runt interpretes, quemadmodum in Horis Subsecivis Marburgensibus me monuisse memini, cum in notionem justitiæ J. Cuius Romanis familiarem in- quirerem. Urget eam ipse Servator optimus, genuinus Juris Naturæ Do- ctor, Matth. V, 16. his verbis: Luceat lux vestra coram hominibus, ut videant opera vestra bona. Nec rationi ignota eadem est. Cum enim unusquisque ad alterius perfectionem conferre te- neatur,

neatur, quicquid a se proficisci potest; ecquis dubitet, nos obligari ad docendum alios exemplo nostro, quid fieri ab homine debeat & ad excitandum alios, ut nobiscum in stadio virtutis contendant. Virtutes nimirum sunt, quæ naturam mentis humanæ perficiunt; sicuti ex adverso vitia eandem continuo imperfectiorem reddunt. Enimvero quemadmodum obligationes generales, quæ universum tangunt genus humanum, in certis subjectis ob rationes speciales novum quoddam robur acquirunt, quo aliis magis devinciuntur; ita quoque ea, de qua jam nobis sermo est, eadem de causa artius tenet Ecclesiæ Ministros. Horum enim est docere populum: ipsum autem docendi munus, quod in Ecclesia eis demandatum est, exigit, ut omnem virtutem christianam exemplo suo doceant. Necesse nimirum est, ut ideas virtutum animis suorum auditorum ingenerent, quas intuentes intelligant, quid virtutis, quid laudis sit, ne sibi virtutem consecuti videantur, a qua tamen longissimo intervallo adhuc ablunt. Impossibile autem est,

*Quod peculiariratione tenet Ministros Ecclesie.*

est, ut ideæ lucidæ virtutum solis verbis cum eo communicentur, qui animum iis adhuc vacuum habet. Ad virtutem singularis quædam agendi promptitudo requiritur, quam non capit, nisi qui eam vel in seipso, vel in aliis intuetur. Eadem singularem quandam sinceritatem exigit, actionum externarum cum internis consummatissimum consensum, quem vultus, gestus, vox & verba veritate magistra selecta loquuntur. In singulis apparet, quod verbis ægre describitur, ut intelligatur, sensu autem perceptum fulgore suo mentem percellit. Hac de causa jam olim magnus ille Sinarum philosophus *Confucius* neminem ad docendam philosophiam aptum judicabat, nisi qui ea, quæ alios docere debet, in semetipso expertus factis ostendere posset, quod verbis exprimere minime valeret. Comitatur præterea virtutem singularis animi lætitia, quæ, quoties recte ac bene factorum memineris, eum suavissima quadam dulcedine demulcet, atque in vultum, gestus, vocem ac sermonem ita influit, ut singulis

(*Hor. Subs. 1731.*) Mm. vim

Exemplum  
quam  
vim affe-  
rat verbis  
docentis.

vim quandam prorsus singularem infundat mentem aliorum ad assensum alliciendi & ad appetitum stimulandi. De vi ista loquuntur Præcones verbi divini, quorum probata est pietas, quando ad cor penetrare affirmant, quod e corde procedit. Lætitia ista totum immutans hominem, ut diversus a seipso videatur, in causa est, ut eadem verba a duobus prolata non sint eadem, nec in calamus coniecta eadem permaneant, ubi eorundem efficaciam in animos audientium spectes. Inde est, quod sermo unius attentionem auditorum excitet, conservet & augeat; verba vero alterius eandem fatigent. Lætitiæ hujus sensus efficax est in eorum animis, quibus infunditur. Certissimum enim præbet sinceritatis illius indicium, sine qua virtus ab omni fuce nondum purgata deprehenditur, modo illam per tranquillitatem ejusdem individuum comitem, ex mutatione vultus, gestuum ac vocis verborumque, quibus sermo constat, provido selectu observabilem, ab illa lætitia distingue-

re

re noveris, quæ ex fonte minus lim-  
pido scaturiens vitii quidpiam admix-  
tum habet. Tranquillitas ista pecu- *Quid hic*  
liarem naturam induit in animo homi- *singulare*  
nis christiani. Dum enim imperfe- *obtineat*  
ctionis suorum operum sibi intime *in homine*  
consciis est, tristitia perfunditur ani- *Christia-*  
mus, quæ ideo singulare quid habet, *no.*  
quod vi amoris Dei ob beneficia in  
Christo nobis exhibita invalescentis  
ea perfectissima esse mallet, desiderio  
perfectionis contra impotentiam in-  
urgente. Tristitia ista quasi deprimun-  
tur, quæ lætitia veluti in altum tollun-  
tur, ut adeo absit, quicquid alias in-  
comiti in hoc affectu observatur. Hoc  
facto gaudium, ut effusum, tran-  
quillum efficitur. Enimvero quando  
nam porro homo christianus persuasis-  
simus est, opera sua imperfecta per  
obedientiam Salvatoris perfectissimam  
perfecta reddi ac per satisfactionem  
jisdem a reatu adhærente purgari,  
ut Deo per fidem cum Christo unitum  
nutrienti placeant; voto suo jam com-  
positus hilaritate perfunditur, ut  
anxii desiderii inquietudo tranquillita-

M m 2

tem



*Effectus  
exempli  
Ministri  
Ecclesiae.*

tem turbatura sedetur & amore Dei benefactoris, in benignitate abyssos sapientiæ revelantis, lætitia virtutis comes propria sibi acquirat blandimenta. Omnes istæ perceptiones atque appetitus in unum confusi, ut paucissimis eos a se invicem leparare datum sit, in vultu, gestu, voce ac sermone singulare quid spirant, quod sensu facile percipitur, distincte autem difficillime explicatur. Notandum præterea est fidum Ecclesiæ Ministrum exemplo suo permovere homines, quorum salus curæ ipsius committitur, ut idem sequantur. Sane quemadmodum olim Sinarum Imperatores suo exemplo obligandi subditos ad obedientiam medium omnium optimum esse judicabant; ita ego præstantius quid a Præcone verbi divini fieri non posse reperio, quam si auditores suos factis magis, quam verbis docet, præsertim cum hic docendi modus tanto efficacior deprehendatur, quanto intensior esse solet amor ejus, qui factis magis, quam verbis docet. Abunde igitur perpicitur, quam prægnantes sint rationes,

cur



cur Ecclesiæ Minister præ ceteris hominibus obligetur, ut exemplo suo profit aliis, quamvis eas non omnes recensuerimus odium mali silentio prætereuntes, quod in peccatis reprehendendis mirificæ efficacæ deprehenditur, atque ceteras, de quibus diximus, magis indicaverimus, quam explicaverimus. Specialem hanc obligationem, quæ Ministrorum Ecclesiæ est, urget Apostolus 1. Petr. V, 3. dum eos populo, quem docere debent, exemplo esse jubet. Immo ipse Christus eundem ipso facto docuit: cum enim in his terris Doctoris quoque munere fungeretur, quod officium propheticum appellare solent Theologi, omni Doctoris fidelis obligationi adeo satisfecit, ut, dum personam Sacerdotis tuebatur, suo tamen exemplo simul doceret 1. Petr. II. 21. Vestigia ejus legerunt Apostoli, Auditores suos ad exemplum, quod ipsis præbeant, relegantes Phil. III. 17. 2. Thess. III. 9. Felicem merito prædicamus eam Ecclesiam, cujus Ministri non solum verbis, verum etiam factis docent, horum-

*Quod obligationem præsentem arguat S. S.*

*Vita cur-  
riculum  
Superin-  
tendentis  
Marbur-  
gensis*

que jacturam merito magni facimus. Habet igitur quod lugeat Ecclesia Evangelico - Lutherana hujus loci, quod præmatura morte ipsi ereptus fuerit Vir maxime Reverendus atque doctissimus, *Dn. Joannes Dietericus Schmidius*, Hassiæ Superioris Superintendens & Consistorii Assessor gravissimus, verbi Divini Præco disertissimus, qui per annos complures verbis & factis docuit. Ex honesto toro natus fuit in hac urbe A. 1673. d. 9. Novembris st. v. nec pater ejus, *Joannes Michael Schmidt*, civis ac scriniarius industrius, quicquam prætermisit, quod ad ejus educationem conferre poterat, matre *Elisabetha*, filia *Antonii Kolbii*, viri senatorii ordinis, salutaribus consiliis filiorum regente. A. 1678. & sequentibus in Schola Lutherana publica primis literarum elementis ac principiis religionis christianæ cum imbutus esset, ab Anno 1681. institutione domestica usus in ædibus viri amplissimi *Eberti*, in curia communi Hassiaca Consiliarii, donec A. 1685. illustri Pædagogio, quod hic floret, traditus industriam suam tanto

tanto successu exerceret, ut A. 1691. d. 27. Martii dignus judicaretur, qui ad lectiones publicas dimitteretur. In numerum igitur civium academicorum relatus est Magnifico tunc temporis Rectore *Tilemanno* dicto *Schenck*, S. S. Theologiæ Professore, & eam, quam Præceptoribus classicis probaverat, diligentiam, nunc Professoribus hujus Academiae meritissimis probare cœpit. Usus autem est *Ottonis* & *Brandii* opera in Logica & Physica, *Maji* in Hebraicis, *Riemschneideri* in Moralibus. Ad studium theologicum propius accessurus Metaphysicæ operam navavit, duce viro plurimum Reverendo *Buschio*, Ecclesiæ Evangelico-Lutheranæ Pastore primario, cujus etiam commendatione effectum est, ut eum A. 1693. post mortem patris charissimi liberis suis informatorem præficeret vir Generosissimus *Wilhelmus Hartmannus de Meissenbugk*, rei forestalis præfectus supremus. In theologicis duces sibi elegit Theologos eximios, Viros maxime Reverendos *Fennerum* & *Schwarztenarium*, S. S. Theologiæ Doctores,

quorum ille postea Hassiæ superioris Superintendens, hic vero Professor Theologiæ in vicina Academia Gief-  
fensi factus est. Ad ministerium eccle-  
siasticum bene præparatus A. 1703. ad  
Diaconatum Kirchhainensem, ac po-  
stea A. 1715. ad Marburgensem vocatus  
est, cui cum per quindecim fere annos  
tanta dexteritate præfuisset, ut omnium  
animos sibi conciliasset, singulari exem-  
plo A. 1730. munus Superintendentis  
Hassiæ superioris in ipsum collatum  
fuit. Sed exiguo Eheu! temporis spa-  
tio in tanta dignitate constitutus fuit  
vir de Ecclesia hujus loci meritissimus:  
etenim die quinta Martii ab hora quin-  
ta pomeridiana viribus corporis antea  
vegeti morbi inclementia consum-  
tis animam Deo placide reddidit na-  
tus annos 58. menses 3. ac hebdoma-  
des 2. Mœstissimam reliquit conjugem  
per 29. annorum matrimonium sibi di-  
lectissimam, *Barbaram Gertrudam*, Viri  
quondam plurimum Reverendi *Joan-  
nis Justi Buschii*, in templo parochiali  
Lutherano Pastoris primarii, nec non  
Pastoris in templo Ordinis Teutonici,  
filiam

filiam natu majorem , quam tori sociam adscivit Anno 1703. Ex hoc matrimonio filios quinque, filias quatuor suscepit ; superstites vero relinquit filium nonnisi unicum & filias tres. Lugent obitum conjugis desideratissimi, patris dilectissimi, Præconis verbi divini disertissimi, Superintendentis gravissimi, vidua, liberi, auditores, totus Hassiæ superioris Clerus Evangelico-Lutheranus. Meretur sane Vir de ecclesia optime meritis, cujus memoria Marburgensibus semper sancta futura, ut obitum lugeant boni omnes. *Invitatio ad funus.*  
Ducetur funus a meridie hora prima & exequiæ ritu solemni celebrabuntur in templo parochiali, quibus ut Vos, Generosissimi ac Nobilissimi Cives, frequenter interesse haud dedignemini ea, qua par est, humanitate rogamus. Agedum vero! Doceamus & nos alios factis, etsi nostrum non sit docere verbis, ut, quando supremo rerum Arbitro visum fuerit, e vita hac discedentes eorum numero adscribamur, qui in his terris cum verbis, tum factis docuere mortales

viam salutis, & quos inter ipse Christus eminet! Publicatum Marburgi Cattorum sub sigillo Academiæ majore die 10. Martii A. O. R. 1732.

# IV.

## PROGRAMMA.

### *De Vita longæ Mensura morali.*

*Vita longæ mensura morali unde pendenda.*

*Vitam hominibus qui nam spectant.*

**V**itæ longæ desiderium omnium hominum animis implantatum est, ut mors dudum omnium terribilium terribilissimum dicta, vitæque longa haud postrema felicitatis humanæ pars habita fuerit, ipso Numine sapientissimo reverentiæ liberorum erga parentes præmium vitam longævam decernente. Atat! vitæ longitudinem non annorum numero, sed benefactorum magnitudine ac felicitatis haud fallacis perceptione metiri convenit. Diu vivit, qui bene vixit. Ut discas, qui bene vivat, tecum habita & noris. Ratione præditi sumus, qua inter creaturas mundi hujus ad-

specta-



pectabilis ceteras eminemus. Actiones igitur nostras ad rationis normam componere, non vago arbitrato determinare tenemur. Vitam hominis solum demum vivit, qui secundum rationem vivit. Immo solo isto tempore vixisse censendus est homo, quo vitam hominis vixit. Quamobrem si numerum in eas actionum, quæ juxta rationis normam determinatæ sunt; earum complexus vitam hominis exhibet. Quod si vero numeres actiones eidem contrarias, quas male consideratas affectuum impetus protrulit; earum complexus vitam non hominis constituit. Quando enim homo in actionibus determinandis non rationis sequitur consilium, sed affectuum exequitur imperium; in eo brutis assimilatur, neque in hoc statu vitam hominis vixisse dici potest. Si ergo vita hominis æstimanda est, *Quanam* annorum, quos is in his terris complavit, numerus in ratione benefactorum ad male facta dividendus & *etatis* quæ benefactis respondet pars pro vita hominis accipienda, *pars pro vita hominis accipienda*. Hoc modulo

lo si vitæ longitudinem emetiri vo-  
lueris , quemadmodum debes , ubi  
pretium rebus ex veritate statuendum  
duxeris ; vita quam sapissime brevis  
erit , quæ per plurimos annos conti-  
nuata fuit ; longa vero , quæ pauco-  
rum annorum ambitu continetur.

*An hæc de  
mensura  
moralis vi-  
tae huma-  
na Philo-  
sophia no-  
ta sit.*

Non nova hæc philosophia est , et si  
nimium subtilis videri possit , quæ  
hominem a se ipso distinguit ac in-  
star Vertumni alicujus alternatim in  
varias brutorum species transfor-  
mat. Aut totus fallor , aut *Augustus* ,  
quem loco eminentissimo inter Sum-  
mos Principes constituerat divina pro-  
videntia , eandem professus est. Ec-  
quis enim est , qui nesciat , Imperato-  
rem optimum maximum a vita sua  
removisse idem , quo nemini benefa-  
ciendi occasio sese obtulerat , pro-  
pterea quod Principis maxime esse  
putaret benefacere omnibus. Enim-  
vero non adeo facilis est hujuscemo-  
di vitæ æstimatio , ubi vel diverso-  
rum hominum vitæ inter se confe-  
rendæ , ut quænam alteram excedat  
dilucide constet , vel diversæ unius  
ejus-

*An æsti-  
matio mo-  
ralis vitæ  
longæ fa-  
cilis.*

eiusdemque hominis vitæ partes invicem componendæ, ut quænam earum longior sit, certa feratur sententia. Benefacta non minus, quam malefacta multiplici gradu differunt, ut ad mensuram ea reducere favente Minerva nemo hætenus fuerit ausus. Quæ enim haud ita pridem in Scotia dedit *Franciscus Hutcheson*, etsi ingeniosa sint, nec a veritate abundant penitus, rem tamen tam arduam nondum conficiunt. Verum enimvero homo quoque creatura est voluptatis non minus, quam tædii, ægritudinis atque doloris capax. Ideo felix fieri potest ac infelix, prouti vera ac intemerata voluptate fruitur, vel tædiis, ægritudine ac doloribus torquetur, aut voluptas nocua eidem imponit. Bene igitur vivit, qui feliciter vivit, adeoque & diu vivit, qui feliciter vivit. *Quam ad mensuram vitæ longe porro requirantur.* Quamobrem si vitæ longitudinem ad mensuram revocare volueris, numerum inire debes partium temporis, quibus voluptate vera frui datum fuit. Hæc in unum coagmentatæ constituunt tempus, quod

*Vitæ hu-  
manæ  
longitudo  
quomodo  
determi-  
nanda.*

quod tanquam creatura felix , quæ homo esse debet , vivendo transegiſti. Quodſi vero ex adverſo partes temporis numeres , quibus tibi fal- lax impoſuit voluptas , quas tædiis , ægritudine ac dolore conſumſiſti; pro- dabit reliqua temporis pars , quam ad vitam creaturæ , quam felicem eſſe jubet ſupremus rerum Moderator , perperam retuleris. Vitæ adeo hu- manæ longitudinem determinaturus , annorum numerum dividere tenetur in ratione temporis cum voluptate tranſacti ad tempus , quo tædiis , ægritudine ac dolore angebatur & volu- ptate nocua corrumpebatur animus. Hoc modulo ſi vitæ longitudinem me- tiri volueris , quemadmodum debes , ſi pretium rebus ex veritate ſtatu- endum duxeris ; vita denuo quam ſæ- piſſime brevis erit , quæ per pluri- mos annos duravit ; longa vero , quæ paucorum annorum ambitu contine- tur. Nec hæc nova eſt philoſophia , multo minus paradoxa , ſed ea po- tius , quæ communibus notionibus reſpondet. Quis enim eſt , qui vi-  
tam

am tædiis ac doloribus plenam non  
ro nulla reputet? Vulgo tamen op-  
ido falluntur homines, quod feli-  
itatem non in seipsis, sed extra se  
uærentes calamitates ac fortunam  
uomodocunque adversam felicitati  
inimicam opinentur, cum tamen  
antum absit, ut eidem noceant, ut  
otius ad eam augendam facere pos-  
nt. Divina hæc philosophia est, quam  
ir vere divinus *Paulus* animo com-  
rehendit, inter medias calamitates  
c vexas tantum non intolerabiles læ-  
as, immo ex his ansam gaudendi ar-  
piens. Dicendum itaque est longi- *Ratio lon-*  
adinem vitæ esse in ratione compo- *gitudinis*  
ta numeri ac gradus benefactorum *vitæ.*  
c temporis voluptatis veræ perceptæ.  
ed quid jam nobis dicendum est de *Vita cur-*  
Viro juvene nobilissimo atque doctis- *riculum.*  
mo *Dn. Friderico Wilhelmo Ulnero*, Ju-  
is utriusque Candidato dignissimo,  
ujus gratia hæc præfati sumus? Na-  
is is est A. O. R. 1707. die 22. Apri-  
s, patre *Jo. Helfrico Ulnero*, J. U.  
doctore, Judicii criminalis Asses-  
s, illustris Regiminis Marburgensis  
&

& Curia Hassiacæ communis Advocato & Procuratore ordinario ; matre *Anna Catharina* , filia viri Nobilissimi *Mælleri* , reddituum Camera electoralis , quæ Heidelbergæ erat, Præfecti. A nobis vero jam discessit ad meliorem vitam evocatus proxime præterlapsa die 28. Februarii. Cum adeo ætas ejus nondum annos viginti sex compleverit , vita ejus brevis censeretur debebat , si annorum numero æstimanda foret. Enimvero si eorum rationem habueris , de quibus antea diximus , secus statuendum videtur. Et si enim annos infantia vix ac ne vix quidem egressus esset , cum Anno 1712. die 11. Aprilis matre dilectissima , Anno sequente die 23. Novembris patre charissimo orbaretur ; post mortem tamen eorum educationis curam suscepit avia , viri gravissimi *Ulneri* in curia communi Hassiaca Consilarii vidua , matrona omnium virtutum genere ornatissima , quæ seculum sequiorem commendant. Consiliis suis eandem juvabant viri prudentissimi , qui tutoris munere fungebantur.



gebantur , nimirum Vir Summe Reverendus *Joannes Christophorus Ungevviterus* , nunc Concionator aulicus & in Consistorio, quod Cassellis est, Consiliarius , & vir amplissimus *Wilhelmus Hartmannus Gæddeus* , illustris Regiminis Marburgensis Secretarius. Et quamvis anno 1725. avia quoque decederet ; non tamen consiliis suis eum destituebant viri , quorum in educatione nostri probatam fidem modo laudavimus. A præceptoribus domesticis bene præparatus per integrum quinquennium industriam suam in Pædagogio hujus loci exercuit, ut A. 1724. d. 7. Julii summa cum laude exemptus in numerum civium academicorum referri meruerit. Cum in nostra Academia omnem philosophiæ ac Juris campum ingressus esset ac sub proximis ac celeberrimis hujus Academiae Professoribus egregie profecisset; Lipsiam excurrerebat eruditionis ulterius poliendæ ac uberius amplificandæ gratia. Biennium ibidem exegerat , cum ad nos rediret anno superiore, hæctica , quam a matre hereditariam experiebatur, continuo invalescente, (Hor. *Subs.* 1731.) Nn donec

donec tandem eadem consumptus animam Deo redderet. Totum vitæ spatium, quod divina providentia determinatum, sub directione parentum, aviæ ac virorum prudentissimorum consumpsit & in id incubuit, ut aptus evaderet ad utilem aliquando patriæ operam navandam. Non igitur dubitamus, quin sat diu vixerit, quia vixit sat bene. Nunc ad Beatos abiit, ubi vita sempiterna, longissima sane, quia optima; optima, quia nec peccatis, nec tædiis atque doloribus obnoxia est. Non superest, nisi ut corpori pia iusta persolvamus. Quoniam itaque a meridie hora tertia funus ducetur, ut Vos, Cives Generosi & Nobilissimi, in æde sacra frequentes compareatis & præsentia vestra ultimum Commilitoni honorem deferatis, est quod rogamus. Faxit vero Deus, ut omnes bene vivamus, ne breviter nos vixisse existimemus, si breviorẽ vitæ terminum nobis præfixerit rerum supremus Arbiter, utque ad vitam veræ longam transferamur, quam viventes nonnulli quod bonum est faciemus gaudioque perenni perfruemur! Publicatum Marburgi

burgi Cattorum sub sigillo Academiæ  
majore d. 4. Martii A. O. R. 1732.

## V.

## PROGRAMMA.

*De Virtutibus Regis.*

**I**mperantium est regere Remp. eam-  
que defendere. Regit Remp. qui  
saluti singulorum prospicit, ut ne-  
mo habeat, de quo conqueratur, nisi  
sua culpa. Defendit eandem, qui ho-  
stium insultus valide reprimit eorum-  
que molimina irrita facit. Curat im-  
perans, ut singulis bene sit, non ut sibi  
bene esse opinentur. Fallax enim ho-  
minum de felicitate, fallax inprimis  
vulgi de eadem opinio est: cui in con-  
trarias partes abeunti satisfieri impos-  
sibile est. Eximia igitur in Imperante  
felicitatis scientia requiritur, quam sa-  
pientiam esse dudum evicerunt philo-  
sophi. Quamobrem cum Salomo ad  
dignitatem regiam evectus felix regi-  
men in votis haberet, sapientiam a  
Deo petiit, ut, quæ ad felicitatem suo-  
rum pertinent, agnoscere & quæ ad sin-  
gula

*Imperan-  
tium offi-  
cium.*

*Virtutes  
1. Sapien-  
tia.*

gula consequenda conducunt media exquirere valeret. At quid juvat felicitatem suorum agnosci ab eo, qui imperat? Quid juvat media acutissime perspicere, quæ sint optima, nisi idem felicitatem suorum vehementer cupiat, & ad eam promovendam mediis, quæ cognoscit, utatur? Non cupit suorum felicitatem vehementer, nisi qui ob eandem voluptate afficitur, immo gaudio perfunditur, ut se felicem experiat, dum suorum felicitatem intuetur. Sed nemo ex felicitate alterius voluptatem percipit ac inde se felicem reddit, nisi qui tenerrimo amoris affectu alterum prosequitur. In Imperante adeo eminere debet Amor subditorum sincerus. Amat vero, ut ametur. Vult amari, ut prompte faciant ac lubenter subditi, quod jubet, ne mediis ponatur obstaculum, quibus salus omnium obtineri debet. Vult itaque amari, ut sibi nunquam desit materia gaudendi, finem, quem intendit, consecuto & obedientia suorum delectari consueto. Amat ab altero, qui habet, vel facit, quod placet alteri. Placet, immo maxime placet

2. Amor  
subdito-  
rum.

ab Imperantibus, quorum Majestas fulgore suo mentem venerabundam parentium percellit, vultu gratioso adspici, & alloquii affabilitate exhilarari. Decet adeo, non dedecet vel Regum maximum frons aperta, vultus humanitas, oris comitas, alloquii affabilitas. His enim animos suorum in se trahit, ut, quibus se benignum exhibuerat, ii totos sese ipsi reddant metu in reverentiam abeunte. Nemo unquam reprehendit, omnes potius collaudarunt collaudantque hominem *Carolus V.* militem Hispanum caput inclinando, Italum humerum tangendo, Germanum dexteram ad osculum porrigendo, omnes denique, quotquot ipsum adire dabatur, affabiliter alloquendo sibi conciliantem. Occulta quædam vis fascinandis hominum animos inest popularitati morum, si Majestati permiscetur, inde sublimitatem consecutæ, ut non habeat, quod sit vulgare. Amor si fincerus fuerit, non intra præcordia peccatoris latet, & foras erumpens non in verbis subsistit, sed ad facta properat. Amans sitit felicitatem amati: qui felici-

3. *Morum quædam popularitas,*

4. *Liberalitas.*



Donorum  
Regiarum  
sit.

S. Impu-  
nienda  
modera-  
tio.

licitatem alterius fitit, ad eam promovendam pronus est : qui ad felicitatem alterius promovendam pronus est, is quam pronus sit, haud fallax præbere indicium studet. Parit hinc in Imperantibus subditorum amor liberalitatem in egenos & bene meritos, clementiam in populum universum. Regia dona singulare quid habent, quod, cum sint gratiæ documenta, iisdem insit quod inæstimabile accipienti, ut plus habeant virtutis ad animum exhilarandum, quam thesauri ingentes aliunde acquisiti. Novimus hinc *Augustum*, ut de animis suorum gloriose triumpharet, manus habuisse ad porrigendum & erogandum usitatissimas. Imperans, qui suos amat, odit delicta suorum, personam odisse nequit. Ad poenam igitur infligendam tardus est, nec severum se præbet, nisi ubi salus publica, adeoque amor suorum amorem a sapientia vinci jubet. Ideo *Philippus II.* non indignum se judicabat solari, quos ob delicta condemnaverat : neque enim fecit imperans, nisi quod, ut fieret, ipse suorum amor extorsit, quorum salutem



tem in discrimen adduci pati minime poterat. Quodsi amor imperantis, <sup>6. Fides.</sup> quo suos complectitur, animos suorum sibi devincire debet, magnam sui fiduciam excitare debet. Verborum igitur suorum tenax promissis stare tenetur, ne unquam vana spe animos suorum lactasse videatur. Maxime adeo Regem ornat fides virtutibus ceteris in universum omnibus novum quendam splendorem affundens, eamque vim in animos subditorum infundens, qua opus habent, ut ex popularibus regiæ evadant. Unde celebratur assertum *Alphonsi*, Regis sapientissimi, tantum valere verbum Principum, quantum privatorum hominum iuramentum. Fide hac firmantur fœdera, tranquillitatis & securitatis publicæ tutissima fulcra, ut adeo sine fide adversus exterorum invidiam subditos felices tueri non possit. Enimvero ut Remp. adversus hostes defendat, terror sit hostium, qui imperat. Quamobrem fortitudo inter ceteras <sup>7. Fortitudo.</sup> virtutes Principum semper eminere visa est, ut adeo in bello fortes se præbuerint, quotquot Majestatis suæ gloriam

Nn 4

3. *Vita  
exempla-  
ria*

riam posteris admirationi esse iusserunt. Nil valent leges optimæ, nisi servantur: magis vero valent, ubi non coacte servantur, sed sua quasi sponte fiunt a subditis, quæ iisdem conformia sunt. Quare cum firmitus non obligentur subditi ad faciendum, quod legibus cautum est, quam si Regem habuerint præeuntem, ut factum ejus sit loco imperii; qui supra leges est, in actionibus suis componendis adeo scrupulosus esse debet, ut nemo, qui eisdem subjectus est, magis sollicitè easdem illis conformes efficere possit. Luculenter admodum hoc non uno exemplo confirmant antiquissimi Sinarum Annales, ita ut Liber Carminum, qui in numero librorum Classicorum priscorum Sapientum est, inter optimos modos obligandi subditos dudum retulerit, modum obligandi per exemplum Principis. Nec desunt plurima in Annalibus ceterarum Gentium exempla, quibus idem clarissime evincitur, ut ideo dudum in proverbium abierit: Qualis Rex, talis grex. Enimvero non opus est, ut ad exempla Regum provocem, quo-

quorum sancta nobis memoria est: etenim Rex Regum, supremus totius universi Monarcha, suo mortales docet exemplo, quid fieri ab ipsis debeat, suo ad idem faciendum exemplo eos obligat Matth. V. 48. Neque etiam opus est, ut exempla virtutum regiarum e longinquo petamus. Quicquid enim in Rege commendari potest, id singulari quadam luce in *Eriderico*, Suecorum, Gothorum & Vandalorum Rege, Hassiæ Landgravio, Domino nostro longe clementissimo radiat. Nondum annus elapsus est, cum ea nobis contingeret felicitas, ut Regem ac Principem Q. M. Patrem patriæ indulgentissimum, coram intuitu ac subjectissimo cultu venerari daretur. Ecquis nostrum est, qui non in admirationem & amorem ejus raptus fuerit partim ponderando, quæ videbat, partim animo recolendo, quæ antea audiverat? Et erit profecto nobis admirationi *Eridericus*, quamdiu vitalis spiritus hos reget artus. Ecquis enim nostrum est, qui non admiretur singularem tanti Herois fortitudinem, quam sibi futuris seculis

*Elogium  
Eriderici  
Suecia  
Regis.*

imitandam proponent Heroës ? Ecquis nostrum est , qui non quōtidie experiatur fructus Sapientiæ atque Amoris , qua quoque terras sibi hereditarias regit ? Academia profecto nostra indies novis documentis convincitur , quam provida sit Patris Patriæ vigilantissimi cura , ne quicquam desiderari possit , quod ad formandum Juvenum ingenia & mores quocunque modo conducere videtur. Ecquis nostrum est , qui non totus summa perfunditur voluptate , quoties sibi veluti præsentem sistit vultus humanitatem , oris comitatem , alloquii affabilitatem , quæ nos venerabundos in amorem Majestatis veluti extra nos rapuit ? Ecquis nostrum est , qui non recordetur , quanta liberalitate , quanta clementia usus fuerit , quacunque occasione data , cum præsentia augusta terras hæc exhilararet ? Sed nostrum jam non est excurrere in laudes tantarum virtutum , quas eminente quodam gradu suas fecit *Fridericus* , ut habeant Principes omnis ævi , quas imitentur. Faciet enim id Vir Nobilissimus atque Clarissimus , *Dn. Johannes*

*Invitatio  
ad Orationem  
solemnem.*

*nes*

nes *Adolphus Hartmannus*, Eloquentiæ & Historiarum Professor Publicus ordinarius, Collega nobis conjunctissimus, qui, ut natalem *Friderici*, Regis, Principis ac Domini nostri longe clementissimi, rite celebremus, in solenni Panegyrico *Regem Sago Magnum, Toga Maximum* ut prædicet, omnes ingenii sui nervos intendet. Sacris igitur hisce, quibus Majestatem Regiam pia ac devota mente veneraturi sumus, ut omnes omnium Ordinum Proceres & Generosissimi atque Nobilissimi cives Academici die 9. Maji. Hora 9. antemeridiana in Auditorio Majore ad Lanum interfint ea, qua par est, humanitate rogamus. Publicatum Marburgi. Cattorum sub Sigillo Academiæ majore Dominica Jubilate A.O.R. 1732.

## VI.

## PROGRAMMA.

*De necessitate obligationis positivæ.*

**N**atura homines obligantur ad *obligatio*  
 omne, quod honestum, æquum, *naturalis*  
 justum, rectum ac decorum est. *qualis sit.*  
 Hæc

Hæc obligatio ita insita est naturæ humanæ, ut ab eadem separari minime possit. Quodsi omnibus, quam primum in lucem prodeunt, ea esset mentis perspicacia, ut honestum ab inhonesto, æquum ab iniquo, justum ab injusto, rectum ab eo quod minus rectum est, decorum denique ab indecoro per rationes intrinsecas separarent; nemo foret, qui non honestum potius quam inhonestum, æquum quam iniquum, justum quam injustum, rectum quam id quod minus rectum est, decorum denique quam indecorum appeteret. Enimvero ad tantam mentis perspicaciam ne adulta quidem ætate perveniunt multi, ita ut distinctæ honesti, æqui, justi, recti ac decori notiones non sint nisi paucis, qui literis operam dederunt. Multo autem pauciores sunt, qui in omni actionum genere, quid sit honestum, quid inhonestum; quid æquum, quid iniquum; quid justum, quid injustum; quid rectum, quid minus rectum; quid decorum, quid indecorum certo definire valent. Quære enim ex iis, quorum est omnem actionum moralitatem exacta mentis lance ponderare, quid sit honestum,

*Cur non  
sola sufficiat?*



tum, quid æquum, quid justum, quid rectum, quid decorum & quomodo singula inter se differant; quam sint plerique responsuri magis muti quam pisces, ut in eloquio omne præsidium collocantes dent sine mente sonos, observare icebit. Quære in casu particulari, cur hæc actio sit honesta, cur æqua, cur justa, cur recta, cur decora; aut denuo obnutescere responsuros, aut ab iis rationes ad rhombum minime facientes plerumque afferri deprehendes. Certum tamen est, naturam hominem non obligare ad honeste, æque, juste, recte ac decore agendum, nisi quatenus actionibus honestas, æquitas, justitia, rectitudo & decus inhæret, ut adeo naturalis obligatio efficax non sit, nisi honestate, æquitate, justitia, rectitudine & decencia actionum intrinseca intime perspecta. Ea igitur ratio est, cur obligationi naturali superaccedere debeat positiva, ut metu pœnæ ac spe præmiorum homines determinentur ad agendum & non agendum. Enimvero obligatio ista positiva non extendi potest ad omnes omnino actus, quos attingit naturalis, nisi quamdiu pueri ac adolescentes sub-

*Cur positiva necessaria*

sunt

*Quenam  
optima,*

sunt juri parentum & eorum, quibus  
ipsum educatio commissa est. Unde  
in civitate multæ dantur hominum  
actiones, de quibus nil disponunt leges  
civiles, nec puniuntur malæ, nisi quate-  
nus fini civitatis, salutis, tranquillitatis ac  
securitati publicæ, e diametro adver-  
santur. Neque tamen civilis etiam obli-  
gatio semper suum sortitur effectum.  
Pœnarum atrocitas hæc raro magis  
obest, quam prodest. Hinc Sinæ anti-  
quissimis temporibus jam agnovere,  
non præstantiorem dari modum obli-  
gandi interiores quam exemplum su-  
prioris. Exemplo Regis obligantur  
subditi, exemplo parentum liberi, exem-  
plo Patrisfamilias domestici, exemplo  
Præceptorum discipuli, exemplo Pro-  
fessorum studiosi in Academiis, siqui-  
dem exemplum universale est, ne pravo  
unius corrumpatur, quod bono alterius  
fuerat emendatum. Exemplum vero su-  
prioris vires acquirit ab amore infe-  
riorum, cum in vulgus notum sit nos  
eos imitari, quos amamus. Quamob-  
rem opera danda est Regi, ut ametur a  
subditis; opera danda parentibus, ut  
amentur a liberis; opera danda patrifam-  
miliis,

miliæ, ut ametur a domesticis; opera denique danda Præceptoribus ac Professoribus, ut amentur a discipulis & studiosis. Utinam omnes satis intelligerent, quantum valeat exemplum superioris, quod vim suam acquirit ex amore inferioris! Nullus dubito fore, ut, quorum est obligare alios ad recte agendum, ipsimet recte agerent & amari, quam metui mallent. Ex re Academicæ inprimis est, ut Rector civibus exemplo suo præeat & ab iis ametur. Quamobrem statutis nostris sapienter cautum est, ut Pro-Rector per scrutinium libere eligatur, ne obtrudi possit, cujus vel exemplum non satis probatum, vel qui parum amatur. Illuxit illa dies, quo novus Pro-Rector a Senatu academico eligendus, & electus in Auditorio majore solenniter inaugurandus. Quamobrem vos *Magnif. & Excel-* *Invitatio ad electionem & inaugurationem Pro-Rectoris.* *lentissimos Academicæ Proceres* ad novum Pro-Rectorem eligendum ea, qua par est, observantia convocamus; Cives vero nostros ut actui inaugurationis interfint frequentia sua, humanissime invitamus. P. P. Marburgi Cattorum Calendis Januarii A. 1740. sub Sigillo Academicæ Majore.

CON-

# CONSPECTUS TRIMESTRIS ÆSTIVI.

## I.

*De Differentia notionum metaphysicarum & mathematicarum.* 385

## II.

*De Usu methodi demonstrativa in tradenda Theologia dogmatica.* 480

## III.

*De obligatione Ministrorum Ecclesiae, qua tenentur ad docendum populum exemplo suo.* 543

## IV.

*De Vita longa mensura morali.* 554

## V.

*De Virtutibus Regiis,* 563

## VI.

*De necessitate obligationis positiva.* 571

*Finis Trimestris æstivi.*

HORÆ SUBSECIVÆ  
MARBURGENSES

ANNI MDCCXXXI,

QUIBUS

PHILOSOPHIA

AD

PUBLICAM

PRIVATAMQUE UTILITATEM  
APTATUR.

---

AUTORE

CHRISTIANO WOLFIO,

NUNC

POTENTISSIMI BORUSSORUM REGIS CON-  
SILIARIO INTIMO, ACADEMIÆ FRIDERICA-  
NÆ PRO-CANCELLARIO, JURIS NATURÆ ET GENTIUM  
AC MATHESEOS PROFESSORE ORDINARIO, PROFESSORE  
PETROPOLITANO HONORARIO, ACADEMIÆ REGIÆ SCIEN-  
TIARUM PARISIÆ SOCIETATUMQUE REGIA-  
RUM BRITANNICÆ ET BORUS-  
SICÆ MEMBRO.

---

TRIMESTRE AUTUMNALE.

---

FRANCOFURTI & LIPSIAE, MDCCXXXI.

PROSTAT IN OFFICINA RENGIERIANA.





# HORÆ SUBSECIVÆ MARBURGENSES

*Anni M DCC XXXI.*

Trimestre Autumnale.

I.

*De Rectitudine actionis hominis  
Christiani.*

§. 1.

**R**ectitudo actionis maximū mo- *Institu-*  
menti est in Philosophia mora- *tum Au-*  
li, immo in omni Philosophia *toris.*  
practica. Eam hactenus non expen-  
derunt Philosophi: qua de causa pra-  
xis præsertim moralis multiplici labo-  
ravit defectu. Cum igitur nobis pro-  
positum esset, praxin moralem ab iis,  
quibus laborat, defectibus liberare, &  
methodo demonstrativa omnem usum  
facultatum humanarum in determi-  
nandis actionibus liberis explicatam  
dare; rectitudo quoque actionum hu-  
manarum distincte nobis explicanda  
fuit. Eo fine eandem non modo de-  
finivimus in Philosophia practica uni-

O o 2

ver-

versali (a); verum etiam abunde ostendimus, quænam ad eam requirantur (b), aliaque inculcavimus, quæ ad recte agendum necessaria sunt, & facile agnoscentur ab eo, qui utramque Philosophiæ practicæ universalis partem attenta mente perlustraverit. Monui jam olim & posthac sæpius inculcavi, actionem hominis Christiani, etsi externa specie videatur eadem, plurimum tamen differre ab actione humana, quatenus rationi congrua & naturæ viribus tota debetur, ita ut amplior facultatum usus ad illam requiratur, quam qui ad hanc sufficit. Quamobrem cum rectitudo actionis ab usu facultatum humanarum potissimum pendeat; mirum videri haudquaquam debet, quod rectitudo actionis hominis Christiani differat a rectitudine naturali actionis humanæ. Philosophia nos manducere debet ad Theologiam revelatam, ut adeo Philosophi, qui idem Christianus est, omnino sit ostendere, quomodo, quæ in Philosophia cognovimus, ea nos deducant

---

(a) §. 64. 65. part. 1.

(b) §. 72. & seqq.

ducant ad intimiorem veritatum theologicarum cognitionem. Instituto itaque nostro in Horis hisce Subsecivis maxime convenit, ut doceamus, quomodo ea, quæ de rectitudine actionis humanæ tradidimus in Philolophia practica, nos manuducant ad rectitudinem actionis hominis Christiani distincte perspiciendam.

### §. 2.

Ut vero concinne mentem nostram exprimere possimus, *Actionem Christianam* appellare lubet, quæ editur ab homine christiano, qualiscunque tandem ea fuerit. Hominem autem christianum hic non dicimus, nisi eum, qui est, consequenter qui officio christiani satisfacit. Absit itaque, ut quando actionem christianam dicimus, eam accipias pro actione homini christiano propria, nec cum homine, quoad obligationem tantummodo naturalem spectato, communi. Hisce prænotatis ex eo, in quo consistit actionis humanæ rectitudo, haud obscure colligitur, in quonam actionis christianæ rectitudo consistat. Rectitudinem

*In quonam re-  
ctitudo  
actionis  
christianæ  
consistat.*

actionis humanæ consistere docuimus (c) in convenientia cum omnibus determinationibus hominis essentialibus. Quoniam itaque non minus certæ quædam sunt determinationes, per quas Christianus tanquam persona moralis constituitur; vocabuli significatu non variato, dicendum omnino est: *Rectitudinem actionis christianæ* consistere in convenientia cum omnibus determinationibus christiani essentialibus. Convenit autem actio cum hisce, si per eas explicari potest, cur actio talis potius sit, quam non sit, ac esse debeat. Dixi jam ante, actionum rectitudinem ab usu facultatum pendere. Unde liquet rationem usus earundem reddendam esse ex determinationibus Christiani essentialibus, ubi rectitudo actionis christianæ demonstranda: per eas nimirum intelligitur, cur Christianus hunc debeat facere facultatum suarum usum, ut recte agat. Quod si itaque nobis jam propositum esset theoriam rectitudinis actionis christianæ condere, ex ipsa notione christi-

---

(c) §. 65. part. 1. *Phil. pract. univ.*

christiani demonstrandum foret, quænam ad hanc rectitudinem requirantur, consequenter quinam sit facultatum humanarum ulus, ut a rectitudine nulla ex parte deficiat actio christiana. Enimvero quamvis præsens institutum non patiatur, ut theoriam adeo exasciatam demus; ea tamen in medium allaturi sumus, quæ ad eam intelligendam sufficiunt, suppositis iis, quæ de rectitudine actionum humanarum in Philosophia practica universalis a nobis demonstrata fuerunt.

## §. 3.

In actione humana recta nihil desiderari debet ex parte intellectus (d). Quamobrem, nec in actione christiana, ut recta sit, quicquam ex parte intellectus desideretur necesse est. Intellectus est ferre iudicium de actionis bonitate & malitia. Ex aliis autem principis actionem bonam vel malam esse iudicat homo christianus, quam qui solo rationis ductu vivit. Qui solo ductu rationis vivit, in intrinseca actionum bonitate & malitia acquiescit &

*Quanam  
ex parte  
intellectus  
requiran-  
tur ad re-  
ctitudi-  
nem actio-  
nis chri-  
stiana.*

O o 4

ubi

(d) §. 79. part. 1. Phil. pract. univ.

ubi pietatem philosophicam virtuti reliquæ omni jungit, quemadmodum jungere tenetur, eas per attributa divina tanquam motiva determinabiles & inprimis voluntati divinæ conformes agnoscit. Enimvero homo christianus actionem judicat bonam, quia a Christo præcepta, adeoque voluntati ipsius conformis. Præcepta autem intelligitur a Christo non modo si ipse disertis verbis eam urget in Evangelio, veluti quando inimicos diligere a nobis jubet; verum etiam quatenus approbavit ea, quæ Deus in Scriptura sacra jubet, & a nobis fieri vult, ac ubi denique ab Apostolis, qui mentem Christi perspectam habuerunt, actio præscribitur. Christianus nimirum vitam omnem voluntati Christi conformare debet, adeoque actionem eam judicat esse bonam, consequenter patranda, quæ voluntati ipsius convenit. Vivit nimirum Christianus vitam rationi conformem, quia Christus vult, ut eandem vivamus: vivit vitam voluntati divinæ convenientem, quia Christus vult, ut voluntatem Patris ipsius cœlestis faciamus. Videmus adeo judicium practi-



practicum Christiani resolvi in voluntatem Christi: cum tamen idem homo sit, qui Christianus est, servusque Dei tanquam Domini supremi omnium hominum, iudicium ideo simul resolvitur in bonitatem intrinsicam actionis & voluntatem divinam. Atque hinc apparet, quid superaccedat iudicio hominis christiani de bonitate actionis, scilicet quod ea quoque sit voluntati Christi conformis, cum homo qua homo tantummodo iudicet, actionem esse committendam, quia intrinsece bona, &, ubi se considerat tanquam servum Dei, addat, quia voluntati Dei conformis. Nequaquam vero existimandum est, quasi parum referat, utrum actio aliqua spectetur tanquam voluntati Christi conformis, nec ne. Patebit enim deinceps, quod iudicium hac ratione nixum influat in determinationem voluntatis, ad quam tanquam ad scopum tendit omne de actionis bonitate iudicium. Iudicium practicum de committenda actione voluntati Christi conformi supponit obligationem actionem committendi, quia voluntati Christi

sti conformis. Obligatio hæc deducenda est ex ipsa notione Christi. Et enim si actiones nostræ voluntati Christi conformare tenemur, necesse est, ut detur ratio, cur hoc fieri debeat, & hæc ratio desumenda ab eo, quod de Christo credimus. Christianus Christum, a quo nomen habet, redemptorem suum esse agnoscit, adeoque benefactorem summum. Quamobrem & ipsa lege naturali, & voluntate Dei positiva obligamur ad animum gratum eidem exhibendum, consequenter ad eum maxime amandum. Hic amor motivum est, ut voluntatem nostram voluntati Christi, subjiciamus, adeoque voluntati ejus actiones nostras conformemus, quantum patitur obligatio naturalis, quæ eadem cum divina. Enimvero constat Christum legem naturæ contra corruptiones Phariseorum integritati suæ restituisse, neque adeo velle aliud, quam ut eidem, consequenter voluntati divinæ, a lege naturali non diversæ, actiones nostras conformemus. Quamobrem nil repugnat, quo minus actiones omnes ad voluntatem Christi componamus, atque

que adeo obligatio, quæ ab hac voluntate venit, cum naturali & divina prorsus consentit. Etsi adeo actio voluntati Christi conformis eadem sit cum actione legi naturali consentanea, quatenus discefferis ab iis, quibus salutem a Christo nobis acquisitam apprehendimus; non tamen propterea superfluum est hominis Christiani de actionis bonitate iudicium. In hoc enim iudicio actus singuli spectantur tanquam debiti ex animo grato & idem agenti insinuat intentionem Christo placendi, quæ nec in eo est, qui in agendo solam obligationem naturalem respicit, nec in eo, qui eidem pietatem jungit, obligationis divinæ habita ratione. Hæc ipsa autem intentio ubi accedit, propositum agendi efficitur magis constans, & exercitium virtutis hinc facilius redditur. Nemo non videt, quam ampla foret tractatio, si singula, quæ diximus, demonstrare vellemus. Quamvis vero demonstratio singulorum ex principiis nostris philosophicis, & quæ tanquam concessa sumi possunt ac debent, theologicis dari poterat; tam vastum tamen

men dicendorum campum hic ingredi minime licet. Ceterum ideo diximus, non expectandam hic esse theoriam completam rectitudinis actionis christianæ; sed nobis tantummodo propositum esse ea indicare, quæ ad ipsam intelligendam sufficiunt, scilicet ut excitemus aliorum diligentiam, quibus plus otii est ad theoriam istam condendam. Ex iis, quæ de iudicio, quod de actionis bonitate ferendum, diximus, haud obscure intelligitur, quid sentiendum sit de iudicio, quod homo christianus ferre debet de malitia actionis. Nimirum actionem malam judicare debet, quæ voluntati Christi contraria, adeoque ad rectitudinem actionis christianæ privativæ requiritur iudicium practicum, actionem hanc esse omittendam, quia Christus eandem omitti vult. Supponit hoc iudicium eandem obligationem, qua nititur iudicium de actione committenda. Et quod idem non sit superfluum, eodem prorsus modo patet, quo ostendimus, iudicium de actione positiva superfluum non esse. Christianus adeo iudicium suum de actionis

nis

nis bonitate & malitia resolvit in auctoritatem Christi, dum judicat actionem hanc esse bonam, quia Christus eam committi vult, aliam esse malam, quia idem eandem committi non vult, seu vult omitti. Pro certo nimirum habet, illud esse verum, quod Christus dicit falli nescius, & illud esse bonum, quod idem urget ab omni labe peccati immunis, nec malo delectatus. Agnoscit itaque Christum esse Doctorem a Deo nobis datum, qui & verbis, & exemplo suo nos docet: id quod ad munus ipsius propheticum referunt Theologi. Hinc sequitur, hominem christianum, quod actionis bonitatem ex voluntate, malitiam ex voluntate Christi metitur, Christum venerari tanquam Doctorem suum a Deo sibi datum, seu tanquam Prophetam, hoc est, interpretem voluntatis divinæ infallibilem, si phrasi Theologorum loqui aures. Ipsa lege naturali obligamur ad honorem debitum unicuique deferendum. Quamobrem ex ipsa obligatione naturali descendit obligatio actiones suas voluntati Christi conformandi: quæ ipsa obligatio naturalis.

turalis divina confirmatur. Disertis enim verbis Deus jussit voce cœlitus delapsa, cum Christus baptizaretur, ut dicto ipsius simus audientes. Idem hic obtinet, quod in pietate christiana, ubi judicium de actionis bonitate & malitia resolvitur in autoritatem Dei dicentis & practicum de illa committenda, hac omittenda in autoritatem Dei jubentis & prohibentis, ita ut homo christianus faciat, quod bonum est, & omittat, quod malum est, ut actiones suas ad voluntatem Numinis componat divinitas nobis revelatam. Manet adeo ratum judicium hominis christiani theoreticum de bonitate & malitia actionis resolvi debere in autoritatem Dei ac Christi; practicum vero in Dei ac Christi voluntatem, siquidem ex parte intellectus abesse debet defectus rectitudinis actionis christianæ. Atque hinc elucet necessitas agenda, quæ in Jure naturæ demonstrantur, in Theologia naturali ex dictis Scripturæ probandi, quemadmodum articuli mixti in Theologia revelata dictis Scripturæ probantur.



## §. 4.

Erunt forsan aliqui, qui existimatu- *An judi-*  
 ri sunt, omnem demonstrationem bo- *cium de*  
 nitatis ac malitiæ intrinsecæ actionum *bonitate*  
 humanarum in Philosophia esse super- *& mali-*  
 fluam, cum sufficiat ex Scriptura sacra *tia intrin-*  
 ostendisse, hæc actiones a Deo atque *seca actio-*  
 Christo dici bonas, illas vero malas, ac *num a re-*  
 velle Deum & Christum, ut hæc actio- *ctitudine*  
 nes committamus, illas vero omitta- *actionis*  
 mus. Sane ita sensisse *Lockium* ex epi- *abesse pos-*  
 stolis, quas ad *Molynesium* conscripsit, *sit.*  
 constat. Et eodem jure rejicienda erit  
 pietas philosophica, quæ demonstra-  
 tionibus philosophicis tota nititur.  
 Enimvero aliter mihi videtur, non  
 obiter quæstionem præsentem inspi-  
 cienti, sed curatius eandem expenden-  
 ti. Qui actiones suas per bonitatem  
 & malitiam intrinsecam earundem de-  
 terminat, adeoque judicium de mora-  
 litate earundem ex hoc fonte derivat,  
 pietatemque philosophicam demon-  
 strationibus Theologiæ naturalis su-  
 perstruit; is vitam hominis vivit &  
 Deum tanquam creatura intelligens  
 veneratur, seu Deo vivit. Enimvero  
 homo dum Christianus fit, non desinit  
 esse

esse homo, nec creatura intelligens, Quamobrem nec obligatio naturalis per eam, quæ Christiano propria extinguitur. Quamobrem qui vitam Christiani vivit, vitam adhuc hominis vivere debet, & pietas philosophica cum christiana conjungenda. Nimirum vita hominis & vita christiana non sibi mutuo contrariantur, sed potius si actionem externam spectes, eadem utraque est: differunt enim tantummodo ex parte intellectus, quæ quippe differentia jam sola attenditur, principio cognoscendi & obligationis specie. Per diversa cognoscendi principia idem agnoscitur verum, & omnes obligationis species ad idem agendum & idem non agendum tendunt. Ex parte adeo objecti nil obstat, quo minus idem ob multiplicem rationem agnoscatur verum & idem fiat vel non fiat ob multiplicem obligationem. Quodsi objicias ab omnibus hoc fieri non posse, ut judicium sive theoreticum, sive practicum de actionum moralitate per diversa illa principia cognoscendi una determinent & a tam multiplici obligatione simul deducant: lubens

lubens concedo, hebetioribus non convenire demonstrationes exasciatas de actionum intrinseca bonitate & malitia, quemadmodum nec ipsorum captui accommodatæ sunt demonstrationes rigidae de genuino verborum Scripturæ sacrae sensu, sine quibus non intelligitur, quid Deus atque Christus a nobis fieri velit. Quod tamen condonandum est nonnullorum infirmitati, id idcirco non desinit esse officii nostri: nec qui ampliorem usum facultatum suarum facere potest, ut eodem cum infirmiori loco sit, ab eo abstinere tenetur. Ex praxi morali constat, quam suo tempore demonstratum sumus, nonnisi ampliori facultatum usu obtineri ab acutioribus, quod acutiori obtinetur ab hebetioribus.

## §. 5.

Si actio recta esse debet, nihil desideretur necesse est ex parte voluntatis & voluntatis (e), consequenter harum quoque facultatum usum facere tenemur, qui actioni christianæ consentaneus. Objectum ideo volitionis esse  
 (Hor. Subf. 1731.) P p debet

*Quenam  
ad recti-  
tudinem  
actionis  
christianæ  
requiran-  
tur ex  
parte vo-  
luntatis.*

(e) §. 79, part. i, *Phil. pract. univ.*

debet actio bona, nolitionis mala (f). Quoniam itaque homo christianus actionem bonam esse judicat, quam Christus committi vult, malam vero, quam vult omitti seu committi non vult (§. 3.) ; rectitudo actionis christianæ requirit, ut voluntatem nostram subjiciamus voluntati Christi. Cumque pietas ab actione recta abesse nequeat, ea autem exigat, ut per voluntatem Dei voluntatem nostram determinemus, cui voluntas Christi ex assensu consentit ; rectitudo etiam actionis christianæ postulat, ut voluntatem nostram voluntati divinæ ex Scriptura sacra agnitæ submittamus. Unde actus volitionis involvit abdicationem voluntatis propriæ, ita ut actionem committere velimus, quia Deum & Christum, eadem a nobis ut committatur, velle certi sumus, si vel maxime voluntas nostra ab appetitu sensitivo pendula feratur in contrarium, & similiter actionem aliam committere nolumus, quia Deum & Christum nolle convicti sumus, ut eadem a nobis com-

mit-

---

(f) §. 80. loc. cit.

mittatur, etiamsi voluntas nostra ab operatione sensitiva pendula propendeat in contrarium. Theologi abnegationem sui appellant: cum qua quod nodo dicta consentiant, facile ostendi poterat, siquidem prolixioribus esse liceret. Multa hic dicenda forent, quæ ad intimiorem intellectum dictorum Scripturæ sacræ sensum faciunt, in actionis christianæ rectæ theoriam & instituto conderemus. Sufficit itaque excitasse attentionem acutiorum, ut propria meditatione suppleant, quæ prætermittere cogimur. Monui plus simplici vice, quemadmodum, ut actio humana recta sit, voluntas & voluntas determinanda est per motiva a bonitate & malitia actionis intrinseca desumpta, prouti scilicet vel positiva est, ut eam velimus, vel negativa, ut eam nolumus, & in pietate etiam philosophica per motiva ab attributis divinis desumpta; ita virtutem christianam requirere, ut voluntas & voluntas determinetur per motiva a Christo, consequenter ab opere redemptionis totaque æconomia salutis desumpta. Actio itaque christiana recta esse nequit, nisi



voluntas & noluntas determinetur per hæc motiva. Eo fine in Theologia morali explicari debebant hæc motiva, tum generalia, quæ locum habent in omni actionum genere, tum specialia, huic scilicet vel isti actionum speciei propria. Cum nostrum jam non sit Theologiam moralem tradere, quæ integrum volumen requirit; de hisce motivis disertius dicere nostrum jam non est. Unum tamen adhuc moneri necesse est, ne prætermittamus, quod ab actione christiana recta abesse nequit. Christus nos non solum docet verbis, quæ in Evangelio leguntur, & mentis ejus conformiter a discipulis ejus Apostolis proferuntur; verum etiam exemplo, quod imitari jubemur. Unde actiones hominis christiani, siquidem rectæ esse debent, ex iis propullulent necesse est virtutibus, quibus Christo reddimur similes. Ex parte igitur voluntatis requiritur actus volitionis, quo Christo similes evadere volumus eum in agendo & non agendo imitantes. Motiva adeo quoque in actione recta desumenda sunt a virtutibus Christi, quas ex ejus actionibus seu vita ejusdem



dem morali colligimus. Quamobrem  
patet in Theologia dogmatica in usum  
Theologiæ moralis locum dandum es-  
se integro capiti de vita Christi mo-  
rali, in quo ex actionibus ejus, quæ  
in Historia evangelica recensentur,  
educantur virtutes ipsius morales &  
quæ cum his necessario connectuntur,  
per legitimam consequentiam inde  
porro eruantur. Immo cum ipsum  
quoque Deum imitari jubeat Christus  
& voluntas nostra per voluntatem  
ipsius determinanda sit; si ex parte vo-  
luntatis ac noluntatis circa actionem  
christianam nullus notari debet defe-  
ctus, actus voluntatis & noluntatis in-  
olvere etiam debet volitionem, qua  
Deo assimilari volumus, & hinc in de-  
terminando illo motiva quoque desu-  
menda a studio imitandi Deum & at-  
tributis moralibus divinis, quatenus  
ipsam voluntas Dei atque Christi, ut  
Deum in agendo & non agendo imi-  
temur, quam attributa moralia per  
scripturam sacram nobis innotescunt  
& quæ de iis agnoscimus ob ejus au-  
toritatem admittuntur tanquam vera,  
hoc est, quatenus ea credimus, quæ de

Deo ac Christo ac utriusque consentiente voluntate dictitat Scriptura sacra. Atque hoc modo patet, quomodo fides influat in determinationem voluntatis hominis christiani, ut ideo bona opera Christianorum ex fide proficisci dicantur a Theologis. Enimvero fides adhuc alio modo influit in actiones Christianorum, ac influere debet, si nullus in iis adesse debet rectitudinis defectus. Nimirum pietas philosophica, a qua amor Dei sincerus sejungi nequit, jam exigit studium placendi Deo, quemadmodum amoris proprium est, ut amans placere studeat amato: id quod non minus a posteriori constat, quam ex ipsis notionibus amoris & placentiæ (quod vocabulum in bono significato sumi rei minime repugnat) a nobis alibi (g) datis a priori demonstrari potest. Enimvero cui perspectum est, quantum requiratur ad rectitudinem actionis, ut bona dicimereatur (neque enim juxta pervulgatum canonem bonum est nisi ex integra causa); is abunde sibi conscius est,

est, quantum actiones suæ, externa licet specie bonæ, a rectitudine adhuc absint. Neque difficile est ex principiis Theologiæ naturalis demonstrare, quod Deo non placeat actio nisi omnimode recta. Unde a Theologis opera bona hominum vocantur merito imperfecta, & nos eorundem imperfectiorem suo tempore in Philosophia morali luculenter demonstratum sumus. Constat vero ex principiis Theologiæ revelatæ, huic defectui mederi, quatenus fide cum Christo uniti meritum ipsius nobis applicamus, cujus quippe perfecta obedientia supplet defectum rectitudinis in actione nostra & cujus expiatio tollit imputationem defectus eidem inhærentis, ut adeo opera nostra imperfecta censeantur perfecta, Deoque placere possint. Hinc denuo recte affirmatur a Theologis, nos Deo placere non posse nisi in Christo. Ad rectitudinem igitur actionis christianæ requiritur quoque fiducia in Deum, quod is vi meriti Christi actiones nostras imperfectas pro perfectis, seu omnimode rectis habeat, adeoque eadem ipsi placeant. Quinam hinc re-

P p 4

sultet

sultet status animi hominis christiani, ex principiis psychologicis demonstrari potest; sed hæc ipsa demonstratio extra limites instituti præsentis nos abduceret. Hinc denuo patet, quomodo fides influat in actiones hominis christiani, & quomodo eadem ex fide procedant, immo procedere debeant, ut rectitudinem omnimodam consequantur. Utinam qui Theologiæ operam navant, ad eam non accederent, nisi Philosophia methodo nostra pertractata probe imbuti, aut hujus saltem studium cum illo conjungerent, prætereaque in Theologia revelata eodem modo progredierentur, quo nos in Philosophia progredimur, ea observantes, quæ in trimestribus anterioribus de usu methodi demonstrativæ in explicanda Scriptura sacra & tradenda Theologia revelata dogmatica annotavimus! Nullus enim dubito fore, ut religionis christianæ veritas & necessitas intimius perspiciatur, & profanitas, de qua hodie tot tantæque ubivis moventur querelæ, profligetur.

## §. 6.

Facultates animæ inferiores serviunt facultatibus superioribus, quemadmodum nemo ignorat, qui ulum facultatum superiorum perspexit. Unde Ordo naturæ pervertitur, si facultates superiores serviant inferioribus, & in hoc illarum consistit abusus. Hinc in actione recta adesse debet consensus facultatum superiorum & inferiorum, rectitudini autem omnimodæ repugnat earundem dissensus. Diximus de hoc consensu & dissensu in praxi necessario in Philosophia practica universali (*b*), ut adeo opus non sit utrumque hic a nobis explicari. Consentit sensus & imaginatio cum intellectu, si, quod intellectus tanquam bonum vel malum nobis repræsentat, idem quoque ut tale exhibent sensus atque imaginatio (*i*). Intellectus hominis christiani actionem repræsentat tanquam bonam vel malam, quatenus eam repræsentat tanquam a Deo & Christo præceptam. Cum eodem adeo sensus & imaginatio non aliter in consensum

*Quenam ad rectitudinem actionis christiana requirantur ex parte facultatum inferiorum cognoscendi.*

(*b*) §. 575. & seqq. part. 2.

(*i*) §. cit. 575. part. 2. Phil. pract. univers.



sum reduci possunt, quam si repræsentatio in intellectu obfuscet eam, quæ est in sensu & imaginatione: quod fieri haud quaquam potest, nisi tantus sit sensus certitudinis iudicii intellectus, ut sensus & imaginatio habeantur pro fallacibus, nec ulla ad eos attentio adhibeatur. Certitudo iudicii intellectualis pendet a gradu fidei, qua verbo divino creditur. Atque adeo huic tribuendum, quod sensuum iudicio stetur, sive appetibile nunc sensu percipiat, sive olim sensu percepti recordemur. Quamobrem in actione christiana consensus sensuum & imaginationis cum intellectu totus a fide est. Ea nimirum, quæ Deus ac Christus dicit, adeo certa sunt, ut, quomodocunque sensus & imaginatio nobis exhibeant objectum, assensum nostrum nullo modo immutare possint, sed perinde nobis sit, ac si bonitatem & malitiam actionis ad verba licet tantummodo Dei ac Christi animum attendentes coram intueremur, adeoque ipso sensu perciperemus. Hoc probe perpendi velim, ut intelligatur, non inopere pro consensu sensuum & imaginationis.



nationis haberi in præfenti cafu, quando intellectus adverfus fenfum & imaginationem tantummodo prævalere videtur. Nimirum quamdiu adhuc pugna quædam eft inter fenfus ac imaginationem cum intellectu & confufas illorum perceptiones adhuc attentione agens dignatur fua; fenfus ac imaginatio nondum consentiunt. Aft ubi certitudo fidei tanta eft, ut eidem quafi fponte fua cedant fenfus atque imaginatio, nec agens in dijudicandis bonis ac malis actionibus fenfibus atque imaginatione amplius movetur; hoc utique ad confenfum in cafu præfenti referendum, præfertim cum fenfus certitudinis, qui fidem comitatur, in caufa fit, in ex dijudicando bono & malo nulla habeatur ratio, quomodo fenfus repræfentent objectum. In eft autem fenfui huic certitudinis quidpiam, quod clarius adhuc loquitur confenfum fenfus & ejus vicariæ imaginationis cum intellectu in actione repræfentanda tanquam bona & mala. Nimirum fenfuum judicio qui ftat in bono & malo dijudicando, bonum quid ex voluptate judicat, quæ inde per-

percipitur, malum vero ex tædio, quod hinc sentitur. Quod si bonum tantummodo apparens fuerit, voluptas in tædium degenerat, aut in posterum tædium parit; si vero malum fuerit non nisi apparens, tædium posthac in voluptatem abit, aut voluptatem gignit. Sensus itaque certitudinis illius, quæ ex fide est, conjunctus cum prævisione futurorum, & dum hæc vi imaginationis repræsentantur, omnem attentionem in se trahunt, ut tædii ex actione olim percipiendi magis nobis simus conscii, quam voluptatis, ubi sensus tanquam bonam exhibent actionem & ex adverso voluptatis olim percipiendæ magis nobis simus conscii, quam tædii præsentis, ubi sensus tanquam malam sistunt actionem. Absit autem ut tibi persuadeas, hoc pacto consensum sensuum atque imaginationis cum intellectu in actione christiana eundem esse, qui ad actionem mere naturalem requiritur ! Differentia enim utrobique satis manifesta est. In actione naturali consensus sensuum & imaginationis cum intellectu consistit in eo, si illi repræsentant voluptatem  
ex

ex actione percipiendam, quæ intellectus iudicio agnoscitur bona, & tædia percipienda ex ea actione, quæ eodem iudicio agnoscitur mala. Quoniam itaque voluptatem ex hac actione percipiendam & molestiam percipiendam ex ista cognoscimus vel vi experientiae, vel vi demonstrationis, vel (quod præstat) vi utriusque; consensus sensuum & imaginationis cum intellectu totus debetur experientiae ac rationi, consequenter a solo usu facultatum naturali proficiscitur. Enimvero in actione christiana voluptas ex actione percipienda simulque tedium ex alia secuturum per modum prævisionis admittitur, quatenus certa fide in genere tenemus, actionem, quam Deus præcipit ac Christus, voluptatis; quam vero Deus prohibet ac Christus, tedium esse procreatricem, etsi ignoremus, qualis præcise ex actione præcepta in specie in nos redundatura sit voluptas in hac vita, & qualis ex adverso ex actione prohibita in specie emerlura sint in vita præsentem tædia. Cumque præterea Christus promiserit se in vita altera æterna ac ineffabili volu-

voluptate eas, quas præcipit, actiones tanquam præmio condecoraturum, & ex adverso actiones, quas prohibet, æternos cruciatus secuturos; in actione christiana, dum sensus & imaginatio cum intellectu consentit, adest prævisio voluptatis & cruciatuum in vita ventura actiones hujus vitæ secuturorum. Et a gradu certitudinis fidei pendet vivida vi imaginationis voluptatis & cruciatuum futurorum repræsentatio, ut phantasmata seu ideæ vi imaginationis productæ ideis sensualibus æquipolleant, quemadmodum exemplo Apostolorum & Martyrum facile probatur, & hoc supposito ratio a priori ex principiis psychologicis datur. Hinc absque difficultate conficitur, consensum sensuum & imaginationis cum intellectu in actione christiana totum deberi fidei, consequenter a gratia, non a natura proficisci.

## §. 7.

*Quænam  
requiran-  
tur ad re-  
ctitudi-  
nem actio-  
nis chris-  
tiana ex*

Quod si ea ad animum probe revocemus, quæ de consensu facultatis cognoscitivæ inferioris cum superiori modo dicta sunt; nec obscurum esse poterit, quænam ad rectitudinem actio-

nis

nis christianæ requirantur, quatenus <sup>parte ap-</sup>  
facultas quoque appetitiva inferior <sup>petitus</sup>  
cum superiori consentire debet, scili- <sup>sensitiva</sup>  
cet appetitus sensitivus cum rationali  
seu voluntate & aversatio sensitiva cum  
rationali seu noluntate. Nimirum  
actus appetitus rationalis, seu volitio  
sequitur iudicium intellectus de actio-  
nis bonitate, actus vero appetitus sen-  
sitivi perceptionem confusam volu-  
tatis ex actione percipiendæ, ac si-  
militer actus aversionis rationalis,  
seu nolitio sequitur iudicium intelle-  
ctus de actionis malitia, actus vero aver-  
sationis sensitivæ perceptionem con-  
fusam tædiorum ex actione percipien-  
tiorum. Unde si appetitus sensitivus  
& aversatio sensitiva cum rationali  
consentire debet, necesse tantummo-  
do est, ut sensus ac imaginatio cum  
intellectu consentiant. Quamobrem  
præter ea, quæ de hoc consensu dixi-  
mus, nihil ad actionem christianam  
equiri videtur, ex parte appetitus sen-  
sitivi & aversionis sensitivæ, ut omni  
audeat rectitudine. Enimvero totus  
illitur, qui ita sentit. Neque enim  
perpendit, in appetitu sensitivo & aver-  
satio-



satione sensitiva sedem suam habere affectus, ac horum in consensu utriusque cum rationali maxime habendam esse rationem, immo per eos demum tolli pugnam inter appetitum sensitivum & rationalem atque averfationem sensitivam & rationalem, ipsumque consensum reddi constantem. Multa hic dici poterant de statu animi in actione christiana, quæ ejus diversitatem in naturali aperte loquuntur; sed hæc relinquenda sunt ei, qui Theologiam moralem aliquando ea methodo explicatam dabit, qua nos Philosophiam moralem enodatam daturi sumus. Labet tamen aliqua saltem prælibare, ne multis videamur dixisse, quæ attentionem nullam merentur. Ostendimus (§. 6.), in consensu sensuum ac imaginationis cum intellectu adesse prævisionem voluptatis perennis ex præmio actionis a Deo ac Christo præceptæ in altera vita percipiendæ. Quod si fides, quæ habetur promisso Christi, suum acquisivit robur; eum parit affectum, quem fiduciam appellamus, summum spei gradum



lum (*k*). Nimirum ex eo fiducia est, quod prorsus certum nobis videtur bonum adventurum esse (*l*), adeoque dem nos jam possidere nobis videtur. Quamobrem affectus fiduciæ, qui oritur in appetitu sensitivo, dum bona a Christo in vita altera nobis promissa prævidemus, ex certitudine fidei est, qua bona hæc tanquam nobis jam præsentia spectamus. Unde de iisdem gaudemus, tanquam de bonis jam nobis præsentibus (*m*) & hinc est, quod ipse affectus fiduciæ species quædam gaudii sit. Dum vero gaudet homo christianus de bonis venturi seculi, quod ea jam sibi possidere videtur, prægustum quendam habet illius voluptatis, quam prævideri diximus ante (§. 6.), quem vitæ æternæ prægustum vocant Theologi. Et prægustus hic pertinet ad appetitum sensitivum sanctificatum, quemadmodum prævisio voluptatis futuri seculi ad facultatem cognoscitivam inferiorem illuminatam. Cum enim gratia ex illumi-

(*Hor. Subf.* 1731.) Qq natio-

(*k*) §. 796. *Psych. empir.*

(*l*) §. 804. *Psych. empir.*

(*m*) §. 624. *Psych. empir.*

natione & sanctificatione sit, gratia vero facultates animæ omnes perficiat & elevet; illuminatio quoque facultatem cognoscitivam inferiorem & sanctificatio facultatem appetendi ac averfandi inferiorem perficere ac elevare debet. Hinc Deus dicitur hominem sanctificare totum, seu, ut vulgatus loquitur interpres, per omnia, *1. Theff. V. 23.* quia non solum respicit voluntatem & noluntatem, sed ipsam quoque facultatem appetendi & averfandi inferiorem, immo in facultatem quoque locomotivam redundat, quemadmodum mox apertius dicemus, & ipsam etiam facultatem cognoscitivam afficit, quatenus appetitus influit in assensum. Ex hætenus dictis liquet, rectitudinem actionis christianæ quoad facultatem cognoscitivam venire ab illuminatione, quoad facultatem appetendi & averfandi a sanctificatione. Etsi adeo vi principiorum Philosophiæ nostræ distincte explicetur rectitudo actionis christianæ; non tamen ideo naturæ viribus tribuuntur, quæ gratiæ accepta ferenda sunt: quin potius ex iis, quæ a nobis dicuntur, liquido appa-

ret,

ret, cur gratiæ accepta ferri debeant, nec tribui naturæ possint. Principiorum philosophicorum multo amplior usus est in Theologia, quam huc usque fuit agnitus, aut agnosci potuit, dum Philosophia nondum satis fuit exulta. Et Philosophiæ nostræ usum in Theologia amplissimum secuturo tempore deprehendent omnes, qui in eadem probe versati ad Theologiæ dogmata rimanda accedent. Ipso nimirum facto experientur distinctas rerum pure revelatarum dari notiones & de iis multa demonstrari posse, ut tamen metuendum non sit, ne viribus naturæ adscribantur, quæ gratiæ tribuenda sunt. Etsi autem de consensu appetitus sensitivi & aversationis sensitivæ cum rationali in actione christiana recta multa adhuc specialia dicenda forent; ab iis tamen in præsentī abstinendum. Ne tamen quis sibi persuadeat, quasi omnia huc spectantia a nobis dicta sint, aut nos saltem ea dixisse videri velimus, hoc saltem monendum esse duximus.

## §. 8.

Equidem actio externa eadem ma- *Quam*  
net, *ad recti.*

Qq 2

*itudinem  
actionis  
christiane  
requiran-  
tur quoad  
faculta-  
tem loco-  
motivam.*

net, five a Christiano, five ab alio homine quocunque edatur, cum tota motibus organorum corporis absolvatur, qui a volitione, non autem a motivis, per quæ volitio determinatur, dependent. Quamobrem rectitudo actionis naturalis non videtur differre a rectitudine actionis christianæ quoad facultatem locomotivam. Enimvero quamvis utrobique iidem sint motus, qui ad actionem requiruntur, siquidem ea nulla ex parte deficere debet; cum tamen diversus sit animi agentis status & corpus animæ interpretem esse constet, vultus, gestus & aliæ actiones externæ, quæ actionem primariam comitantur, nec in id, quod faciendum, influunt nisi forsan ex accidente, in utroque agente eodem sese modo habere nequeunt. Cui ea perspecta sunt, quæ de conjectandis hominum moribus in parte altera Philosophiæ practicæ universalis demonstravimus; ei non obscura erunt, quæ hic dicuntur. Quoniam vero status corporis per se sequitur statum animæ, nisi quatenus consuetudines contractæ mutationem quandam inducunt;

unt; modo cætera sese recte habeant,  
e hisce non anxie laborandum. Non  
amen propterea inutilem iudicamus  
anc disquisitionem, cum in conje-  
tandis hominum moribus magnum  
abeat momentum hæc doctrina, ut  
t hætenus in desideratis sit. Acce-  
it, quod virtutes christianæ ea de cau-  
longe aliam induant speciem exter-  
am, quam naturales, ut, quæ latent,  
oc pacto sensibus manifestentur. Sa-  
e si patientia naturalis conferatur cum  
atientia christiana, quam comitatur  
audium ex prævisione vitæ æternæ  
rtum & amorem Dei ac Christi ab hac  
separabilis, qualis conspicitur in Apo-  
olis & Martyribus, differentia quoad  
ociem externam, consequenter quo-  
d ea, quæ a facultate locomotiva pen-  
ent, oppido manifesta erit. Exter-  
a hæc virtutis christianæ species cum  
b actibus appetitus & aversionis de-  
endeat, isti autem actus ad sanctifi-  
ationem referantur solis quippe na-  
uræ viribus non debiti; illa quoque  
psa quin ad sanctificationem referri  
lebeat, haud quaquam dubitandum.  
Quamobrem tanto minus contemnen-



da sunt, quæ originem suam a divina gratia deducunt, sed digna omnino, quæ a Philosopho christiano accuratæ discussioni subjiciantur.

### §. 9.

*Cur orthodoxia  
habenda  
sit ratio.*

Quamvis quæ hætenus diximus sufficiant, ut quandam rectitudinis actionis christianæ notionem consequamur, evolvendam accuratius quoad singula in eadem contenta ab eo, qui exaltatam theoriam condere voluerit; non tamen inconsultum judicamus, ut adhuc unum atque alterum moneamus. Dudum demonstravimus (n), rectitudinem actionis humanæ quoad voluntatem a rectitudine ejusdem quoad intellectum dependere. Idem obtinere in actione christiana non minus ex anterioribus perspicitur, quam ipsa natura animæ loquitur, siquidem eam ex Psychologia habueris perspectam. Verum adeo esse debet, Deum atque Christum præcipere aut prohibere hanc actionem. Vera esse debent dogmata, a quibus petuntur motiva volendi ac nolendi. Veræ denique esse debent doctrinæ.

---

(n) §. 89. part. 1. Phil. pract. univ.



doctrinæ omnes, quarum quomodo-  
unque in determinandis iis, quæ ad  
rectitudinem actionis christianæ quo-  
d facultatem appetendi & averfandi  
& quoad consensum facultatis cogni-  
tivæ inferioris cum intellectu vi an-  
teriorum requiruntur. Unde liquet,  
hominem christianum non recte age-  
re, nisi etiam recte credat. Quamob-  
rem non minor cura impendenda do-  
ctrinæ puritati, quam morum integri-  
tati conservandæ, cum hæc sine illa  
subsistere nequeat. Quamvis adeo in-  
tempestivus zelus quorundam Theo-  
logorum, quo doctrinæ puritatem de-  
fendere voluerunt, orthodoxiam in  
contemptum adduxerit; ea tamen in se-  
pectata contemnenda non est, modo  
nomen non in abusum trahatur: id  
quod futurum confidimus, ubi non  
modo nostra methodo philosopha-  
buntur Theologi, sed eadem quoque  
in omni studii theologici genere dex-  
tre utentur. Quoniam vero agendo-  
rum integritas a puritate credendorum  
pendet, & agenda cum credendis in-  
divulso nexu cohærent, siquidem illis  
sua constare debet rectitudo; pietati

ac virtuti omnichristianæ parum consulunt, qui credenda parum curant & christianismum ad agenda propemodum sola restringunt ignorantiam sub specioso simplicitatis christianæ titulo commendantes. Quemadmodum virtutes morales sejungi nequeunt ab intellectualibus, immo nec sejungi debent, ubi obligationi naturali satisfaciendum; ita nec agenda a credendis separanda, siquidem in agendo officio suo satisfacere debet Christianus. Theoria perfectior praxin quoque perfectiorem reddit, modo illa utaris. Theoriam autem veri nominis intelligimus, quæ parit plenariam convictionem, ut fidem gignat vivam.

§. 10.

*Omnia  
ab agente  
observari  
possunt,  
quæ ad re-  
ctitudi-  
nem actio-  
nis chri-  
stianæ re-  
quirun-  
tur.*

Multa admodum sunt, quæ ex parte omnium facultatum ad actionis christianæ rectitudinem requiruntur. Nullus igitur dubito fore plurimos, qui cum ea ad animum revocaturi sunt, impossibile pronuntiabunt, ab agente omnia perpendi posse, dum agit. Non nego dubium hoc aliquam habere speciem, quæ non satis acutis fa-  
cile

cile imponit. Enimvero non habet speciem, nisi a falso supposito, quasi in qualibet actione actus isti facultatum singularum singuli certo quodam intervallo sese invicem excipere debeant, ut singulorum tibi sis conscius. Qui vero hoc supponit, is actus, quibus habitus aliquis absolvitur, cum ipso habitu agendi confundit. Sume enim habitum quemcumque, & ad eundem multiplices actus requiri deprehendes, quorum nullus abesse potest, nisi vitium quoddam irrepere debet in actionem, & qui singuli successive in potestatem agentis sunt redigendi, ut prompte edantur. Quando vero ex habitu agitur, actus omnes ea promptitudine eduntur, ut eorundem sigillatim tibi minime sis conscius: ubi autem quis deficit, defectus ex actione vitiosa statim agnoscitur, aut ab acutioribus deregere saltem potest. Eodem modo sese hic res habet. Operanda est homini christiano, ut omnes actus, qui ad rectitudinem actionis requiruntur, ipsi fiant familiares: quod ubi obtinuerit, ex habitu dum agit, actus isti omnes sua veluti sponte con-

current, utut eorundem sigillatim minime sibi fuerit conscius. Qui ea tenet, quæ de perceptionibus & appetitionibus confusis in Psychologia demonstravimus, ei nihil in hisce supererit obscuri. Pendent in anima præsentia a præteritis : quæ dependentia etsi in casu singulari imperscrutabilis sit, in genere tamen a priori demonstratur & a posteriori experimentis ac observationibus confirmatur. In Philosophia autem morali pariterque in Theologia morali dependentia ista distincte explicanda, quatenus ad recte agendum sufficit. Nemo autem se huic labori parem putet, nisi qui facultatum humanarum usum & earum a se invicem dependentiam in Psychologia penitus perspexit & demonstrandi habitu pollet. Fortunæ potestati homines in praxi morali permittunt, quæ libertati suæ subicere poterant ac debebant. Quid ergo mirum, si actiones ipsorum a rectitudine illa abesse deprehenduntur, quam urgemus?

## §. II.

*Quid sit  
Christo  
vivere &c.*

Quod si ea perpendere libuerit, quæ de actionis christianæ rectitudine a nobis

bis

bis dicta fuerunt ; non modo intelliges , quomodo Christianus veri nominis Christo vivat , verum etiam videbis , quomodo Deus in Christo honoretur qualibet actione christiani veri nominis. Deo vivit , non sibi , qui actionibus suis voluntati divinæ satisfacere studet , committendo actiones , quia Deus eas committi vult , & non committendo seu omittendo alias , quia Deus eas non vult committi , seu vult omitti (o). Quamobrem Christo vivit , non sibi , qui actionibus suis voluntati Christi satisfacere studet , committendo actiones , quia eas committi vult , & non committendo seu omittendo actiones , quia eas non vult committi , seu vult omitti. Ad rectitudinem actionis christianæ requiritur , ut actiones ideo committat Christianus , quia Christus eas committi vult , & omittat seu non committat alias , quia idem eas omitti vult seu non vult committi (§. 5.). Christo igitur vivit , non sibi Christianus. Nimirum Christiano non est propria voluntas , sed voluntas

*Deum honorare in Christo.*

(o) not. §. 27. part. 2. *Phil. pract. univ.*



luntas Christi est ipsi loco propriæ, quoniam non juxta suam, sed Christi voluntatem determinat actiones suas liberas. Similiter non proprio judicio determinat, quænam actio sit commit-tenda, quænam omittenda, sed Christi judicium suum facit, actionem bonam esse ratus, quia Christus eam præcipit, malam vero reputans, quia idem eandem prohibet : ut adeo, quatenus non suo, sed Christi stat judicio indi-judicandis actionibus liberis, intellectu suum subjiciat intellectui Christi, adeoque hujus intellectus sit ipsi loco proprii. Perinde igitur est quoad actiones liberas, consequenter vitam moralem (p), ac si intellectus ac voluntas Christi, consequenter Christus esset in nobis. Atque hinc intelligitur, quo sensu Christus dicatur esse in nobis & quomodo vivat in nobis. Facile perspicient acutiores nos dedisse principia, per quæ multæ locutiones Mysticorum sano sensu explicari possint, ut nihil habeant absurdi, quamvis propterea non velimus, ut locu-

---

(p) S. 7. part. 2. Phil. pract. univ.



locutionibus utamur, quæ infirmos ac hebetiores facile offendere possint, etsi ea teneri consultum judicemus, ne nos iniquos præbeamus iis, qui, ut veritatem retineant, linguam temperent, admonendi tantummodo erant. Obiter hic observamus, ut hoc etiam documento addiscant, qui philosophiæ nostræ infensi sunt, quantum ea utilitatis afferat ad Theologiam omnem intimius perspiciendam, qualis hactenus a Philosophia expectavit nemo. Evicimus in superioribus (§. cit.), voluntatem Christi atque Dei esse unam, eandemque ac pariter iudicium Christi atque Dei de actionibus nostris liberis esse unum idemque. Quamobrem dum dicto Christi sumus audientes eumque tanquam Doctorem a Deo nobis datum veneramur, in qualibet etiam actione Deum veneramur tanquam Dominum nostrum, immo quatenus Deo placere studemus fide firma meritum Christi nobis applicantes (§. 5.), eundem qualibet actione veneramur tanquam benefactorem nostrum in Christo. Atque adeo jam patet, quomodo Deus a nobis honoretur

tur in Christo, quemadmodum in sacris præcipitur. Idem adhuc luculentius liqueret ex aliis, quæ de motivis à Christo & redemptionis opere petendis dici poterant, si ad specialia descendere licuisset. Sed hæc relinquimus iis, qui Theologiam moralem aliquando accuratius pertractaturi sunt ea observantes, quæ a nobis in tradenda praxi morali suo tempore ac loco observaturi sumus.

## §. 12.

*Usus doctrinae præcedentis.*

Rectitudo actionis christianæ abunde docet, non esse adeo facile, ut vitam agas, quæ Christianum decet. Ex eadem etiam liquet, Christianum nunquam otiosum esse, sed continuo ad majorem vitæ perfectionem contendere debere. Immo hinc patet, quid sibi velit Scriptura, quando Christianos crescere jubet. Mittimus alia, quæ inde lucem suam mutuantur. Pauca hæc tantummodo indicare libuit, ut acutiores tanto rectius videant, quam fecundæ sint notiones nostræ etiam in Theologia revelata. Non vero parvi pendendus est tam præclarus ac eximius

nus usus Philosophiæ nostræ in Theologia: etenim hic facit ad non repugnantiam christianismi cum principiis rationis evidentius inspiciendam, consequenter ad veritatem ejus persuadendam acutioribus. Plenaria nimirum convictio non naturæ, sed gratiæ lebetur. Neque adeo a Philosophia plus expectari potest, quam ut religionis christianæ probabilitas adstruatur. Hæc autem plena luce fulget, ubi animadvertis ex principiis Philosophiæ rationem a priori reddi posse eorum, quæ in Theologia revelata affirmantur, admissis hisce tanquam veris, nec inter hæc atque principia rationis distinctis notionibus explicata repugnantiam ullam dari.

## II.

*De Abusu Rationum legalium  
Legum.*

## §. I.

**S**olenne est interpretibus Juris Romani in rationes legum inquire-  
re: quo studio inter ceteros emi-  
nere voluit *Caspar Manzius*, Juris quon-  
dam

*Institu-  
tum Au-  
toris.*

dam Professor in Academia Dillingiana, deinde Ingolstadiana. Præter alios enim Tractatus particulares integrum Commentarium conscripsit in quatuor libros Institutionum imperialium, quo omnium, non modo in singulis paragraphis, sed etiam versiculis traditorum rationes redduntur. Cum enim toto illo triennio, quod Philosophiæ addiscendæ impenderat, ita rationibus delectatus fuisset, ut id solum se scire crederet, quod per causam suam cognosceret; ubi ad Juris studium transitum fecit & illud in solis legum auctoritatibus fundatum vidit, tædium illius in principio statim cepit, animumque post multos jam superatos labores ferme omnino abjecit & sæpe de deferenda legali scientia cogitavit. Ipse igitur ad munus publice interpretandi Institutiones admotus tales Institutiones suis auditoribus tradere voluit, quales tyro quondam excipere desideraverat. Propria nimirum experientia edoctus noverat, studium Juris hoc pacto facilitari & profectus discentium promoveri, prætereaque ipsi exploratum erat per rationem ma-  
xime

time veritatem perspicere. Qui rationes legum reddere conantur, iis possimum rationes legales placent: unde etiam *Manzius* Commentario suo in titulo hunc versiculum adscripsit:

*Nil alii sine lege volunt, Et nil sine textu,  
Sed sine legali nos ratione nihil.*

Nobis, qui Jurisprudentiam civilem in formam artis methodo demonstrativa redigendam esse existimamus, quod, & quomodo hoc fieri possit, in his ipsis Horis docuimus, institutum hoc reddendi rationes legum non potest non probari, ac imprimis etiam rationes legales sese præ ceteris commendant, ubi tales dari possunt. Non tamen promiscue probamus rationes legum, quas passim allegant autores, ac multo minus studium rationes legales afferendi in totum probare possumus. Quemadmodum Theologi licitis Scripturæ dogmata sua probaturi non uno modo peccant, dum nunc ea allegant, quæ non probant, quod erat probandum, nunc ad ea provocant, quæ non satis evidenter evinunt, quod erat demonstrandum, nunc licitis Scripturæ probant, quod hæc

(*Hor. Subs. 1731.*)      R r      pro

probatione non indiget ; ita similiter interpretes Juris non uno modo in reddendis rationibus legalibus a veritate aberrant. Quamobrem rationes legales , merito suo loco commendandæ , in abusum trahantur ; de eo in præfenti dicere instituimus.

§. 2.

*Quænam  
bis suppo-  
nenda.*

Ut autem penitus intelligantur, quæ jam dicturi sumus ; pauca quædam de rationibus legalibus præmonenda sunt. Quænam rationes sint legales, dudum diximus alibi (9), nimirum hæ , quæ desumuntur ex alia lege. Unde facile apparet , legum omnium rationes legales reddi minime posse, nisi circum vitiosum committere velis. Dantur enim necesse est leges quædam primitivæ , si vel maxime omnes inter se cohæreant, ut una sit concordia, quarum ratio aliunde, quam ex lege quædam alia reddenda. Quod si ergo rationes legales cognoscere aves, necesse est ut legum mutuam a se invicem dependentiam cognoscas : neque enim alio pacto absque circulo vitioso cer-

to

(9) §. 134. part. 1. *Phil. pract. univ.*



to cognoscitur , quænam leges rationem in alia lege & in quam habeant (r). Quamobrem quod dicit *Manzius* (§.1.), nihil sese velle sine legali ratione, universaliter dictum accipi nequit, nullo minus ut hoc fiat, studendum, nisi subinde nugari aut circulum vitiosum committere velis. Dependencia legum a se invicem tum demum notescit, ubi methodo demonstrativa in formam artis rediguntur. Quæ hæc ipsa methodus tutissima via est, quæ ad rationes legales genuinas absque ulla hæsitazione & hallucinatione pervenire datur. Quicumque igitur rationum legalium utilitatem agnoscit easdemque urget, Methodo demonstrativæ in Jure adversari nequit nisi per ignorantia. Nos itaque cum hanc methodum commendamus, non aliud agimus quam ut illorum propositum promoveamus, & ne eodem aberrent efficiamus. Nullus ego dubito, *Manzium*, si eandem operam Mathesi impendisset, quam Philosophiæ navaret, ut methodi demonstrativæ notio-

Rr 2

nem

nem quandam habuisset ejusque vim ac efficaciam animo comprehendisset, illa methodo Jura in formam artis reducturum fuisse. Quemadmodum enim desideravit videre aliquem, qui Philosophiam legalem Philosophiæ naturali conformaret, quia Philosophiæ addiscendæ toto triennio se totum dederat; ita similiter desiderasset videre aliquem, qui Jurisprudentiam Mathematici conformaret, siquidem huic addiscendæ tempus aliquod impendisset. Diserte nimirum fatetur, desiderii sui hanc esse rationem, ut intellectus humanus plene satiatur. Qui vero demonstrationum vim expertus est, ejus intellectus plene satiari nequit, nisi evidentia demonstrationum. Cum itaque ipsemet Philosophiam legalem naturali, qualem didicerat, conformare studuerit, quod neminem reperiret autorem, qui hoc fecisset; ita eadem ratione permotus methodum quoque demonstrativam ad tractationem Juris transtulisset.

## §. 3.

*Primus  
abusus  
rationum  
legalium.*

Primus abusus rationum legalium est, quod etiam eorum, quæ pro legibus

ous parum apte habentur, rationes legales inquirantur. Exemplum apud *Manzium* occurrit statim initio Commentarii ad Rubricam proœmii, ubi eguntur hæc verba: In nomine Domini nostri JESU Christi. Rationem enim redditurus, cur a Divino Numine principium ducendum, quod verbis hisce proœmio præfixis ab Imperatore præcipi sumit, provocat ad l. 2. C. *le Off. præf. præt. Afric.* ubi in principio Imperator: In nomine, inquit, Domini nostri JESU Christi ad omnia consilia omnesque actus semper progredimur. Non probat exemplum Imperatoris habere vim legis, ut perinde sit ac si juberet a Divino Numine duci principium. Cumque verba Codicis non loquantur nisi de exemplo, ne quidem ea pro ratione, cur hoc fieri jubeat Imperator, accipi possunt. Ipse utem Imperator, l. c. rationem facti reddit ex eo, quod felices in regimine suo successus referat ad Deum tutorem. Quamobrem si factum Imperatoris pro lege habere voluisset *Manzium*, verbis, quæ allegat, idem robans rationem in ipsa lege conten-

ram potius afferre debuisset. Sed videtur mihi argutari, qui in explicando Jure hoc modo procedit, quam solidam ejus scientiam auditoribus tradere. Mallem ego explicari distincta notatione, quid sit in nomine Domini nostri Jesu Christi tractationem juris incipere, quam præcepti non explicati rationem afferri, præsertim cum ratio non sit, nisi quatenus per eam intelligitur, cur hoc fieri debeat. Quomodo autem perspicere potes, cur quid fieri debeat, ubi nondum intelligis, quid sit illud, quod fieri debet. Similiter *Pomereschius* (s) rationem redditurus, cur in Jure non tradantur definitiones regulis Logicæ conformes, eam inde petit, quod juxta *Ulpianum* (t) Icti veram, non simulatam philosophiam affectent, & in jure omnis definitio periculosa (u). Idem, cur justitia definiatur per voluntatem, rationem hanc datur legalem, quod errantis nulla voluntas sit (x). Nolumus cumulare exempla

(s) in *tyrocinio Juris ad princ. de J. & J.*

(t) l. 1. ff. de J. & J.

(u) l. 102. de R. J.

(x) l. 15. de Jurisd.

quæ passim obvia sunt. Quin potius ostendemus, quod recte ad abusum rationum referatur legalium, si eorum, quæ legum in numero non sunt, rationes legales reddere volueris. Rationes legales cum ex legibus petantur, ubi eadem redduntur, per legem unam intelligitur, cur in altera hæc præcipiantur, vel prohibeantur, consequenter per eas manifestatur legum concordia. Neque enim solum *Justinianus* voluit legum civilium omnium unam concordiam esse debere (y); verum etiam hanc requiri in legibus civilibus & positivis quibuscunque in Jure naturæ demonstratur. Quamobrem per rationes legales potissimum intenditur, ut hæc concordia palam fiat. Rationes itaque legales non exigunt nisi leges, quæ ab aliis legibus pendent in latu ideali se prioribus. In legum igitur numero quæ non sunt, aut perperam in eundem referuntur, eorum absque ratione redduntur rationes legales. Leges admittuntur tanquam leges ob voluntatem imperantis: Sed cetera, quæ

R r 4      leges

---

(y) l. 8. C. de J. U. encl.

leges non sunt, admittuntur tanquam vera, non quia imperans hoc dicit, sed quia vera esse intelliguntur. Quamobrem per rationem legalem in Jure civili non intelligitur, cur assertum aliquod sit verum, consequenter rationes legales sine ulla utilitate afferuntur. Afferendæ potius sunt rationes, per quas patet asserti veritas. Atque adeo abusus omnino est rationum legalium, si ad asserta alia, quæ leges non sunt, trahantur, omiſſis præſertim iis, quæ veritatem in apertum producere debebant. Sumamus cum *Manzio* exemplo *Justiniani* nos doceri, principium tractationis Juris ducendum esse a divino Numine, seu in nomine Domini nostri JEſu Christi. Cur hoc fieri debeat, non intelligitur ex eo, quod *Justinianus* profiteatur, se in nomine Domini nostri JEſu Christi ad omnia consilia omnesque actus semper progredi. Ratio igitur legalis, quæ assertur, nulla est. Nimirum Christiani obligantur præcepto divino, ut, quicquid faciant, hoc faciant in nomine Domini, 1. Cor. X. 31. Quamobrem hæc obligatio extendenda ad Juris quo-

que



ue tractationem ; ante omnia expli-  
andum est, quid significet in nomine  
Domini Jesu Christi quid facere , ut  
etiam constet quid sit incipere tracta-  
tionem in nomine Domini Jesu Chri-  
sti & hinc pateat , num obligatio illa  
divina etiam spectet auspicium Juris  
tractandi. Tum vero tantummodo  
constat , nos Juris tractationem inci-  
pere debere in nomine Domini nostri  
Jesu Christi , ut officio hominis chri-  
stiani satisfaciamus, nondum vero in-  
telligitur , cur hoc sit præceptum stu-  
dioso aut Doctore etiam Juris, qui Chri-  
stianus est. Quicquid igitur sibi velit  
æc enuntiatio : Juris tractatio inci-  
pienda est in nomine Domini nostri  
Jesu Christi ; facile tamen apparet ,  
nam aliunde quam ex lege aliqua posi-  
va petendam esse. *Manzii* ævo non-  
um distincta notione explicabatur ,  
quid sit ratio , nec usu receptum erat  
ullos recipere terminos distincta no-  
tione nondum explicatos. Qua de  
causa mirum minime videri debet ,  
quod & ipse, & alii videantur sibi red-  
dere rationem, ubi revera nullam red-  
dunt. Sed de eo jam nobis quæstio

R r 5

non

non est, ubi tantummodo notamus abusum petendi rationem ex lege, ubi ex lege nulla peti potest; non autem de valore rationum, quæ dantur, disquiritur. Similiter quando quæritur, num in Jure civili requirantur definitiones accuratæ, quales exigunt regulæ logicæ; ex lege ratio reddi nequit. Lex enim tantummodo docet, quid fieri aut non fieri velit Legislatores; an vero definitiones accuratæ requirantur in Jure civili, ex voluntate Legislatoris definiri nequit. Definitiones habent suum usum, cui destinantur, & ut hanc habere possint, observandæ sunt regulæ a Logica præscriptæ. Ab usu adeo definitionum, quem in Jure habere debent, petenda ratio est, utrum necesse sit eas esse accuratas, an vero adeo scrupulose concinnandæ non sint, quemadmodum volunt regulæ Logicæ.

## §. 4.

*Secundus  
abusus ra-  
tionum le-  
galium.*

Secundus abusus rationum legalium in eo consistit, quod allegentur, quæ pro rationibus haberi nequeunt. Quando quæritur, utrum ratio aliqua legalis revera ratio sit, necne; quæstio duplex

duplex est. Aut enim quæritur in genere, num quod tanquam ratio ex lege aliqua allegatur, sit ratio veri nominis, an solummodo pro tali venditetur: aut quæritur in specie, num ratio, quæ datur, revera in lege ista contineatur, cujus verba adducuntur. Illud dijudicandum est ex definitione rationis, quam dedimus in Philosophia prima; hoc vero ex sensu, quem habent verba legis. Duplici igitur modo peccatur in allegandis rationibus legalibus, vel quando lex allegata pro ratione alterius legis, cujus ratio legalis datur, haberi nequit, definitione rationis repugnante; vel quando verba legis, quæ rationis loco citantur, alium prorsus sensum fundunt, quam qui ipsis tribuitur. Exempla utriusque abusus rationum legalium obvia sunt. *Manzius* (2) rationem redditurus, cur Jurisprudentia definiatur, quod sit divinarum atque humanarum rerum notitia, iusti atque iniusti scientia, hanc allegat, quod *Chrysippus* legem dixerit omnium divinarum & humanarum

---

(2) *ad* §. 1. *Inst. de J. & J.*

rum rerum reginam, justorum & injustorum regulam (a). Rationem vero hanc nullam esse, facile ostenditur. Etenim quamvis leges sint objectum Jurisprudentiæ, ex eo tamen quod *Chrysippus* dicat, reginam rerum divinarum & humanarum atque justorum & injustorum regulam esse legem, nondum intelligitur, an Jurisprudentia recte dicatur divinarum & humanarum rerum notitia, justis & injustis scientia; supponitur enim legem recte definiri per reginam rerum humanarum & divinarum, justorum & injustorum regulam. Lex igitur allegata tantummodo facit ad definitionis interpretationem, non vero definitionis insinuationem. Nimirum si sumamus, in definitione Jurisprudentiæ respici ad verba *Chrysippi*, quod lex sit regina rerum divinarum & humanarum, justorum & injustorum regula; dicendum erit, definitionis hunc esse sensum, quod Jurisprudentia sit scientia legum. Quod si ergo quæras rationem, cur loco legis ponantur res divinæ & humanæ,

---

(a) l. 2. ff. de LE.

næ, justum & injustum; ratio omnino reddenda erat, per quam intelligitur, legem recte definiri per reginam rerum divinarum & humanarum, justorum & injustorum regulam. Si quis excipiat, definitiones Jurisprudentiæ ac legis arbitrarias esse, adeoque nullam reddendam esse rationem, cur ita definiantur; eo ipso *Manzium* redarguit, quod rationem reddere voluerit ejus, cujus nulla ratio datur, adeoque obiectio ista a nobis non attendenda, qui contendimus, quod ex lege allegatur tanquam ratio alterius legis, rationem esse nullam. Quoniam Jēti contendunt, in Jure non opus esse definitionibus exactis (§. 3.), agnoscunt tamen definitionem magnum lumen omnibus materiis affundere, & ex ejus ignorantia nullam materiam bene intelligi aut cognosci posse (b); definitiones suas magis considerant tanquam propositiones, in quibus de subjecto confuse percepto enunciantur prædicata eidem tribuenda, quam definitiones, atque adeo non inepte quærant rationes,

---

(b) *Schraderus apud Manzium ad rubr. tit. 25. lib. 3. Instit. n. 4.*



nes, cur eadem ipsi tribuenda sint, easque legales, cur ex mente legum tribuenda veniant, ubi in Philosophia forent arbitrariæ terminorum explicationes. Quamobrem si quis in Jure communi definitiones exactas dare voluerit, Jurisprudentiam civilem informam artis methodo demonstrativare dacturus; non suo arbitrio eas formare potest, quemadmodum Philosopho concessum, qui terminis significatum tribuit pro suo arbitratu, sed vocabulis tribuere tenetur significatum menti legum conformem. Atque tum non est absolum dare definitionum rationes legales, quibus evincitur, esse eas menti legum consentaneas. Similiter quando testamentum pronuntiatur invalidum, si princeps litis causa vel in testamento imperfecto instituatur hæres(c), *Pomereschius* cum aliis hanc reddit rationem legalem, quod deceat tantæ majestati eas servare leges, quibus ipsa soluta videtur (d) & nihil tam proprium sit imperii, quam legibus

(c) §. 1. *Inst. quib. mod. test. infirm.*

(d) l. 23. ff. de leg.



ius vivere (e), dignaque vox majestatis regnantis, legibus se profiteri alligatum, & revera majus imperio subnittere legibus principatum (f). Rationem hanc esse nullam, ex ipsa definitione rationis patet: neque enim per hoc intelligitur, cur Princeps in istiusmodi negotiis, quæ ad imperium non spectant, legibus privatorum se subnittere debeat. Ratio itaque legalis petenda potius ex Jure naturali, quo demonstratur, Principem quoad ista negotia, quæ imperium non tangunt, considerandum esse instar privati, & vi officii imperantis ipsi incumbere exemplo suo commendare leges subditis & eos obligare ad eandem observantiam. Cum Jus naturæ ab interpretibus juris civilis aut prorsus fuerit neglectum, aut saltem non satis excultum, propterea quod in ea fuerint sententia, Jus naturæ & gentium in generalissimis tantum consistere; rationes ex jure naturali petendas in Jure civili quæsierunt: quo in casu fieri haud

---

(e) l. 23. C. de Testam.

(f) l. 4. C. de LL.

haud quaquam aliter potuit , quam  
ut afferrent, quæ minus satisfaciunt.

§. 5.

*Tertius  
abusus.*

Ad abusus rationum legalium etiam  
refero, quod in iis reddendis circulus  
committatur. Quod enim circulus  
committatur, non aliunde est, quam  
ab intempestivo studio rationum lega-  
lium, quasi omnium eorum, quæ in  
Jure dicuntur, ratio quædam ex alia  
lege reddi debeat. Accidit itaque ut  
ex lege P rationem reddas legis B &  
ubi deinde ad legem P perveneris, de-  
nuo rationem petas ex lege B, conse-  
quenter circulus committatur. Quem-  
admodum vero nihil definit, qui in  
definiendo circulum committit, ni-  
hilque probat, qui eundem commit-  
tit in probando; ita etiam rationem  
nullam dedisse dicendus est, qui in ra-  
tionibus reddendis circulum commit-  
tit. Quoniam leges non eo ordine  
collocantur, quo a se invicem depen-  
dent, sed priori loco explicantur in  
compendiis Juris, quæ multa suppo-  
nunt infra demum proposita; circulus  
vitiosus committi potest, ut vix ani-  
madver-

advertatur. Cum enim leges non  
o ordine digestæ sint, quo a se invi-  
em dependent; permissum utique est  
nteriorum rationem petere ex sequen-  
ibus & vicissim sequentium ex ante-  
rioribus; nec qui hoc facit ideo circu-  
um committit. Dum vero hoc face-  
e suevit, defectu attentionis vel etiam  
memoriæ quodam defectu in circulum  
facile incidit.

§. 6.

Cum rationibus legalibus confun- *Quenam*  
denda non sunt, quæ interpretes Juris *cum ratio-*  
civilis ex legibus citare solent, ut con- *nibus la-*  
stet eos legibus consentanea proferre. *galibus*  
Aliud nimirum est probare, quod le- *non con-*  
gibus ea consentiant, quæ dicis; aliud *fundenda.*  
est rationem reddere, cur lex hoc im-  
peret, vetet, permittat aut puniat, ut  
servetur concordia legum. Unde *Man-*  
*zins* in versiculo supra citato ( §. i. )  
distinguit inter voluntatem nil asse-  
rendi sine lege & voluntatem nil asse-  
rendi sine ratione legali. Quamvis  
adeo illi, qui nil sine lege loqui vo-  
lunt, in eosdem legum abusus inci-  
dant, qui sunt familiares in rationes  
legales inquirentibus; non tamen pro-  
( *Hor. Subs. 1731.* )      Ss      pterea

pterea in unum confundenda, quæ diversa sunt ac a se invicem separanda. Optime hæc duo distinxit *Pomereschius* in Tyrocinio Juris super quatuor libros Institutionum : unde iis, quæ ex legibus rationis loco adducit, in gratiam tyronum, quibus scripsit, nomen rationis præfigit, ceteris nullo titulo ornatis. Equidem concedo posse etiam quodam sensu leges quascunque allegatas rationes dici ; non tamen ideo sunt rationes legales legum, quas hic consideramus. Nimirum si quis probaturus ea, quæ affirmat, legi consentanea esse provocat ad quandam Pandectarum aut Codicis legem ; ex ea, quam adducit, lege utique intelligitur, quod legi consentientia loquatur, consequenter lex illa, quam allegat, ratio est, qua constat ipsum a lege non aliena affirmare. Enimvero qui ipsius legis alicujus rationem legalem reddere studet, docere intendit, quod lex, cujus rationem reddit, aliter sese habere nequeat, siquidem unus esse debet legum concentus, propulsatis antinomiis. Obtinet idem in Theologia, ubi aliud est dicta Scripturæ allegare,

are, ut ostendas te menti ejus conformia statuere, aliud dogmatis alicujus, quod Scripturæ menti convenire constat, reddere rationem ex dogmate alio idem consentaneo. Cum Institutiones eandem habeant auctoritatem cum Pandectis & Codice: frustranea omnino est eorum opera, qui citatis & Digestis & Codice legibus consentanea esse probant ea, quæ in institutionibus docentur. Idem est, ac si Theologus per alia Scripturæ loca probare vellet, quod Scripturæ consentanea sint, quæ Scriptura uno in loco dicit. Ne tamen virgula censoria notentur, quæ eam minime merentur; duo a se invicem probe distinguenda sunt. Nimirum aliud est allegare leges, ut per eas constet, quæ hic affirmantur esse menti legum conformia; aliud est ad leges alias provocare, ut per eas sensus verborum in data lege obscuriorum fiat manifestus, seu leges per leges explicare, quemadmodum interpretes Scripturæ sacrae Scripturam per scripturam explicare solent, immo in eodem casu, de quo nobis hic sermo est, explicare debent. Acutum in di-

stinguendo te probare teneris, nisi in censendis aliorum factis te iniquum præbere ac a veritatis tramite deflectere velis.

## §. 7.

*Quartus  
abusus ra-  
tionum le-  
galium.*

Etsi autem leges, quæ tantummodo eo fine allegantur, ut appareat, quæ hic dicuntur esse legibus alibi enarratis consentanea, non sint rationes legales (§. 6.); fieri tamen potest, ut tanquam rationes legales allegentur, cum apud Doctores Juris non insolitum sit, ut rationem reddituri idem aliis verbis dicant. Occurrunt sane in ipso Jure Romano exempla, ubi rationes, quæ proferuntur, idem dicunt aliis verbis, immo iisdem propemodum verbis. In Institutionibus (g) ubi dicitur: Si filius familias militaverit, vel si Senator, vel Consul factus fuerit, remanet in potestate patris, hæc additur ratio: Militia enim vel Consularis dignitas de patris potestate filium non liberat. Qui verba a rebus distinguit, animum advertens ad notationes, quæ vocabulis tanquam signis  
respon-

(g) §. 4. quib. mod. Jus Patr. Pot. solv.



respondent, ei haud obscurum est, idem dici, quando asseritur, filiumfamilias remanere in potestate patris, si militaverit, vel si Senator, vel Consul electus fuerit, & quando affirmatur, militiam vel consularem dignitatem de patris potestate non liberare filium. Synonyma enim sunt remanere in potestate patris & non liberari de patris potestate. Ratio igitur tautologica est. Quod si dicas, verba posteriora non accipi debere pro ratione ejus, quod anterioribus enunciatur; nullo sane fine adduntur & particula enim mittenda fuerat, siquidem tantummodo anteriorum declarativa esse debeant: quod tamen ipsum nec commodè asseritur, quia prioribus nec magis perspicua sunt, nec anteriora deo obscura, ut per se intelligi nequeant. Nolumus cumulare exempla in re facili. Rationes enim tautologicas, quas inter abusus rationum legalium recte referri nemo in dubium evocabit, nisi qui, quid ratio sit, ignoret, facillime agnoscet, modo ei hoc exemplum, quod produximus, solum ob oculos versetur.

## §. 8.

*Quomodo  
abusus ra-  
tionum le-  
galium  
evitentur.*

Quodsi jam porro quæsieris, quo-  
modo abusus rationum legalium evi-  
tari possint ; facilis quidem responsio  
est, sed quæ eorum evitandorum gra-  
tia præcipiuntur, non eadem facilita-  
te ad praxin transferuntur. Primo ne-  
cesse est, ut distinctam notionem ra-  
tionis habeas, quam explicatam du-  
dum dedimus (*b*). Etenim qui ra-  
tionem reddere vult ejus, quod asseri-  
tur; is omnino certus esse debet, quod  
rationis loco affertur, esse revera ra-  
tionem. Quemadmodum vero cur-  
va non agnoscitur esse parabola, nisi  
quatenus eidem convenit parabola  
definitio ; ita nec quod rationis loco  
affertur revera rationem esse liquido  
constat, nisi quatenus definitio ratio-  
nis eidem competit. Nemo ea de re  
dubitaverit, nisi qui ignorat dictum de  
omni & nullo, unico ratiocinandi fun-  
damento (*i*), aut saltem animum ab  
eodem avertit. *Pomereschius* (*k*) ra-  
tionem cur militia ac dignitas consu-  
lans

(*b*) §. 56. *Ontol.*

(*i*) §. 349. Et 353. *Log.*

(*k*) ad §. 4. I. quib. mod. patr. pot. solv.

laris non liberet a patria potestate, allegat summum rigorem patriæ potestatis apud Romanos, quem patere existimat ex §. 2. *I. de patr. pot.* ubi Imperator: nulli alii, inquit, sunt homines, qui talem in liberos habeant potestatem, qualem nos habemus. Ex hisce verbis nec intelligitur, quod summus fuerit rigor patriæ potestatis apud Romanos, nec ex summo rigore patriæ potestatis apud Romanos intelligi datur, cur militia & consularis dignitas non liberet a patria potestate. Quod igitur rationis loco affertur, ratio nulla est. Ipsum vocabulum summus rigor non satis perspicuum, ut, quid eodem significetur, præcise non appareat. Quod si dicas declarationis causa eum addere, patriam potestatem non solvi nisi morte aut naturali, ut civili, atque hinc constare, quoniam sit summus rigor; primo quidem rege, perperam allegari §. 2. *de patr. pot.* cum allegari potius debuisset integer hic titulus, quibus modis patria potestas solvatur. Ex eo enim constat, moribus Romanorum eandem fuisse solutam morte naturali & civili

patris, non tamen sola, cum soluta etiam fuerit emancipatione & dignitate Patriciatus ad illius imitationem. Quod si rationes, quæ a Juris interpretibus redduntur, vi definitionis rationis, quemadmodum fieri debet, dijudicare volueris; quam parum satisfaciant longe plurimæ deprehendere licebit. Ut vero vi definitionis hujus rationes genuinas a spuriis separes, acumen quoddam requiritur nonnisi multo usu acquirendum, ne tibi videaris intelligere, cur quid sit, etiamsi non intelligas, aut non intelligas sufficienter. Sane quamvis distincta rationis notio perspecta minime fuerit iis, qui rationes legum reddere voluerunt; confusa tamen ejus notio, quæ evoluta idem dicit, animis eorum obversata fuit. Quamobrem ubi rationem attulerunt, quæ nulla est; id ideo accidit, quod sibi visi sunt per eam intelligere, cur illud sit, cujus rationem reddere voluerunt, cum tamen per eandem intelligi hoc nequeat. Ita *Schneidevvinus* rationem hanc reddit legalem, quod militia a patria potestate non liberet, quia etiam militibus pietatis ratio inparen-

tes

tes constare debet (1) : quam nullam esse agnoscit *Gothofredus*, quod hanc etiam parentibus debeant liberi emancipati. *Schneidevvinus* adeo per hoc sibi visus fuit intelligere, cur militia a patria potestate non liberet, quod milites etiam pietatem debeant parentibus, consequenter hanc rationem esse agnovit, cur militia non solvat patriam potestatem. Et *Gothofredo* idem visum fuisset, nisi instantia ab emancipatis desumpta ipsi persuasisset, rationem hanc nullam esse. Nimirum si *Schneidevvino* apparere non debuisset, quod non est, & si *Gothofredus* ostendere debuisset, cur ratio nulla sit; uterque expendere debuisset jura, quæ involvit patria potestas Romana, & officia, quæ injungit pietas : tum enim evidenter uterque perspexisset, quod positis hisce liberorum officiis non ponantur illa jura parentum, consequenter per hæc officia non intelligatur, cur parentibus competere debeant ista jura. Romani jus patriæ potestatis deduxerunt a generatione, quod

S s 5

adeo

---

(1) l. i. ff. de obseq. a lib. & lib.

adeo patri competit, quia pater est, adeoque revera considerarunt tanquam jus naturæ patri competens, quod invito auferri nequit; etsi Imperator dicat jus civium Romanorum proprium, quia aliæ gentes talem in liberos potestatem non habebant, qualem habebant Romani (m). Atque hinc omnino sequebatur, nec militiam, nec dignitatem consularem liberare a patria potestate, etsi pater filium emancipare posset, libere suo juri renunciare. Confunduntur in Jure Romano quæ a Jure naturæ veniunt cum iis, quæ positivi sunt: unde non omnia satis inter se cohærent. Sed hæc brevibus exponi minime possunt.

## §. 9.

*Idem ulte-  
rius ex-  
penditur.*

Rationes legales genuinas redditus porro expendere debet dependentiam legum a se invicem: ita enim demum intelligitur, quænam lex rationem habeat in lege alia, & qua posita ponatur & ipsa (n). Dependencia legum a se invicem minime patet per omnia, nisi eadem methodo demonstrati-

(m) §. 2. *Inst. de patr. pot.*

(n) §. 851. 118. *Et Onol.*



strativa in ordinem redigantur. Quamobrem qui rationes legales genuinas detegere, atque abusus, quos antea notavimus, omnes evitare voluerit; eo ordine leges digerere tenetur. Dici non potest, quanta confusioprehendatur apud Autores, qui rationes legum legales reddere conantur. Non vero erit hujus confusionis finis, nisi ubi leges methodo demonstrativa in ordinem fuerint digestæ. Qui rationes legales admittit, negare nequit, leges methodo demonstrativa in ordinem redigi posse. Quoniam enim legum aliarum ex aliis ratio reddi potest, aliæ quoque ex aliis demonstrari possunt. Qui adeo concedunt dari legum rationes legales, hoc tamen non obstante contendunt, methodum demonstrativam non convenire Jurisprudentiæ; hi aut non intelligunt, quid sint rationes legales, aut ignorant, quid sit demonstratio legum ex legibus aliis tanquam principiis, aut utrumque non satis capiunt. Non nego interpretes Juris multarum legum dedisse rationes legales genuinas, etsi methodi demonstrati-

strativæ auxilio destitutos: id vero est, quod affirmo, quod in eas casu magis inciderint, quam arte, & quod ignorantiae methodi demonstrativæ tribuendum, quod spurias a genuinis non semper separaverint, haud raro etiam genuinas non sufficienter evolverint, ut vel tales agnoscantur, vel scientiæ idea exemplari instructo satisfaciant. Eodem modo sese res habet cum rationibus legalibus ac cum veritate, cujus non omnis cognitio negatur iis, qui methodi demonstrativæ ignari sunt, etsi haud raro falsum cum vero, incertum cum certo confundant, nec veritatem intime perspiciant ab ea evidentiâ procul remoti, quæ aliunde quam a methodo demonstrativa frustra expectatur. Non commendamus hanc methodum, quæ nunquam satis commendari potest, nisi quantum exigit indispensabilis necessitas, siquidem solida rerum cognitio in omni genere promoveri debet. Nihil tribuimus amorî; veritati unice litamus. Scientiam legalem promoveri optamus, cum multam ea promittat generi humano utilitatem, qua  
nunc

nunc caret. Ingenue igitur indicamus, quænam ad eam consequendam necessaria sunt, ut excelsa ingenia excitemus ad bene de scientia humanoque genere merendum. Inter est Reip. ut habeat viros doctrina solida imbutos & scientia legali instructos, quemadmodum aliquando in Philosophia civili disertius explanaturi sumus.

§. 10.

Denique omnibus, qui rationes legales scrutari genuinas sibi proponunt, commendamus, ut quid in Jure Romano sit juris naturalis, quid positivi & quid in specie Romanorum proprii accurate discernant. Et enim tum demum patebit, num ratio legis genuina ex lege naturali quadam petenda sit, an in lege aliqua positiva contineatur, an vero ex statu civili Romanorum arcessenda veniat. Qui vero huic labori se parem existimaturus est, is exasciatam juris naturalis theoriam perspectam habere debet, nec ignorare, quomodo ex lege naturali fiat positiva addendo, vel demendo,

*Quænam  
porro ad  
rationes  
legales in-  
vestiganda  
sunt.*

mendo , prouti rationes ex statu civili desumendæ requisiverint : immo nec incognita ipsi esse debent , quænam Statui Romano fuerint propria. Alias enim inanem operam sumet, nec satisfaciet peritis , si vel maxime sibi aliisque se non acutioribus vel prorsus hebetioribus magnus videatur Apollo. Jus positivum supponit naturale : antequam igitur theoria Juris naturæ fuerit exasciata , de exacta theoria Juris positivi non cogitare licet , nisi a se invicem separanda confundere velis. Multa sunt in Jure Romano ac civili omni Juris naturalis, quæ ex Systemate Juris Naturæ sumenda , non vero in systemate Juris civilis demum demonstranda , siquidem systemati Juris civilis systematis Juris naturalis partem aliquam interere nolis. Idem hic tenendum, quod de articulis mixtis in Theologia revelata demonstrandis monuimus , cum de methodo demonstrativa ad hanc applicanda ageremus. Nimirum quemadmodum Theologiæ revelatæ systema methodo demonstrativa digerendum supponit systema Theologiæ natura-

turalis eadem methodo conditum; ita systema Juris civilis methodo eadem componendum supponit systema Juris naturæ ea ipsa methodo concinnatum. Et quemadmodum articuli mixti, qui in systemate Theologiæ naturalis demonstrati sunt, in Theologiæ revelatæ systemate demonstrandi non sunt ex principiis rationis, ita nec leges, quæ ex Jure naturæ in Jus civile receptæ, in systemate Juris civilis ex principiis rationis demum demonstrandæ. Etenim si utrobique accurata esse debet demonstratio, aut sumenda sunt principia ibi ex Theologia naturali, hic ex Jure naturæ, aut integrum systema ibi Theologiæ naturalis inferendum est systemati Theologiæ revelatæ, hic systema integrum Juris naturæ inferendum in systema Juris civilis. Si principia demonstrandi petuntur ex systemate Juris naturalis in Jure civili ad legem civilem demonstrandam, quæ nonnisi ex Jure naturæ in hoc translata est absque ulla immutatione; nulla sane ratio est, cur non ipsa lex in systemate Juris naturæ demonstrata supponatur. Ubi  
vero

vero systema Juris naturæ satis completum idque veri nominis extiterit; systema Juris civilis multo minore opera absolvi poterit & ad systema Juris naturæ relatum omnem demum habebit lucem, quæ offundi potest juri civili. Et maximus labor huc redibit, ut ex principiis Theoriæ naturalis legum civilium demonstretur, quomodo conditæ fuerint leges civiles a naturalibus recedentes. Tuncque patebit magis quam nunc putatur indispensabilis necessitas Juris naturalis, consequenter & Methaphysicæ, ad Juris civilis studium feliciter absolvendum, neque qui Mathesi operam dederunt cum tædio versabuntur in studio Juris, cum in Jure eadem luce fruantur, qua in Mathesi.

## §. II.

*Monitum  
de ratio-  
nibus le-  
galibus  
hactenus  
traditis.*

Quamvis autem quoad rationes legum non modo legales, verum etiam ceteras multa regnet confusio apud Doctores, qui in eas hactenus inquisiverunt; absit tamen ut existimes, eorum operam nulli prorsus usui esse, qui genuinas scrutaturus est. Cui enim

ex



ex Psychologia leges perspectæ sunt :  
uxta quas sese exerit usus rationis ; ei  
non ignotum erit , etiam acutissimi  
aciem haud raro subterfugere rationem  
genuinam , nisi juvetur vel spuria ab  
alio allata. Obtinet hoc in omni ve-  
ritate investiganda, ita ut error ab alio  
admissus nobis monstret viam ad ve-  
ritatem inveniendam, quæ alias nobis  
minime patuisset. Errantes dum er-  
rant nos haud raro deducunt in viam  
veritatis, ut ideo ipsis tanquam duci-  
bus debeamus gratias, sine quibus ad  
veritatem perungere nobis minime  
datum fuisset. Multum adeo falleris,  
si tibi persuadeas eos , qui male fece-  
runt, quod erat faciendum , nihil ad  
hoc conferre, ut tu recte aut saltem  
melius facias. Sed de his ex instituto  
agendum est in arte inveniendi, siqui-  
dem eadem methodo in formam artis  
redigatur , qua Logicam reduximus.  
Nos sane magistros veneramur, quo-  
rum institutione profecimus , etiam  
eos , qui errore suo nos ad veritatis  
cognitionem perduxerunt, quam alias  
non assecuti fuisset, aut saltem tunc  
temporis nondum perspexissemus, de-  
(*Hor. Subs.* 1731.) T t fici-

ficiente causa, ob quam rectum facultatum usum facere nobis datum fuisset. Neque hunc morem a principiis juris naturæ & philosophiæ moralis alienum esse scimus, quicquid videatur aliis per præcipitantiam judicantibus, ad quam affectuum inordinatorum impetu abripiuntur. Si quis vero in perscrutandis rationibus legum a Doctoribus relatis utilem operam sumere voluerit; is & principiis Philosophiæ, & imprimis Juris naturæ animum imbutum possideat methodique scientificæ gnarus sit necesse est. Secus enim nulla ratio est, cur plus videat illis, consequenter rationes genuinas a spuriis ea accuratione separet, quæ ad evitandum omnes abusus in superioribus notatos aliasque aberrationes requiritur. Nimirum qui exactum de rationibus legum ab aliis relatis iudicium ferre debet, illi & principia perspecta sint necesse est, quæ ad ratiocinandum necessaria, & ipse habitura ratiocinandi ac ratiocinia legitime concatenandi polleat. Etenim cur Doctores hinc inde cespitaverint, non alia est ratio, quam quod principiorum

um philosophiæ ac juris præsertim naturæ ignari fuerint habituque demonstrandi caruerint. Quodsi ergo illotis manibus examen rationum legum aggrediaris, non multum tibi promittere poteris, nec expectandæ a te erunt nisi opiniones, quæ tibi videntur probabiliore.

### III.

#### *De Notione Libertatis Academica.*

##### §. 1.

**N**Emini ignotum est, in Academiis <sup>Institu-</sup> nostris regnare libertatem, quæ <sup>tum au-</sup> tantum valet apud Studiosos, <sup>toris,</sup> ut, quoties eam violari aut restringi arbitrantur, non modo ingentes audiantur querelæ, verum etiam haud raro magni tumultus excitentur periculosi iis, qui eidem adversari videntur. Pro certo tamen habendum, vix ac ne vix quidem unum reperiri, qui distinctam libertatis academicæ habet notionem, & multos non sine maximo suo damno libertatem in licentiam convertere solere. Quamobrem non inconsultum esse duxi ostendere, quomodo

modo ex principiis Philosophiæ nostræ  
 methodo nobis familiari distincta no-  
 tio libertatis academicæ determi-  
 netur, & libertas academica a licentia se-  
 paretur.

## §. 2.

*Ex quo  
 fonte no-  
 tio liber-  
 tatis aca-  
 demicæ  
 ducenda.*

Libertas academica supponit notio-  
 nem libertatis in genere, sub hac enim  
 tanquam species sub suo genere con-  
 tinetur. Notio libertatis in genere  
 ex Jure naturali petenda. Est enim ea  
 jus quoddam homini connatum seu  
 natura competens. Qua de causa etiam  
 nos cum in Tomo primo Juris natu-  
 ræ jura connata demonstrarem, de  
 jure quoque libertatis egimus (o),  
 eamque a licentia separavimus (p).  
 Quicquid libertatis in genere notio  
 inest, id etiam notio libertatis acade-  
 micæ cum eadem commune habet. Ut  
 vero intelligatur, quomodo libertas  
 academica ab alia quacunque specie  
 differat; expendendæ sunt actiones  
 Studiosi qua civis academici: cum non  
 in aliis, quam in hisce libertas acade-  
 mica spectari possit. Atque adeo ap-  
 paret,

(o) §. 135. & seqq.

(p) §. 149. & seqq.

paret, ex quo fonte notio libertatis academicæ deducenda sit, si eam rite determinare, nec a veritate aberrare volueris. Hanc igitur viam ingrediamur, ut distincte percipiamus, quid sit libertas academica & quomodo a licentia differat.

## §. 3.

Libertatem definivimus per potestatem in seipsum, quatenus nimirum liber seu sui juris est, qui alterius potestati subiectus non est (*q*), atque hinc deduximus (*r*), hominis liberationes esse independentes a voluntate alterius, ut adeo libertas etiam recte definiatur per independentiam actionum hominis a voluntate alterius hominis cujuscunque, quatenus scilicet homo liber in agendo non dependet nisi a seipso (*s*). Quoniam itaque libertas academica restringitur ad actiones Studioso proprias (§. 2.); ex his, quæ modo diximus, sua sponte sequitur, libertatem academicam esse independentiam actionum studiosi quæ

*Libertas  
academica  
quid  
sit.*

T t 3

studio-

(*q*) §. 135. Tom. 1. J. N.

(*r*) §. 152. Tom. 1. J. N.

(*s*) §. 153. Tom. 1. J. N.

studiosi a voluntate aliorum, ita ut studiosus liber sit, quatenus in determinandis hisce actionibus non dependet ab aliorum voluntate, sed eas determinare potest prout lubet. Est autem Universitas species quædam societatis civilis, ex docentibus & discentibus tanquam membris composita, ita ut docentes Superiorum seu Magistratus, discentes vero parentum personam tueantur: unde studiosi in Academia degentes, quatenus tanquam membra Universitatis spectantur, vocantur cives academici. Quemadmodum itaque in statu civili libertas naturalis limitatur, quantum exigit finis civitatis, ne abusu vertatur in licentiam eidem contrariam; ita quoque libertas studiosi, quatenus est civis academicus, limitatur, quantum exigit finis Universitatis, ne abusu abeat in licentiam eidem adversam. Unde quando libertatem academicam definimus per independentiam actionum studiosi quæ studiosi a voluntate aliorum; propterea ipsum non facimus independentem a legibus academicis, quali in actionibus suis determinandis earum nullam



nullam habere debeat rationem. Quemadmodum enim libertas naturalis non tollit obligationem naturalem (1); ita similiter libertas academica non tollit obligationem civis academici. Qui nomen suum dat Universitati declarans sese esse velle membrum ejusdem seu civem academicum, promisso suo se obligat ad leges academicas servandas, consequenter in tantum libertati academicæ in se spectatæ renunciat, quantum per eas limitatur. Hinc libertas academica duplici modo considerari potest, nimirum quatenus in se spectatur citra respectum ad statum alicujus Academiæ, & quatenus spectatur in relatione ad hunc statum. Illam *naturalem* vocare licet, & de ea valet definitio a nobis allata: hanc vero *positivam* seu *civilem* appellare possumus, & ea definiri poterat ad imitationem *Florentini* (2), quod sit independentia actionum studiosi qua studiosi a voluntate aliorum, nisi quatenus aliqua actio lege academica prohibetur,

T t 4

§. 4.

(1) §. 138. Tom. I. J. N.

(2) l. 4. ff. de statu homin.

## §. 4.

*Circa  
quasnam  
actiones  
versetur  
libertas  
academi-  
ca.*

Vi libertatis academicæ studiosus seu civis academicus ea facere potest, quæ lubet, nisi quatenus lege academica quid prohibetur, dum eas spectamus actiones, quæ studioso propriæ sunt. Quodsi ergo eandem ultra suos limites extendere nemo debeat, necesse est, ut inquiramus, quænam sint actiones studiosi tanquam personæ moralis propriæ. Videamus itaque, quo fine studiosi in academias proficiantur, ut, qualis sit persona moralis, quem studiosum appellamus, & quænam ad finem suum consequendum faciant actiones, intelligatur. Constat juvenes in academias mitti, ut ad certum quoddam vitæ genus, olim in civitate obeundum, reddantur apti ac idonei, quod sine intellectus ac voluntatis cultura rite obire non licet. E. gr. qui studiosi Theologiæ appellantur, ad munus ecclesiasticum adspirant, atque adeo in Academiam proficiuntur, ut cultura intellectus ac voluntatis ea consequantur, quæ requiruntur, ut quis Ministri ecclesiæ munere dextre ac utiliter defungi possit. Ita Studio-

sus

sus Juris, qui ad munus Judicis aut Advocati adspirat, in academiam adven-  
tat, ut ea discat easque consequatur  
animi dotes, ut aliquando Judicis aut  
Advocati personam cum laude susti-  
nere queat. Studiosus Medicinæ, qui  
artem salutarem post reditum in pa-  
triam exercere decrevit, in Academia  
commoratur, ut aptus efficiatur ad  
morbos sanandos & præcavendos.  
Hinc adeo liquet, actiones studiosi  
qua studiosi non esse alias quam quas  
committere aut omittere tenetur, ut  
& intellectus, & voluntas ad eum per-  
fectionis gradum perducatur, qui ad  
munus, ad quod adspirat, recte ob-  
eundum requiritur. Et in hisce actio-  
nibus independens est a voluntate alio-  
rum, ita ut facere possit, quod lubet,  
nisi quatenus quid lege academica pro-  
hibetur. Non faciendum ipsi est, quod  
volunt commilitones; non faciendum,  
quod hic vel ille vult Professor, aut  
alius quidam docens: sed quemadmo-  
dum vi libertatis naturalis unicuique  
hominum permittendum est, ut in  
determinandis actionibus suis suum  
sequatur judicium, quamdiu contra

jus tuum nil facit ( $\alpha$ ); ita etiam vi libertatis academicæ unicuique studioso permittendum est, ut in determinandis actionibus studioso propriis ex fine, cur in Academiam accesserit, agnoscendis & ab aliis distinguendis suum sequatur judicium, nec aliquis commilitonum vel Professor etiam, aut docens alius prætereundum potest, ut sequatur judicium ipsius, quamdiu contra jus ejusdem nil facit. Exemplo res evadet clarior. In academiis animus studiosi imbui debet certa doctrina, siquidem aptus ac idoneus esse vellet ad munus illud obeundum, ad quod adspirat. Eo fine frequentare tenetur collegia eorum, qui docent ipsi discenda. Electio igitur docentis, frequentatio hujus vel illius collegii, diligentia & assiduitas pertinent ad actiones studioso proprias. Vi libertatis academicæ studiosi est pro suo arbitrato eligere docentem, cujus lectionibus interlit & ex cujus ore proficiat: neque ea in re sequi cogitur judicium commilitonis, aut Professoris alicujus.

Quodsi

Quodsi tamen lege aliqua academica, quæ in statutis continetur, cautum sit, ut nonnisi Titius hoc doceat, nullus autem alius; si alium docentem sibi eligere velit, non obstante libertate academica, ne faciat, cogi potest. Neque vero cogi potest, ut Titii collegia frequentet, quoniam vi libertatis academicæ collegium aliquod frequentare perinde ac non frequentare potest, prout ipsi libuerit. Similiter vi libertatis academicæ si collegio nomen suum dedit studiosus pro suo arbitrio frequenter lectionibus interesse, aut raro ad eas audiendas accedere potest, prout libuerit: neque docenti permissum est compellere eum in auditorium statuto tempore, aut absentiae pœnam in eum statuere, vel in rationem absentiae inquirere; neque etiam permissum est commilitoni, ut ipsum adigat ad exemplum suum sequendum. Alia igitur est ratio studiosi in Academia degentis & discipuli in Schola, qui Præceptoris sui voluntatem sequi tenetur in discendo & vi compelli potest ad faciendum, quod facere non vult. Ad hætenus dicta  
qui

qui animum advertit, is facile deprehendat actiones, in quibus locus est libertati academicæ easque discernet a ceteris, ad quas hæc minime pertinet.

## §. 5.

*Actiones libertatis naturalis non confundenda cum actionibus libertatis academicæ.*

Libertas academica non tollit libertatem naturalem, sed ex hac potius tanquam ex fonte suo fluit, adeoque eam intactam relinquit, quatenus per statum civilem non limitatur. Distinguendæ igitur sunt actiones, quæ sunt libertatis naturalis, ab iis, quæ sunt libertatis academicæ. Quoniam itaque studiosus tanquam peregrinus in alieno territorio per aliquod tempus commoratur, vi legis naturalis simul civis temporarius est, seu membrum ejus civitatis, in qua degit, & ideo libertas naturalis ipsi salva est quoad actiones, de quibus leges positivæ istius civitatis nil disponunt, quoad ceteras vero iisdem legibus subijcitur. Ita vi libertatis naturalis pro arbitrio suo statuere potest studiosus de habitatione sibi commoda visa, nec cuiquam jus est eum adigendi, ut in aliis potius, quam in hisce habitet ædibus. Simi-

liter



iter vi ejusdem ipsi liberum est, quo convictu uti & quomodo pecunias suas erogare velit. Etsi adeo Rectori academiciæ competat jurisdictio in cives academicos, non tamen ideo ipsi us est studiosis præscribendi, in quibus ædibus habitare, quo convictu uti & quomodo pecunias suas administrare debeant. Quodsi tamen leges lentur civiles, quibus actiones istæ certo modo limitantur; contra eas ne quicquam facere potest studiosus, quatenus enim civis temporarius in eo territorio esse vult, tacite libertati suæ naturali renunciat, quatenus ibi loci lege positiva restringitur. Quæ ex libertate naturali fluunt, ea studiosus communia habet cum civibus aliis, ejusdem civitatis membris, nec ipsi tanquam studioso competunt, cum ex adverso quæ libertati academiciæ accepta ferenda studioso propria sint. Duplicem studiosus in Academia degens sustinet personam, nimirum civis academici & civis temporarii. Hæc differentia nisi attendatur, fieri haudquaquam potest, ut in omni casu de potestate studiosi in seipsum, seu actionum

num

num ipsius a voluntate aliena independentia exactum feratur iudicium. Non finguntur subtilitates inanes, ubi differentiae ipsis rebus insunt : quin potius diversae hinc oriuntur notiones, ex quibus petenda est ratio eorum, quae in genere spectata eandem habere videntur.

## §. 6.

*Quenam  
de privile-  
giis stu-  
dioforum  
hic tenen-  
da,*

Equidem fieri potest, ut civis temporarii, qui studiosus est, libertas naturalis minus restringatur, quam civium reliquorum sive perpetuorum, sive temporariorum. Enimvero haec praerogativa juris privilegium academicum est a Rectore civitatis, cujus imperio summo subest academia, studiosis concessum. Respectu istiusmodi privilegiorum studiosus consideratur tanquam persona privilegiata, quae jure potiori utitur aliis civibus temporariis cum civibus perpetuis eodem jure utentibus. Quamobrem ea, quae licita sunt vi privilegiorum academicorum, non confundenda cum iis, quae a libertate academica veniunt. Ita in Academiis, in quibus studiosi subsunt Jurisdictioni Rectoris, cum alii cives pere-

peregrini subsint jurisdictioni ordinariæ illius loci, studiosi habent forum privilegiatum, neque accusati comparere tenentur in foro alio, etsi tanquam cives peregrini ordinariæ jurisdictioni illius loci subesse deberent. Hoc vero privilegium non fuit ex libertate academica. Similiter si studiosis competit immunitas a certis oneribus, quæ ferre debent etiam cives temporarii, quæ ideo licita sunt studioso, non autem alii civi temporario, ad libertatem academicam minime referenda. Quæ enim a privilegio studiosis concessa veniunt, eorum ratio ex notione libertatis academicæ reddi nequit. Libertas academica in se & originarie spectata naturale quoddam jus est ex ipsa notione studiosi fluens: ast privilegia, quibus studiosi tanquam civis temporarii jus efficitur potius quam aliorum peregrinorum in territorio isto commorantium, inde originem suam minime deducunt, etsi vulgo libertas academica dicatur major, ubi studiosi præ aliis peregrinis & civibus perpetuis potiori jure fruuntur.

## §. 7.

*De restri-  
ctione li-  
bertatis  
signanda,*

Ex adverso fieri etiam potest, ut libertas eorum, qui studiorum causa in urbe commorantur, magis restringatur quam aliorum peregrinorum, adeoque ipsis licita non sint, quæ hisce licent, quemadmodum etiam libertas academica limitibus quibusdam coerceri potest, qui eidem per se non conveniunt. Hoc dijudicandum est ex legibus positivis, quas superiori terrelicuit. Quoniam adeo superior non permittit, ut quis studiorum gratia in academia sua commoratur, nisi sese legibus istis subiciat; qui nomen dat academix, libertati & academica, & ei, quæ competit aliis civibus temporariis in isto territorio, in tantum tacite renunciat, quantum utraque legibus positivis coarctatur. E. gr. Ponamus esse legem, qua nummi, qui mittuntur studiosis, mitti jubentur ad quosdam Professores, qui sumtus necessarios inde subducant & cuique, quod debetur, solvant. Repugnat hoc libertati, qua fruuntur cives alii temporarii de nummis suis pro arbitrio suo disponentes. Non tamen ideo con-

conqueri potest studiosus quasi de jure quodam suo violato : neque enim ipsi fit injuria , cum fiat volenti. Si nolit nummos suos mitti ad Professores , qui de iis juxta legem præscriptam disponunt ; ab Academia ista abesse debet , cum liberum ipsi sit , utrum legi se submittere & in Academia hac commorari malit , an vero in alia Academia vivere , ubi talis lex non adstringit studiosos. Cum vero superioris sit ferre leges , quibus libertas sive academica , sive naturalis restringitur ; jus libertatis studiosorum violant Professores , qui proprio ausu , nulla a superiori concessa potestate , eandem limitibus coercant , injurii adeo in studiosos , quemadmodum in ipsum Superiorem , cujus jus sibi arrogant.

§. 8.

Demonstravimus in Jure naturæ (y), *An libertas academica tollat obligationem naturalem.* libertatem naturalem , quæ scilicet natura competit homini omni , non tollere obligationem naturalem , ac ideo nemini , quia liber est , permissum esse , ut quid faciat contra jus alterius (z).

(Hor. Subf. 1731.)

Uu

Quo-

(y) §. 159. Tom. I.

(z) §. 160. Tom. I.

Quoniam itaque libertas academica sub naturali tanquam species sub suo genere continetur (§ 2.); nec ea obligationem naturalem tollit, neque adeo studioso, quia studiosus est, permissum ut quid faciat contra jus alterius cujuscunque. Si studiosus officiis suis erga seipsum sive naturalibus, sive academicis non satisfacit; nemini jus est ab ipso rationem exigendi, cur hoc non faciat, vel remediis coactivis ipsum adigendi ut faciat: hoc enim repugnat libertati naturali & academicæ, vi cuius conscientia ipsius relinquendum, quid agat (a). Attat quamprimum violat jus alterius, hoc ferendum non est; cum naturaliter homini omni permissum sit jus suum adversus alterum prosequendi, cumque studiosus sit civis temporarius, subiectus legibus civilibus loci, ubi degit, adversus eum in hoc casu civibus perpetuis licent, quæ vi illarum legum adversus alium civem sunt permissa, nisi quatenus privilegia jus quoddam potius eidem conferunt (§. 5.), quod citra injuriam a nemine violari potest. Quodsi exem-

plis

---

(a) §. 157. Tom. 1. Jur. nat.



olis hætenus dicta illustrare vellemus, ingens dicendorum campus aperiretur, qualis locus non conceditur in hisce horis subsecivis. Quoniam tamen studiosi distincta notione satisque dæquata libertatis academicæ destituti male eandem interpretantur, sibique competere jura arbitrantur, quæ nulla sunt; aliqua saltem in specie moneri consultum est. Multi studiosorum ubi persuadent, quasi sui sit arbitrii, utrum docentibus, quorum collegiis interfuerunt, honorarium, quod vulgo dicitur, aut rectius & magis proprie loquendo mercedem promeritamolvere velint, nec ne. Obligatio solutionis nascitur ex contractu, qui inter ipsos & docentem initur, dum nomen suum dant. Solvere, quod debes ex contractu, legis naturalis est. Ab hac igitur obligatione studiosum non liberat libertas academica. Si non visolvere quod debes, alteri competitutur jus te vi adigendi, ut facias, quod sponte facere non vis, & in statu civili implorandum est officium judicis, cui exercitium juris cogendi demandatum. Quamobrem docens in-

Uu 2

juri-

juriam non facit studioso; ubi iudicis officium implorat adversus eum, qui quod debet solvere, detrectat: sic ita quod multi docentium hoc non faciant, quemadmodum ego, qui per quadraginta propemodum annos in academiis docui, nunquam auxilio iudicis usus in exigendo honorario. Idem jus in studiosum est omni, cui quid ipse debet. Somniant adeo, qui opinantur, quasi sibi injuria fiat, siquidem querela ob moram ad iudicem defertur, multoque magis a veritate recedit eorum opinio, quod ea de causa jus non solvendi acquisiverint. Similiter etsi nemo prohibere possit, quominus pecunias in alios usus impendat studiosus, quam ad quos mittuntur; non tamen ideo hoc facere licet vi obligationis naturalis, sed tantummodo impune facit vi libertatis academicæ, ubi nulla lege positiva restringitur.

## §. 9.

*Licentia  
academi-  
ca quid  
sit.*

Ex hactenus dictis abunde constat, quo usque extendatur libertas academica proprie sic dicta & intra quos limites coercetur, si accedat libertas studio-

studiosis tanquam peregrinis in alieno territorio commorantibus seu civibus temporariis, ut adeo extemplo pateat, um abusu in licentiam vertatur. Luet tamen delicentia academica diserus dicere. Licentia, quatenus opponitur libertati naturali, est jus sine illa restrictione faciendi, quod libet: quod fingi, non dari utpote per naturam humanam impossibile a nobis demonstratum est (*b*). Quamobrem licentia academica est jus fictum studio- in Academia viventis sine ulla restrictione faciendi, quod libet, siue consideretur tanquam studiosus, siue tanquam iustus temporarius, siue tanquam homo. Vimirum qui libertatem academicam um licentia academica confundunt, falso opinantur, quasi eadem tollatur omnis obligatio, ut adeo in determinandis actionibus suis nullius legis siue naturalis, siue positivi habere debeat rationem studiosus, sed prorsus rex sit. Quoniam error infinitus si, non omnes licentiam academicam, quam pro libertate habent, eodem

U u 3                      modo

---

(*b*) §. 150. Tom. I. *Jur. nat.*

modo extendunt, etsi omnibus eadem sit confusa notio. Quod enim nonnulli arctioribus limitibus eandem constringant, quam alii, non inde est, quod notio licentiæ academicæ alia ipsis sit notio; sed quod aliæ sint rationes, pro diversitate subjectorum admodum variantes, cur quasdam actiones avertentur, quas alii sub eadem comprehendendi putant. Sufficit omnibus eam insedere opinionem, quod studioso facere liceat, quod lubet, sine ulla restrictione, quasi nulla esset ipsius obligatio, aliorum ex adverso jus nullum. Jus proprium vero voluntate sua metiuntur, quam pro ratione stare sibi persuadent. Lex naturæ obligat studiosos, ut omni studio ac labore contendant ad finem, cuius gratia in academiam venerunt, aut venire debuerunt, quem esse culturam intellectus ac voluntatis ad munus aliquando in patria vel alibi obeundum necessariam constat. Qui libertatem academicam cum licentia confundunt, hanc obligationem tollunt. Et si vel maxime studiis gnaviter incumbunt, non tamen hoc faciunt, quod ad faciendum se

ē obligatos agnoscant, sed ex ratio-  
nibus aliis extrinsecis, quæ ipsis neces-  
sitatem diligentiaē persuadent. Inde  
est, quod negligent, quæ maxime ad-  
discere debebant, vel quod se eorum  
notitia carere posse arbitrentur, vel  
quod ea addiscendi studium molestum  
videatur. Similiter lex naturæ studio-  
sos obligat, ut pecunias ad tolerandos  
sumtus sibi missas recte administrent.  
Hanc obligationem non agnoscunt,  
qui libertatem academicam cum licen-  
tia confundunt, in erogandis nummis  
ad rationes tantummodo extrinsecas  
minimè advertentes, per quas arbi-  
trium suum determinant. Ex licentia  
ideo academica fuit perversa studio-  
rum œconomia, de qua tot hodie in  
Academiis audiuntur quærelæ. Por-  
ro lex naturæ obligat studiosos tan-  
quam homines & positiva tanquam  
vires temporarios, ut unicuique sol-  
vant, quod debent. Licentiam acade-  
micam cum libertate confundentes  
nec hanc obligationem agnoscunt; sed  
sibi solvere licere putant, quod de-  
bent, quando commodum videtur,  
aut, si non sit commodum, nec solu-



tionem jure a se exigì putant, ita ut injuriam interpretentur, si quis petit, quod sibi debetur. Studiosus lege naturali obligatur aliis ad ea officia præstanda, quæ homo quilibet debet alteri. Qui vero licentiam academicam pro libertate habent, sibi in alios licere arbitrantur, quod libet. Inde est, quod opinentur, quasi jure suo cives perpetuos contemnere, contumeliis afficere, & quidvis in eos audere possint, nec his permissum sit conqueri de injuria sibi illata. Plura addere nolo, qui enim perversos multorum studiosorum mores perpendere voluerit, quænam eorum actiones licentiæ academicæ tribuendæ sint vi principiorum a nobis distinctè explicatorum dignoscet. Qui adeo ex instituto de libertate academica & licentia cum eadem perperam confusa commentari voluerit; ex indicatis fontibus derivabit, quæcunque dicenda sunt ac singula accurate demonstrabit, modo principiorum philosophiæ ac methodi fuerit gnarus, sine quibus nulla datur solida eorum, quæ ab hominibus fiunt, cognitio.



§. 10.

Qui mores studiosorum in Academia viventium perspectos habet, <sup>Utilitas</sup> quantum noceat ignorantia distinctæ <sup>notionis</sup> libertatis academicæ notionis, satis <sup>explicata.</sup> superque intelligit, modo discernere non potest ea, quæ a licentia academica ortum trahunt, a ceteris. Utile igitur est nosse, in quo libertas academica consistat & quinam sit ejus abusus. Quæ in anterioribus explicavimus, fecunda sunt principia, ex quibus omnia deduci possunt a studioso observanda, ne libertas in licentiam vertatur. Quamobrem cum maxime noceat studiosus & sibi, & aliis; optandum omnino foret, ut nemo in Academiam mitteretur nisi libertate academica rite intellecta & ejus recto usu perspecto.

IV.

*De Experientia morali.*

§. 1.

**P**hilosophia experimentalis vulgo <sup>Institutum</sup> non intelligitur nisi de naturali. <sup>authoris.</sup> Etenim hætenus usu non est receptum nisi in Physica, ut per experimen-

U u 5                      men-

menta inquiratur in effectus naturæ absconditos & causas eorum, quæ patent. Constat autem quanta utilitate Philosophia experimentalis fuerit introducta tum ad veritatem latentem detegendam, tum ad eam, quam cognovimus, confirmandam. Qui vero sibi persuadent extra cognitionem rerum naturalium nullum esse locum experimentis, oppido falluntur. Etenim in aliis quoque Philosophiæ partibus utiliter fiunt, & in ipsa inprimis Philosophia morali. Connubium itaque rationis & experientiæ commendandum in quolibet cognitionis genere, & magnum habet momentum in Philosophia morali. Experimenta & observationes tanquam duæ species sub Experientia tanquam genere continentur. Acidem est observationum, qui experimentorum usus. Quod si observationes semper in potestate essent, quando eas desideramus, ac tales haberi possent, quales expetimus; experimentis carere possemus. Quamobrem quoad Philosophiam perinde est, siue quid per experimenta detegatur, siue ex observationibus eruatur.

In

præfenti itaque nobis propositum  
 est docere, quomodo observationibus  
 & experimentis sit utendum in Philo-  
 sophia morali ad imitationem ejus,  
 quod in Philosophia naturali fieri so-  
 let.

## §. 2.

Veritates morales duplices sunt. *Quomodo*  
 Aliæ theoreticæ, aliæ practicæ. Primo *per obser-*  
 gitur tenendum, quomodo observa- *vationes*  
 tionibus & experimentis sit utendum *pateat in-*  
 quoad veritates theoreticas. Veritates *trinfeca*  
 theoreticæ actionum humanarum in- *actionum*  
 trinfecam bonitatem & malitiam, seu *honestas*  
 honestatem ac turpitudinem inspicien- *& turpi-*  
 lam sistunt. Quæritur itaque, quo- *tudo.*  
 modo per observationes & experimen-  
 ta pateat actionum intrinseca honestas  
 ac turpitude. Ex iis, quæ in Philo-  
 sophia practica universali demonstra-  
 vimus (c), constat, actiones intrinse-  
 ce bonas tendere ad perfectionem ho-  
 minis statusque ejusdem, intrinsece  
 autem malas ad imperfectionem ejus-  
 dem status ipsius, consequenter non mi-  
 nus honestatem, quam turpitudinem  
 intrinsecam æstimandam esse ex eo,  
 quod

---

(c) §. 50. & seqq. part. 1.

quod ex actionibus hominum liberis necessario consequitur, etsi propter circumstantiarum diversitatem non semper specie idem sit. Quoniam homines, inter quos vivimus, continuo edunt actiones tam malas, quam bonas; si attentionem nostram desiderari minime patiamur, ea observare licet, quæ ex actionibus ipsorum consequuntur. Atque adeo ex observationibus honestatem ac turpitudinem actionum eruere licet. Necesse tamen est, ut te satis circumspectum præbeas, ne actioni cuidam tribuas, quod alii caulæ tribuendum, & ne necessario inde consequi existimes, quod saltem per determinaciones quasdam accidentales superaccedentes hinc consequitur, etiam quatenus in genere spectatur. Antequam vero dispiciamus, quænam ad circumsectionem istam requirantur; tenendum est, observando vel erui honestatem ac turpitudinem intrinsecam actionum, vel confirmari. Posterius facilius est, prius difficilius, si in genere pronunciare debemus, quid obtineat. Quamobrem primo dicemus, quomodo intrin-

seca

leca actionum honestas & turpitudine observationibus confirmanda. Demonstravimus in Philosophia practica universali (d), actiones bonas per easdem rationes finales determinari, per quas determinantur naturales, malas autem determinari per diversas. Vi hujus principii demonstrari potest, quemadmodum in Jure naturæ fecimus, quænam actiones hominum sint intrinsece bonæ, quænam malæ. Quamobrem veritatem eorum, quæ demonstrata sunt, confirmaturus animum advertere debes ad actiones tam alienas, quam proprias, & postea cum cura attendere ad ipsorum statusque eorundem mutationem inquisiturus in rationem, cur hæc detur: hoc enim pacto innotescet, num actioni sit tribuenda, utpote non secutura, nisi ea edita fuisset. Quando suo tempore ad Philosophiam moralem accedemus, principia quoque suppeditabimus, quæ in casibus specialibus usui sunt. Hic nec propositum nobis est ultra generalia progredi, nec progredi licet, cum ea, quæ hoc fine præsupponenda sunt, a nobis



nobis hic demonstrari minime possunt. In quibusdam actionibus intrinseca honestas & turpitudine adeo obvia est, ut sola attentione agnoscatur : sed de his multa præcipi non est opus, quæ per se patent. De iis enim potissimum solliciti sumus, quæ non statim unicuique obvia. Si quis theoriam completam experientiæ moralis dare vellet, ei multi distinguendi forent casus, in quibus non prorsus idem obtinet, et si quod obtinet in singulis ex principiis generalibus deducatur. Nobis in præsentis sufficit indicare viam, qua sit eundem, ut ad metam perveniatur, ad quam contenditur. Diximus jam actiones per se bonas tendere ad perfectionem hominis atque status ejusdem, malas ex adverso ad imperfectionem ejus & status ipsius. Et hoc quidem principio opus habes, ubi honestatem ac turpitudinem actionum intrinsecam ex observationibus eruere volueris. Nimirum hic animum advertere debes ad actiones tam proprias, quam alienas, & memoriæ infigendum, quid tu feceris, vel fecerint alii. Non minori sollicitudine animum attende-

re



re debes ad mutationem agentis & status ejusdem, & inquirendum in rationem hujus mutationis. Ubi enim deprehendis ex actione ipsius hanc mutationem fuisse consecutam, non consecuturam, si actio edita non fuisset aut privativa fuisset omissa; actio num sit intrinsece bona, an vero intrinsece mala dignosces. Multa tamen, quemadmodum jam monui, hic circumspeditione opus est, ne actionem intrinsece bonam, vel malam statuas, quæ tantummodo apparet. Atque acumen hic præsupponitur non vulgare, nisi ubi inde cœcutire velis, omnia quoque exacte trutinandi habitu pollere debes, ne actioni per se tribuas, quod alii causæ tribuendum, quæ ex accidente eidem non nisi accedit. Nihil igitur mihi consultius videtur, quam ut in hisce consilium perpetuum sit rationis ac experientiæ & ne judicium præcipitet, qui nec principiorum psychologicorum adhuc gnarus est, nec ulla Philosophiæ practicæ theoria genuina imbutum habet animum. Non multa præclara in ullo genere cognitionis philosophicæ præstabit, qui Philosophia

phia veriori, qualem nos dedimus, vacuum possidet animum: Quo vero quis in ea majores fecerit progressus, eo etiam in observando erit acutior. Exemplo Astronomorum docemur, quantum observationibus debeat theoria & quantum vicissim observationes debeant theoriæ, observationibus theoriam & theoria vicissim observationes continuo perficientibus. Quæ ab eo, qui omnis theoriæ ignarus est, nec multo facultatum cognoscendi usu pollet, ex observationibus eruuntur, nonnisi obvia sunt ac plerumque non satis determinata. Nisi præsupponi possit aliqua theoria, non multum progredi datur; quo vero illa fuerit amplior magisque exalciata, eo etiam plura observationi patent.

§. 3.

Quomodo  
& quando  
intrinseca  
actionum  
bonitas  
cognosca-  
tur per ex-  
perimen-  
ta.

Homo natura obligatur ad actiones intrinsece bonas committendas, intrinsece vero malas omittendas (e), & ad illas committendas, has omittendas eundem quoque obligat Deus (f). Actiones itaque intrinsece malas ne-

(e) §. 153. part. 1. Phil. pract. univ.

(f) §. 276. part. 1. Phil. pract. univ.

mini committere licet, neque etiam  
 licitum est seducere alios ad eas com-  
 mittendas (g). Qui adeo experimen-  
 ti notionem habet & ejus ab observa-  
 tione differentiam perspicit; hinc  
 omnino videt, experimenta quoad  
 actiones intrinsece malas esse illicita.  
 Non facienda sunt mala, ut inde eve-  
 niant bona. Immo nec prudentiæ fo-  
 ret experimentum capere actionis in-  
 trinsece malæ in seipso, cum omnis  
 actio intrinsece mala noceat agenti,  
 utque adeo absurdum sit tibi ipsi no-  
 cere, ut certus evadas, te hoc agendo  
 tibi nocere. Solæ igitur actiones bo-  
 næ experimenta admittunt, malæ au-  
 tem nonnisi observationibus subjacent.  
 Et quatenus obligatio naturalis non  
 permittit, ut mala facias; danda omnis  
 opera est, ut intrinseca malitia magis  
 observetur in actionibus alienis, quam  
 in propriis. Quoniam tamen dum ad  
 virtutem contendis, fieri haud qua-  
 quam potest, ut subinde facias, quæ  
 mala sunt, immo haud raro specie bo-  
 ni delusus mala facis, vel aliis rationi-  
 bus extrinsecis adductus committis

(*Hor. Subs. 1731.*)

X x

actio-

(g) §. 694. *Tom. I. Jur. nat.*

actionem, quæ omittenda erat; per se patet, quod non modo hisce in casibus observare liceat malitiam intrinsecam actionis in teipso, verum etiam quod ipsa lex naturæ te adigat, ad eam observandam, quatenus præcipit emendationem utpote urgens continuum progressum ad maiorem perfectionem. Ostendemus in Philosophia morali, qua attentione opus sit ad quaslibet suas actiones, ut intelligas, quantum in virtute profeceris, & quibus imperfectionibus adhuc obnoxius sis. Hac autem ipsa attentione una detegere datur intrinsecam actionum honestatem atque turpitudinem in seipso.

## §. 4.

*Necessitas  
experien-  
tiæ mora-  
lis quoad  
rectitudi-  
nem actio-  
nis.*

Inprimis autem observationibus & experimentis opus est ad rectitudinem actionis agnoscendam. De rectitudine actionis principia generalia demonstravimus in theoria Philosophiæ præcticæ universalis (b), atque per ea constat, quænam observanda sint. Ubi in Philosophia morali principia specialia

(b) §. 64. & seqq. 70. & seqq. part. 1. Phil. pract. univ.

alia tradiderimus, ea observationes & experimenta facilitabunt. Rectitudo actionum requirit determinatum quendam omnium facultatum animæ usum quippe quæ omnes ad actionem humanam concurrunt, etsi concursus magna, immo haud raro maxima ex parte adeo confuse percipiatur, ut sola attentione non animadvertatur. Quoniam tamen ea, quæ in nobis sunt, novimus, quatenus eorum conscii sumus, ex adverso autem, quæ in aliis sunt, nonnisi ex actibus externis tanquam signis internorum colligenda veniunt, sæpius nonnisi conjectando; adeo observationes & experimenta rectitudinis actionum capere facilius datur in seipso, quam in aliis. Et quia ad rectitudinem actionum ipsa lege naturali obligamur (i); istiusmodi observationes & experimenta in seipso non modo capere licet, sed etiam capere debemus. Novimus culpam esse defectum rectitudinis actionis vincibilem (k). Sine experimentis propriis vix ac ne vix quidem statuere datur,

X x 2                      num

(i) §. 189. part. 1. *Phil. pract. univ.*

(k) §. 696. part. 1. *Phil. pract. univ.*



num is vincibilis sit , nec ne. Et defectu horum experimentorum contingit, ut infirmitati tribuantur humanae, quæ negligentiae tribuenda erant, & indefessa diligentia tandem evitari poterant. Quamobrem experimenta apte necessaria sunt quoad rectitudinem actionis, ne quid minus recte a nobis fiat nostra culpa. Quod si ea attenta mente perpendas, quæ de culpa demonstravimus (1); quænam observanda & experimentanda sint in qualibet actione, ut quantum a culpa vacet & quid culpæ adhuc super sit intelligas, non ignorabis. Abundantem perspicies, quantus observandorum hic sit numerus, ut non amplius mireris, cum homines ad id, quod culpæ est in actionibus suis, animum parum advertant, quod actionum rectitudo adeo rara inveniatur, etsi maxima felicitatis humanæ pars sit habere animum nullius culpæ sibi conscius: id quod nonnisi rectitudine actionum consequi datur.

---

(1) §. 77. & seqq. *ibid.*



## §. 5.

Operosum videbitur forsan plerisque ac tædiosum honestatem intrinsecam & turpitudinem atque rectitudinem actionum humanarum observandi & experimentandi studium, ut, qui per præcipitantiam judicare sueverunt, inanem existimaturi sint operam, quæ hisce observationibus & experimentis impenditur. Urgebimus eorundem necessitatem in Philosophia morali, ibidemque adferemus ea, quæ ad eandem nobis commendandam faciunt. Ne tamen neglexisse videamur, quæ ad commendandum illas observationes illaque experimenta esse videbantur, pauca quædam dicenda nobis sunt. Ad rectitudinem actionis requiritur determinatio voluntatis per bonitatem, voluntatis per malitiam actionis intrinsecam, & judicium de bonitate & malitia actionis verum esse debet (m). Apprime igitur necessarium est, ut recte agas, observando & experimentando detegere ac aliunde jam cognitam confirmare actionum humanarum intrinsecam honestatem ac

X x 3

tur-

(m) §. 80. part. 1. Phil. pract. univ.

turpitudinem. Sane ubi hic notatur defectus rectitudinis ut actiones legi naturæ conformes determinantur per rationes extrinsecas, omissa actionum intrinseca honestate ac turpitudine, quod virtutis speciem habet cum virtute ipsa confunditur, videnturque sibi hanc consecuti, qui ab eadem procul adhuc absunt. Modo insinuavi (§. 4.), maximam felicitatis partem esse, ut habeas animum ab omni culpa vacuum. Quare cum hoc fieri non possit, nisi rectitudinis in agendo ubi fueris conscius; necesse omnino est, ut, quæ de rectitudine actionis demonstrata sunt, observando & experimentando confirmes, omnemque moveas lapidem, quo huc spectantia in teipso experiaris. Equidem me fugit omnium minime, quam sit a moribus nostris alienum observationibus & experimentis vacare, de quibus modo dixi; quodsi tamen ea ad animum revocare volueris, quæ de experientia domestica in moralibus a nobis demonstrata sunt (n), mores hosce minime probabis, quin potius nobis facilem præbebis

---

(n) §. 261. & seqq. part. 1. *Phil. pract. univ.*

bebis assensum illorum emendationem urgentibus. Suo etiam tempore in Philosophia morali ostensuri sumus, quomodo studium hoc observandi facili-  
tetur, ne videatur nimis operosum, nec molestum accidat, & quomodo tædium tollatur, immo efficiatur, ut non sine voluptate verferis in obser-  
vando & experimentando.

## §. 6.

Veritates practicæ morales ut ob-  
servationibus & experimentis confir-  
mentur, magis opus est, quamvis  
etiam observationes conducere pos-  
sint ad eas detegendas: id quod tamen  
non adeo facile est, siquidem no-  
tiones rite determinatas desideren-  
tur. Praxium moralium determina-  
tæ notiones adhuc desiderantur. Et si  
enim nulla Philosophiæ pars majorem  
utilitatem spondeat generi humano,  
quam Philosophia moralis, in qua pra-  
xes illæ demonstrari debent; diffiteri  
tamen nequit, nullam propemodum  
minus quam hanc esse excultam. Ratio  
in promptu est. Praxis moralis niti-  
tur recto facultatum animæ usu, adeo-  
que ex principiis psychologicis de-

*An necesse  
sit veri-  
tates pra-  
cticas mo-  
rales ob-  
servando  
& experi-  
mentando  
confirma-  
ri.*

monstranda. Psychologia vero hæc-  
nus parum fuit exulta, quemadmo-  
dum ad oculum patet, siquidem Psy-  
chologiam nostram cum iis conferre  
volueris, quæ ante nos de anima scri-  
pta sunt. Psychologiæ principiorum  
& methodi demonstrativæ ignari fac-  
ile & sibi, & aliis persuaserunt, praxin  
moralem, quæ usu facultatum animæ  
continetur, nullis regulis adstringi pos-  
se. In hac opinione confirmati sunt  
præjudicio, quasi quæ a libertate vo-  
luntatis pendent non certæ legi sub-  
jiciantur, consequenter nec demon-  
strari possint. Enimvero omnem fa-  
cultatum animæ usum certis contine-  
ri regulis & liberas etiam volitiones  
ac notiones quasvis non determinari,  
nisi illarum determinato concursu;  
non modo ex iis intelligitur, quæ de  
Facultatibus animæ in Psychologia  
nobis demonstrata sunt, verum etiam  
ex his perspicitur, quæ de Deo in  
Theologia naturali ostendimus. Et  
quando annuente Deo ad Philoso-  
phiam moralem accedemus, quæcun-  
que ad praxin moralem spectant ea-  
dem evidentia demonstrabimus, quo  
hæc-

hactenus cetera demonstrata fuerunt, tumque liquido constabit, salva libertate voluntatis hoc fieri posse. Equidem *Lockius* in literis ad *Molyneusium* am monuit, philosophiam moralem non minus demonstrari posse, quam elementa Geometriæ, ipsique assenti-  
tur *Leibnitius* in Animadversionibus, quas in Tentamen *Lockii* de intellectu humano conscripserat eidemque manuscriptas communicaverat: ex ipsis tamen literis *Lockianis* constat, ipsi tantummodo sermonem fuisse de officiis hominis, quæ ad theoriam spectant & a nobis in Jure naturæ demonstrantur, non vero de praxi, qua modus acqui-  
tendi habitus virtutis & fugiendi vitia cum aliis huc spectantibus continetur, quippe de quo nemo hactenus cogita-  
vit, quod ex principiis psychologicis a priori demonstrari possit. Provo-  
co ad libros qui de philosophia & Theologia morali huc usque in publi-  
cum prostant. Generalia nos dedi-  
mus principia in parte altera Philoso-  
phiæ practicæ universalis, quibus ad-  
utus prævidere potest acutior, quæ-  
nam in Philosophia morali sint expe-



etanda. Et ubi ea publicæ luci fuerit exposita, quod experimentis hic magis sit locus, quam in theoria morali, quodque magis opus sit observationibus domesticis, me vel tacente videre licebit. Ne tamen sine ratione quid asseruisse videamur, hoc unum jam perpendi velim. In Philosophia morali, siquidem Philosophus officii sui partes adimplet, demonstrandum est, quo facultatum usu determinentur actiones bonæ & quo earundem abusu determinentur malæ, ut ne ignores, quid fieri debeat, ut actiones bonas committas, malas autem omittas libera voluntatis determinatione. Experiendum itaque est, num isto, qui docetur, facultatum usu actiones bonæ, abusu autem malæ determinentur. Quoniam obligamur ad bonas committendas, earundem determinationem non minus observationibus, quam experimentis confirmare licet, quatenus nimirum in casu posteriori ea, quæ in Philosophia morali fieri debere demonstratur, ea intentione facis, aut ut faciant alii facis, quo veritatem eorundem experiaris. Ast quia actiones



es malas omittere debemus, neque deo facienda sunt mala, ut inde eveniant bona; beneficio observationum inquirendum, num illo facultatum abusu actiones malæ determinantur, cui ædem imputantur in Philosophia morali. Cum enim multæ sint rationes, quibus evidentiæ veritatum moralium acilior oblectetur, quam aliarum; plurimum omnino refert, ut quæ demonstrata sunt experientia confirmantur, acque evidentiæ luce sua radiet, ac nebulæ dissipentur, quæ a facultatibus nimæ inferioribus, appetitu inprimis sensitivo & aversatione sensitiva, corripiuntur. Tanto autem magis necessarium est, ut hoc fiat, cum perpauca sint, quæ evidentiæ rationis, quæ demonstrationi inest, ad assensum compelli possunt, propterea quod demonstrationum in Philosophia practica evidentiæ a multis admodum dependet principiis, quæ familiaria experiri non deo facile est. Qui novit, quæ de successiva assensus generatione alias in his horis subsecivis inculcavimus, & ea principia, a quibus pendet evidentiæ demonstrationum in Philosophia

phia morali, inquisiverit, quod tum facillime fieri poterit, ubi demonstrationes ipsæ prostabunt (o); difficultatem assensus immoti in hoc veritatum genere abunde perspiciet. Intera vero experimentum capere licet, demonstrationem aliquam, quæ in altera Philosophiæ practicæ universalis parte prostat, in principia sua resolvendo.

## §. 7.

*Quanam  
de obser-  
vationi-  
bus & ex-  
perimentis  
veritatum  
practica-  
rum spe-  
cialius te-  
nenda,*

Equidem quæ hætenus diximus, pro præsentī instituto sufficere videntur, cum nobis tantummodo propositum sit docere, observationibus & experimentis non minus locum esse in Philosophia morali, quam in Physica, & experientiam domesticam in morali indispensabilis esse usus: non tamen in consultum ducimus, si de nonnullis in specie quædam notentur. Et enim Philosophia moralis nondum edita a nobis fuerit, immo nec literis consignata; ex parte tamen altera Philosophiæ practicæ universalis haurire licet, quæ ad ea intelligenda sufficiunt, de quibus jam instituenda oratio est.

Demon-

demonstravimus ibidem (*p*), si quis vitam legi naturali conformem vivere, vel alterum ad eam vivendam aducere voluerit, 1. excitandum esse ardorem vitam legi naturali conformem vivendi, 2. mentis aciem ad hunc gradum elevandam, ut data quacunque occasione agendi nexum actionis cum fine ultimo, seu convenientiam & inconvenientiam cum lege naturali perspicere possit tum ope systematis legum naturalium, tum absque eodem, dominium in sensus, imaginationem & affectus acquirendum. Cum igitur in philosophia morali, cujus pars generalis est philosophiæ practicæ universalis pars altera, praxin complectens, qua omnis praxeos moralis principia inconcussa ex ipsa animæ humanæ natura a priori demonstrantur, ostendatur, quomodo ardor vitam legi naturali conformem vivendi excitetur, mentis acies ad hunc gradum evegetur, ut data quacunque occasione agendi nexum actionis cum fine ultimo, seu convenientiam & inconvenientiam cum lege naturali perspicere possit,

possit, dominium denique in sensus imaginationem atque affectus obtineatur; observationes & experimenta moralia patefacere debent num ea quæ triplici hoc fine præcipiuntur, sufficiant ad finem consequendum, nimirum ut hoc usu facultatum, qui præscribitur, ardor legi naturali conformiter vivendi, mentis acies ad discernendum convenientiam cum lege naturali requisita conciliari & dominium in sensus, imaginationem atque affectus acquiratur. Experimenta autem & observationes non modo versantur circa ea, quæ in genere in Philosophia practica universali hoc fine præcipiuntur, sed locum maxime habent in iis, quæ in specie de actionibus ad hanc vel istam virtutum ac vitiorum speciem pertinentibus inculcantur. Quod si vel ea perpendere libuerit, quæ de ardore vitæ honestæ, de acie mentis in discernenda actionum honestate ac turpitudine, de dominio denique in sensus, imaginationem & affectus in Philosophia practica universali traduntur; facile videbis, multiplicia experimenta ac observationes in hisce singu-

ingulis institui posse. Præterea in Philosophia practica universalis exponitur nodus conjectandi hominum mores. Earum veritatem experimentis confirmari plurimum refert, tum etiam experimentis crebro repetitis ars ipsa conjectandi aliorum mores acquiritur. In Philosophia morali doctrinæ huic generali subest doctrina de signis virtutum & vitiorum cum in genere, tum in specie, seu pars illa, quæ semioticæ moralis nomine venit. Quamobrem semiotica moralis rationalis cum experimentalis constanter jungenda. Quod si ea quoque perpendere libuerit, quæ de conjectandis hominum moribus docuimus; te denuo non fugiet, multiplicibus hic experimentis esse locum. Hæc autem experimenta tanto magis necessaria sunt, quanto certius est, quæ in philosophia morali demonstrantur, etsi veritati maxime consentanea sint, non tamen praxi cum successu demandari posse, nisi experimentis artem conjectandi aliorum mores tibi comparasti. Quamvis adeo ad specialissima descendere non licet, quæ Philosophiæ moralis systema supponunt;



ponunt; specialia tamen nonnulla merito addimus iis, quæ in genere dicta sunt.

### §. 8.

*Quenam  
de ardore  
vita honesta  
in spe-  
cie notan-  
da.*

Per ardorem animi intelligimus actum voluntatis cupiditate, & noluntatis fuga vehementi stipatum (q). Ubi adeo ardor animi adest vitæ honestæ, appetitus rationalis cum sensitivo & averfatio rationalis cum sensitiva consentit, immo sensitivus appetitus urget rationalem & averfatio sensitiva averfationem rationalem, sicque voluntas & noluntas efficitur constans, qualis ad virtutem requiritur. Sine motivis nulla datur in anima volitio, nulla nolitio (r). Actus adeo voluntatis & noluntatis, qui in ardore adest, elicitur motivis. Philosophi adeo est docere, quænam sint ista motiva. Diversæ cum sint hominum inclinationes naturales, non omnia motiva omnibus æque conveniunt. Philosophi est discernere motiva pro diversitate inclinationum diversa. Liquet igitur, experimentis esse inquirendum, num

moti-

(q) §. 218. part. 2. *Phil. pract. univ.*

(r) §. 389. *Psych. empir.*



motiva, quæ proponuntur, vim quoque habeant ad movendum appetitum vel aversionem rationalem. In hoc autem experimentorum genere ului est, e artem conjectandi aliorum mores, ex eo patet, quod motiva diversa sint pro diversitate inclinationum naturalium, immo etiam pro diversitate quondam habituum moralium acquisitionum. Propriorum morum cognitio non minus hic ului est, ubi experimenta in teipso capis: quamvis etiam ex adverso experimenta capiendo de motivis deteguntur hominum mores latentes, prouti disertius docebimus in Philosophia morali. Appetitio & aversio sensitiva non minus habet duas rationes determinantes, confusam scilicet boni & mali repræsentationem. Sensus & imaginatio, quibus debetur hæc repræsentatio, cum intellectu in repræsentando bono & malo consentire debent (s): id quod obtinetur, ubi repræsentant voluptatem ex eo percipiendam, quod intellectus iudicio agnoscitur bonum, & tædia ex eo percipi-

---

(*Hor. Subf. 1731.*)      Y y      cipi-

(s) *S. 577. part. 2. Phil. pract. univ.*

cupienda, quod eodem intellectus iudicio agnoscitur malum (1). Hic igitur consensus denuo multiplici experimento locum dat, &, quoniam ab inclinationibus naturalibus est, quod sua unumquemque trahat voluptas, experimentis denuo hic maxime opus est, quibus comprobatur, pro diversitate inclinationis naturalis consensum hoc modo, non alio obtineri, quemadmodum etiam ex adverso, ubi in Philosophia morali propositiones determinatæ de hoc consensu fuere demonstratæ, beneficio earum via experimentalis in inclinationes naturales inquirere licet. Equidem non ignoro, ad talia parum adverti solere animum, ut mihi facile persuadeam, fore haud paucos, quibus praxis moralis hoc pacto nimis difficilis reddi videatur; non tamen hinc sequitur, quæ a me dicuntur esse a veritate aliena: quin potius hæc ipsa dubitatio ratio sufficiens est, quæ experimenta a nobis commendata institui virtutis cupidis persuadeat. Dolendum omnino est, quod Philosophis

---

(1) §. 578. part. 2. *Phil. pract. univ.*

ophis Philosophia moralis adeo stelligis fuerit visa, quasi in ea nil derur, quo acumen suum exercere possint ingenio præstantes habitus invenienti pollentes. Huic enim præjudicio ebetur, quod de disciplina humano eneri utilissima excolenda parum coitaverint Philosophi, cum tamen mais accessit sit, quam Philosophia naturalis, ita ut facilius ad demonstrationes perveniatur in morali, quam in naturali. Immo eadem de causa conngit, ut emendandæ voluntati non a opera impendatur, quæ intellectui mendando impendi solet, virtusque magis spectetur tanquam fortunæ bonum, quam quod multo studio ac labore acquirendum, siquidem ex praxi ominum judicandum, quænam in onfusis ipsorum perceptionibus lateat opinio intellectus judicio contraria, oc tamen vincens ubi agendum.

## §. 9.

Si systema Juris naturalis prosteret, quo bonitas & malitia actionum ininteca demonstratur; qui idem animo comprehendit, ope eorum, quæ eodem docentur, bonum a malo

*Experientia circa acumen discernendi bonum & malum instituenda.*

separabit. Videntur adeo experientia & observationes hic instituenda redire ad ea, quæ de bonitate ac malitia intrinseca paulo superius commendavimus. Enimvero qui ita sentiunt, non satis intelligunt, quid sit acumen, quo bonum a malo discernitur ab agente. Nimirum in Juris naturalis systemate in genere demonstratur, quænam actiones sint bonæ, adeoque committendæ; quænam malæ, adeoque omitrendæ. Agens vero judicaturus hanc actionem in singulari, cujus patranda occasio offertur, esse bonam, vel malam principia juris naturalis generalia applicare tenetur. Applicatio fit mediante syllogismo, cujus major est principium juris naturalis: requirit vero eadem etiam minorem, quam suppeditat notio determinata actionis, cujus hic & nunc patranda occasio offertur. Opus adeo est acumine, quo actio ista rite determinetur. Quæ de eodem præcipiuntur, observationibus & experimentis subjici possunt, & quantum in eo acquirendo profeceris non minus per observationes & experimenta addiscitur.

## §. 10.

Sapientia obligamur ad agendum propter finem, qui vero propter finem legit opus habet mediis ad eum ducen-  
 tibus; id quod ex ipsa sapientiæ no-  
 tione patet (u). Media ad finem du-  
 centia ex observationibus erui & per  
 experimenta in eadem inquiri potest:  
 ed hæc experimenta & observationes  
 non conveniunt nisi iis, qui veritates  
 atentes investigandi habitu pollent  
 ut ad eum sibi comparandum contem-  
 plantur. Enimvero si Philosophus in  
 Philosophia morali muneris sui partes  
 omnes adimplere debet, apprime etiam  
 opus est ut non modo doceat fines,  
 sed etiam in agendo intendere debet, ve-  
 rum etiam media, quibus ad eos con-  
 sequi datur. Observationibus adeo &  
 experimentis comprobatur, media,  
 quæ præscribuntur, esse ad finem con-  
 sequendum apta, nec minus experi-  
 mentis addiscendum, num mediis il-  
 lis uti possis; & experimentis opera dan-  
 da, ut iis uti discas. Multum hic ho-  
 mines fortunæ committunt, agenti tri-  
 buentes, quæ fortunæ tribuenda erant,

*Experi-  
 menta &  
 observa-  
 tiones cir-  
 ca media  
 instituenda.*

Y y 3

ubi

(u) §. 678. *Psych. rat.*



ubi ex eventu de mediis, quibus uti, statuunt. Imitantur in agendo alios aut consilia incerta sequuntur, eventum, quem sperant, fortunæ committentes. Unde haud raro mirantur, male cefisse, quod alias optime cesserat, sequere spe excidere de eventu maxime securos. Equidem plures dantur rationes, ob quas fortunæ aut rectius providentiæ divinæ multa committenda sunt, nec agenti imputari potest eventus; sunt tamen plura in potestate haud raro agentis, modo usum facultatum suarum facere voluisset, quem facere debebat.

## §. II.

*Experimenta & observationes circa dominium insensuum, imaginationem & affectus inveniendæ.*

Si dominium insensus, imaginationem atque affectus acquirendum, necesse est ut impedimenta vitæ legi naturali conformis omnia remove discamus (x). Hinc in philosophia morali demonstrandum, quænam sint impedimenta virtutis, & quomodo removeantur in qualibet virtutis specie. Duplex adeo nascitur observationum & experimentorum inde genus, quibus nimirum inquiritur, utrum impe-

dimen-

(x) §. 592. part. 2., *Phil. pract. univ.*



limenta, quæ enumerantur, revera tantum sint, nec ne, & num præscripto modo tollantur. Opus quoque est experimentis ut discas, num iis tollendis par sis, & ut ea tollendi habitum tibi compares. Quodsi adeo Philosophia moralis rite exulta prostabit, quantum sit harum observationum horumque experimentorum numerus nullo negotio constabit. Impedimenta distinguuntur in impedimenta finis & impedimenta mediorum (*y*). Quamobrem & hinc conjectare datur saltem acutioribus observationum & experimentorum multitudinem. Equidem in parte altera Philosophiæ practicæ universalis generalia tantummodo docuimus de impedimentis eorumque remediis; quodsi tamen quis ea perlustrare voluerit, satis superque intelliget, quam multa sint in hoc genere, quæ observationibus atque experimentis locum dant. Lubens concedo, fore plerosque, quibus observationes istæ atque experimenta difficillima videantur, immo qui inanem in iis operam sumant. Eadem vero ma-

Y y 4

gis

---

*(y) S. 197. part. 2. Phil. pract. univ.*

gis in potestate sua esse deprehendent, ubi in Philosophia morali ex generalibus specialia deduxerimus.

§. 12.

*Quanam  
circa signa  
virtutum  
& vitio-  
rum obser-  
vationes  
& experi-  
menta in-  
stituenda.*

Semiotica moralis, quæ ars conjectandi hominum mores (z), non potestrema Philosophiæ moralis pars est. Hinc Philosophus non satisfacit officio suo, nisi etiam de signis virtutum & vitiorum agat in Philosophia morali. Quænam hic docenda, ex iis videre licet, quæ de conjectandis hominum moribus in genere proposuimus in parte altera Philosophiæ practicæ universalis. Apprime faciunt hæc signa non modo ad cognitionem sui, verum etiam ad intimiorem cognitionem aliorum. Qui vel ea perlegere voluerit, quæ de conjectandis hominum moribus demonstravimus; quantus sit usus observationum & experimentorum in hoc genere, sive ad ea, quæ docentur, confirmanda, sive ad eadem in potestatem suam redigenda, sive ad seipsum convincendum, quod artem hanc nostram fecerimus, perspiciet.

(z) §. 707. part. 2. Phil. pract. univ.

iciet. Istiusmodi autem observationes & experimenta locum habent in omni signo, quod affertur in philosophia morali.

### §. 13.

Egimus quoque de vitanda culpa in philosophiæ practicæ universalis parte, non modo in genere, verum etiam in specie, quatenus diversæ culpe species in omni actionum humanum genere locum habent, quas cum te distinximus in Philosophiæ practicæ parte prima. Observationibus experimentis confirmatur, culpam quamlibet eo modo evitari posse, qui describitur. Iisdem opus est, ut culpam evitare discamus. In Philosophia morali de culpa multa erunt in specie demonstranda, sive theoriam innectes, sive praxin. Tumque observationum experimentorum, qui hic emergit, numerus magis patebit. Quemadmodum vulgo homines de vitanda culpa cogitant, plurimum & sibi, & aliis damni dantes, quod evitari potest, ita etiam a Philosophis hæc philosophiæ moralis pars neglecta fere ac deserta fuit, cum tamen ea sit, quæ

*Observationes & experimenta circa culpam vitandam instituenda.*

maxime excoli merebatur, quoniam culpa tollit rectitudinem actionis, ad quam obligamur. Absit itaque, ut tibi persuadeas, nos observationum & experimentorum moralium numerum nulla necessitate augere.

### §. 14.

*Experien-  
tia mora-  
lis reali-  
tas est.*

Abunde igitur ostendimus, tum quoad theoriam, tum quoad praxin plurima dari in Philosophia morali, quæ non uno modo observationibus & experimentis subsunt. Qua de causa patet, experientiam moralem a nobis minime fingi; sed eam non modo in numero eorum esse, quæ fieri possunt, verum etiam eandem esse utilem, neglectum vero ejusdem damnosum. Equidem inauditum forsan nomen est observationum ac experimentorum moralium, neque ego novi librum ullum, qui de istiusmodi observationibus & experimentis, qualia hic indicavimus, scriptus sit, utut multi de philosophia morali a posteriori commentati sint; non tamen hinc inferre licet, quod istiusmodi libris carere possimus: contrarium enim per ante-  
rior

iora constat. Neque ego dubito fore, ut, ubi Philosophia practica a nobis fuerit ad finem perducta, plures hisce observationibus & experimentis faciant. Etsi enim nunc non adeo facile sit observationes in hoc genere acuratas, multoque difficilius acurata capere experimenta; nulli tamen dubitamus fore in posterum facile, quod nunc difficile videtur, si tanto negotio pares idem aggrediantur. Ego in omni philosophia maxime facio consensum rationis & experientiae, maxime autem in Philosophia practica; cum enim faciat ad firmandum assensum, ut sit prorsus immobilis, etiam si non desint rationes, ob quas falsum esse mallet, quod verum agnoscat; praxi in primis morali admodum favet consensus iste, quando actiones extrinsecæ appetitum in contrarium flectunt. Quantum valeat experientia domestica cum in theoria, tum in praxi morali, evidenter demonstravimus in parte altera Philosophiae practicae universalis, ut adeo le utilitate experientiae moralis dubitare non possit, qui demonstrationes nostras

nostras animo comprehendit. Non repeto, quæ ibidem legi possunt; suadeo tamen ut ea attenta mente evolvat, quicumque de experientiæ moralis utilitate iudicium sibi sumit, ne id deproperet, cum non obvia sint ea, in quibus utilitas consistit.

## §. 15.

*Quando  
observa-  
tiones &  
experi-  
menta in  
moralibus  
accurata  
speranda.*

Antequam vero Philosophia practica universa in systema veri nominis methodo demonstrativa redigatur, non est quod observationes & experimenta omnibus suis numeris absoluta in moralibus speres. Exemplo esse potest Astronomia, quæ quo magis fuit exacta, eo quoque accuratiores observationes instituerunt Astronomi. Nemo hoc ignorat, nisi qui observationes antiquorum Astronomorum cum observationibus recentiorum non contulit, neque Astronomiam veterem cum recentiori composuit. In promptu quoque ratio est. Etenim ubi Philosophiæ practicæ cum theoria, tum praxis fuerit demonstrata; tum demum constabit, quid observandum sit & quid experimentis definiendum veniat. Et  
veri-



eritates demonstratæ reddent obser-  
atorem & experimentatorem acutio-  
em, ut observet, quæ alias aciem  
ossius subterfugerent, & in ea inqui-  
it, de quibus alias non cogitaret.  
Medicina nimis longo adhuc inter-  
allo distat ab ea evidentia, quæ in  
Astronomia regnat, etsi in hac quo-  
ue multa dentur, quæ certo cogno-  
ci nequeunt. Neque hætenus reper-  
is est, qui Medicinæ systema dede-  
t, quod nomen suum tueatur. Enim-  
ero qui observationes ad veritatem  
tentem indagandam & cognitam  
onfirmandam utiles dijudicare novit;  
uibus observationes Medicorum la-  
orent defectibus non ignorat. De-  
ectus imputandi sunt ignorantix ve-  
e methodi & impotentix eadem uten-  
i, atque carentix systematis, in quo  
eritates medicæ tam theoreticæ, quam  
racticæ inter se connectuntur. Un-  
e dudum monuit *Pitcairnius* Medicum  
nitari debere Astronomum & nos  
i his ipsis horis sublecevis acuratus  
ocuimus, quomodo hoc fieri debeat.  
quemadmodum itaque Medicis acci-  
it, ut in observando non se præ-  
beant

beant satis acutos, quamdiu Medicina methodo scientifica non redigitur in systema veri nominis; ita etiam sperandum non est, ut observationes morales & experimenta moralia fiant ea, quæ requiritur, accuratione, quamdiu systema Philosophiæ practicæ scientifica methodo conditum non prostat. Hæc ideo monemus, ne qui sint, qui plus de facultatibus suis sperantes, quam in iis est, se pares judicent labori, quo cum laude defungi nequeunt. Dolendum enim est, quod plurimi ad ardua molienda progrediantur, antequam satis didicerint, quæ scire debebant, multo rectius sibi & aliis consulturi, si discipulorum adhuc subsellia occupare, quam docentium numero sese ingerere maluissent. Etenim si tempus discendo consumerent, quod scribendo fallunt; quod nunc malefaciunt, cum laude post hac facere poterant. Non tamen ideo improbamus observationes & experimenta moralia, si quæ initio dentur imperfecta, quæ cum aliis emendandi occasionem præbeant ad profectum scientiæ profunt. Quamobrem

quis qui methodo pollet & eorum,  
uæ in Philosophia practica univer-  
li & Jure naturæ hætenus demon-  
ravimus, gnarus est observationes &  
xperimenta moralia tentare voluerit,  
udabimus conatum, etsi non de  
mnibus numeris absoluta, modo de  
uæ viam sternunt ad accuratiora. Ut  
ero præcipitantiam evitet, quam me-  
ito damnamus, observationes & expe-  
imenta iteranda sunt: neque enim  
mo tempore desunt rationes, ob quas  
animum advertimus ad ea, quæ alio  
tempore attentioni nostræ  
sefe subducunt.



CON.

# CONSPPECTUS TRIMESTRIS AUTUMNALIS.

## I.

*De Rectitudine actionis hominis  
christiani,* 579

## II.

*De Abusurrationum legalium legum,*  
623

## III.

*De Notione Libertatis academica,*  
659

## IV.

*De Experientia morali,* 681

*Finis Trimestris autumnalis.*



# INDEX

# INDEX ERUM ET VERBORUM.

A.

Actio cur bona judicetur a Christiano,	584
cur mala,	588
Actio abolita quid sit,	347
Actio depravata quid sit,	348
Actio diminuta quid sit,	347
Actio aucta quid sit,	348
Actio Christiani cur placere Deo possit,	599
Actio laedi quando dicatur,	347
Actionum intrinseca bonitas & malitia quomodo per observationes & experimenta pateat,	683. & seqq. 688. & seqq.
num cognitu necessaria ad rectitudinem actionis christiani,	591. & seqq.
Lumen discernendi bonum & malum quod experimenta suppeditet,	707. & seqq.
Lumen studio Matheseos questum num profit Metaphysico,	466. & seqq.
Versariorum auctoris mores,	242. 243
Vitis quænam pars pro vita hominis accipienda,	555. 556
Vialogia fidei quomodo constituitur,	22
Vatomia pars Physicæ,	76
Vidoris vitæ honestæ experimenta,	704. & seqq.
Viconjectandi hominum mores usui in experientia morali,	705
Vicoquinaria quomodo rationalis fiat,	88
Viticuli mixti fidei quomodo demonstrandi in Theologia revelata,	522. & seqq.
Viticuli puri fidei quomodo demonstrandi in (Hor. Subf. 1731.)	Zz Theo-

## Index Rerum & Verborum.

- Theologia revelata, 525. & seqq.  
*Autori* quid propositum sit in philosophia, 190  
*Autorum sacrorum mens* quomodo intime perspicuiatur, B. 322. & seqq.  
*Battologia Scholæ* in quo consistat, 435  
*Bibliorum versioni* explicationes sensus literalis non inferendæ, 276  
*Bona fides* cur toto præscriptionis tempore requiratur a Pontifice, 107. 115  
*Botanica* pars Physicæ, 76  
 C.  
*Cartesius* notatus, 279. 280. num methodo demonstrativa philosophatus fuerit, 3  
*Casus conscientie* quinam dicantur, 39  
*Causa morbi definitio* Boerhaviana explicata, 151. 152  
*Causa morbi notio* in genere explicata, 144. quomodo ea demonstretur, 147. quomodo constet eam esse sufficientem, 149  
*Causa externa & interna morbi* quomodo differant, 153. & seqq.  
*Causa prædisponens morbi* quænam sit, 173  
*Causa proxima & remota morbi* quomodo differant, 159. & seqq.  
*Causa procataretica morbi* quænam sit, 167. quid sentiendum de ejus definitione Boerhaviana, 170. quomodo illa ab alia causa manifesta discernatur, 171. quomodo a priori cognoscatur, 171. 172.  
*Causarum patroni* quomodo se justos præbere possint, 74. 75  
*Chemia* pars Physicæ, 76  
Chri.



## *Index Rerum & Verborum.*

- Christus* quo sensu dicatur esse in nobis, 620
- Commentarios in S. S.* quales postulet ætas nostra, 326. 327
- Commentator & Paraphrasta* quomodo differant, 274. 275
- Commentatores S. S.* quinam reprehendendi, 260.  
quinam nulli, 298. 299
- Consensus rationis & experientiae* quantum valeat in Philosophia morali, 715
- Consensus sensuum & imaginationis cum intellectu* unde sit in actione hominis christiani, 601.  
& seqq. quomodo differat ab eodem consensu in actione naturali, 604. & seqq.
- Consequentiarum* notantur, 302
- Corporis notio* qualis sit Geometris, 396. & seqq.  
an in Philosophiam transferri possit, 398.  
quinam in ea hinc fluxerint errores, 399
- Culpa vitanda* quænam suppeditet experimenta, 713
- Curriculum vitæ Schmidii*, Superintendentis Marburgensis 550 & seqq.
- Curriculum vitæ Ulneri*, J. C. 559. & seqq.
- D.
- Definitiones* quando usui sint in S. S. explicanda, 288. & seqq. unde ad eam explicandam hauriendæ, 292. & seqq. quomodo hoc sine adhibendæ examinandæ, 297. & seqq. cur examinandæ, 300. quomodo eadem demonstrationibus vindicandæ, 305 & seqq.
- Definitiones autoris* quales sint, 8. 9
- Definitiones facultatum superiorum* quomodo claritatem consequantur, 8 9
- Zz 2
- Defi-*

## Index Rerum & Verborum.

- Definitiones nominales verborum S. S. quomodo  
inveniantur,* 498
- Definitiones terminorum agraphorum in Theolo-  
gia quas exigant demonstrationes,* 517. & seqq.
- Definitionum in Jure num rationes legales dari  
possint,* 638
- Definitionum in Theologia ordo,* 521
- Dei notiones Newtonianae imaginariae,* 406.  
& seqq.
- Demonstrationum in Theologia naturali & rev-  
lata diversitas quoad articulos fidei mixtos,*  
500. & seqq.
- Demonstrationum usus in explicanda S. S. 305.  
& seqq. 319. & seqq.*
- Determinationes intrinsecae corporis quomodo  
inveniantur,* 128. & seqq.
- Deum honorare in Christo quid sit,* 621
- Dietetica quomodo excolenda,* 85. & seqq.
- Differentia philosophiae auctoris a reliqua quanta  
sit,* 4. & seqq.
- Dissensus in facultatibus superioribus quomodo  
tollendus,* 9
- Dogmata eadem cur pro diversitate temporum  
diversimode proponenda,* 57
- Dogmata in S. S. contenta quomodo excerpet-  
da,* 483. 485. & seqq. 490. & seqq.
- Dogmatum concordia quomodo obtineatur,* 1
- Dogmatum probationes in facultatibus superiori-  
bus quomodo evidentiam nanciscantur,* 9
- Dogmatum repugnantia quomodo tollatur,* 11
- Dominium in sensus, imaginationem & affectum  
quibusnam observationibus & experimentis  
subsit,* 710. & seqq.

*Index Rerum & Verborum.*

- honorum regionum vis & efficacia*, [566](#)
- E.**
- emphasis verborum S. S. quomodo ostendatur*, [20. 21](#)
- errores adversariis non imputandi*, a quibus  
alieni, [36](#)
- errorum systemata ubi explicanda*, [37](#)
- eventus certus negotiorum num pendeat a theo-  
ria rationali*, [238. & seqq.](#)
- incrementa vitio laborare quando dicantur*, [348](#)
- templi ministri Ecclesie effectus*, [548](#)
- temple alios docere num obligati simus*, [543](#)
- templum quam vim afferat verbis docentis*,  
[545. & seqq.](#)
- cordii in concionibus finis*, [50](#)
- perientia moralis explicata*, [681. & seqq.](#) quæ-  
nam eidem subsint in praxi morali, [700. & seqq.](#)  
num detur, [714](#)
- perientie moralis necessitas quoad actionum  
intrinsecam honestatem & turpitudinem*, [683.](#)  
& [seqq. 688. & seqq.](#) quoad rectitudinem  
actionum, [690. & seqq.](#)
- perientie moralis utilitas in rectitudine actio-  
nis*, [693. & seqq.](#)
- perimenta motivorum usui conjectandis ho-  
minum moribus*, [705. & inclinationes na-  
turales](#), [706](#)
- perimenta in moralibus quando accurata spe-  
randa*, [716. & seqq.](#)
- plicatio S. S. quid sit*, [284.](#) quod recte facta,  
cur demonstrandum, [305. & seqq.](#) cur requi-  
rat demonstrationem, quod dogmata hæc ejus  
verbis contineantur, [319. 320.](#) quod requirat  
[22 3](#) demon-

*Index Rerum & Verborum.*

- demonstrationes dogmatum & quales, [320](#)  
& seqq.
- Extensionis notio* qualis sit Geometris, [392](#). an  
hæc sufficiat Philosopho, 395. quinam in Phi-  
losophia inde errores manarint, [395](#). [396](#)
- Extensionis ratio*, F. 130. & seqq.
- Fides* quid dicatur Apostolo Rom. XIV. 13, [19](#)
- Fides* quomodo influat in determinationem  
actionis hominis Christiani. [598](#). 600
- Figura Telluris cognitio* quam habeat utilitatem  
in Geographia, [362](#). & seqq.  
in navigatione, [364](#). 365  
in libellatione, [366](#). [367](#)  
in parallaxi determinanda, [365](#). 366
- Finis* in explicatione S. S. intentus, [284](#). 285
- FRIDERICI*, Sueciæ Regis, elogium, [569](#)
- Fundamentales articuli fidei* quinam dicantur, 22
- G.
- Gravitatis notio* qualis sit Mathematicis, [436](#)  
& seqq. an eadem in Philosophiam transfer-  
ri possit, [437](#). & seqq.
- Gustus moralis* quid sibi velit, 219
- H.
- Hebraismi* quid sint, [267](#)
- Historiæ cognitio* cur cum theoria negotiorum  
publicorum conjungenda, 213
- Historici domicilium* ubinam sit, 189
- Historicum studium* quomodo tractandum in  
usum Reip. administrandæ, [219](#)
- Hypothesium* qualis usus in Medicina, [79](#). & seqq.
- I.
- Idiotismi linguarum* quinam sint, 265. 266.  
quomodo vertendi, 266. & seqq.



*Index Rerum & Verborum.*

- Imperantis* officium, 563  
*Influxus philosophiæ autoris* in Theologiam uti-  
litas, 53. necessitas, 56. & seqq.  
*Infiniti notio* qualis sit Geometris, 445. an hæc  
in philosophiam recipi possit, 441. & seqq.  
*Infinite parvi notio* qualis sit Geometris, 447.  
an pro reali haberi possit, 448  
*Intentio* ejus, qui librum in alium sermonem  
vertit, 245  
*Interpres libri* quænam nosse debeat, 269. & seqq.  
*Interpretatio S. S.* quomodo analogiæ fidei con-  
formis fiat, 21. 22  
*Introitus concionum* finis, 49. 50  
*Judex* quomodo certus esse possit se esse justum,  
71. & seqq.  
*Juris* num habenda ratio in deliberationibus de  
negotiis publicis, 188  
*Jurisprudentia* quomodo cum philosophia in  
concordiam revocetur, 65  
*Jus Canonicum* in quo differat a civili, 118  
*Jus civile* quomodo a dubiis interpretationibus  
liberetur, 69. 70  
*Jus ecclesiasticum Protestantium* unde pendear, 66  
*Jus natura* ab autore ampliatur, 62. quam  
late pateat, 191. num reddatur inutile iis, qui  
demonstrationes non capiunt, si demonstre-  
tur, 196. cur necessario excolendum, 191.  
& seqq. num ejus theoria recte ex principiis  
metaphysicis demonstretur, 194. ejus usus in  
negotiis publicis, 189. 127  
*Juris positivi exacta theoria* num dari possit, ante-  
quam detur theoria exacta Juris naturæ, 654

**L.**

- Legum equitas* quomodo certo agnoscatur, [71](#)  
*Lexicon Biblicum* quale desideretur, [260](#)  
*Libertas academica* quid sit, [661](#). circa quasnam  
 actiones studiosorum versetur, [664](#). cum natu-  
 rali non confundenda, [668](#). nec cum privile-  
 giis studiosorum, [670](#). [quomodo](#) restringatur,  
[672](#). [an](#) tollat obligationem naturalem, [673](#)  
*Libertatis academica notio* unde [deducenda](#), [660](#).  
 ejus utilitas, [681](#)  
*Licentia academica* quid sit, [676](#)  
*Loci notio* qualis sit Geometris, [411](#). & seqq.  
 num sufficiat [eadem Philosopho](#), [412](#). & seqq.  
*Logica* cur discenda ad negotia publica adspi-  
 rantibus, [214](#)  
*Logica auctoris Germanica* in quot linguas trans-  
 lata, [245](#)  
*Logica studium* cur S. S. explicaturis necessarium,  
**M.** [298](#)  
*Manzii* (Casparis) *Commentarius* in *Institutio-*  
*nes* qualis sit, [624](#)  
*Materia* quo sensu phaenomenon dicatur, [124](#).  
[125](#). quomodo differat ab aliis phaenomenis, [127](#)  
*Mathematicus* qua *Mathematicus* num sit *Meta-*  
*physicus*, [450](#). & seqq.  
*Mathematicus purus* sibi iudicium sumere non  
 debet de rebus metaphysicis, [470](#). & seqq.  
*Matheſis* cur discenda ad negotia publica adspi-  
 rantibus, [214](#). quid conferat ad perficiendam  
 Metaphysicam, [454](#). & seqq.  
*Media* quibusnam subsint observationibus & ex-  
 perimentis, [709](#)  
*Medici*



## Index Rerum & Verborum.

- Medici* cur in observando non sint satis acuti, [717. 718](#)  
*Medicina* partes, [75. 76](#)  
*Medicina theoria philosophica* num sit Medico-  
utilis, [150](#)  
*Mensura moralis vite longæ* in quo consistat, [555. 557](#)  
*Metaphysica* cur discenda ad negotia publica ad-  
spirantibus, [217. 218](#)  
*Metaphysicæ studium* num sit Mathematico in-  
utile, [473.](#) & seqq.  
*Metaphysicus* num curare debeat objectiones  
Mathematici imaginaria cum realibus con-  
fundentis, [476.](#) & seqq.  
*Methodus demonstrativa* in quo consistat, [285.](#)  
quorumnam vocabulorum definitiones ur-  
geat, [290.](#) quem habeat usum in explicanda  
S. S. [281. 324.](#) & seqq. in Theologia reve-  
lata dogmatica, [480.](#) & seqq. quid in hac  
conferat ad fidem roborandam, [536.](#) & seqq.  
*Methodus philosophandi auctoris* [2. 3.](#) num in Facul-  
tatibus superioribus adhiberi possit, [12.](#) & seqq.  
*Methodi scientificæ* habitus quomodo acquira-  
tur, [8](#)  
*Ministri Ecclesiæ* obligatio exemplo suo alios do-  
cendi, [544.](#) quod eandem urgeat S. S. [549](#)  
*Morbi* quomodo præcaveantur, [161.](#) quomodo  
tollantur, [164](#)  
*Mos Auctoris* legendi auctores, [495](#)  
*Motus* qualem ideam habeamus, [139](#)  
*Motus existentia* cur a nonnullis Philosophis  
negata, [424.](#) & seqq.

*Motus notio* qualis sit *Mathematicis*, [420.](#) & seqq.  
num eadem satisfaciatur philosopho, [424](#)  
*Mundi rationalis descriptio* ubi reperiatur, [185.](#)  
[190.](#) in eodem quinam peregrinentur, [185](#)

N.

*Negotia publica* quænam dicantur, [181.](#) quomodo  
expendenda, [187.](#) quomodo revocentur ad no-  
tiones communes, [226.](#) & seqq. num hætenus ge-  
rantur absque omni theoria, [222.](#) & seqq.  
*Negotiorum publicorum curam habentes* num a subtili-  
tatibus metaphysicis abhorreant, [197](#)  
*Negotiorum publicorum gratia* quænam addiscenda, [213](#)  
*Negotiorum publicorum theoria* unde haurienda, [206.](#)  
& seqq. quomodo applicetur, [209.](#) & seqq. ejus  
cum theoria privatorum nexus, [191](#)  
*Negotium humanum* quid sit, [182](#)  
*Nebhionus* (Isaacus) cur hypothesin atomisticam am-  
plexus, [400.](#) quantum profecerit in Theologia  
naturali, [407.](#) & seqq. [418.](#) & seqq.  
*Notiones* cur sint diversæ, [387.](#) & seqq. quales su-  
mant Geometræ, [390.](#) & seqq.  
*Notiones imaginaria* quem locum in Philosophia ha-  
bere possint, [458.](#) & seqq. num earum usus de-  
trahat laudi Mathematicorum, [462.](#) & seqq.  
*Notionum metaphysicarum & mathematicarum* differen-  
tia, [385.](#) & seqq.  
*Notiones methaphysica* num ex Mathesi peti possint,  
[449.](#) [450.](#)

O.

*Obligatio christiani* unde deducatur, [32.](#) [556](#)  
*Obligatio christiani actiones suas voluntati Christi con-*  
*formandi* unde derivetur, [589](#)  
*Obligatio exemplo suo docendi alios*, pars justitiæ uni-  
versalis, [543](#)  
*Obligatio naturalis* qualis sit, [521.](#) cur sola non suffi-  
ciat, [572.](#) quod subsistat in libertate academica, [673](#)  
*Obligatio positiva* cur necessaria, [573.](#) quænam opti-  
ma, [574](#)  
*Obscu-*

## *Index Rerum & Verborum.*

- Obscuritas* quomodo ex Facultatibus superioribus expellatur, II
- Observationes morales* quando accuratæ sperandæ, 716. & seqq.
- Orthodoxia* cur habenda sit ratio, 614
- P.
- Paraphrasta* quomodo differat a Commentatore, 274. 275.
- Pathologia* qualis sit, 93. quomodo rite excolenda, 93. & seqq.
- Peregrini* an ad consilia publica recte adhibeantur, 211
- Philosophia autoris* in quonam differat ab omni reliqua, 2. & seqq. quinam sint ejus effectus, 6. quomodo influat in facultates superiores, 1. 15. quotuplici modo influat, 7 & seq. 43
- Philosophia autoris influxus* in Jurisprudentiam, 60. quoniam ea habeat usum, 69. in Medicinam, 75. & seqq. quem habeat usum & quod sit necessarius, 97. 105. speciatim in *Physiologiam*, 77. Dieteticam, 85. Pathologiam, 92. Semioticam, 98. Therapeuticam seu Curatoriam, 101. in Theologiam exegeticam, 18. & seqq. dogmaticam, 33. & seqq. moralem, 26. & seqq. casuisticam, 38. & seqq. polemicam, 33. experimentalem, 43. & seqq. homileticam, 49. & seqq.
- Philosophia autoris influxus* in Facultates superiores num sit noxius, 10. & seqq.
- Philosophia moralis* cur discenda ad negotia publica adspirantibus, 215. arti-inveniendi exercendæ ansam suppeditat, 707. cur hæcenus parum fuerit excolta, ibid.
- Philosophia prima* usus in Jure, 64
- Philosophia verbalis* adhuc desideratur, 265
- Philosophi domicilium* ubinam sit, 189
- Philosophus* quomodo in mundo sensibili peregrinetur, 189
- Phrases* quomodo spectandæ in versionibus librorum, 261. quomodo vertendæ, 263. & seqq.
- Phrasium definitiones* quales requirantur in explicando autore, 303. 304
- Politica*

## Index Rerum & Verborum.

- Politica* quænam præsupponat, 203  
*Politica excolenda* necessitas, 203. & seqq. usus in de-  
 liberatione de negotiis publicis, 201, 202, 217.  
 theoria ubinam contineatur, 201  
*Pontifex* adversus Doctores Juris defensio, 107, & seqq.  
*Possessio mala fidei* num sit peccatum mortale, 113, 114  
*Præceptus vite æternæ* quomodo influat in actionem  
 hominis christiani, 609  
*Praxis juris* quomodo juvetur Philosophia auctoris,  
 66, 67, 68  
*Praxis moralis* quod demonstrari possit num ante au-  
 ctorem fuerit agnita, 697  
*Praxis Theologia moralis* quomodo differat a philo-  
 sophia morali, 30, 31  
*Principia demonstrandi* in Theologia revelata quænam  
 sint, 539, & seqq.  
*Principia refutandi* unde desumenda, 35  
*Principiorum Philosophorum* usus in Theologia qui-  
 nam sit, 611  
*Probationes ex lege petite* quænam non confundendæ  
 cum rationibus legalibus, 641  
*Propositionum* ordo in Theologia revelata, 521  
*Propositionum determinatarum* usus in explicanda S. S.  
 314, & seqq.  
*Propositiones theologice* ex S. S. excerptæ quomodo rite  
 determinandæ, 496, & seqq. quomodo explican-  
 dæ, 489. quomodo reperiantur expressis verbis in  
 S. S. non contentæ, 519, 520  
*Providentia divina* quid committere & casui relinquere  
 quomodo differant, 213  
*Prudentia politica* num studio historico comparetur, 226  
*Publica negotia* gerentium ingenia num sint ad specu-  
 landum apta, 200

### R.

- Rationes legales legum* quomodo innotescant, 626, 627  
*Rationes legales eorum*, quæ in numero legum non sunt,  
 rejiciuntur, 629 & seqq.  
*Rationum legalium*, quæ a Doctoribus dantur, cognitio  
 num utilis, 656, & seqq.  
*Ratio-*



## Index Rerum & Verborum.

- Rationum legalium abusus* quinam sint , [628.](#) & seqq.  
 quomodo evitentur , [646. 650. 653.](#)  
*Rationum legalium circulus vitiosus* rejicitur, [640.](#) & seqq.  
*Rationes legales spuria* quænam sint , [635.](#) & seqq.  
*Rationes legales tautologica* rejiciuntur , [644.](#)  
*Rationis & fidei* differentia in rebus theologicis, [40](#)  
*Relitudo actionis christiani* in quo consistat, [581.](#) & seqq.  
 quænam ad eam requirantur ex parte intellectus ,  
[583.](#) voluntatis, [593.](#) facultatum inferiorum , [601.](#)  
 appetitus sensitivi, [607.](#) & seqq. facultatis locomoti-  
 vae , [612.](#) quomodo pendeat ab illuminatione &  
 sanctificatione , [610.](#) num ad eam requisita omnia  
 observari possint ab agente , [616.](#) & seqq.  
*Rektor* quomodo eligatur in Academia Marburgensi, [575](#)  
*Refutatio veri nominis* quænam sit , [35](#)  
*Regis christianissimi* munificentia singulari in promo-  
 vendis scientiis , [353. 354.](#)  
*Regula* cur non observentur ab iis, qui eas aliis præ-  
 scribunt , [279.](#) 280.  
*Res nonnaturales* quænam sint , [85](#)  
*Responsa Facultatum Juridicarum* cur sint adeo *diffusa*, [68](#)  
*Retenta visio* laborare quando dicantur , [348](#)

### S.

- Scriptorum sacrorum sensus* quomodo intimius perspi-  
 ciatur , [287](#)  
*Scriptura sacra interpretatio* qualis esse debeat, [18.](#) &  
 seqq. quando esse debeat rationi conformis, [23](#)  
*Scriptura sacra lectio* quando proficua , [316](#)  
*Scriptura sacra verba in libro antiquiore* num explicari  
 possint per verba in recentiore exstantia, [310.](#) & seqq.  
*Sensus verbis S. S.* quod recte tribuatur demonstnan-  
 dum , [305.](#) & seqq.  
*Sermonis imperitia* quomodo rerum intelligentia sup-  
 pleatur , [272](#)  
*Signa virtutum & vitiorum* quibusnam experimentis  
 subsint , [712](#)  
*Significatus vocabulorum* quomodo immutetur incon-  
 stantia loquendi , [254](#)  
*Sinarum prudentia politica* commendata , [208](#)  
 Soli-

## Index Rerum & Verborum.

- Solida scientia* num vacare possint, qui negotiis publicis vacant, 198. 199
- Spatii notio* qualis sit Geometris, 401
- Spatium* an sit ens absolutum, 402. aut Deus aut attributum divinum, ibid. an organon sensorium Dei, 404. & seqq.
- Subtilitates metaphysicae* num recte contemnantur, 186
- Symptoma* in genere quid sit, 330. & seqq. num causam proximam externam habere possit, 339. & seqq. num semper per se sequatur aliud praternaturale in corpore, 340. & seqq.
- Symptomatis notio* quomodo investigetur, 328. & seqq.
- Symptomatum cognitio* num in praxi Medica necessaria, 328
- Symptomatum divisio* a causa petita, 344. & seqq. a forma desumpta, 347. & seqq.
- Symptoma causa morbi* quid sit, 344
- Symptoma erroris externi* quid sit, 345
- Symptoma morbi* quid sit, 344
- Symptoma qualitatum mutatarum* quid sit, 349
- Symptoma symptomatis* quid sit, 345
- Syllogismus* a Cartesio perperam rejectus, 280
- Systemata* quomodo ab opinionibus liberentur, 10. 11
- Systematis idea exemplaris* quomodo animo ingeneretur, 7
- Systema philosophicum* juxta mentem alicujus Philosophi quomodo concinnandum, 494
- Systema Theologiae revelata* ad philosophicum aliquod referendum, 25. 26

### T.

- Telluris figura qualis*, 351. & seqq. ejus cognitio quam habeat utilitatem, 351 & seqq.
- Temporis notio* qualis sit Mathematicis, 415. & seqq. an eadem satisfaciatur Metaphysico, 417. & seqq.
- Termini theologici & ygeorici* quinam & num retinendi, 504. & seqq. quot sint eorum species, ibid. quomodo definiendi, 509. & seqq.
- Textus* in concionibus quomodo explicandus, 50
- Textus explicati applicatio*, 51
- Theop



## Index Rerum & Verborum

- Theologi* cur indefinendo non sint accurati 514  
*Theologia experimentalis* quid sit, 44. 45  
*Theologia moralis* ad formam demonstrativam redigenda quid supponat, 30  
*Theologia moralis* dogmata, 27  
*Theologia naturalis* experimenta ubi tradantur, 46  
*Theoria negotiorum publicorum* quid sit, 181. quando sit completa, 181. num detur, 182. & seqq. ubinam detur, 185. quinam eandem negent, 186. qualis hactenus sit, 231. & seqq. quomodo vulgo acquiratur, 225. quomodo fuerit inventa, 230. 231.  
*Theoria negotiorum publicorum* generalia capita, 186. & seqq.  
*Theoria rationalis negotiorum publicorum* num præstet empirica, 237. quis sit ejus effectus, 240  
*Therapeutices* quænam sit ratio, 102. quomodo excolenda, 103. & seqq.  
*Toleranter vera* cum absolute veris non confundenda, 473

### V.

- Verborum S. S. sensui* quomodo tribuatur omnis amplitudo, 19. 20  
*Veritas* quando plena luce radiet, 5  
*Veritas inventu difficilis* subinde obvia, 230  
*Veritas latens* num inquirenda non sit, antequam de ejus utilitate constet, 356. & seqq.  
*Veritates morales practica* num observando & experimentando confirmandæ, 695  
*Veritates theologica* quomodo distinguantur, 482  
*Veritates theologica pura* quomodo connecti possint, 24  
*Veritatum in Theologia revelata nexus* num exigat demonstrationem mixtarum per se invicem, 534. & seqq.  
*Versio libri* quomodo juxta principia Philosophiæ auctoris adornanda, 248. & seqq. quando principiis auctoris conveniens, 277. quænam iisdem repugnet, 247. quid in ea intendatur, 245. quomodo fieri possit collatis operis, 271. 272  
*Versio libri & explicatio* quomodo differant, 273. & seqq.  
*Versiones librorum examinare* cur auctoris non sit, 282  
Virium

## *Index Rerum Verborum.*

<i>Virtutum metricum notio qualis sit Mathematicis,</i>	<a href="#">427.</a> & seqq.
<i>an eadem satisfaciat Philosopho,</i>	<a href="#">430.</a> & seqq.
<i>Virtutes christiana num externa specie differant a naturalibus,</i>	<a href="#">61.</a>
<i>Virtutes eorum, quibus negotiorum publicorum cura demandata,</i>	<a href="#">187.</a>
<i>Virtutis regia quznam sint,</i>	<a href="#">563.</a> & seqq.
<i>Virtutum philosophicarum &amp; theologicarum differentia materialis,</i>	<a href="#">28.</a> 31
<i>Vis centripeta notio qualis sit Mathematicis,</i>	<a href="#">439.</a> & seqq.
<i>an in Philosophiam inferenda,</i>	<a href="#">442.</a> & seqq.
<i>Vis inertia ratio,</i>	<a href="#">135.</a> & seqq.
<i>Vis motrix quomodo differat ab aliis phænomenis,</i>	<a href="#">127.</a> <a href="#">125.</a> <a href="#">126.</a>
<i>quo sensu phænomenon dicatur,</i>	<a href="#">137.</a> & seqq.
<i>Vis motricis ratio,</i>	<a href="#">554.</a> <a href="#">555.</a>
<i>Vitam hominis quznam vivat,</i>	<a href="#">554.</a> <a href="#">555.</a>
<i>Vita humana moralis longitudo quomodo determinanda,</i>	<a href="#">553.</a>
<i>Vita longa mensura moralis unde petenda,</i>	<a href="#">554.</a>
<i>Vita longa moralis aestimatio cur sit difficilis,</i>	<a href="#">555.</a>
<i>Vivere Christo quid sit,</i>	<a href="#">619.</a> & seqq.
<i>Vocabula quznam definienda vi methodi demonstrativæ,</i>	<a href="#">290.</a>
<i>Vocabulorum in textu authentico &amp; versione identitatur cur requiratur,</i>	<a href="#">249.</a> quomodo obtineatur, <a href="#">256.</a>
<i>quod non observetur ab interpretibus S. S.</i>	<a href="#">257.</a>
<i>Volitionis actus in homine christiano qualis sit,</i>	<a href="#">594.</a> <a href="#">595.</a>
<i>Voluntatis emendatio quanto cum damno negligatur in Academiis,</i>	<a href="#">215.</a> & <a href="#">164.</a>
<i>Utile vere quid sit,</i>	<a href="#">193.</a> <a href="#">204.</a>
<i>Utilitas sine juris præsidio nocua,</i>	<a href="#">193.</a>
<i>Utilitas apparens in civitate quznam,</i>	<a href="#">204.</a>

*Finis Indicit.*





